



3 1761 08824257 3



















M. TULLII CICERONIS OPERA.



LL  
C5684B

M. TULLII CICERONIS

# OPERA

QUAE SUPERSUNT OMNIA

EDIDERUNT

J. G. BAITER C. L. KAYSER.

VOL. IV.

*EDITIO STEREOTYPA.*

EX OFFICINA BERNHARDI TAUCHNITZ.

LIPSIAE MDCCCLXII.

7756



M. TULLII CICERONIS

ORATIONES

RECOGNOVIT

C. L. KAYSER.

VOL. II.

*EDITIO STEREOTYPA.*

EX OFFICINA BERNHARDI TAUCHNITZ.  
LIPSIAE MDCCCLXII.



## PROOEMIUM.

Ratio huius editionis Tullianarum orationum in superioris voluminis prooemio est exposita;<sup>1</sup> itaque statim accedimus ad ea, quae de nostra singularum tractatione monenda videntur.

Tullianae disiecta membra<sup>2</sup> componere conabamur adiuti maxime Hushkii v. cl. supplementis,<sup>3</sup> aliquoties etiam Peyroni, Beieri et Kelleri.

Fonteianae codicem Vaticanum ita secuti sumus, ut rarissime<sup>4</sup> ab eius lectione discederemus.

1 enumerationi VV. DD., quorum coniecturis illic usi sumus, addantur hic Becke, Bernays, Bloch, Classen, Gebhardt, Huldricus, Keller, C. F. W. Müller, Nägelsbach, Nipperdey, Putsche, Seyffert, Sorof, Stanger, Tischer, Tittler, Ussing, Usteri, Wolff, Wunder, Zumpt; singularem autem praedicamus Jeepii benignitatem, qui nobiscum praeclara quaedam inventa, antequam ederentur, per epistolam communicavit. De siglis nostris vide Praefat. XXI; de coniecturis Prooem. vol. III, not. 6.

2 servata, ut constat, maximam partem Taurinensi palimpsesto (T), multo pauciora praebeuit Ambrosianus (A), cf. Kelleri Semestrium Vol. I, l. 3, p. 653 sqq.

3 vide Imman. G. Hushkii Analecta litteraria, Lips. 1826 p. 79 sqq. Péyroni editio 1824 Stuttgartiae prodiiit, Beieri Lipsiae 1825.

4 factum hoc in 16, 21, 37, ubi codicis Salisburgensis aulici 34, nunc Monacensis Latini 15734 (s) lectiones praetulimus. Eundem codicem lector iam novit ex adnot. cr. ad or. pro Sex. Roscio, ubi siglum eius est m, et cognoscet in Cluentiana, Rabirianis, Flacciana, Sullana, Vatinalana, et orr. de lege agraria. Capita tria prima (§§. 1—6) a Niebuhr ex codice palimpsesto Palatino 24 (p) prolata (Romae a. 1820) et fragmenta §§. 7—10 duplicem numerationem attulerunt capitum et paragraphorum.

Caecinianam ex Tegernseensi libro feliciter, postquam multa lustra pro deperdito habebatur, recuperato,<sup>5</sup> cuius lectiones antea minus accurate notatae fuerant ab I. Ch. Harlessio, identidem emendare contigit adhibitis Baiteri et notis et Addendis 1437—1440; pauca praeterea ex Parisino k (7779) Kelleri et Taurinensi palimpsesto p duximus.

Orationis de imperio Cn. Pompei codices<sup>6</sup> Baiterum secuti expressimus exceptis locis paucis (20, 33, 46, 71).

Cluentianam constat duobus codicibus s, de quo cf. not. 4, et t (Laurentiano XLVIII, 12 sive Lagomarsiniano 12),<sup>7</sup> praeterea palimpsesto Taurinensi (p) in §§. 32<sup>8</sup>

5 Tegernseensis (t) quo modo a Baitero repertus et recuperatus sit, exponit Halm in Monacensibus doctis nuntiis 1854, n. 20, p. 163 sq. et brevius in praef. ed. alt. Orell. II, 2, p. V. Est eiusdem atque Erfurtensis (e) et Palat. 1525 (v) familiae, sed illo multo praestantior, etsi aliud olim fuit iudicium C. A. Jordani in commentatione de cod. Tegernseensi orationis Tullianae pro Caecina Lips. 1848. cf. annal. Heidelberg. 1851, p. 689 sqq. Palatinus nondum totus collatus est, sed videtur propius ad Erfurtensem accedere.

6 Sigla eorum reliquimus praeter  $\pi$ , quo hic Parcensis notatur.

7 soli s obsequimur 58, 113, 119, 123, 124, 143; soli t 31, 59, 70, 104, 124, 171; utrique 8, 16, 37, 39, 42, 47, 62, 63, 77, 85, 90, 95, 101, 107, 110, 113, 117, 128, 133, 137, 142, 149, 165, 166, 169, 183, 185, 189, 194; de nonnullis eorum locorum cum Classenio et Klotzio consentimus.

8 cf. 77, 129, 130.

ita niti, ut ex reliquis (vel antiquissimo Laurentiano LI, 10 sive Lagom. 10 (m) et Faesulano (f) sive Lagom. 1) raro<sup>9</sup> melior lectio proferatur, quam ob rem eorum additamenta abicere maluimus quam, quod in bonorum librorum lectionibus solemus, includere tantum.

Orationes de lege agraria<sup>10</sup> ex potioribus Lagomarsinianis s. Laurentianis XLVIII, 1, 3, 9, 20, 26, 38, 39,<sup>11</sup> Halmianisque s et m (Ambros. part. sup. c. 96, quem Baiter contulit) placuit recensere; nam aliquanto pauciora videbantur inveniri in Erfurtensi (e) et Erlangensi 38 (f) probabilia, haec fere: II, 22, 24, 25, 40 bis, 48, 69, 70, 85. In Lagomarsinianis autem singularem locum tenet XLVIII, 9, cui A. W. Zumpt in editione harum orationum ante hunc annum emissa tantum tribuit, ut eum solum sequeretur; itaque quas lectiones eius commemoramus, intellegendum est apud illum in ordinem receptas exstare. Bonum esse codicem eo certe cognoscitur, quod saepius Lambini aliorumque criticorum correctiones confirmat,<sup>12</sup> locos complures emblematis liberos offert,<sup>13</sup> sententiam verbis aut mutatis aut trans-

positis rectius exhibet,<sup>14</sup> veriores nominum propriorum scripturas suppeditat.<sup>15</sup>

In Rabiriana pauca mutavimus ex t, s, et codice Torrentii,<sup>16</sup> Lagomarsinianisque 8, 9, 12, 13, 20, 25, 28.

Idem, ut ordinem relinquamus, de Flacciana et Sullana atque ea, quam pro Archia habuit Cicero, valet;<sup>17</sup> hic, ut in aliis, quarum codices iam diligentissime excussi fuerant, non nisi criticorum sagacitate adiutis vitia quaedam expellere licuit.

Etiam Catilinariarum recensionem, plurimorum bonorum librorum auxilio ab Halmio factam<sup>18</sup> plerumque repetivimus, paucis locis (I, 2, 4, 6, 15, 32, 33; II, 2, 6, 25; III, 4, 14; IV, 8, 11, 13) aliam lectionem secuti codicum aut coniecturam nostram alienamve.

Aliquanto magis discrepat a su-

<sup>14</sup> vide I, 2, 10, 18; II, 14, 22, 29, 39, 44, 55, 56, 65, 67, 77, 89, 101; III, 1, 3, 7, 9, 13. <sup>15</sup> II, 67, 90; III, 8.

<sup>16</sup> In Rabiriana t codicem Oxoniensem notat; de codice Torrentii num manuscriptor fuerit, an a v. d. varias lectiones et coniecturas in margine impressi libri adscriptas indicet, dubitatur. Fragmenta inde a §. 32 Niebuhr ex eodem palimpsesto Palatino (p) protulit, unde Fonteianam auxit.

<sup>17</sup> Sullanam et pro Archia orationem oportuerat ante Flaccianam collocari. In hac s potior videbatur 1, 52, 53, 68, 71, 85; b (scholiasta Bobiensis Maii) 1, 14, 51, V (Vaticanus) 53, t (Bern. 254) 92; in Sullana s 35, a (schol. Bobiens.) 40, v (Pal. 1525) 42. 3 Lagom. 48. In or. pro Archia s est schol. Ambrosianus Maii, g Gemblacensis 5352, e Erfurtensis.

<sup>18</sup> Catilinariarum plurimos libros ne hic recenseamus, remittere liceat lectores ad Halmii notarum explicationem p. 657 sq. Unus hic accessit Ambrosianus C. 29. part. inf. saec. X (α), collatus a Baitero. Inscriptiones accuratiores secundum Ep. ad Att. II, 1, 3 praescribi nec aequalitas patiebatur, nec consuetudo.

<sup>9</sup> vide 30, 31, 86, 87, 193.

<sup>10</sup> de subscriptione alterius d. l. a. orationis 'emendavi ad Tironem' etc. (cf. Addenda Baiteri p. 1442) vide doctissime Zumptium disputantem in editione sua p. XX. sqq.

<sup>11</sup> septem hos notamus l; omnes cum conspirant Lagomarsiniani (accidentibus 7, 8, 24) notam habent L. Francianus Graevii (interpolatus cod. cf. II, 72, 104) est g.

<sup>12</sup> ut I, 20, 27; II, 6, 27, 49, 67, 79, 83, 95, III, 2.

<sup>13</sup> ut I, 20, 21; II, 3, 6, 8, 19, 23, 48, 49, 50, 68, 71, 85, 90, 100.



perioribus haec editio in oratione pro L. Murena, in quam certatim viri clarissimi emendationes protulerunt; ut de ceteris hic taceamus, Halm nuperrime complura sanavit<sup>19</sup> in censura Zumptianae<sup>20</sup> editionis; in sua recensione codici g (Helmst. 304) paulo plus, quam sat erat, favit cf. 11, 12, 32, 47 (bis), 51, 54, 58, 66, 71, 73, 83 (bis); nos et his locis et haud paucis aliis codicum aut omnium reliquorum aut plerorumque lectionem restituimus;<sup>21</sup> de l 9 autem, quem in hac, ut in orationibus de lege agraria unice probat Zumpt, etsi primo aspectu non nulla<sup>22</sup> arriserunt nobis, quae nunc reicimus, ita nunc sentimus, ut teneamus eius verba 4, 7, 11, 18, 23, 36, 41, 51 (bis), 60, 65, 66, 73, 77 (quater), 89, 90. Qui cum eo libro saepius facit m<sup>23</sup> alibi ab Halmio s notatur. Paucissima ex reliquis codicibus duximus, ut 2, 85 ex l 24; 21 ex l 26.

Utinam hoc illustrissimum opus Tullianae eloquentiae, sed aliquot locis mancum, multis corruptum, utinam maioribus lacunis deformatas Tullianam, Fonteianam, Rabirianam, Flaccianam, primam de lege agraria, in quibus similis prae-

stantia conspicua est, tam bonus codex nobis conservasset, quam est Parisinus ille 7794, quo declamationes nostro certe sensu<sup>24</sup> plane a Ciceroniana arte abhorrentes, quas eum post reditum in senatu et apud Quirites, deinde apud pontifices de domo sua et in senatu de haruspicum responso habuisse volgo putant, servatae sunt! In his omnia magistrum redolent, qui antiquitatum et historiae cognitionem, verborum quandam copiam et volubilitatem sibi comparavit, ingenii vim et celeritatem, decori sensum, iudicii acumen, dicendi suavitatem et leporem, quae natura ei negaverat, adipisci scilicet non potuit: eis virtutibus carens a Cicerone longissime abest vel tum, cum paene eadem verba, quod facit saepissime, profert: nam incommode atque invenuste inculcat atque infectis suis inventis depravat, quae ex Sestiana, Pisoniana, Planciana, Miloniana multisque aliis orationibus corrasit. Nolumus igitur Ciceroni gratulari, quod vindicare sibi quodam modo iam possit orationes ante inventum codicem Parisinum peius quam nunc habitas, ac propter multas vitiosas locutiones a F. A. Wolfio reiectas;<sup>25</sup> non enim ea sola Wolfio et Marklando indicia alienae originis esse videbantur: offendebant<sup>26</sup> in conformatione prava orationum, in molestis-

19 cf. Sitzungsberichte der k. Akademie der Wissenschaften 1861, Bd. I. Heft IV, et vide 15, 33, 34, 43, 63, 67, 86, 89.

20 prodit Berolini in F. Dümmleri libraria MDCCCLIX.

21 ut 11, 18, 21, 25, 26, 28, 29, 32, 33, 35, 37, 41, 47, 52, 55, 56, 57, 58, 60 ter, 64, 66, 68, 71, 73, 79, 89.

22 Jahrb. f. Philol. LXXI, 769 sq.

23 G. Sorof. de Ciceronis pro L. Murena oratione commentatio critica. Particula prior. Potisdamiae, 1861 p. 3 sqq. idem quaedam retractavit in censura editionis Tischeri, Z. f. Gymnasialwesen 1861, 758 sqq.

24 idem iudicat G. Bernhardt, Grundriss der römischen Litteratur ed. 3. p. 684 sq.

25 cf. Dietzsch, Rh. M. XII, 529 sqq.

26 cf. utriusque disputationem in editione F. A. Wolfii; huius in praefatione XXXI—XLV, Marklandi ibid. LXVII—LXXX.

simo languore, quo a principio usque ad extremum laborant, in sententiarum insulsitate et ridiculis ineptiis, in dictionis modo ieiunitate modo tumore; quae omnia codicis praelari ope tollere nondum cuiquam contigit.

Præter eum librum (p) et Gemblacensis nunc Bruxellensis 5345 (g) et Erlangensis 38, nunc 847 (e),

Salisburgensis quoque 34(s), cuius supra aliquot locis mentionem fecimus, ab Halmio et Baitero adhibiti sunt, præterea m in or. de domo Lagomarsinianum 8, in or. de har. resp. Lag. 25 denotat; in hac e codicis Erfurtensis est siglum, v autem est Palatinus 1525; β, quod iam in Prooemii vol. III n. 5 indicavimus, ed. Veneta 1472.

## ADNOTATIO CRITICA.

### M. TULLII CICERONIS PRO M. TULLIO ORATIO.

1, 1. *antea sic hanc causam* Peyron supplevit. *agere statueram recuperatores* Beier suppl. *ut infitiaturos* Orelli suppl. *sed etiam iuvare hac confessione causam suam putavit* suppl. Huschke. *video* — *eo* suppl. Peyron assentiente Huschke. || 2. *testibus* — *volis* supplevi. || 3. *tum erga P. Fabium* — *ut non* suppl. Huschke. || 2, 4. *nam si L. Quinctius* — *patronorum more* suppl. Huschke, priore lacunae parte relicta. *quam ne* Mommsen. *quam in eo* ('in eo' reliqui.) 8. *omnes A*, (*A omnis*) Mai, Klotz. *homines*. || 5, 11. *ut quod* Huschke. *quod. quodque* — *homines* suppl. Huschke. || 6, 14. *emerat* — *videbantur se* suppl. Huschke. || 7, 16. *pos[sederat — commode]* suppl. Beier. *optimo* — *agri falsum* suppl. Keller. || 17. *caverent* — *at ille se* suppl. Huschke. Post 'se de tota re ex' plura excidisse docuit Keller. ('sed et orare ex' A corr. Niebuhr.) || 18. *habilia* Heinrich. *abititalia A*. || 8, 20. *sic negoti immeo est* A retinent E ante Baiterum. || 9, 21. *vi* add. Heinrich. *quodque facile malit* Huschke. || 22. *ex vicinitate Thurina* Pluygers. ea vicinitate tum illa. *malis 'ei ex v. Th.'* || 23. de sententia eorum quae exciderunt, cf. Huschke ad h. l., qui particulam a Victorino 63 ed. Or. Jul. Victore 240 ed. Or. Martiano Capella p. 411 ed. Kopp. diverse citatam sic con-

stituit, ut nunc in ordine legitur. || 11, 27. *posset* scr. potest. || 28. *vim* Halm. vi. || 12, 29. *interdicere hoc exemplo* Madvig. *intercedere hoc interdicto. interdicto velut inter* suppl. Huschke. *de del. Baiter*; incl. *si ubi* scr. sicubi. *sic defendam* scr. *si defendam. ut vi* Peyron. vi. *equidem* Halm. *quidem. at Claudio* scr. et Claudio. || 30. *valet et causa si* suppl. Huschke. *ut vi deiceretur ex iudicio Kelleri om. Baiter*; incl. || 13, 31. *vi* add. Huschke. *datum* Baiter. 'factum' Huschke, Keller, Klotz...tum T. || 32. *eum in iudicium* suppl. Peyron. || 15, 35. *de simili causa. fo: de s. c. reae*. || 36. *mehercule res* Beier. *mehercule fide*. ('mehercule' T.) *hoc iudicium* — *putetur hic inseruit* Beier ex Prisciano VI, p. 221 Krehl. *causa Tullii* — *posita esse* suppl. Keller. || 37. *sit* Baiter, in T. verbum legi nequit. || 16, 39. *cum et nempe ita* suppl. Peyron. *depulsus es*, suppl. Peyron. || 17. *ceterique* Madvig. *ceteri T*, Klotz. || 41. *si* add. Beier. *quicum* Peyron. *cum. debeat* Baiter. *debet*. || 19. 45. *probare* scr. *probari*. || 20, 46. post 'hominum' suppl. *licentiam* Peyron. deinde excidit formula interdicti: unde tu aut familia aut procurator tuus illum aut familiam aut procuratorem illius vi hominibus coactis armatisve deiecasti. || 47. *luci T*, Beier, Huschke, Klotz. luce. || 21, 49. *tribunicia* scr. *primum* ista. || 50. *defendet* Baiter. *defendit. quid si repugnat?* malit Madvig. ||

51. *magis quam iecit* suppl. Peyron ex Topic. 64. || 52. '*si quis furem — constitutum est*' servata sunt ex Iul. Rufiniano de figuris sent. p. 201 Ruhnck. Baiter addit huc facientia ex Schol. Vat. ad Cic. p. Milone §. 6.: ipsas quoque XII tabulas adseveravit Cicero exebare pro hominum salute, quae hanc interimendi potestatem non facile permiserint. || 23, 53. in lacuna ante haec verba excidit disputatio, utrius esset centuria Populiana. *si igitur — tuum fuisse* suppl. Husehke. minus apte videntur verba '*ita quoque si*' addita. *non modo servos ante — tamen in eo* vitiose repetitum ex seqq. del. Baiter. '*necesse est*' fo: necesse sit. || 24, 56. *iure potuerit — occideretur* petita sunt ex Quint. I. O. V, 13, 21. Praeterea ex hac oratione petita videntur, quae sunt apud Jul. Vict. VI, 6. p. 224 ed. Or. si iudicaveritis sine dolo malo posse familiam congregari, hominem occidi, omnibus facinorosis eandem licentiam permiseritis.

#### M. TULLII CICERONIS PRO M. FONTEIO ORATIO.

2, 3. *atqui omnes, si qui in hoc genere quaestionis accusati sunt, reprehensos videmus primum testibus* Madvig. (ex p.: *atqui homines in* sei hoc genere quaestionis accusatos et repraehensos videmus primum testibus.) '*atqui homines, si qui tenentur hoc g. q. accusatos et r. v. p. testibus*' ex Mommsenii con. Halm. || 3, 4. *ducenties Mommsen. ducentis* p. Klotz. || 5. fo: '*suppitioproferatur.*' || 6. *maximi exercitus in Italia civium* Halm. *maximi e. in Italiam civium* p. '*in Italiam maximi exercitus civium*' ex con. Niebuhrii Klotz. *de iudiciis* Niebuhr. iudiciis p. || 4, 7. quod legitur est

petitum ex C. Iulio Victore VI, 2. p. 219 ed. Orelli. || 8. ex Aquila Romano de fig. §. 35. || 9. ex Ammiano Marcell. XV, 12, 4. || 10. ex Quintil. Inst. or. VI, 3, 51. Accedat hic fragmentum a Th. Oehlerio in codice quodam inventum et cum Baitero communicatum: '*exsurgite quaeso viri optimi atque fortissimi, legati amplissimae atque honestissimae civitatis, resistite per deos immortalis eorum periuriis iniuriisque, quorum saepe numero telis restitistis.*' || 5, 12. (1, 2.) *ex tanto* Halm. ex toto. || 13. (3) *populi Romani copijs atque praemijs* Madvig. p. R. copijsque remis v, s. || 6, 14. (2, 4.) fo: '*qui ea gessit.*' *sua religio laudatis auctoritas aliquid — momenti.* fo: *sua religio in laudatione auctoritatis aliquid — et momenti.* || 7, 16. (3, 6.) *adferam* Halm. ('*adferat*' v). *affero. qui testimonio possint esse s. quae — t. possit esse. exierunt* supplet Pluygers. '*si obtemperetis*' malim addere, quam cum Mommsenio '*imperata sint ea, sine quibus*'. oppugnari quibus oppressis s, Klotz. || 9, 19. (5, 9.) *sed inita iam ac proposita* ser. *sed in Italiam hac proposita.* v, s. *sed in Italia iam hac proposita. Croduni — portarent exegissent.* de desperato loco vide Madvig. notam in Halmii appendice p. 1436 sq. quo auctore sc. Croduni et Vulchalone ser. et incl. || 20. (10.) *et invidia vel maximum: maxime* Pluygers. et invidia: vel maxime. *divolvari* Pluygers. *divolgare.* || 10, 21. (6, 11.) *sapientia iudicis tenet* s, Klotz. *sapientiam iudicis. videte* addit Faern. || 22. *interrogandus est* Klotz. *interrogandus et.* v, s. || 11, 25. (7, 15.) *iudicium* incl. Mommsen ('*iudicium*' C. '*iudices*' E.). *debere* ser. de teste. *iudicem* incl. Madvig. 12, 26. (8, 16.) '*ac saepius*' deleverim. '*ac semper*' malit Mommsen. || 13, 29. (9, 19.) *et audaciam.*



incl. Pluygers. || 14, 31. (10, 21.) *hominum caede* Pluygers. *hominum scelere*. || 32. (22.) *sibi suscipient*. fo: *flagitii suscipient*. cum *Gallis iurare*. 'cum Gallis stare' Cobet. an 'cum G. coniurare'? || 15, 35. (11, 25.) post 'oppugnarunt' excidit membrum de Fonteii defensoribus, quod vidit Pluygers. || 16, 36. (12, 26.) *nationem Allobrogum et reliquias*. C. fo: 'nationis Allobrogum reliquias'. nationem A. et reliquias (Lambin). ut velint Junt., Orelli, Klotz. volunt. post 'potestatibus' suppleverim 'suscipiendis', Mommsen 'obtinentis'. aut a crudelitate aut add. Pluygers ex 17, 40. si non vera, at tamen ficta s. Orelli, Klotz. 'si vera non at deficta' v. fo: 'si vera non esset, at efficta' si non vera, at commode ficta. Halm. || 17, 38. (13, 28.) *Scaurum* incl. ac *libidinum*. Faërn. Halm. ad *lubidinem*. C. || 39. *quod erant plures* incl. Pluygers. || 18, 41. (14, 31.) 'amicis populi Romani' coni. Pluygers. *Tusculo* incl. Bake. a qua *interfectus est* incl. Pluygers. || 19, 42. *hoc leviter pro mea auctoritate*. C. fo: 'hoc certe pro levi m. a.' 'hoc leniter'. Klotz. *hominibus autem*. fo: *hominibus autem talibus*. *improviso* Lambin. *improvisa*. || 43. (33.) *reperietis* scr. *scietis*. *populo Romano* Klotz, Halm. *reipublicae*. C. *condonare* Faërnus. *condemnare* C. || 20, 44. (16, 24.) M. add. Halm. ('gallim' v.) *video iudices sed* Halm. 'video iudices e. et' v (sic). a *Thraecum* Fleckeisen. ('at grecum.' v.) a *Thracum*. in *eis*. Lambin. in his. v. s. || 21, 46. (17, 36.) *dux Allobrogum ceterorumque Gallorum* incl. Bake.

M. TULLII CICERONIS PRO  
A. CAECINA ORATIO.

1, 1. *disceptari*. Graevius. *deceptari*. t. e. *decertari*. E, Klotz. || 2. 'malitiae' velit Mommsen. *quoniam*

fo: 'quo modo'; ante 'quia' videtur 'etenim' excidisse. aliam rationem init Madvig. scribendo: 'A. Caecina perterritus profugerit'. || 3. *creditur* add. P. Faber. || 2, 4. *tum ab se* Klotz. *tamen ab se iustam moram*. fo: 'istam moram'. || 5. *qua in re*. fo: *qua re*. *quodque constitutum* t. quod constitutum. || 6. *videatur*. Bake, Pluygers. *videtur*. *quae-sisse* t. *acquisisse* e. *anquisisse* (ex Gulielmii conjectura). *cum omnia—reperita sint*. Lambin. *omnia—reperita sunt*. *requirit*, *quod est gravius* interpunxi. *requirit*. Quod est gravius. || 7. at *eadem quia*. p, t ('at eadem qui'), Baiter; Klotz. *coni*. at ea, in qua. E. ('at de eadem hac, quia' Klotz in ed. 2da.) || 3. fo: 'ad constituendum cito iudicium'. || 8. *praetor* incl. || 4, 10. *eius* P. Faber. et *ius* C. || 11. *Caesenniae* incl. *dos* om. t. incl. || 5, 13. *intrudebat* E. *pleraeque*. intro dabat. C, Klotz, Baiter. || 14. *cognoscitis* C, Klotz. *cognovistis*. || 6, 16. *qui non audisset* add. Baiter *similibus supplementis* Spengelii et Mommseni usus. || 17. 'hanc se ansam' Bake. || 7, 19. *iste* Schütz. ipse C. *itaque illis* scr. atque illis. *hoc est* om. t., incl. || 8, 22. *est* add. Hotoman. *et clara voce ei*. Baiter ('et ei cl. v.' Lambin.) et cl. voce. || 9, 23. *istius* k. *illius*. || 24. *proterruī* Aquila Romanus, Lambin, Baiter. *perterruī*. || 25. *servo se imperasse* scr. (servos impetrasse t.) *servo imperasse*. || 10, 26. *sui* om. t., incl. || 27. *hoc est mortem minaretur* incl. *Phormio* alterum incl. Bake, recte, ut videtur, etsi iam a Quintiliano VI, 3, 56. lectum. || 30. *quid causa postularet* scr. *quid causae optaret*. C. *quid causae obstaret* Halm, Baiter. *tantum modo errare*. fo: *tantum modo id errare*. *duos solos*. Baiter. *suos solos*. || 11, 31. *quod liqueret* Schütz. *quid liqueret* C., Orelli, Klotz. || 12, 34. ante 'hoc

genus' excidisse videtur 'com-  
misisse existimabitis ut'. || 35. nul-  
lum deiectum. t. nullo modo deiectum  
scr. deiectum nullo modo. *quid il.*  
Ernesti, Baiter. quid. *an ad atrocis*  
*rei notionem atque animadversionem*  
*ages iniuriarum?* scr. aut ad actoris  
notionem atque etc. C. ('ad' om. t.)  
[aut ad actoris notionem atque  
animadversionem?] Ages iniuria-  
rum? Baiter auctore Lambino. ||  
12, 36. *Pisoni.* Lambin. Pisone C,  
Klotz. || 13, 38. *in iudicio* Pluygers.  
iudicio. *reieci* Keller. *eieci* C. || 39.  
'cum eo' post 'constitutum' ex-  
cidisse suspicor. || 14. *quam habet*  
*vim, ut distare—possim?* interpungit  
Madvig. *quam habet vim?* ut di-  
stare — possim. || 40. *dissolvi* et  
*interdictum* incl. alterum *est* om.  
Vindob. β., fortasse recte. || 41. *lo-*  
*quemur* scr. ('loquimur' Bake). *lo-*  
*quamur.* || 15, 42. *formidine animum*  
*perterritum* incl. 'de' om. Quintilia-  
nus VII, 3, 17. || 16, 45. *cum sup-*  
*plevi.* || 46. *periculo.* videtur 'in-  
*iecto'* deesse. || 47. *magna* incl.  
Pluygers. || 17, 49. *ain tu* Bake,  
Madvig. *an tu.* || 50. *deiectus esse*  
*quisquam* incl. cum Bakio. || 18, 51.  
*iudicia aut stipulationes aut* incl. ('fi-  
ducia aut stipulatio aut' coni. Bake.  
requirebatur saltem 'fiduciae aut  
stipulationis aut'). || 52. *familiaris*  
t, Bake. et *familiaris nostris* om. t,  
incl. || 19, 55. *utilitatem omnem* t.  
omnem utilitatem. *probare eis.* Bai-  
ter. ('probaris' t, e). *probari eis.*  
*verbum* Iunt. verbo num C. || 56. *re-*  
*sput* — *putat.* scr. *respuat* — *putet.*  
|| 20, 57. *gerunt* Baiter coni. 'gerant'.  
|| 58. *id in hac re quaeri* coni. Jordan.  
(*'in hac re id quaeri'* Schütz.) in  
hac re quaeri. *ei ipsi* Halm. et ipsi.  
*ipsi* Naugerius. *ipsi servi* C. || 21,  
59. malim 'perspicietur'. || 60. *dices*  
k, Ald. *dicis* C. *verbis ponderantur.*  
Bake. *vocibus ponderantur.* 'vinces  
quidem' coni. Baiter. *vinesque* t. ||

22, 62. *quod inermi armati iudicaren-*  
*tur* incl. || 63. *si alio modo, consilio*  
*eodem facta sit* scr. ('periculo' incl.)  
si alio consilio, eodem periculo facta  
sit. || 23, 65. *quod defendant, si con-*  
*tra — contenditur* interpunxi. 'quod  
defendant. si contra contenditur'.  
'*tum solent* scr. *solent. bonique* incl.  
|| 66. *hoc* t, e. haec. *interdicto* Ascens.  
3ia, Lambin., Klotz. *interdictum.*  
*vindicari.* e, Ascens. 1ma, Lambin.,  
Klotz. *vindicavi* C. *plerique,* unde  
'vindicavisse' Mommsen, Baiter.  
|| 24, 67. *id aliqua causa faciebat, tu*  
*nulla* scr. in aliqua causa faciebat, tu  
in nulla. 'defende quia verbis' t. de-  
fendebat, quia verbis. Klotz, Baiter.  
defendit quia verbis. E. || 68. *non* k,  
Naugerius. nec. C. || 69. 'statuerunt  
si velit' Madvig. pro 'statuunt si'  
praestat hoc delere. *placuit Mucio*  
t. Mucio placuit. *ius* Madvig. *iuris.*  
|| 25, 71. *iudici* incl. idem malim in  
72 abesse. || 72. *creatum* t. incl.  
Baiter. 'vel creatum' alii C, vel co-  
gitatum k, Lambin, Klotz. *statue*  
*cui.* Madvig ex 'seate cui' t ('esse  
cui' al. C.). *cui. ruptum; iudica—de-*  
*beri.* interpungit Madvig. 'ruptum  
indica:—deberi'. 'id deberi' Halm.  
|| 26, 73. *quid enim* Madvig. quod  
enim. || 74. 'quae mina tua'. t; unde  
*quae patrimonium tua* scr. *quae cum-*  
*que tua.* Lambin., Klotz, Baiter;  
*quae cum omnia tua. sunt* Wesen-  
berg. sint C. *si parum communium*  
*ius est civile.* Mommsen, Baiter. *si*  
*parum.* Ascens. 1 'si parietum' t, e.  
si parum sit. Iunt. Lambin. Orelli.  
si parum st. Wesenberg. communi-  
tum ius, si civili. C, E. *factum est*  
Baiter. *factum sit.* || 75. *dimittetur.*  
C, Klotz. *dimittitur.* || 27. 76. *sine*  
*iuris* scr. tu res si. t, e. *iuris si.*  
Baiter ('iuris' Madvig.) *haec vox est*  
*esse vim* Madvig. (ex 'si equos  
vestes si vim' e; in t est: 'si ee vosx  
est esse vim'. *deiectum.* Klotz, Baiter  
ex 'delictum' t, e. *rem et sententiam,*

ut coni. Spengel, t, Baiter. 'retinere sententiam' e, unde 'retineri sententiam' Madvig. *intorqueri* t. torqueri. *intorqueri*, vos interpunxi. torqueri. Vos. *utrae voces vobis honestiores* add. t. *et utiliores esse videantur* Baiter coni. ('utra utilior esse videatur' Klotz auctore Madvigio) et viliores esse videantur C. (fo: 'utrae viliores e. v.'). non vereor. Naugerius. vereor. C. || 78. *iustus sit* Madvig. iustus est. *tantum sit* Madvig. tantum est. || 79. *cum vos aliquem — cur meum — vestrum non nominetis* Keller (qui praeterea 'nostrum nominetis' ante 'vestrum non nominetis' insertum vult). cur vos aliquid cum eum — nostrum nominetis. *quibus quidque* Hotoman. omnibus quidque. C. || 28, 80. *ex omni memoria antiquitatis* Pantagathus. etiam illa materia aequitatis. *armatis hominibus*. t. hom. arm. || 29, 84. *sin hunc locum* Baiter. is in hunc locum. t. is in locum. e. (is tu locum cett. C.) istum locum. k, E. *reieci* Keller. *cieci* C, Klotz. *ex edicto* Lambin. ex decreto C, Klotz. || 85. *neque* Junt. *neve* C. || 30, 86. *deiectum* Klotz. *eiectum*. || 87. *unde Telesinus* Baiter. 'unde deiectionis'. t. unde deiectionis. C. unde deiectionis \* Ernesti, Orelli; unde deiectionis sunt \* Klotz. || 88. *duas res* t. res duas. || 31, 89. *tum* Aldina. iam C. tu om. t. incl. || 90. *iam* om. t. incl. *nisi inde, ubi tum esset; iam posse*. Klotz (ed. 2da). nisi indubium esse etiam posse C. || 91. *esse sic deiectionum* scr. esse deiectionum. || 32, 92. *tum deiectionum*. Naugerius. tum eiectum C. || 93. *bonis* incl. Bake. *igitur* om. t. incl. || 94. *eodem iure* om. t. incl. || 95. 'de his de Aquili.' e. 'de his de quibus' t. fuisse videtur gl. 'id est de Aquilii sententia'. Post 'et aequum' (sic t) lacunam magnam esse existimamus. et ad eum ('etacum' e) om.

E. || 33. *querar* Junt. rare s. raro C. *ecquid est* Pluygers. quid est. *ipsa* scr. ista. || 96. *de te*. Baiter. (te C. abs te. E.) *qua in re* Baiter. 'qua inter' t; quae inter. e. || 97. C. add. Baiter. *religionem* E. religionis C. *et incl. aut imperiti* incl. scio add. Jordan, Baiter. || 98. *voluissent, manere*. Baiter ex 'voluissent tam ne re' t. *voluissent tamen manere*. || 34. *dedidit*. Junt. *dedit* C. *deditur* Baiter ex 'detraditur' C. *traditur*. *vendidit*, eum, quem interp. *vendidit* eum, quem. || 100. *rogatione*. Ant. Augustinus. *ratione* C. *nam quia* Jordan, Baiter. nam qui. *aliquam poenam*. t. poenam aliquam. *ut* add. Naugerius. *homines* Naugerius. omnes C. || 35, 102. *de ea re*. Jordan, Baiter. *de re*. C. ('ea de re' k, Orelli). post 'quam' non nihil desideramus. || 36, 103. *ne inique contendere aliquid* Mommsen ex 'neque contendere aliquid'. atque contenderit. Baiter. *dissolutius* Halm, Baiter. (*dissoluti*. t. v.) *dissolute*. *rem relinquere* Baiter. *relinquere*. C. *veritus sit* Lambin. *vereretur*. || 104. *virtute cognita* incl. *amplissimum* Lambin. *amplissimi* t. v. 'amplissimo'. Garatoni, Baiter. *amplissimis*. E. *totius Etruriae* Garatoni, Baiter. *totius se turi re*. t. *viris Etruriae*. E. *hominem* scr. et incl. nomine. *offendendum est*. Halm. *offendendum sit*.

M. TULLII CICERONIS  
DE IMPERIO CN. POMPEII  
AD QUIRITES ORATIO.

2, 4. *L. Lucullum*. Baiter. *Lucullum*. || 3, 7. *Mithridatico* incl. Bake. *litterarum* om. c, f, Baiter. incl. *suscepit*. nonne 'cepit'? || 4, 9. qui posteaquam C. *qui postea cum*. Benecke 'qui cum'. Baiter. *postea* incl. || 5, 13. 'ceteros in hanc provinciam'. requirit Lambin. *differant, hunc* interpung. Halm, Baiter. *differant*. Hunc. || 15. *pecuaria relin-*



quitur Pluygers. 'pecua relinquuntur' Halm, Baiter ex Servio ad Verg. Georg. III, 64. 'pecora relinquuntur' ('relinquentur' e, v.). || 16. *in salibus* Hotoman. in salinis. C, E ante Halm. ('in silvis' Lambin.) || 7, 18. *publica his amissis* Mommsen. publicanis amissis. *vectigalia* incl. Mommsen. || 8, 20. *elaborandum* Bake. laborandum. *ea vobis*. Buttman, Orelli, Halm. a vobis C plerique, Lambin. vobis. v, Baiter. || 9, 24. *et eorum, qui se ex ipsius regno conlegerant* incl. Benecke, Halm, Baiter. || 25. *Luculli* del. Madvig, Halm, Baiter; incl. || 26. *M. Glabroni* Krause, Halm, Baiter. Glabroni. || 10, 28. *mixtum ex civitatibus atque ex bellicosissimis nationibus* incl. Halm. || 12, 33. *ei nunc* C plerique, Halm ed. 1 (inter uncus 'ei') nunc. e, v,  $\pi$ , Halm ed. 2, Klotz, Baiter. || 35. *transalpina* incl. Garatoni. || 13, 37. *ventum est* coni. Halm. ventum sit. || 15, 44. *huius* incl. Orelli, om. cod. Victorianus, Junt., N. Angelius, Halm, Baiter. || 16, 46. *a communi Cretensium* Gulielmius (ex c: communi Cretensium). Cretensium. *semper* incl. Halm ed. 1, Baiter. *iudicari* C plerique, Orelli, Halm, Klotz. iudicare. || 49. 'cum eum ei' Moser. || 18, 54. *sed quae civitas umquam* Pluygers. 'quae civitas, inquam' coni. Halm. quae civitas umquam. *quam tam parva* Manutius. tam parva C. || 55. *quem nobis* ser. cum eum nobis. || 19, 58. *ascribetur* Pluygers. ascribitur. || 23, 66. *se* om. Heumann, Benecke, Madvig, Baiter; incl. || 24, 71. *id ego omne* e, v, Halm ed. 1. Klotz. id omne ego t, b, a, Halm ed. 2, Baiter.

M. TULLII CICERONIS  
ORATIO PRO A. CLUENTIO  
HABITO.

1, 3. *ac sine* incl. Garatoni, Baiter.  
|| 4. *illam* om. Quintilian. IX, 2, 19.

incl. || 2, 6. *nisi hic ex ipsis causis indicabimus* incl. animo incl. Garatoni. || 3, 8. *veteris* incl. ipsius s, t. istius. || 4, 10. *non potuero* s, t, Spengel. [satisfacere] non potuero. *pro* incl. Lambin. || 5, 12. *se continebat* Baiter. (continebat s, t.) continebatur. *non pudor* s, t. non pudor [non pudicitia]. || 14. *non libidinis* incl. et *victrix filiae* arctius coniunxi cum superioribus. || 6, 16. *ne quae*. Garatoni. namque. s, t, ne quam. cett. C. *atque ipsa*. s, t, Klotz. atque in ipsa. *accusatio* om. Baiter, auctore Madvig. incl. || 8, 25. *numquam* s, t. [numquam se iudicii, numquam legibus]. *inermem*. s, t. al. inermum. m, Baiter. || 9, 27. 'demiratur' malit Lambin. *Teani* s, t ('Teano'). Teani [Apuli]. *ludis* s, t. ludis [publicis]. || 10, 30. *vocemque* C praeter s, t. vocesque. || 31. 'nihil ei clausum' om. s (pr. m.) incl. Baiter. *nihil ei sanctum* incl. *custodia* — *potuisset* C praeter s, t. custodiae — *potuissent*. || 32. *heredibus* s, t. heredibus [secundis]. quanto est C et Quintil. VIII, 4, 11, sed requiritur 'quanto erat'. || 12, 33. *esset*. Halm. esset et. || 34. *non longe*. s, t, Classen. longe. 'nondum debitam' postulat Pluygers. || 13, 37. *atque ibi*. s, t, Classen. atque ubi. *ibidem diem* ser. ibi diem. ('et ibidem diem' Lambin.) *appellat testamento* — *disceditur* — *Avillius ipse* ser. appellat ipse testamento — *disceditur*. Avillius. *Asuvius autem ab eo* ser. ('Asuvius autem ab Avillio' Halm.) Asuvius autem. *brevi illo tempore* incl. *iret* incl. Mommsen. || 39. *itaque tum* s, t. tum incl. auctore Baitero. itaque rem. *et tam manifestam* s, t, Classen. et manifestam. || 14, 40. *per quem interfecerat plurimos* incl. Lambin, Baiter. *circumforaneum* incl. (foranum. s, t.) || 42. *sed tamen*. t, f, Asc. 1. Ernesti. erat; sed tamen. || 15, 44. *avarissimi* s (pr. m.) avarissimi [at-

que audacissimi]. || 45. *neque legare* s, t. neque [enim] legare. *quicquam* ex Arusiano Messio 235 ed. Lindem. add. Baiter. || 16, 47. *medico non ignobili* s, t. medico ignobili. *et spectato* scr. sed *spectato*. || 17, 50. 'arbitrabantur' commodius abesset. || 18, 51. *non possim*. s, t. non possim [implere]. || 19, 92. *quidque* Baiter. *quidquid. cum Habito fuissent* scr. cum Habito. || 20, 55. *id* incl. Mommsen. || 21, 57. *nam hoc* Pluygers. iam hoc. || 58. *citatur reus* s. citatur reus [agitur causa]. *accusationi* incl. Lambin., Baiter. || 22, 59. *omitto* t. [nunc] omitto. || 60. *per se* incl. Lambin. || 23, 62. *per Fabricium* s, t, Classen. *per Fabricios*. || 63. *non dubium* s, t, Classen. *nemini dubium. potius eum — quam illum* scr. *potius illum — quam eum* ('potius illum — quam illum' Lambin.). || 24, 65. 'quod confessi estis' mallet post 'quod abstulistis' collocatum. || 67. *sententia absolutus* incl. auctore Baitero (Garaton. et Torrentius in suis codd. non invenerunt). 'iam hoc' Pluygers. || 26, 70. *miserrimus* t, Severianus 339. *miserrimis. in oculis*. Ernesti. in locis. *ante inanissimis* scr. et *inanissimis*. ('et' incl. Classen.) || 72. 'condisset' malit Baiter ('condidisset' t.) *sese ab Oppianico destitutum* incl. Madvig; etiam 'pulchre adseverat' et 'atque' aliena videntur. || 27, 73. 'occultata' Lambin. || 28, 76. fo: 'qui hoc statuerent — iudicaret'. || 77. *clamabat* p. clamitabat. *nulla iudicia esse* s, t. nulla esse iudicia. || 29, 79. *summa potestate* s, t. *summa potestate* [praeditus]. *conflatam, atque interpunxi. conflata* t. Atque. *qui illi quaestioni praefuerat* incl. || 31, 84. *admonitus est* scr. admonitus. ib. 'istam' dedit conciliationis et gratiae fabulam' addunt C. ante 'nam fuisse' (85) praeter s, t; incl. Classen, Baiter. || 86. *Staieni*

*fuit*. 'fuit' om. s, t, incl. Baiter. || 32, 87. *an ut praevaricaretur* C. (praeter s, t.) Classen. *an is prae*. Baiter. ('an iis prae' s, t.) *nam id Panta-gathus. iam id*. C. || 88. *ista res* incl. Garatoni, Baiter. || 33, 89. *at ad quam*. Baiter. *at quam*. || 90. *sedata* s, t, Classen. *sedata* [iam]. || 35, 95. *sapientia* s, t. *sapientia* [et humanitate]. || 96. *iudicem* incl. Garatoni, Baiter. || 97. *et quae res*. fo: 'qua reus'. || 36, 100. *accepisse se* Baiter. accepisse. || 101. *eius omnes*. s, t. omnes eius. || 37, 103. *petita est* Halm. *petita sit*. post 'iudicandam' excidisse haec fere coniecit: 'pecuniam, ut ille, qui maiestatis est damnatus, cum iudex pecuniam accepisset'. praeterea legerim 'causam tamen nusquam [Staienus] ea quidem lege dixit'. || 104. *aliud si is* t, Classen, Klotz. (aliud is. C.) aliud si. Halm, Baiter. || 38, 106. *bis* s, t. Classen. *bis* [iam]. || 107. *quod hi*. s, t, Classen. *quod ii*. || 109. *ignorantia* s, t, Klotz. *ignoratio*. || 40, 110. *at idem* scr. atque idem. *suis ipsis*. s, t, Classen. *suis illis ipsis*. 'fuit' om. s, t, inde Baiter coniecit 'fuit illis ipsis'. || 41, 113. *contionibus*. s, Classen. *contionibus* [omnibus]. 'aliqui Oppianicum gratis condemnavit, iam' malim abesse. *putabitur* scr. (putaretur s, t.) *potuerunt. qui sit*. s, t. *quis sit. obiectam*. fo: *prolatam*. || 115. *in cetero iudicio* Pluygers. *in ceteris iudiciis*. || 116. *eos eidem* Baiter. *eisdem*. || 42, 117. *cum huiusce periculo ceterorum*. s, t. *cum huiusce periculi, tum ceterorum*. || 119. *unum illud* s. *illud unum*. || 44, 123. *dictatorium* s. *dictatorium* [gladium]. || 124. *unum denique*. t. *unum denique* [aliquod]. ('aliquid' post 'Cluentio' s). *amplexato*. Priscianus VIII, 526., E rec. *amplexator* C. *coniunctum cum re esse*. s. (coniunctum esse cum re t.) *cum re coniunctum esse*. || 45, 126. *re-*

*liquisse se* scr. reliquisse. || 127. *non comperisse* Lambin. probante Madvigio. comperisse. || 46, 128. *e consuetudine* Baiter ('consuetudine' C.) a consuetudine. *sortito* Classen. ('sortitio' s, t). sortitione. || 129. *ad ignominiam* p. ad ignominiam [et turpitudinem]. || 47, 130. *in contione* p. in contione [a tribuno seditione]. || 131. *dixerint* E. dixerunt C, Klotz. || 48, 133. *de re* s, t. *de re tota*. || 49, 137. *L. Quinctii* s, t. *L. Quinctii* [tribuni plebis]. || 51, 142. *cum ita dixi*. s, t. ('cum illa dixi' Halm). *cum ista dixi*. || 52, 143. *cui ego*. s. ('cui' t.) cui ego [autem]. || 54, 149. *neque enim*. t. neque ego. *te a me desiderare*. s, t, Klotz. *a me desiderari*. || 55, 150. *recusavit* Lamb. Baiter. 'accusavit' C, Klotz. *ne cum* Baiter. ut cum ('quin quo' Lambin.). *uti oportere*. C, Baiter. uti non oportere. Manutius. || 56, 153. *ut ei qui*. Halm. ('uti qui' Manutius.) utique. C. *equestrisque ordinis* Classen, Baiter. ceterique huiusmodi ('eiuscemodi' s, t) ordinis. ('ceterisque eiusdem ordinis' Klotz.) || 154. *insignia* incl. Gulielmii, Baiter. *exercitus* incl. Baiter. || 57, 155. 'quam sit indignum' Lambin. || 159. 'meminisse se hominem' C, Klotz. om. Baiter. incl. || 164. 'totam' malis abesse. || 60, 165. *Cappadocem* s, t, Classen, Klotz. *Capacem*. Orelli, Baiter, haesit in ed. nostra. post 'mortuus' add. 'at heres est Cluentius' inclus. Baiter, Classen; om. s, al. Klotz. || 166. *per quae*. s, t, Klotz. *quae*. || 107. *autem* incl. Mommsen. || 168. *perspicite cetera* incl. || 61, 169. *fuisse*. s, t. [inter ipsos] fuisse. || 170. *si autem*. s, t, Klotz. sin autem. || 171. *eripuit mors*. t, Klotz. mors eripuit. || 63, 176. *Sassia* incl. Beck, Baiter. 'quae-situras esse se' s. 'qu. sese' requirit Baiter. *et vi tormentorum* incl. Halm. || 64, 181. post 'quaerebatur' desi-

derantur verba, quibus transitum factum fuisse ad narrationem oportet. *dedidit* ex Arusiano Messio (s. v. 'dedo ad hoc') Baiter. dedit. || 65, 182. *denuo* Halm. denique. *conata es?* scr. conata es. || 183. *Larini*. s, t. *Larini* [fuit]. || 66, 185. *qui obsignarit*. Baiter coni. quis obsignarit. *nominatim* s, t. *nominate*. || 186. *Stratone et Nicostrato* incl. Pluygers. || 189. *scelerum omnium*. s, t. Classen. *scelere omni*. || 68, 194. *nostrorum* s, t. *nostrum*. *putat* Lambin., Orelli. *putet*. || 69, 195. *quasi aliquos* Halm. Baiter ('quos alios' t.) alios. *non domesticis* Madvig. in domesticis. || 198. *ab his* C (praeter s, t.) Classen, Klotz. *ab iis*. || 70. *quam doleo*. Classen, Klotz, Baiter. *quando*. C. *ex testimonio* Graevius, Baiter. *et testimonio* C. (praeter s, t, qui om. 'et'), Klotz. || 201. *maerorum*. Anall. gramm. ed. Eichenfeld, p. 102. Baiter. laborum.

M. TULLII CICERONIS  
DE LEGE AGRARIA CONTRA  
P. SERVILIUM RULLUM  
TR. PL. ORATIONES III.

I.

Verba 'imberba iuventute' servavit Charisius Institut. Gramm. I, 18, 6 p. 53. ed. Lind. 'venibit — parebunt' Aquila Romanus de figuris etc. §. 43. 'praedam — vendent' A. Gellius XIII, 24, 4. *venibit*. Orelli. *veniet*. *omnis* coni. Baiter. communis C.

1, 1. *occulte* incl. Ruhnken. *his* 19. iis. || 2. *perscribit auctionem*. C. pro-scribit auctionem. 'numerata' om. e, incl. Baiter. 'petitur' 19. *tamen consume sane*. 19. s, m, f. ('consume sane tamen' e. 'consume tamen sane' Klotz.) *consume sane*. *quando commodum*. 19. (quoniam comm. C.) *quod comm. quandoquidem*. 19. *quoniam quidem*. || 2, 4. *non dubitabis*.



19. non dubitatis. || 5. *quod adfectent* Ussing, Baiter. 'quo adfectent' Klotz, Zumpt. quoad fecerit. C. 'Olympiorum'. 19. *quos*. Lambin. *hos. qui Persen viciit* incl. Pluygers. 'tum vero'. Baiter. 'oblata' Baiter ut anonymus apud Orellium. || 3, 9. *mittantur*. 19. *imittantur. omnium rerum* 19. rerum omnium. *spoliationes*. fo: stipulationes. || 10. *iubet eosdem*. C. *iubet enim eosdem. enim om.* L. (praeter 9.) s, m, f. incl. 'censorium' Zumpt. || 11. *attinet*. l, s, m, t. attinuerit. *putat* Zumpt. *putet. quisnam tandem abstrusus* C. *quisnam tam abstr.* || 12. *audite*. C. *audite, audite. pervenit aut pervenerit*. L, s, m, p. *pervenerit e*, Baiter. ('pervenit pervenerit' E.) *suscipere*. 17, 8, 9, 13, 20, 24, s, m. *suscipere*. 11, 3, 26, 38, 39, Baiter. *suscipiant* Zumpt. fo: *suscipere ausi sunt*. || 13. *habeat pecuniae*. C. praeter e. *pecuniae habeat. deferat* C. praeter f. *referat*. 'ut' om. Baiter incl. 'quae nobis Pompeius' 19. *vendere* incl. Pluygers. || 5, 14. *quis ergo*. C. praeter e. *quis igitur*. || 15. *prospicite* C. praeter e, f. *perspicite*. || 16. *quo?* 'quot'? Lauredan. Zumpt. *quorum hominum*. fo: *quo numero hominum*. 'haec etiam cons.' 19. 'omnium' om. 19. || 6, 17. *colonius* C. *colonis*. (ex coni. Lauredani.) *neminem nostrum cuiusmodi esset*. 19. *cuius modi esset neminemne nostrum*. *sed*. C. praeter e. *verum. modesti*. 19. *modeste*. || 19. *quicquam*. C. praeter e. *quicquam in urbe*. e, Baiter. *fuit* om. e. incl. Baiter. 'vobis' om. 19. || 7, 20. fo: *in coloniis eis deducendis*. *esse ibi*. 19. *inibi esse. ex Campanorum*. 19, Ald. Lambin. *haec ex Camp.* ('haec' incl. Baiter.) || 21. *diminutionem*. C. *deminutionem. gravissime et verissime*. Naugerius. *gravissima et verissima* C. *vectigal* om. 19, s(pr. m.) Zumpt; incl. *hoc solum* 19. *solum hoc*. || 22. *nobis* l.

*vobis. nostra s. vestra. retinendum* L, s, m, Ald. Lamb. ('retinendam' f.) *retinenda. cogitarunt* Lauredanus, Baiter. *cogitarint*. C. Zumpt. || 8, 23. *deductionibus* scr. *deditionibus* C. *seditionibus*. || 24. *metu* 19, 7, 24, s. *motu*. || 25. *fiant* l, s (pr. m.), m. *fiant ostendero. rem ullam* C. praeter e. *ullam rem*. || 26. *aliud*. l. 7, 8, 9, s. (sec. m.) *aliquod. populi Romani*. (p. r.) C. Zumpt. *patres conscripti*. Lauredan. E. || 9. 'deserite illos'. 19. || 27. *liberi a deliciis* 19, Lambin. *liberi a delictis. ipsum me* 19. *me ipsum*.

## II.

1, 1. *orationem* l, s, m, t. *contionem. mihi quidem* l, s, m. *mihi Quirites*. Pithöus, Baiter. ('mihi que' cett. C.) *disciplinaque* scr. *disciplinisque* C. ('discipulos' 19.) || 2. *de me autem ipso* C. *de me ipso autem*. e, Klotz, Baiter. *sim singularique iudicio*. 19. *sing. iud. sim. ipse modice dicam, si necesse erit* incl. Pluygers. || 3. *quod ipsum est per se* 19. *quod est ipsum per sese. nobiles* om. 19, incl. 'autem' om. e incl. Baiter. || 2. *petierunt* 13, Zumpt. *petierint* C. praeter e. *petissent. possumus*. C. praeter e, f. *possimus*. || 4. *multis posthabitis* L. (praeter l, 7.) s, m, g. *multis post annis. vocem unam* C. *vocem vivam*. E. *extrema suffragiorum* Zumpt. *suffragiorum* 19. *extrema tribus suffragiorum. tribus* incl. || 5. *neque nocturnae neque diurnae* 19. *neque diurnae neque nocturnae*. || 6. *id* om. 19. incl. Baiter. || 7. *facere possum ut*. C. 'possum' Baiter ex Torrentii correctione. *sim* Lauredan. *essem*. C. *esse* Baiter ex corr. Torr. *verbi* add. N. Angelius. fo: 'vim recte interpretandam v. o. e. v. sapientia; adversatur enim mihi'. || 8. *vestrum otium* C. praeter e. *otium vestrum. ac. post hanc vocem nonnihil excidisse videtur*.

(‘metu’ suppleant Gebhardt, Baiter; ‘ac’ cum ‘perturbatione’ coniungit Zumpt.) *perturbatione iudiciorum, infirmatione rerum iudicatarum* incl. || 4, 9. *quid enim est*. C. praeter f (‘quid est enim’) et e (‘quid enim’). *quid est enim. et maiores vestri* om. 19. incl. ‘praesertim in imperio ac dignitate’ abesse malim. *quin idcirco*. Madvig, Baiter, Zumpt. *qui idcirco*. ‘uti impune’. e, f, Baiter. *possimus* Pluygers, Zumpt. *possemus*. || 10. ‘neque vero illa — esse exitus’ aliena videntur. *quiddam*. Naugerius, Baiter. *quidem*. fo: ‘spei simulatione’, om. ‘ac specie’, vel ‘spei specie ac simulatione’. || 5. *amicissimos*. 19. *amantissimos*. || 12. *quibus rebus*. Naugerius, Orelli, Baiter. *quibus in rebus* C. (‘quibus nos rebus’ Zumpt.) || 13. *concitata iam pridem expectatione* scr. *contio tandem expectata*. C. *contio expectatur. tametsi si qui* scr. ‘tametsi qui’. Lambin., Baiter. *tamen si*. C. ‘astiterant’ malis ex Quintiliano VIII, 4, 28. *ad me* incl. Baiter. || 6, 14. *vobis ratione*. l, s, m. *ratione vobis. natura neque studio*. 19. *natura neque discidio*. (‘naturali quodam discidio’ Pluygers.) || 15. *atqui*. Lauredanus, Baiter. *atque*. ‘nihil aliud cogitatum’ om. 19. *populi Romani* C praeter 139. *populo Romano. per tribunum plebis, quem maiores praesidem legum custodemque* C. praeter e. *per tribunos plebis, quos m. praesides l. custodesque*. || 16. *cum exposuero*. l, s, m, Klotz. *cum Quirites expos*. Pithöus, Baiter. (cumque expos. e, f, p.) *nolite*. 19, 3, 20. *nolitote*. ‘vestrorum’ om. e incl. Baiter. *labore vestro* l, s, m. *vestro labore*. || 7, 17. *legum ac rerum* 19. *rerum ac legum. fortuito*. 19. *fortuitu*. || 18. *eodemque modo*. C. praeter 120, 38, e, g. *eodem modo*. || 19. ‘populi ad partes traheret’ Bake. || 19. *proprium* om. 19, incl. (‘proprium semper’ 11, 7, 8, 13, 24. ‘semper proprium’ 13, 20, 26, 38, 39, e, f.) ‘dari’ om. ‘populo’ e, Baiter. *potest, tamen*. Kahnt (‘potest’ Orelli.), Baiter. *poterat potestate*. C. (‘poterat potestati’ Zumpt.) || 8, 20. ‘Romanam Quirites’ Baiter ex f, p. (‘Romanamque’) habere comitia xviris creandis. l, s, m. com. d. habere cr. || 21. *sortietur*. E. *sortitur*. C, Zumpt. *educet* E. *educit*. C, Zumpt. *tribus* incl. Pluygers. *ab eodem Rullo eductae* incl. Pluygers. *atque hi*. l praeter 7, 8, 13, 24, e, f. *atque ii. iure denegare* C praeter e, f. *iure se denegare*. (‘posse se suo’ coni. Baiter.) || 22. ‘animorum vestrorum’. 19. || 9. *arbitrarer* C. (‘arbitrar’ e, f, p.). *arbitror* (ex Pal. 2.?). *sine ulla periculi suspitione* scr. (‘sine ulla suspitione’ C, Klotz, Zumpt.) *sine ulla exceptione. idem add. quos* C. praeter 19, e. *quae* 19, e, Klotz, Zumpt. *in indice*. e, f, p. Orelli, Baiter. *invidiae. cett.* C, Ernesti. *invidiae in indice* Klotz. *huius* om. 19, incl. *aequa ex parte* Torrentius, Baiter. *aequa ei parte*. 13, 20, 26, 38, 39. Klotz. *aequa sibi parte* 11, 7, 8, 13, 24. *aequa parte* 19, 23. fo: ‘cogitasse ea’. (‘aut sic Rullo’ Zumpt.) || 23. *terra et mari*. C praeter 13, e. *terra marique*. || 24. *ac legibus* om. e, incl. ‘non reus denique’ Lambin., Zumpt. || 25. *cupiditatis* om. e, incl. Baiter. *acciperetis* Zumpt. *acceperitis. crearetis* C. *creetis*. Wesenberg, Baiter. *putaretis* Zumpt. *putetis*. || 26. *novo more* l, s, m. (novo in more 11, 7, 8, 13, 24). *novum. ut ei*. Lambin. *uti* C. ‘populi Romani’ om. Baiter. || 11, 27. *nunc Quirites* 19, Baiter. *nunc quia. prima illa* C. praeter e, 11. *illa prima. centuriata et tributa* incl. *eam* Lauredan. ea, C, Klotz, Zumpt. *non initis*. Madvig, Baiter. *non sinitis* C, Klotz. *non scistis* Zumpt. ||



28. *habere potestatem* 19. potestatem habere. *de his legem curiatam* 19. legem de his curiatam. 'praetori imperat' incl. Pluygers. || 29. *cum quarto* Lambin. quoniam quarto. C. 'fundamentisque' om. e, incl. Baiter. fo: gerere rem. *nostrum ius* C. praeter e, f. *vestrum ius*. || 12, 30. 'temere' om. 19. *legi curialae* Lauredan., Pluygers, Zumpt. lege curiata. *intercedere* Manutius, Zumpt. *intercedendi* C. *intercedi* Turneb., Baiter. *atque usurpationem* 19, 3. atque ad usurp. *acceperunt* 19. acceperint. || 31. *auspicia* incl. Baiter. 'ipsa lex' e, Baiter. *esse creatos* C praeter e, f. creatos esse. || 13, 32. *centuriis* incl. Baiter. ('servitiis' Zumpt.) *finitores*, Ant. Augustinus. *ianitores* C. ('iam lictores' 19, inde 'tum finitores' Zumpt.) || 33. *at perspicite* scr. perspicite. || 34. *magistratus his* C praeter f ('is'). m. eis. *vel quos* C praeter e ('et quos'), f ('ut quos'). *colonis*. C. 'colonis' Turnebus, Baiter. *regnorum vel dandorum* C praeter e. 'regnorum dandorum' e, Baiter. 'regnorum vel dandorum vel adimendorum' Klotz. 'regnorum adimendorum' Zumpt. *de consiliis* 19, s, m, E. Klotz. e consiliis. || 14, 35. *quod non, si minus — contineretur* 19, 3, s. quod non se minus — contineretur C. 'quod non se, si minus — contineret' Baiter. *imperium vestrum* 1, s, m. *vestrum imp.* *ut eis liceat* 19, 20. ut liceat eis cett. C. ut liceat ea. *postea*. C. aut *postea*. Crat. Klotz, Baiter. || 36. *tam est* C. est tam. *accedit — accedunt*. C. accedet — accedent. || 37. 'facta sint' velit Madvig. 'facta numquam' et 'potestas permittitur' ex 19, ut videtur, Zumpt. *vos*. 1, s, m. nos. || 15, 38. *factum*. Lauredan., Orelli, Klotz. *iactum*. Ante 'qui agri' excidisse nonnulla videntur, quibus transitus ad transmarinas pop. Romani possessiones fieret. *quicquid ergo* C praeter e, f. quicquid igitur. || 39. *primum enim hoc quaero qui* 19. 'primum hoc quaero enim qui'. C cett. 'primum hoc quaero equi' Gebhardt, Baiter. *idem iudicare*. C. *eidem iudicare* Manutius, Baiter. *recuperata est* Zumpt, Pluygers. *recuperata sit*. || 40. 'an non idem et disseret et iudicabit?' 19. *nolet* e, f, g, Baiter. *volet*. *existimabit* C. *aestimabit*. 'de quo disputari' Madvig. *quod iam* 19, 3, 26, 39. quoniam. *quam hereditatem* C praeter e ('quum'). quoniam her. Ernesti, Baiter. || 16. *quae certe*. N. Angelius. *quae terrae* C. *discriptione* Bücheler, ut 79, 95. *descriptione*. *inclusae* Pluyg. *inclusi*. || 41. *Alexandri* Zumpt. (Alexandriae 19.) *Alexae*. *Alexandro* Zumpt. ('Alexandrino' 19). *Alexa*. || 43. 'ceteris' om. e, incl. Baiter. *verum iudicabit?* C. *utrum iud.* Puteanus, Baiter. *reperietur* 11, 3 (2da m.), 7, E. reperitur C cett. || 17, 44. *primum cur* Pluygers ('primum quaero, cur' sive 'primum tum quaero cur' malim). 'cur non iterum' Pluygers. *ut tum* 113, Zumpt. *ut cum*. ('ut cum' incl. Pluygers). *decreto*. C. 'directo' Lauredanus, Baiter. *qui etesius, qui* Gulielmius, Baiter. *quietis iis qui*. C. (Quirites ii, qui. Manutius, Klotz, Zumpt.) *regnum* incl. ('portum' Pluygers). *caecis tenebris* 19. *tactris tenebr.* || 45. *mentibus animisque* Lauredanus, Zumpt. *mentibus unaque*. C, unde 'mentibus una Quirites' Turnebus, Klotz, Baiter. *legatos vestros homines* 1, s, m. *legatos nostros hom.* cett. C, E, unde conii. 'diligenter' nostros homines'. 'vestro' om. 19. *totum* om. 1, s, m. incl. || 46. *populo* Pluygers. *populi*. 'an opprimendos' 19, *si quis est*. 19, 3, 7. *si qui est*. *imprudenter* Lauredan., Baiter. *impudenter* C. || 18, 47. 'non permittit quidem' Aldin. Lambin. 'non perm. tantum'

Pluygers. *nobis* C praeter e, f. vobis. || 48. *praeconi* om. l 9, incl. *ipsi* Nic. Angelius, Baiter. ipsam C. *luzuriosus est* Lambin., Baiter. *luxuriosus*. 'percensuit' l 9. *reliquerunt* f, m, Baiter. *reliquerint*. || 49. *absente* l 9, Lauredan., Manutius. *absente illo*. || 50. *hanc totam* C praeter e, f. totam hanc. *video comparari* C. video. e, f, Baiter. || 19. 'Olympenorum' Naugerius, Baiter. Olympinorum (s. Olimpiorum) C. Olympiorum. l 9, 7. *Aperensem* Zumpt. Agerensem. *Eleusanum* Zumpt. Gedusanum. *clarissimi viri* P. Servilii imperio et victoria l 9. P. Servilii i. e. v. clarissimi viri. *qui a censoribus* l 9. qui item a cens. item incl. 'maximum et certissimum' Gebhardt. 'et certissimum vectigal ascribit' Zumpt. || 51. *item auctioni* Zumpt. fidem auct. C. eidem auct. Lambin., Baiter. *decertarunt* l, s, m. certarunt. *regios* incl. || 52. *Mithridates* incl. xviri. l 9. || 53. *mea lege* C praeter e. 'lege mea' e, Baiter, Klotz. || 20, 54. *illis* Pluygers. aliis. *viderit* Ald., Lambin., Orelli. *viderint* C., Baiter. || 55. *cum stultos* l 9. tam stultos. *qui hoc sperent* C praeter l 1, 7, 8, 13, 24. e, f. qui haec sp. *tum impudentes* l 9. tam impudentes. *qui conentur* C praeter e. 'qui haec conentur' e, Baiter. *refrenandam*. C. ('refrenatam' e). effrenatam Baiter. || 21. fo: 'hoc amplissimo ex loco.' nostras — a nobis l, s, m. vestras — a vobis. *alienari*. l 9, 1, 7, 26. *alienari*. || 56. *auctione sua* C praeter e. sua auctione. *ne et quidem* om. Lauredan., Baiter, incl. ('non modo non vobis arb.' Halm.) *ante a Sulla* l 9. antea ab Sulla. *eique agro* Madvig, Baiter. sicque agro C. 'denique agro' Zumpt. *pergrande vectigal* C praeter e. vectigal pergrande. fo: cognitio est. || 57. *propter rei aequitatem* Pluygers. propter aequ. *ipse vehementer* Gruterus, Baiter. saepe veh. *quae est* Madvig, Baiter. quae. *amicissimis* C praeter l 9 ('amenissimis'), e (a maximis). 'antiquissimis' Lauredan., Klotz, Baiter. *qui publicus esse fateatur*. fo: quem publicum esse fatentur. *aliqua ratione* Madvig, Baiter. alia rat. || 22, 58. *ei tamen* Lambin., Baiter, Zumpt. et tamen. *accipitur* Pluygers. excipitur. || 59. *Juba* Lauredan. *Jubae* C. *ad quoscumque* Naugerius, Baiter. *ad quodcumque* C. 'erit nunc iudicium' Lauredan., Baiter. *nostris* l, s, m. vestris. || 60. *hinc* C. hic. || 23, 61. 'praecipui' Orelli, Baiter. *imperatores nostros*. C praeter e, f. imp. vestros. || 62. *hoc animo est* Garatoni, Klotz, Baiter. hoc an. sit. *perficiet* ed. Ven. 1480, Zumpt. *perficiat*. *quanta est* Lambin., Baiter. *quanta sit*. *nilil praetermissum sit* Lauredan., Baiter, Zumpt. *nilil pr.* sed C. || 24, 63. *vellem* Ernesti. *velim* C. || 64. *Philii* Sigonius. *Philippi* C. *vos nunc* C praeter e. nunc vos. e, Baiter. || 25, 65. *expeditissimum est* Wesenberg, Baiter. exp. sit. fo: 'de agris publicis'. *fateor expectasse* l 9. expectasse. || 66. *Linterninus* Gebhardt. Linternus ('Linternius' e) C. *Ancerranus* Zumpt. 'Casilinas'. Camillus Peregrinus, Baiter. *Casinas* E. *ancasianas* C. *Sabinus* ager C praeter e. 'Sabinus' e, Baiter. *ab alia Venafranus* ser. Venafranus. 'coaedificare possis' sive 'continuare possis' velit Pluygers. *et vendendis* l, s, m. et in vendendis. *in Italiam aliove deducamini*. C. in It. aliove ducamini l 9. 'in Apuliam aliove ded.' Sigonius, Baiter. 'in Italiam alio ded.' Zumpt. fo: in Ulubrarum ulvas ded. || 67. *Neratianae* l 9. Veratianae. *aut macrum* l, s, m. et macrum. 'hoc quoque C praeter e, f. ('hocque')'. 'hoc Quirites' Klotz, Baiter. *invenietur* Lambin., Zumpt. inietur l, s, m.

inhibetur l 1, 7. inhibetur 8. 13. 'inibitur' Ascens., Klotz, Baiter. *de nostra* 19. de vestra. || 26, 68. *qui* om. 19, incl. *pertimescebant* 19. Ald., Lambin., Orelli. *expertimescebant* C. *extimescebant* Klotz, Baiter. || 69. *et oppresso* 19. ex oppresso 3, 26, s, m. oppresso 20, Ascens., Lambin., Orelli. ex presso 1, 7, 8, 24, 39, e, f, p. 'et presso' Halm, Baiter. *gravi sua lege* C. 'gratissima lege' Halm, Baiter. non om. e, f. incl. *plurimo maiorum vestrorum sudore et sanguine quaesita* ex §. 16 repetita incl. || 70. *emptus* 19, c. *cocomptus. id est* Klotz, Baiter. idem est C. illud est Klotz ed. 2da. istud est E. *hoc enim est usus* C, Zumpt. 'hoc enim verbo est usus' Hervag., Baiter. || 27, 71. 'pestilentiae uligine' coni. Pluygers. *Salpinorum* C. Salap. E. *aut dicat* Turnebus., at dicat. *vero* om. 19, incl. fo: at ab invito. || 72. 'pecunia' g, Ascens., Lambin., Baiter. 'adducentur' E praeter Klotz, Zumpt. || 73. 'huius modi' 19. *est qui plane recuset* Lauredan., Baiter. 'est plane qui recuset' Zumpt. aut plane rec. Klotz. est plane rectius et C. 'idoneis in locis' glossema videtur. || 74. *nostris* l, s, m. vestris. *possint collocare* l, s, m. posse coll. l, 7, 8, 13 (e, f?). collocare. E. 'quot colonias' Lauredan., Zumpt. || 28, 75. *opibus et praesidiis* ser. praesidiis. *cogitet* m, l 1, 7, 8, 13, 24. *cogent* f. *cogitent* cett. C, Zumpt. *agros* C. *agrum. omnem pecuniam, maximam multitudinem, id est* incl. ('omnia oppida maxima multitudine, id est' Zumpt). || 76. *orbis* 13, 20, 26, 38, 39. m, Baiter. 'orbis' 19, s. 'orbe' cett. C, E. at *quid*. 19. atque *quid* 13, 20, 26, 38, 39, g, m, s, t. 'atqui quid' cett. C, Klotz. 'quid' Ernesti, Baiter. *prius vestro* l, (26 'nostro') s, m. *vestro prius. dignitatem rei.* ser. *dignitatem. delectatur* Lamb., Baiter.

*delectetur. rei dignitas* 11, 7, 8, 13, 24, e, f, s, m. *rei indignitas* g, Zumpt. (de ceteris C non constat) *sumunt.* l, s, m, e, f. *sument.* || 77. *si maiori* Torrent., Baiter, Zumpt. aut *maiori.* Ald., Lambin., Orelli, Klotz. *maiori.* C. 'feret'. N. Angelius, Baiter. *conivebo* N. Angelius. *commovebo* C. *fir-mari praesidia* 19. *armari* pr. || 29, 79. *Romulia* 19, Klotz. *Romilia. a Subu-rana* Lauredanus. ab usura nam. C. *Aniensem* 19. *Arniensem.* || 80. 'quod si posset—disperire' om. 19, Zumpt. *quid vos* l, s, m. *quid nos. quid scri-ptura* Gebhardt, Baiter, Zumpt. *quid Syriae cura.* C praeter e, f. *quid Syriae rura* e, f, Asc. Lambin., Klotz. || 81. *eius modi est* N. Ange-lius, Baiter. *eius modi sit. cum domi* C. et *domi.* Torrent., Baiter, Klotz. *de Campanis* Lauredanus, Orelli, Zumpt. *Campanis. quod ei tenebant* Lauredan., Klotz, Baiter. *quod et tenebant* C praeter 19, g. 'quod tene-bant' 19, g, Orelli, Zumpt. *dimoveret* 19, 7. *demoveret.* || 30. *quem pariter faciunt.* 19. *quem pariter qui faciunt* cett. C ('per iter' e). 'quem ea iter qui faciunt' C. F. W. Müller. *qui ea iter faciunt* ser. 'quem per iter qui faciunt' Lauredan., Klotz, Baiter. 'qui in urbem iter faciunt' Zumpt. *externi homines* incl. *divisus neque vester* dicetur. 19. *divisus neque vester esse* dicetur. p. d. *neque vestrum* dicetur C, d. *neque erit neque vester esse* dicetur Hervag. Orelli, Klotz. *malis: 'd. vester neque erit neque vester dicetur.'* d. \*\* *neque vester esse* dicetur Baiter. d. *numquam vester* dicetur Zumpt. || 82. *increperunt* l, s, m, g. *concre-puerunt. expediti ad urbem* 19. *exp. ad caedem. avitis his.* ser. *avitis.* 'quantum' velit Halm. *quod* incl. Madvig, Ussing, Pluygers. 'Qui-rites' pro 'quod' Baiter. *is qui* Lauredan., Zumpt. *qui. fuit* add. Lauredan., Baiter, Zumpt. *com-*

*movit* E praeter Zumpt. || 83. post 'commovit' haec fere excidisse vidit Pluygers: 'ne agrum parvolum populo Romano Lentulo flagitante grandi pecunia venderet'. at *idem* 19, Mommsen. at fidem C. ('at quidem' g) 'atqui idem.' Lauredan., Baiter. || 31, 84. *tradetur* Naugerius. tradatur C, Klotz. || 85. *malitis* e. maletis cett. C praeter 11, 3, 7 ('malletis'). *pertineat nihil* 19. 'nihil pertineat' cett. C. 'nihil perveniat.' Lambin., Baiter. 'hic' om. 19. 'paululum' e, Baiter, Klotz. a *Stellati*. sed Turnebus. a Stellatis. et 19. ac Stellatis, et C. || 32, 87. *rem publicam vestram*. 1, s, m, e, f. remp. nostram. *ita* incl. Baiter. 'in fructuosissimas ins.' Zumpt. *separentur* C. 'separarentur' Naugerius, Baiter. || 88. 'consultatum' Lambin., Baiter. 'senatum' incl. Baiter. || 33, 89. 'novam contra veterem' Zumpt. *rei publicae* 19. populi Romani. *totam Capuam* 19. Capuam totam. || 90. *magistratus* Turnebus. magistratum C. qui incl. Lambin., Baiter. *plane esset exortum ac natum* Halm, Zumpt. 'plane exortum ac natum esset' N. Angelius, Orelli, Baiter. *plane exortum ac natum* C. *in ea urbe*. 19, 3, 7, 8, 13, 24. in illa urbe. *excogitatum* 1, s, m. Ascens. est cogitatum. *bella* 19. bella gesta. *Perse* 19. Persa. 'bellum gerendum — exercitus armandos' 19. || 91. *non contentione non ambitione non discordia* Pluygers. non contentione non ambitione discordes C, (praeter 19, qui haec om.) E. 'quod competerent' Torrentius, Pluygers. *adrogantium* 1, s, m. adrogantem. 'omnibus urbe' e, Baiter. 'omnibus urbis' Klotz. *exsectis* 126, N. Angelius, Baiter, Zumpt. *electis*. C. 'electis' Madvig. || 34, 92. *et P. Rullo reprehendenda* 19. reprehendenda et P. Rullo. *et P. Rullo* incl. Baiter. *atque auspicia M. Bruti*. 19. M. Bruti atque auspici-  
 cia. *illo creante* Turnebus, Baiter, Zumpt. et locreanti C praeter e: 'locare ante', unde Klotz: 'eo locante'. *illa colonia* 19. illo colonia. *deducta fuil* 1, s, m. ded. sit. 113, e. ded. sint. 1, 7, 8, 24, f. ('sunt'). 'ded. est' Wesenberg, Klotz, Baiter. *in ceteris* 19. ceteris in. || 93. *cum fascibus bini* Zumpt. cum fascibus duobus. *probatae* Lauredanus. probatis C. 'decuriones patres' Pluygers. *ut grandi*. C. vegrandi. Lauredanus, Klotz, Baiter. 'atque abiectionem' Lambin., Orelli, Baiter. *cum Campano*. Pluygers. Campano. *supercilio* Naugerius, Baiter. 'praesidio' C, Zumpt. *Vibellios* 120, 26, Halm, Zumpt. Iubellios. || 94. *quo denuntiasset* Klotz, Baiter, Zumpt. quod enunt. C. quid enunt. 13, Orelli. 'qui hinc Roma' e, Klotz, Baiter. *Roma* incl. Bake, Baiter. || 35, 95. *prospexerunt* Zumpt. perspexerunt 19, perspexerint C praeter 18, 24. prospexerint 18, 24, E. *natura nobis* Turnebus (ex codice?). *natura bonis* C. *natura loci*. Hervag, Klotz. *ac vitae consuetudine* Zumpt. et vitae cons. Hervag, Lambin. a *vita cons.* C. ad vitae consuetudinem Turnebus, Klotz, Baiter. *Ligures montani* C praeter e, f, p. *Ligures* e, f, p, Klotz, Baiter. *apta est* Zumpt. apta sunt C praeter 19, 13 (acta sunt.) et e, f, p (capta sunt); unde 'capta est' Madvig, Wesenberg, Klotz. 'nata sunt' N. Angelius. 'nata est' Baiter. *qua* 19. Hervag, Lambin. quae. 'et ea luxuries' 19, 3, 20, 38. 'illa luxuries' Zumpt. *cum numerum* C, E. cum. Baiter. 122. Lauredanus. modo C. || 96. *prae illis plateis* scr. praecillis semitis. C. prae illis aedibus Zumpt. 'prae illa Seplasia' Pluygers. 'praeclarissime sita' Baiter. 'prae latis suis viis' Halm. 'praeclarissimis viis' Klotz. 'agros vero — contendunt' om. 19. *opinis*. Lauredan. optimis



*C. uberibus* C praeter 113, e, f. (uber-  
rimis). *Veios* Zumpt. vicos C. 'La-  
bicos' Beroaldus, Baiter, Klotz. non  
om. Junt., Orelli, incl. || 97. 'vix fini-  
bus se' Pluygers. 'vix artis se'  
Halm. *sedibus luxuriosis* C. sedibus  
luxuriae Naugerius, Baiter. 'con-  
cepturi' coni. Orelli, Pluygers. ||  
36, 98. vetera vectigalia ea exple-  
retis novo C (praeter 19, et 7 2da  
manu: 'nova'). ut vetera vectiga-  
lia venderetis et expleretis nova.  
Hervag. ut vetera vect. venderetis,  
ut expilaretis nova. Lambin. 'ut  
vetera vectigalia \*\* ea expleretis  
novo \*\*\* Baiter. 'ut vetere vecti-  
gali ex republica erepto novam'  
Zumpt. 'urbi Capuam' 17 2da. 'urbi'  
cett. C. 'novam urbem' Zumpt.  
*nova, ut urbi Capuam* Manutius, et  
Hervag. (om. 'ut'). *curis* incl. Pluy-  
gers. *potestatem* Junta. *potestatis*  
C. *tamen vobis pecunias ad nutum*  
*vestrum penderent, ut* incl. Pluy-  
gers. Totam §. 99. incl. Pluygers.  
'vestris urbibus' om. 19. incl. *quovis*  
*praesidio* 13 (2da m.), 20, 26, 38.  
(*quovis* pr. cett. C.) enius pr. *saepis-*  
*sime rem publicam* (r. p.) C. *saepis-*  
*sime* populus Romanus. E *tutatum*  
19. 'tutati sumus' Zumpt. om. cett.  
C, E. *victoria* 19. victorem C (\*\*  
victorem. Baiter.) varie explent E.  
velati manu C (praeter e, f: vel  
laeta manu; 113: vi et leta manu);  
*vi et manu* 17, 8, E ('vi ac manu'  
Zumpt). *in senatum cogere* C. *senatus*  
*cogere* N. Angelius, Baiter. *posset*  
Ernesti. *possit* C. || 100. *mei* om. 19.  
incl. || 37. summis ab istorum peri-  
culis scelere insidiisque def. 19.  
'cum his ab istorum pergam sce-  
lere insidiisque def.' Zumpt. 'sum-  
mis \*\*\* ab istorum scelere insidiis-  
que def.' Baiter. bonae fidei C.  
*bona fide* N. Angelius, Baiter. *non*  
*timido diligentique* 19. non timido,  
diligenti C. non timido, diligenti  
non ignavo Hervag., Baiter. || 101.

*pertimescam* 19. perhorrescam. *ego*  
*cum* C. praeter g. ego enim g,  
Orelli, Klotz, Baiter. *armatus sim*  
19. *armatus. ornatus* C praeter e, f.  
*exornatus* e, f, Baiter. non horreo  
in hunc locum progredi posse C.  
non horreo ('non horru' Junt.  
Lambin., Orelli. al.) in hunc locum  
progredi Lambin., Baiter. fo: 'non  
horreo, ut in hunc locum progredi  
possim'. 'non horreo: in h. l. pro-  
gredi possum' Zumpt. || 102. *volue-*  
*ritis* g, Orelli. *volueratis* ('voluistis'  
Ussing). *quibus odio est otium* Us-  
sing, Baiter. *quibus otiosi otium.*  
C, Klotz. *quietissimos* Madvig. fe-  
cissemus C, Klotz. om. Baiter. *at-*  
*que otiosissimos.* Ascens. Madvig.  
'et otiosissimos' Zumpt. aequo  
otiosos Ussing, Klotz, Baiter. *ius*  
*in iudiciis* ser. hos in iud. C. honos  
in iud. Beroaldus, Baiter, Zumpt. ||  
103. Verborum 'tam et si hi — con-  
flarent', quae aliena habemus,  
scripturam exhibuimus codicum;  
correctiones has commemorandas  
duximus: nam si ei. Lambin., Bai-  
ter. ex ipso otio. Madvig, Baiter. ab  
ipso otio. Zumpt. quam vos fortun-  
nati eritis—non ignavia quaesitum,  
sed virtute partum. Madvig, Bai-  
ter. in hoc statu. Zumpt. ea con-  
cordia. Madvig, Baiter. cum con-  
cordia. Zumpt. invitissimis eis ho-  
minibus. β. qui nos in consulatu  
inimicissimos fore †. Madvig, Bai-  
ter. 'iactaverant, vobis omnibus  
prospexi, atque revocavi' Ussing.  
'quos nobis in consulatu inimicos  
esse et cupiditatibus proripi omni-  
bus. perspexi, pararim, revocarim'  
Zumpt. ne quid turbulenti. Turne-  
bus. *hodierno die.* N. Angelius. 'ho-  
dierna die' C, Zumpt. *rei publicae* N.  
Angelius. populo Romano C. 'pro  
certo vero' Zumpt. pro certo re-  
perto e, 18, 13, 24; pro certo repeto  
p. pro certo recepto f. fo: 'pro  
certo recipio (om. polliceor)'.

## III.

1, 1. *nostrae disceptationis* 19. vestrae disc. 'si videtur' (om. 'eis') 19. || 2. *probaro* 19, Ernesti. probabo. || 3. *commodo vestro* 1, s, m. commodis vestris. *promulgata est* Klotz, Baiter. promulgata sit. || 2, 4. *professus* Manutius, Baiter. confessus C. || 6. *cum datur* Ald., Lambini, Klotz, Zumpt. cui datur C. *inhibet* Schütz, Klotz. inibet 19. 'inhibet' cett. C. habet in. Hervag., Baiter. 'habet' Zumpt. *ademptum* — datum Puteanus, Madvig, Baiter. ademptus — datus. 'Cn. Carbonem' 19. || 7. *Syllana* L, s, m. (Sullanus c, p. Sillanus f, unde 'Sullanus res' conii. Baiter.) 'Sullae acta' Pluygers. *privata sunt* 19. privata sint. || 8. *Sullani ipsi non postulant* Pluygers. Sulla ipse non postulat. *ut privatum sit?* ita Wesenberg, Baiter. ut privatum? sed ita. *meliore iure* Pluygers. melior. *Hirpinus* 19, E. Irpinus. || 9. *immunia* meliore l, m. imm. commodiore. *Crabra* Manutius. crebra C || 3, 10. *cogit* Lauredanus. cogat C, Zumpt. *eius modi in causa* Baiter. ('in eiusmodi causa' Madvig.) eius modi causa C, Zumpt. *at si* C praeter s, m, f. ac si. s, m, f, Baiter. || 11. *possideret* Ernesti, possidet. C. *est* add. Baiter. *deiecit* Lambini. 'ciecit' C, Zumpt. *Africa* om. L, s, m. incl. *quaesiverunt* 19, s, m. reliquerunt. || 13. *intelligitis* 19, 24. intelligetis. — post 'bonus est' non nihil videtur excidisse. *de generi impudentia* Manutius. de genere impudentiae. *sanciri* C. F. W. Müller. sancire. *quia his rebus* Pluygers. 'qui eius rebus' Zumpt. quibus rebus. *defendere criminor.* 'defendere me criminatur' Lambini. || 14. *conformando* Gulielmii. confirmando C. *perficeret* Ernesti. perfecit. C. || 15. *promulgavit* Graevius. promulgavit C. *num ego quem Sullanum possessorem*

ser. 'iam ego quem possessorem' Zumpt. num ego quem possessorem. *respublica* C. populus Romanus. 'denique'. c, Baiter. *rem publicam* 19. populum Romanum. *dimoveri* 19, 7, 20, 26, 38, 39, s, m. demoveri. *praesertim cum* 19, 1, 7, 8, 13, 20, 24, 26. praesertimque cum 13, 38, 39, c, f. 'praesertim Quirites cum' Klotz, Baiter. || 16. in hoc. Iunt. hoc. C. *hoc enim vos in errore* Zumpt. in hoc enim vos errore.

M. TULLII CICERONIS PRO  
C. RABIRIO PERDUELLIONIS  
REO AD QUIRITES ORATIO.

1, 2. *vitaes*, 13, 9, 12. Halm. vitaeque cett. C. *in his rebus evertendis* incl. Ernesti. || 3. 'fortunisque omnium' conii. Bake. *eaque qui* Bake. ea qui. *iudicare* Turnebus. iudicari. C. || 2, 4. *nisi ut* Halm. ut C (praeter 11, 3, 8, 9). quam ut. *et vita* Bake. vita. *et salus* Iunt., Orelli, Bake. salus. || 6. *curriculum* C, Orelli, Klotz. circulum t, cod. Torrentii, cod. Lambini, Halm. *hoc* incl. Ernesti. || 7. *crimen* incl. Bake. || 3, 8. *ant de tabulario* C, Halm. an de tab. E. Curtius C, Halm (in appendice). Curius. (t.) *quid enim? est verisimile cariorum* Garatoni. quid enim est tam verisimile quam cariorum. *tam et quam* incl. cum incl. Lambini, Halm. *Campaniae* C, Klotz. Campanae (ex conii. Manutii). *vicinitatis* incl. Beck (aperte exsequente versu profectum). *perscriptum* Manutius. praescriptum. C, Klotz. || 10. *id* incl. Beck. *ut hoc* cod. Torrentii, Halm. utinam hoc. (om. 'hoc' Cratander. Orelli.) || 4, 12. *tribunus plebis es* ser. tribunus plebis. *tu horum libertatis* incl. ('horum' incl. Bake.) *invisitatis* conii. Halm. inusitatis. *nam* 124. namque. *haec tua* incl. Bake. *quae* incl. *quae verba* om. t, incl. Quirites incl. || 5, 14. *tui* incl. Ernesti. *patru*

et fratris incl. Bake. ('fratris si' Schütz, Halm. 'fratris sui si' C.) *patruus vester* incl. Ernesti. *ac Ti.* Manut. et Ti. C. C. *Gracchi* scr. Gracchi. || 15. C. *Gracchus* Halm. prius 'Gracchus' C plerique, fortasse ex 'Gaius' natum. || 17. *publica* om. 19, 20, 25, 38, cod. Torr. incl. || 6, 18. *crimine.* incl. *at id.* Turnebus. et id. C. || 19. *inter* [fectum iure concedas necesse est] add. Manutius. || 7, 20. *praetores* add. Manutius. *ex aedificiis.* 'ex aede Saneus' Mommsen. ex ede sui aneus s, 113, 26. *qui hos patres conscriptos, qui nunc sunt* incl. Bake; idem 'quem ne vos ipsi quidem in invidiam vocatis' coni. *quem iam ne vos ipsi quidem* scr. sed plus requireretur ex. gr. 'quem etiam vos ipsi praedicatis, laude extollitis'. 'laudare consuevistis' add. E. om. C. *Romanorum* om. ed. Ven. 1480 incl. Ernesti. *patrum nostrorum atque eius aetatis* incl. Bake. *qui tum* Bake. quae tum. ('qua tum' velit Halm, ceteris servatis.) || 21. *evocavissent* Budaeus, Garatoni. vocavissent. *perditus* C, Halm. praepeditus ed. Ven. 1472, Lambin., Orelli, Klotz. || 9, 24. *et abesse* velit Halm. incl. || attulit Baiter. attulisset. 'attulisses' corruptum videtur. *tuas umquam rates* Pithöus. *tuas umquam rationes. naufragium fortunarum.* fo: naufragium fortunarum factum. *natus es* Baiter, Halm. natus esses. Post 'potuisses' plene interpunxi. *eam cum in iudicium vocas, non intellegis* Rau. eam causam in iudicium vocas. an non intellegis. || 26. *an* incl. *ex eis.* 18, 9, 12, 13, 25, 38. Lambin., Orelli, Klotz. ex his. *periculum capitis* C, Halm. capitis periculum. *maximi* Bake. maxima. || 10, 27. *loquor?* ipsorum Lambin. loquor? de ipsorum. || 28. *hospes* es cod. Torrentii, Halm. hospes. *quoniam sensu et vita caret* incl.

Bake. || 11, 30. *qua si* Torrentius. qua re si. || 31. *omnes ei* C praeter l 24. omnes hi. || 12, 33. *qui auctor huius iudicii est* Niebuhr, Klotz. isq. auctor huius iudicii. p. *aeternum hoc imperium* Klotz, Halm. 'aeternum imperium' Niebuhr. || 34. *volunt* Wesenberg. 'vellent' Halm. 'volt' Niebuhr. 'neve vestro' malit Halm. || 35. *facerem idem* Halm. 'facerem id' Niebuhr, Orelli. *vocandos esse* cerum. Halm. 'vocandos mihi esse, sed' Niebuhr, Orelli. † *perhorrescit.* 'pertimescit' non ideo spreverim, quod timet antecedit, fortasse alius vocabuli terminatio.

M. TULLII CICERONIS  
ORATIO QUA L. CATILINAM  
EMISIT

IN SENATU HABITA.

1, 2. *iam diu* om. b, s. incl. Halm. || 2, 4. *mors ac* om. 165, cod. Mureti, incl. Wunder. || 6. *oppressus* C praeter a, a, c, d, g, h, k, q, et 3 lag. obsessus. || 3, 8. *meis* incl. Ernesti. *quod non* Halm. 'quin' Madvig, Klotz. quod C. || 4, 9. *consul* om. k, p, s, w, incl. Halm. || 6, 13. *in fama* Augustinus. infamiae C (infamia. a). || 15. *tuum* om. a, d, e, g, h, k, l, o, r, u, 146, Halm, incl. *nihil agis* om. b, i, s, t, w, x, Klotz, incl. Halm. *nihil moliris* om. a, s, Klotz, incl. Halm. || 16. *tamen ea carere diutius non potes* incl. Heumann, Halm. om. Klotz. || 17. *tu opinor* Cobet. ut opinor. || 8, 19. *te* om. a, g, h, k, 12, 11, 50, 53, 55, 57. incl. || 20. *verba* 'id quod abhorret a meis moribus' aliena videntur. || 11, 28. *propter invidiae* Matthiae, Halm ed. Lips. propter invidiam. || 13, 31. *biberunt a.* || 32. *id* om. a, a, d, q, y, z, 12, 11, 46, 50, 57, 65, Klotz. incl. || 33. *a Romulo* incl. Tittler. *omnium* om. b, c, i, l, s, t, u, w, k, 11, 6, 43, 50. Halm. incl.

M. TULLII CICERONIS  
IN L. CATILINAM ORATIO  
SECUNDA,

HABITA AD POPULUM.

1, 1. *iustum* om. b, m, s, incl. Halm.  
 || 2, 3. *quam multos, qui propter stultitiam non putarent* om. s, o, 12, 9, 11. Halm. ('quam multos' om. a) incl. *quam multos, qui propter improbitatem faverent* incl. Bloch, Madvig, Halm. || 4. 'in praetexta catamitum' Withof, Beier. in praetexta calumpniatus 150, 57. in praetexta calumpnia s. in pr. calumpnia C (praeter i, qui om. 'calumpnia'). || 3, 5. *prae Gallicanis* Lambin. 'et Gallicanis'. cod. Mureti, Orelli, Klotz. ex Gall. C. || 4, 6. *si* incl. Halm. (revocat in appendice). || 6, 13. *scelerum* om. e, i, Pal. 6, 9, Klotz. ('scelerum sacrarium' b, c, o, s.) incl. Halm. || 8, 18. *quid ergo? in vastatione* Klotz, Seyffert. *quid? ergo in vastatione.* || 9, 19. *in maxima multitudine* Halm. maxima multitudine C. maxima in multitudine 19, Klotz. maximam mult. a. || 20. *eis* om. a, e, i, p, s, s, 12, 11, 50, 57, Klotz. incl. Halm. || 11, 25. *urbe.* a, a, c, i, p, s, s, 12, 11, 50, 53. '[populo] urbe' Halm. *virtutes omnes et cum vitis omnibus* incl. || 27. *atque adeo qui.* 'qui' incl. Halm., om. Klotz.

M. TULLII CICERONIS  
IN L. CATILINAM ORATIO  
TERTIA,

HABITA AD POPULUM.

2, 4. *ad Catilinam esse* b, s. esse ad Catilinam. || 3, 6. *quae erat commissa* om. g, h; incl. Halm. || 7. *deferrem* Halm. deferre. p. deferri. || 9. *ab Lentulo* Halm. a P. Lentulo C. || 10. *recepissent* Muret. praecipissent C. || 5, 12. *scriptae* om. a, a, b, s, s, 150, 53, 57. incl. Halm. *vide ecquid* Halm. vide et quid a, b, i, s,

150, 57, a ('vide et qui') vide quid 116, 20, 43. et vide quid. || 6, 14. *et a reipublicae* a, b, c, d, g, h, i, k, p, q, w. 12, 9, 11, 50, 57, 65. et [a] reip. Halm. et reip. || 15. fo: 'itaque illud'. 'lactantem' C plerique (a). || 8, 20. *illud signum* incl. || 9, 21. *et senatus et vos* om. k, 146, incl. Klotz, om. Halm. 'cogitata contra salutem omnium' b, c, s. || 22. *illa Allobrogum sollicitatio, iam* incl. Mommsen. *commissae litterae* b, s. incl. commissaeque litterae. 'praesertim qui nos non pugnando sed tacendo superare potuerint' suspecta Halmio. *potuerint* Madvig, Halm. *potuerant.* || 10, 24. *eiecit ex urbe* incl. Lambin, Halm. || 25, *atque illae — diiudicatae sint* incl. Bloch, Madvig, Klotz, Halm. 'infinita e caede' Mommsen. || 11, 26. *propagatam esse.* 'prope natam esse' Jeep. || 12, 27—29. 'quamquam Quirites—providebo' aliena videntur.

M. TULLII CICERONIS  
IN L. CATILINAM ORATIO  
QUARTA,

IN SENATU HABITA.

1, 2. *sella curulis* incl. Klotz, om. Halm. || 4, 7. *qui populum Romanum* incl. Bloch, Madvig, Halm. *putent* Ernesti, Klotz, Halm ed. Lips. *putet. uno dolores* C. 'uno dolore dolores' Graev., Halm. fo: una dolores. || 5, 10. *at is et ser. is et.* C. ('set' a). 'sed' Halm. || 6, 11. *atque vos* incl. *exsolveritis* ser. *exsolvitis* q, Col. *exsolvitis* b, c, p, s. 'defendētis' cett. C. ('defenderitis' s, l, 3 lag.) 'populus Romanus exsolvēt Madvig, Halm. p. R. om. d, g, h, k, r, t, u, 146, 53. Lambin., Orelli. 'populo Romano exsolvētis' Putsche, ut olim Klotz. 'populi Romani exsolvam' Klotz. 'apud populum Romanum exsolvam' malit Halm. || 6, 13. *fuisse*



*videamur* C praeter a, b, c, g, h, i, k, s, 12, 3, 6, 11, 57, 65: fuisse videamini (ut Klotz, Halm.). || 7, 16. *hoc* om. a, c, g, h, k, m, t, u, 146, 53. incl. Halm. || 8. 'nati et' malim abesse. || 10, 22. *recepti in amicitiam* b, c, s, Halm. recepti.

M. TULLII CICERONIS  
PRO L. MURENA ORATIO.

1, 1. *precatus*. Quintil. IX, 41, 107. Donat. ad Terent. Andr. III, 4, 3. Lambin. Halm. deprecatus C. *mihi*. 19, Klotz. *mihi fidei* Lambin. Halm. (*mihi fides* 110, 24, 26, g, p.) *ea* scr. ut habet 124. ci. C. eum 19, E. *qui* C praeter 19. (quem.) || 2, 3. una C. fo: per manuz. cf. de prov. cons. 39. 'iam' Klotz. 'cuncta' Halm. 'continuo' Bake. 'tanta' Jeep. 'tradetur' Bake. *consul* incl. Madvig, Halm. || 4. *is potissimum summo* Madvig, Halm. *is potissimo* C. *fert*. Quintil. V, 11, 23. Victorius, Halm. adfert. C. *ingrediuntur* 19, 20. *ingrediantur*. *tempestates* om. 'rei publicae' Quintil. l. c. 3. *tulerim* fo: *tuleram*. *abrogarim* Wesenberg. *abrogarem* C. || 6. *negas* scr. *negat*. || 7, *ferre se* Klotz. *se ferre* Lambin., Halm. *ferme* C. 'consulatum petenti' incl. Bake. || 8. *adfui* Oxon. h. et m. (abfui), 'favi' 19. *verbum* om. cett. C. *petis* 19, Lambin. *petas*. || 4. *infamiam* Gulielmus. *famam*. *sic et si ceperis eos* C plerique ('sic etiam' 17. 'sic existimo' 19) fo: 'hanc statim, fructus eos'. 'labores per quos ea ceperis' E ante Halm. || 9. *inertiae* C. *inertiae nota* Lambin., Halm. *turpitudine* om. Boot, Zumpt. incl. 'desinam' Bake. *industrius homo* Bake. *industrius quisquam*. Gulielmus, Halm. *industrius* C. *veneris antea* scr. *veneris*. || 5, 11. 'illos' om. g incl. Halm. 'militari labore' (om. 'in'.) Halm. *fuit ut*. 110, 13, 24, 26, 65, g, p. Halm in append. Zumpt. 'fuit, ne' m, Halm.

'fuit ne ut' cett. C. || 12. 'etiam' om. g, incl. Halm. || 6, 13. *et* incl. *quamquam vitiosa* C, Zumpt. quaeque vitiosa. || 14. *potest, nihil inquam* Zumpt. *potest? nihil inquam*. *iudices* nescio quis. 'iudicio' C. *in vita* incl. Ernesti, Halm. || 7, 15. *plebes* g, p, 17, 65, Halm. *plebs*. L cett. || 16. *et historicis* incl. Bake. || 8, 17. *novis hominibus* incl. Bake. || 18. *habet* 19, 24, 65. Bake. *habeat*. *est* Bake. *sit*. 'unus tantum primus possit' Bake. 'unus autem primum locum possit' Mommsen. || 9, 20. *L. Lucullo* incl. *loquor* m, Halm. *loquar*. *huic* add. Halm. ('ei' add. Klotz. 'Murenac' Lambin. 'quibus legato Lucullus tantum laudis' Bake). || 21. *pari atque eadem in laude* 126, Lambin., Orelli. 'parem atque in eadem laude' Bake. *pari atque in eadem laude* C, E. *ut—contendas* C, Zumpt. *et—contendas* β, Quintil. V, 13, 27, Halm. *tu item* Orelli, Halm. *tu idem* C. ('tu tui' Bake.) || 22. 'adipiscendum' incl. Bake. *instituis* incl. Boot. *et scit* incl. Bake. || 23. *diligis* scr. *dicisti*. *in ista* Halm. *in illa*. *concilient* 19, Ernesti. *conciliant*. || 11, 24. *dicendi* incl. Boot. || 25. 'si quid—fuerit' Bake. *Cn. Flavius* incl. Bake. 'edendis' Bake. *ab ipsis—compilarit* incl. 'et ab ipsis capsis iureconsultorum sapientiam compilarit' Madvig, Halm. *Glossema malui auctore Orellio sic edere: et ab ipsis cautis iureconsultis eorum sapientiam compilarit.* — *pervolgata* C, Klotz, Zumpt. *promulgata* e, f, Halm. *agi lege posset* scr. *lege agi posset* Halm. *lege posset* agi E. *lege posset* C. || 12, 26. *ex iure Quiritium* Lamb. *ex iureque* C. *quod huic* Bake. *quid huic*. *manu consertum* C, Klotz, Zumpt. *manum consertum* Lambin. Halm. (et infra 30 utroque loco). *ite viam* Arusian. Mess. p. 237. ed. Linden. Servius ad Verg. Aen. IV, 468. V,

86. inite viam C. *et haec sed* C. ('sed' corruptum et ab Halmio inclusum non videtur ad formulam pertinere). *peruulgata* C. promulgata g, Halm. || 27. *ut putarent* C, Zumpt. ut — putarunt ed. Ascens. 1511, Halm, Klotz. || 13, 28. *etiam inanior est* Zumpt. etiam maiores. 19. etiam minores C. etiam minus ed. Crat. 1528, Halm. *aliquando* 19, e, Franc. Zumpt. *aliquamdiu. esse* incl. Ernesti, Bake. 'me esse iuriscons.' g, Halm. ('iurecons.') || 29. *et add. Lambin. evadere non potuerunt* C (praeter m, 110, 26, 65), Zumpt. ev. n. potuerint. *eos* incl. (Cobet malit 'sic apud nos videmus' ex Quintil. VIII, 3, 79, ubi est 'sic nos videmus'). || 14, 30. nonne 'duae igitur sunt artes'? *depositis* incl. Bake. 'adpositis' Lambin., Zumpt. *dispositis*. Halm ('dispositis' g). *promulgatis* poetae rectae tribuere videtur Zumpt. *Sulpici* om. g. incl. Halm. || 31. *gratissimae* l 13, Oxon. X, Victorius, Halm, Zumpt. *gravissimae* C. *clarissimae* Klotz. *aequa* *parta* ser. ut Sorof. si qua *parta* C. si qua p. (sic) 19, 7, 8, 25, 86. *aequiparata* Madvig, Halm, Klotz. || 32. *statuam* C. 'statuo' m, Halm. *cum Scipione* incl. Ernesti, Halm. ('eum Glabrigone' Klotz.) || 15. 'regem' om. g. incl. Halm; idem 'nimirum' del. 'ad confirmandas rationes' Bake. *tantum spe conatuque* *valuit* Klotz, Halm. malim 'tantam in spem conatumque convaluit'; cf. ad Att. VII, 3, 5. *tantum ipse conatuque* *valuit* C. *Sertorii copias cum suis* incl. Bake. || 33. *existisset* C. *constitisset* Crat. Halm. *et add. Halm. Mithridates* add. Bake. || 16, 34. fo: 'si bellum hoc, si hostis ille — suscipiendum illud putasset'. *neque* incl. L. Lucullus. Junt., Mommsen, Halm. 'L. Luculli' C. (om. nomen aliquot codd.) *tamen* incl. Halm.

coni. a Pompeio add. 'adipiscendum' incl. Bake. || 17, 35. *reliquis* C. in reliquis Ernesti, Halm. || 36. *opibus* Hotoman. opera. *Manlio* 19, 24. Mallio. || 18, 37. *comes* C. comitiis Hotoman, Halm. *sumpsit, ipse* Zumpt. *sumpsit ipse. omen praerogativae* Zumpt. *omen praerogativum.* || 19, 39. *sed* incl. ('et' malit Bake.) *ab delectatione omni* incl. Bake. || 40. 'non solum eos, qui fatentur' incl. Cobet. || 41. *militari, militaris* Halm. 'militaris' s. 'militari' C. *urbanae* 19, g, Halm. *urbana.* ('sit par militari suffragatio urbana' Hervag. Klotz.) *offensione vitata* C. Zumpt. 'offensionem vitat' Beroald, Klotz, Zumpt. *requiritur utique 'sibi' ante 'benevolentiam'.* || 42. fo: 'plena, ex altera catervarum testium atque indicum'. 'alienatus' Halm. 'proba pars' Kritz. *ipse* C, Zumpt. *ipsa* Ernesti, Halm. || 21, 43. *Servius* incl. *consulatum* incl. Halm. coni. *et atque et dicere* incl. Bake. *fortissimi viri* 19. fo: 'fortis sane viri'. || 44. *quid ergo* Orelli, Klotz, Zumpt. *quid?* ergo. Lambin., Halm. || 45. *de candidato rumore* Jeep. *candidatorum. aut molestiam omnem* ser. *aut testam rem* C plerique. ('aut certam rem' 19, m.) *aut desertam rem* Halm, Zumpt. *aut totam rem* Lambin. || 22. 46. *consulatus* incl. Boot. *te* incl. idem. || 23, 47. 'aut in incommodo' Ruhnken. 'haec' om. g. incl. Halm. 'tulit' alterum incl. Bake. *perrogationem* ex coni. Mommsenii Halm. *prerogationem* C plerique. *prerogationem*  $\beta$ , Zumpt. 'vicinitatibus' g, Halm. *occulta* incl. Bake. || 24, 48. *comparas* Lambin. *comparaes.* || 49. 'quibus rebus certe ipse candor candidato- rum obscurior eis videri solet' Jeep. 'quibus rebus certe ipsi candidato rationem suffragiorum obscuriorem videri liquet'. Halm.

'quibus rebus esse ipsi candidato obscurior spes videri solet' Klotz. ed. 2da. In nostra ed. excidit 'certe' ante 'ipsi'; ceterum videntur haec aliena esse. || 25, 50. *habuisse*. fo: iactavisse. || 51. 'omnia timebant' Bake. *tum erupit* 19, m. cum erupit 110, 13, 24, 26, 65. cur er. 125. qui er. 17, 8, 20, 86, c. que er. g. atque er. Mommsen, Halm. *tum* incl. *idem ille* 19, 13, 25, 65, al. ille *idem. exstincturum* 19, 10, 13, 36. restincturum. 'quod cum gladiis in campum deduci Catilinam sciebam' Halm. 'quod ab hominibus cum gladiis in campum deduci Catilinam sciebam' Bake. || 26, 52. *in campum* incl. Halm (in append.), Boot. factum est g, Halm. || 54. *locus est reliquus* scr. 'locus reliquus est'. g, Halm. locus est relictus. C. locus est 19, m. *ab eis* E. ab his C, Zumpt. C. Postumo Zumpt. Postumo C. Cn. Postumio E inde a Naugerio. P. Postumio Halm. Postumio Klotz. || 27, 55. post 'quae' excidit aut 'a maioribus' aut, quod Halm coni., 'ei'. *parta* C. 65, Lamb., Halm. *descenderint* Lambin. *descenderent. accusat paternus amicus C. Postumus* Zumpt. acc. paternus amicus Postumus 124. acc. paternus amicus tum Postumus C. acc. paternus amicus Cn. Postumius E, Klotz. acc. P. Postumius pat. amic. Halm. *sodalis filius* Zumpt. *sodalis filii C. qui cum—tum* scr. qui quamquam — tamen. *nobis β. nobilis C. nobis* incl. Halm. *atque ingenium* 124, Oxon. t, β, Halm. et ing. 186. ut ing. cett. C. *deberet* C. praeter g, m, p. deberent. || 28, 58. 'illud' om. g. incl. Halm. 'deprecor' Stanger. *prodesse possit* 19, 10, g, m, p. prodesse posset β, Halm. prodesset cett. C. *eximiam vim* C plerique, ex. vim et dignitatem 19, m. ex. dignitatem Halm, qui nunc 'ex. vim' praefert. || 29, 60. *forsitan in*

*re* 19, m. forsitan. *sed peccas* C. sed si peccas Ascens. 1511, Halm. *ego non te* C. ego te Crat., Halm. *accessit istuc* Ernesti, Klotz, Zumpt. accessit his tot. C. 'acc. his dotibus' s. 'acc. his virtutibus' Halm. || 61. *aput imperitam multitudinem* scr. aut imperita m. C. fo: eius sententiae. *esse dicunt* incl. Bake. || 30, 62. 'inquit' utrumque incl. Boot. || 63. *fateor* Halm. coni. || 31, 64. *aut non dixisses* incl. || 65. 'ipsi mihi isti' g, Halm, qui 'ipsi' incl. *nihil omnino gratiae concesseris* 19. 'nihil gratiae concesseris' Boot. omnia immo gratiae confeceris C. nihil gratiae causa feceris Crat. nihil gratiae causa cesseris Halm. *immo insistito* 19. immo resistito gratiae. *etiam, dissolvenda severitate, sed tamen est laus* scr. etiam in dissolvenda severitate, sed tamen est laus C. etiam, sed tamen in dissolvenda sev. est laus. Halm. (nunc tollit 'in dissolvenda veritate'). || 32, 67. *praetermitte* incl. Halm. coni. (ac praetermitte 19, m, Halm. ac om. cett. C. *conducti* incl. *volgo* incl. tributum C. plerique. tributus. 'et item' om. 19, 'et' incl. Sorof. || 33, 68. *consulatum petenti, et solet fieri et revertenti* incl. Bake. *non possum* Klotz. non possum C. 69. *criminisum est* Halm (in append.) criminisum sit. 'Martium' abesse malim. 'Postumus' m, e, Oxon. ψ, β, Zumpt. P. Postumius. (P. om. Klotz.) || 34, 70. *candidulos* incl. Rinkes. 'praeter eorum suffragium' g, Halm. *si* incl. *ut suffragantur* g, Par. 7. ut suffragantur C., Halm ('† si ut suffragantur'). *nil valent gratia ipsi, denique* interp. nil v. gratia, ipsi denique *hac* add. *quae est de numero sectatorum* incl. Bake. post 'L. Caesare' excidit alterius consulis nomen. || 72. *haec homines tenuiores a suis tribulibus vetere instituto adsequebantur* incl. ('instituto' add.

solus 186). deinde lacuna est quattuor versuum secundum 13; explevit partem sententiae Mommsen: 'quod si criminosum videtur amicum quendam Murenæ'. || 35, 73. *volgo* 19. *volgo passim*. ('passim' incl. Halm.) || 74. *tu summam* Lamb., Halm. *summam*. C. || 36, 76. 'distinguit — voluptatis' suspecta sunt Halmio, certe corrupta videntur. fo: excidit 'otii, servat' post 'temporum'. *quid tandem ais? num* ser. quid tandem ais? tunc 19, 24. 'quid tandem ais? anne' m. quid tandem is tunc C. quid tandem? istue Ascens. 1511, Halm. || 77. *quid? quod habes nomenclatorem? in eo — decipis* E ante Halm. quid? quod habes nomenclatorem, in eo — decipis. *sin etiamsi noris* Lambin. *sin etiam noris* C. *cur nomen* ser., ut Tischer. *cur tamen* 19. *cur ante m, E. curam* cett. C. 'nomen tamen' Zumpt. *quasi* Zumpt. *quam. incertum sit?* 19. 'inceravit' plerique C. *insusurravit* E ex Naugerii correctione. *quod posteaquam* 19. quid posteaquam. *comprobaverunt* Bake. *compararunt*. || 79. 'in insidiis' Halm. *vīs* Crat. *vitiis* s. *vitis* C. Post aut lacuna satis certa, expleta a Bootio: 'exiguīs copiis rem publicam impugnari'. 'vitiis agi' Zumpt. || 38, 83. *videris* add. Madvig, Klotz. ('videre' Halm.) || 39. 'sustinetis' Bake. 'de hac re' g, Halm. 'summum furorem' g, Halm. || 84. 'periculum' om. 19. || 85. 'unus si erit' Bake, Zumpt. 'in creando conlega' Zumpt. fo: qui impedituri sint, iam parati sunt. *illa pestis immanis* incl. Halm et add. 'manus' ante 'importuna'. *Catiliæ* incl. Tischer. *prorumpet* 124, 26, 65, g, Halm. *perrumpet* cett. C. *et iam minatur* add. 19, 86, m; om. Halm. *in rostris* 124. in castris. *quæ iam diu comparantur. eadem ista* Halm in append. quæ iam diu comparan-

tur, eadem ista. || 40, 86. *idem vos* Madvig. fide in vos 110, 13, 26, 65. fidem vestram 19, m. fidem vel. cett. C. *vestram* add. Halm. | 87. *hoc eum cum honore* quo Bake. 'cum hac eum qua' Halm. hac eum re qua. *demisso animo* Bake. demissis hominibus. || 41, 89. *eius matrem* ser. nisi praestat 'eius ego matrem'. ego matrem. *fuit, exercitus duxit* Halm coni. fuit et exercitus duxit C. *res maximas* C, praeter 124. et res maximas. ('et' del. Halm. in nota.) 'permutatio fortunæ' Halm. *quom, quibus* Halm. quod, quibus. *celebrarant* Boot, Zumpt. celebrassent. *concurrerant* 19. concurrerint. *existet* Gulielmius. excidet C. ('eo accedat' Junt, Klotz.) *tota causa* 19, E. causa tota.

#### M. TULLII CICERONIS PRO L. FLACCO ORATIO.

1, 1. 'in gravissimo' velit Baiter. || 2. *institutæ*. videtur adverbium e. g. 'præclare' excidisse. 'institutis' Halm. *veteres et* add. Pluygers. || 3. 'posita — defixa' Halm. *providentiam* om. b, ε, Baiter; incl. || 2. 'corrupti concitatique' b, Baiter. || 5. *pepulit* Baiter coni. repulit b, a, f. expulit Pantagathus, E. Ex lacuna, quæ post 'conservandam salutem' in codd. est, servata videntur verba ab Arusiano Messio p. 218 ed. Lindem. 'quam benevolum hunc populo Romano, quam fidelem putatis?' et ab Hieronymo comment. ad Galat. I, 3, et ep. X, 3: 'ingenita levitas et erudita vanitas'. argumentum orationis, non fragmenta exhibere dixerim Isidorum Orig. II, 21, 29. 'cuius laudis praedicator esse debuerit, eius periculi deprecatorum esse factum' et Julium Victorem XV, p. 243.: 'nihil agi illo iudicio, nisi ut magistratus in provinciis non audeant



imperare sociis quod ex usu rei publicae sit'. Fragmenta 'strangulatos — Lentulum' ab A. Maio in codice Vaticano Bobiensium scholariorum reperta sunt, ut infra 'sed si neque Asiae — traditus'; longius autem 'externum — nomine aliquid' ab eodem in codice Mediolanensi. *impie* Orelli, Baiter. *impia*. 'numquid adulescentiam L. Flacci notasti' supplet Beier, idem statim 'quia suspitiose dici poterat, criminabare'. *potuit voluptate corrumpere* add. Baiter. || 3, 6. *laudabatur* Pluygers. *laudatur*. 'esse spe falsis' Pluygers. || 7. *turpe compendium* incl. Bremi. || 5, 12. *autem* incl. *existimatio verba* Pantagathus. *existimatio vestra C. et ineptiae ser. tenebrae. impudenti ser. in impudenti*. 'sed' prius abesse malim. *his nervis* Garatoni. *his verbis C. his viribus* Wolf, Jeep. || 6, 14. *vehementer* om. b, incl. || 7, 17. *paulo* incl. Pluygers. fuitne 'paulo nimium'? *atque omni* Pluygers. *deduxi* Halm. duxi. || 10, 22. 'scite reprehendit' Mommsen. || 23. *testium* om. s, a, al. incl. Baiter. *ipse* incl. Pluygers. 'vocem quandam temerariam' Pluygers. || 11, 25. *reliquis* incl. *cuius familia ser. cuius ex familia. qui primus — constituta est quae* incl. *sed qua, ser. sed quod s. sed id quod t, a, Baiter. sed in qua p, f, E. florere generis sui gloriam p, f, Lambin., Orelli, Klotz. florere in generis sui gloriam ('gloria' s). acerrime* incl. Ruhnken. || 14, 32. *in numero — sumptus ser. in numero — sumptus? discriptione — discripsit* etc. Bücheler. *descriptione — descripsit. in provincias* incl. Mommsen. 'quid ut lucretur' Müller. || 33. *hac laude* Pluygers. *laude. 'laude ea' Baiter. superiorum* Pluygers. priorum. || 15, 34. fuitne: 'prodeant. procedit unus Aselepiades.'? || 16, 37. *enim* incl. Mommsen. *obsignata*

Ciceronis vol. IV.

Lambin. consignata. || 17, 40. 'subit enim' Pluygers. *consensuque C. 'concurasuque' Pluygers. fo: conventuque. ac dicto testimonio* incl. Pluygers. *testimonium* incl. Pluygers. || 18, 42. *at qui* Baiter. et qui. || 19, 45. *haec una* Pluygers. huic una. *Heraclidem* incl. || 20, 46. *Siloga* Garatoni, Baiter. *Siloga V. Stola s, Klotz. || 47. discipulos adulescentis* Rau, Klotz. *adulescentis. acceperat V, Arusian. Mess. p. 223. 'ubi nihil possent discere nisi ignorantiam litterarum' add. s, t, a. illic persequitur* Pluygers. ille persequitur. || 21, 51. *tu testem* om. b, incl. *nondum* add. Faernus, om. C. || 22, 52. *studia et* om. s. incl. *Pythodori, Aetidemi, Epigoni*. Baiter. *pythodoria et idem iepisoni V, s, a. Pythodori, Aetidemi, Lepisones E ('Archidemi' Klotz.) || 53. mihi* om. s. incl. || 23. *vere V. severe. || 54. quo* incl. || 24, 57. *an id quod Pergami?* fortasse alterius civitatis nomen latet in 'an id'. 'quid Pergami' Ernesti, Pluygers. || 25, 60. 'cum omni vestigio' s. 'cum vestigiis' velit Garatoni. || 26, 61. *se* om. C, incl. Baiter. || 62. *eteorum eadem terra parens, alitrix, patria dicitur* om. s, incl. || 63. *tribunum militum* Gulielmii. *militem. || 27, 64. illam gentem* incl. Garatoni, Baiter. 'Acolis — Doriis' Lachmann, Garatoni, Baiter. || 65. *de tota Caria corruptum videtur. || 28, 67. prae re publica* Baiter. *pro re publica. || 68. quandoquidem s. quoniam quidem. Pergami non multum. deest, quod vidit* Pluygers. *nomen legati, ut antea summae indicium desiderat* Mommsen. || 69. *quam deo cara, quod servata* Bernays, qui idem glossema indicavit hoc esse. *quod elocata quod servata. || 29, 70. sed tamen Pergameno C. sed tamen in Perg. E. ('in' incl. Orelli, Baiter.) Tyriam* incl. Mommsen. Tyriam. || 71.

C

*fidelissimosque socios* Lambin. fidelissimos socios. *tota Asia* s. tota ex Asia. ('ex' incl. Baiter). || 72. *longe est* Baiter. longe. || 73. fo: 'sciunt haec homines nobiles, sciunt boni viri, sciunt denique nostri homines omnes, qui in ea regione negotiantur.' || 30, 74. *mulierum* Pluygers. mulieribus. *rebus* incl. Orelli, Baiter. || 31. *haberem* Baiter. habereme. || 76. *isti igitur* Mommsen. igitur illi Crat., Baiter. illi igitur, illi Orelli, Klotz. *Pergameni* incl. || 32, 77. *olim* ante 'solita sint' desidero. || 78. *sed in latentem* add. b. *recita. LITTERAE Q. CICERONIS* Mommsen, Baiter. recita litteras Q. Cicero. Klotz. || 79. *at haec* Lambin., Klotz, Baiter. ad haec E. nullo iure Hervag. nullo in iure E ante Kl. neque re. Crat. neque in re. E ante Baiter. || 80. *Apollonide* H. Stephan. Apolloniae cett. 'familiam responsum est, eius facta non videri; idem visum est postea Flacco, cum rem cognosceret: itaque decrevit' post 'maximam habiturum esse' add. Lambin. ex antiquo codice, cum essent ad eius oram ab aliena manu e regione huius lacunae adscripta. || 33, 82. *facete* Lambin. facile. aut fortasse fecisti f. (fecistis Crat.) aut \* fortasse fecisset. *ut te ex populi sermone exciperes* Madvig. ut tu ex pop. serm. excideres Manut., Baiter ('ut tu ex'). *haud veri simile est* incl. Madvig, et arcte adiungit 'ita scitote', a quibus verbis volgo nova perodus initium capit. || 34, 85. *illud* om. s. incl. || 86. *atque* Halm, Baiter. itaque. *extorquere* incl. || 35. *nihil istorum* Nauger. nihil doti istorum C. || 87. *orationi suae* Garatoni, Schütz, Bremi. religioni suae. || 88. *iudicatur* Pluygers. iudicatis. || 36, 89. *adcumulateque* s. cumulateque. || 37, 91. *minus igitur lucri facit* incl. || 92. *qui sis, ipse igitur ille* t. L multi. quis, ipse igitur ille s, Baiter. quis

is est igitur? ille ipse f, Lambin; Orelli ('ipse ille'). || 94. *disputo postulo* s. a, f. *postulo* incl. Mommsen, Baiter. || 38, 96. '*duces principesque*' s. fo: auctores principesque sive 'auctores' incl. || 40, 102. *C. Pomptino* Lambin., Baiter. 'C. Pomtinio' C, E. || 41, 104. '*si*' add. Baiter. || 42, 106. *fortissimi* om. s, Baiter; incl.

#### M. TULLII CICERONIS PRO P. SULLA ORATIO.

1, 1. *perdomiti* Halm. con. in ed. Lips. et in appendice. redomiti. || 3. *inflammandae huius urbis — delendae civitatis* v, ut Spengel coniecerat. inflammandae huius civitatis — delendae urbis cett. C *mihine* Halm. michime v. mihi. || 2, 6. *quis his nostrum* Ernesti. quis iis horum. ('eis' Garatoni). 'si defendas, quem' t. s, 14. 'nulla suspitio' incl. Mommsen. || *Autronii fuit* C. fuit Autronii a, Halm. || 16. *mediocri*. fo: modico. || 17. *legiones* incl. Hansing, Halm. || 6, 18. *in meis aedibus* Lambin., Klotz. in meis sedibus v. in sedibus meis. || 20. fo: 'at idem'. *nec homo* incl. Pluygers. *nec reus* Pluygers. nec res. || 10, 29. *modo* om. Orelli, incl. Halm. || 30. post 'de scelere P. Lentuli' unum aut plura nomina excidisse videntur. *de Lentulo* incl. Halm. 'de vinculis' Jeep. || 31. *autem* om. t incl. Halm. *id* incl. Ernesti. *virtute animi* V, Klotz. animi virtute. || 11, 34. *confectis* Baiter. confessis. || 12, 35. *a tua dignitate* s. Orelli, Klotz. a sua dignitate. *dolor me meus* Orelli, Halm. ed. Lips. dolor meus. || 14, 40. 'me accusat' incl. Pluygers. || 41. *institui senatores* a, Seyffert. constitui senatores. || 15, 42. *quid? deinde quid feci?* Huldricus. quid deinde? quid feci? *divisi totae* v. divisi toti. || 43. 'ne qui posset — comminisci' Cobet.

|| 44. fo: 'aut cum familiari aliquo meo'. Baiter incl. 'aut cum familiari meo'. 'aut cum' delet Cobet, et 'familiari tuo' scribit. || 16, 46. 'concedo amicitiae' Ernesti. || 47. *quia reconditi* Pluygers. qui reconditi. *gratiam* incl. Pluygers, Campe. || 17, 48. *cognovit* 3 lag. Lambin. cogitavit. || 49. *pater tuus* incl. Baiter. || 18, 51. *Cornelium* incl. Cobet. *sed quid dixi* Madvig, Halm, Klotz. et quid dixi. || 52. *descriptio*. Bücheler. descriptio. || 19, 55. omnia inde a 'iam si in paranda familia' usque ad finem § videntur Ciceronis responso tribuenda esse. || 20, 58. *putavit* Huldricus. putaret. || 21, 61. *ab istis* Halm. ab his t. ab illis cett. C. 'de amputatione' Jeep. || 22, 63. *qui si id promulgavit* Halm, Klotz. qui id promulgavit t. qui id promulgaret (s. promulgare) cett. C. 'si' notandum erat. *videatur* Garatoni, Halm: videbatur. *ut restitueretur* Pantagathus. ut stitueretur C. *at nihil* Orelli, Halm. nihil. || 23, 66. *tumultum nobis* Schütz. metum nobis. || 25, 71. *conatum* incl. Lambin., Halm, Klotz. || 26, 72. *quis misericordior inventus est* add. e. *quam ante* multorum' add. Hervag. ex Gellio VII, 16, 6. om. C. || 73. *quae domus celebratio* Jordan. quae domestica celebritas Pluygers. quae domus? quae celebratio C, Halm. || 27, 76. *civitas posset* Ernesti. civitas possit C. || 28, 77. *deserviet* Halm. deserit (s. deseruit) C. || 79. 'vita valeat ad poenam' Jeep. *et ad poenam* Jordan, Halm. ed. Lips. ad poenam. || 29, 82. *his temporibus* t. iis temp. *optime* Spengel, Halm. apertissime. || 30, 83. 'et animum inducam' Madvig. || 84. *pro patria* Cratand. pro patriae C. || 31, 88. *habebit* Pluygers. habet. || 32, 91. 'relictus est' F. C. Wolff. 'relictus esse' cod. Parcensis, Halm.

M. TULLII CICERONIS  
PRO A. LICINIO ARCHIA  
POETA ORATIO.

1, 2. *huic uni* Lambin. huic cuncti. C. || 3, 5. *sed etiam hoc* C. iam hoc. Halm ed. Lips. 'specimen iam hoc' Madvig. || 4, 6. *cum M. Lucullo* Schütz, Baiter. cum L. Lucullo. || 7. *Silvani* Manutius. Silani C. || 8. *Grati* Gruterus (ut 12). *gratis* C. *venerunt* incl. Mommsen. etiam 'huius iudicii causa' commodius abesset. 'requirere quae habere' Cobet, Halm ed. Lips. || 9. *in his* Halm. coni. his. || 11. 'clarissimo imperatore' om. s. *ita* om. Lambin. *quibus tu* Ascens. 1511. 'quibus cum tu' Halm. coni. quem tu. *L. Lucullo proconsule* Graevius. L. Lucullo p. r. et cons. g. L. Lucullo praetore et cons. cett. C || 6. 'convincetur' Lambin. || 12. *eis* Madvig. his C. 'aut commodum meum abstraxerit' Garatoni. aut commodum aut otium meum abstr. 5 lagg. || 13. *ideo* 11 lagg. adeo cett. C. eo. ('id eo' om. 'hoc' C. Nauk.) *est* add. Ald. || 14. 'coniecissem' coni. Halm. || 7, 15. *est certe* Baiter. est certum ('certum' om. Mommsen et Cobet). *quod respondeam* g, e. quid resp. fo: 'atqui idem' s. 'at idem'. 'M. Catonem' C. Stephanus. Catonem. || 16. *colendam* incl. Mommsen. colendamque E. 'atque colendam' Halm. 'anini remissionem' Bonamicus, Halm, Baiter. *alunt* Hervag. agunt C, Klotz. || 9, 19. *qui et* Cratand. et qui C. *repudiabimus* Ald. repudiamus C, Klotz. || 20. 'item' om. p. || 21. *L. Lucullo imperante* Baiter. Lucullo imperante. *natura et regione* Mommsen, Halm ed. Lips. *naturae regione* C. *natura regionis* Baiter. *efferruntur* Madvig, Wunder, Baiter. haec feruntur C. || 22. *ex marmore. at eis* Hon. Fascitellus. ('e marmore') Klotz, Baiter. et marmoratis C.

'cuius laudibus' Mommsen, Halm. || 10. *Rudinum* s, Ant. Augustinus. rudem tum g. rudem tu e. || 24. *Ilias illa* Nauger. illi ars illa g, p. ars illa e. *Mytilenaeum* Baiter. Mitylen. (mitil. g.). || 16, 26. *etiam in eis* Madvig, Baiter. etiam in his Amm. Marc. XXII, 7. etiam illis C. etiam in illis E. || 28. *adornavi* Klotz, Baiter. adortavi g. hortavi p. adhortatus sum. *et tam brevi* incl. Garatoni. || 29. 'dimetiendam' Lambin. 'dimetandam' Bergk. || 12, 31. *venustate* 118, Muret. *venustate. estque ex eo numero* Madvig. isque est ex e. n. C. || 32. *quae autem remota mea* Jeep. (addidi a) quae firme a me C. 'quae forensi aliena' Halm. 'quae a foro aliena' Garatoni.

M. TULLII CICERONIS  
ORATIO CUM SENATUI  
GRATIAS EGIT.

1, 1. qua nihil potest esse iucundius om. p<sup>1</sup>, incl. Halm. || 2. *debemus* Lambin., Orelli. debeamus C, Halm. || 2, 3. *delituit* e, f. Halm in append. deluit p. delevit. || 4. *quam meus inimicus* Lambin. cum meus inimicus. || 3, 5. *postea vero cum* Spengel. postea vero quam. || 7. 'summi viri et clarissimi viri' p, g. 'summi et cl. viri' coni. Halm. || 4, 9. *post Romam conditam* add. e, f, Orelli, Klotz. om. cett. C, Halm. incl. *non* om. e. del. F. A. Wolf. incl. *inimicus* incl. Halm. || 5, 12. 'nihil ageret' velit Halm. || 6, 13. *non vis consilii, non dicendi facultas, non scientia rei militaris, non cognoscendorum hominum studium* Lambin. (qui 'non consilium') Halm. non inconsulta studium non dicendi vitia rei militaris non e. hominum. p, g, s. || 7. *isne quemquam, me quidem non — decepit?* Jeep. isne, quamquam me quidem non — decepit. || 17. *sicut eras eo tempore* incl. Garatoni, Halm. de-

*pellerent* Halm. depulissem e, f, Pal. IX, 19, unde 'depulissent' Lambin. (in cett. C deest verbum.) || 18. *item ad vicinum* e. ad item vicinum. || 8, 21. officia studia C. studia incl. officia ac studia Halm. || 9, 24. 'et defendendum' om. e, f. || 10, 25. illum Manut., E. illum Metellum C. *Metellum* incl. 'honestis omnibus ne luctuosus tandem' p, unde Halm: 'honestus omnibus sed luctuosus tamen.' || 26. *exstitit* e, Pal. IX, Crat. demittit p, g. dimittitur s. 'fuit is' Manut. 'tum fuit' Halm. *ante hoc suum* e, f. 'ante hoc unum' cett. C. || 11, 27. *vos graviter* e, Klotz. graviter vos Halm. graviter C. *eis* add. Lambin. || 29. *consignarit — putarit — elaborarit* Lambin. consignavit — putavit — elaboravit C. || 12, 30. *silere nullo modo possum* b, 110, 21, 24, 65. ('silere n. m. possunt' p.) || 13, 32. *pactionibus se* Halm. pactionibus eos. || 33. *hoc auxerunt* e, Halm. in hoc auxerunt C. unde Halm coni. 'ii hoc aux.' in incl. *mihi ipsi* Heuman. mihi ipse C, Klotz. || 14, 35. *imperator* incl. Garatoni, Halm. *cum fuerit quaestor non imperii sed doloris mei* incl. Garatoni, Halm. || 15, 36. *binorum* Madvig. *divinorum. nam et importata est* e, Orelli, Klotz. nam imp. est. || 37. *Metellarum* Manut. Metellorum. C.

M. TULLII CICERONIS  
ORATIO CUM POPULO  
GRATIAS EGIT.

1, 1. *desiderium* incl. Halm. || 3. *in incolumitate* Halm. incolumitate p. 'incolumitatis' sive 'incolumes' cett. C. || 2, 5. *amissa esset* Ernesti. amissa est C. || 3, 6. *aut Metellarum liberi* incl. Halm. *valebant* Halm. 'valent' s. 'valerent' C. || 7. et inaudita 'pietas atque virtus' coni. Ernesti. inaudita satque virtus p.



inaudita auctoritas atque virt. cett. C. || 8. 'nam tanto' Halm. *me om.* p. cod. Lambin., Halm. incl. *posset adesse mihi* Halm. *posset esse, mihi.* || 10. 'ut vita valeret' Jeep. *perficeretur — perfregit* p<sup>1</sup>, g, e, v, Mommsen. *proficeret — perfecit. consule add.* Mommsen. || 5, 11. *irretiti* Cratand. *irritati.* C. ('*irinati*' p.) de solem religione p, et g, e (sole). 'de solemni deorum religione'. coni. Halm. || 12. *et voluntate* C praeter 124, qui om. 'et'. 'ex voluntate' Mommsen. || 13. *constrictum* C. *me constrictum* Crat. et Halm, qui malit 'constrictum me'. || 6, 14. *dum ego* Halm coni. cum ego C. *absum* C praeter aliquot l. *abfui. parietum* se Halm. *parietis* C. ('*parietum*' s). || 16. *ab eodem* Ascens. 1511. *ab eadem* C. *vos om.* e. incl. Halm. || 17. *in eo me loco* Ascens. 1511. *in eo loco.* C. || 8, 18. *en ego tot* s, L complures, Klotz. 'his ego' Halm. ('*tot*' om. p.) *me diversis locis* in C positum incl. || 20. 'vita utar' Jeep. || 9, 21. *deberent* Ernesti. *debuerunt* C. *facinora eorum singula* Halm. *facinorum singula* p. *facinora singula* cett. C. *genera singula* E. *mili Quirites* Halm. *mili quin p.* mihi quam g, e, v. *mili.* E. || 22. *meritis* alterum om. g, e, v, al. incl. Halm. || 23. *leniri* Jeep. *teneri. bene meritos ne colas* l 25. *bene m. colas* C. cett. 'ne b. m. colas' Halm. 'ut bene meritos colas' Jeep, quod nunc praeferimus. *remittere* Garatoni. 'rependere' Jeep. *repetere* C. *utique* Lambin. *utrumque* s. 'verum neque' Jeep. *utrumque* C. † *in eorum aperte utitur* C meliores. 'in eo suo iure aperte utitur' Mommsen, Halm. *mox aperte laudatur* C deteriores, E. 'in eo rumore certe utitur' Jeep. *atque in officio — dissolvit* incl. Klotz, Halm. om. 7 L. || 10, 24. *neque solum me vivo et anima defecerit mea ex Mamertini gratiarum*

*actione* Juliano C. 32, p. 208 ed. Jaeger suppl. Halm. in p, g, e, v legitur: 'sempiterna cum anima expirabo mea sed etiam cum me ulla monumenta', unde *multa monumenta* Halm. *e re publica ferenda* Jeep. *ferenda.*

M. TULLII CICERONIS  
DE DOMO SUA AD PONTIFICES ORATIO.

1, 1. *religionum ius* Halm. *religionibus* C, β. || 2, 3. *specie ipsa dignitatem rei publicae sustinent* C praeter m, E. ('*spe ipsa*'. β) *specie ipsa et dignitate rem publicam sustinent* m, Baiter. || 4. *inquit tum.* Hottom., Baiter. *inquit tu* C, E. *tunc ad hos* Halm. *tum ad hos.* E. *tu ad hos.* || 3, 7. *an ea res erat illa* Halm, Baiter. *an aures regatila* p. 'an res' g, m, v. || 4, 8. *in sen. ipsis non venire licere* Jeep. 'in sen. non esse veniendum: qui cum tum in senatum ipsi non venirent, non intellegebant' Halm. *tum in senatum ipsi non venirent.* || 9. *deinde eam, quam* p<sup>2</sup>, β, Orelli. *eam* C. ('*de eam*' p<sup>1</sup>). 'denique eam' Halm. || 5, 19. *quae vis, quae causa* Orelli ex codd. quibusdam, Junt. Lambin. *vis quae causa* C. *ius quae causa* β. *quae causa* Baiter. *cum illis* Halm. *illis.* ('*illa*' Orelli, Klotz.) *senatum — oportuit* Madvig. *senatus — potuit.* || 12. *a te fictum* Jeep. † *delictum.* || 7, 16. *in ea re necne ratio* Garatoui, al. *in ea regeneratio* C. (p, m, in ea re... ratio g.) || 8, 18. *fuisse et* Mommsen, Baiter. *fuisse* C. ('*potuisse*' p.). *non solum a fume* Halm, Baiter. *non solum ea me. p.* non solum eam C cett., E. || 19. *haberi oratio potest* Baiter. *haberi ratio potest* β. h. o. *posset* C. ('*h. o. est*' p. || 20. *latrocinium* Naugerius, al. *patrocinium* C. ('*patrimonium, vim*' Naegelsbach). *si ius* Halm, Baiter. *si quis.* || 9, 21. *redarguo tuam?* Naegelsbach. *redarguo tuam.*

(‘neque in hoc — tuam’ Halm.) in ipso Catone incl. (post ‘subduxeras’ supplet Naegelsbach: ‘inconstans fuisti, nam quem’) || 22. *quod* add. Lambin. *cognominibus* p<sup>1</sup>, Baiter. cum nominibus. *idem in posterum* del. Lambin., Baiter. incl. Klotz. a *tribunatu* Lambin., Baiter. tribu-  
natu. *at sive* Ernesti, Baiter. aut sive. || 23. *cum pacatissimis* Wesenberg, Baiter. *pacatissimis. ex sui* Niebuhr, Baiter. ex vi C. (‘vi ex’ Orelli, Klotz.) *generi* Robertellus, Orelli, al. *soceri* C. || 24. *decreta* incl. (del. Hotoman, Baiter.) ‘decretas’ Klotz. || 10. *equi* Halm, Baiter. sed qui C. || 25. *animo* v, Baiter. *animo* modo p, g. *animo* me E. ‘mutila-  
tam’ Junt., Ruhken. *ex lege* Halm, Baiter. *exige* p<sup>1</sup>. ex re Orelli, Klotz. || 11, 27. *industrius* Lambin., al. *industrius* C. *in senatu* 19, Lambin., Baiter. *senatui* C, E. *aeque atque* Klotz, Baiter. *aeque* C. || 30. ‘illud vero esset’ Halm. || 12. *idem* p<sup>1</sup>, Baiter. *idem* cum. *lacunam* notat Baiter. || 31. ‘quasi hi’ Baiter. *pontifex* — *civis quam* Gulielmius, al. *pontifices* — *cuiusquam* C. || 13. ‘nunc radicitus (vel ‘eam rad.’) Halm. *radicitus* Lambin., Baiter. non *radicitus* C, Aquila Romanus §. 7. *hodie esse* p, Baiter. *esse*. || 14, 36. *adeptio* Pantagathus, al. ‘aditio’ vel ‘adoptio’ C. || 37. *dicere se* Baiter. *dicere*. (diceres C) *sed ut e patriciis exeat et* Orelli. *se ut e p. exeat* C. ‘sed ut si e p. exeat’ Halm, Baiter. || 38. *patriciis* Baiter. *patricii* p<sup>1</sup>. *patricius* g. *patricio* m, v, s. || 15, 39. *infirmas igitur tua acta* Madvig. *infirmas sunt igitur tua acta* C. i. s. i. *tua sententia acta* E. || 40. *a te interrogati*. Mommsen, Baiter. ‘te interrogati’ v. ‘te interroganti’ p. ‘te interrogante’ m. ‘quasi non ipse’ supplet Halm ante ‘per suum’. *lacunam* notavit Baiter. || 42. *dicerent* Naugerius, al. *dicerem*.

C || 24. *civi ita de rep.* Baiter. *civi a de rep.* p<sup>1</sup>. || 43. ‘tam iure atque etiam lege’ velit Halm. *Villius* Baiter. *ulius* p<sup>1</sup>. (rullius p<sup>2</sup>, g) ‘Rullus’ Orelli, Klotz. || 17. *privatis hominibus* Baiter. (privatis in hom.) p, v. ‘privatis ... hom.’ g) *privis* hom. Scaliger, Orelli, Klotz. || 44. *fecit etsi* Orelli, Klotz. *fecit* si C. *re*, *etsi* Mommsen, Baiter. || 45. *ne improdicta* Mommsen, Baiter. *ne in prodicta* p, g. *ne nisi prodicta. sublatum sit* Naegelsbach, Baiter. *sublatum* est. || 18, 46. *et gentis* Halm, Baiter. *et gentis* p<sup>1</sup>. *egentis* p<sup>2</sup>, g, v. || 48. *socium* del. Garatoni, Baiter, incl. Klotz. || 19, 49. *per medium forum* Lambin., al. *per medium* C. *alienae dominationis* p<sup>2</sup>, Baiter. *alienae* *dominae* *dominationes* p<sup>1</sup>, g, m. *alienae damnationis* E. || 50. *sortitore tulisti* Madvig. *sortitu rettulisti. bonis* g, m. † *in bonis. consiliariis* Madvig. *consularis*. (‘consularibus adiutoribus’ coni. Baiter) *hominem* g, Garatoni, Baiter. *hominum* p, omnium m, E. *documentum* supplet Baiter. (‘architectum facinorum’ etc. velit Halm.) || 20, 52. *sub praeconem* Wesenberg, Baiter, Klotz. *sub praecone. dedi* E. *dedisses* C. *dedisses* m, Orelli, Klotz. *dedisset* p, g, Baiter. *scriberes* Orelli, Klotz. *scriberet*. || 21, 54. *in conventu* Manutius, Baiter. *conventu*. || 55. *spoliarent senatus* Markland, Baiter. *spoliarent*, *senatum*. || 22, 58. *nova manus* Graevius, Baiter. *novanus* p<sup>1</sup>. *nova vis*. || 23, 60. ‘etiam bona’ Naegelsbach. || 61. *interneivumque* Graevius, Baiter. *innocivomque* p. *intestinumque. excindere* Manutius, Baiter. *excipere* C. *excidere* E. *Lacunam* explet Lambin.: ‘sic vos vestrum in me crudele et immane odium in meam domum profudistis’. || 24, 62. *senatum consules vocabant* Baiter. ‘senatum consules non vocabant’ Naegelsbach. ‘senatus,

consules tacebant' Jeep. senatus consulta volabant. || 63. *optatissimum fuisset* 19, Baiter. *optatissimum* C, E. opt. erat Orelli, Klotz. || 25, 65. *quid ageres — amandas esse*. desperati loci omissis Lambini, Mommsenii, Halmii coniecturis cum Baitero lectiones C repraesentare placuit. || 67. *compulerit* add. Halm. om. p<sup>1</sup>. coniecerit p<sup>2</sup>, g, m. || 26, 68. mihi ac meis E. mihi C. *ac meis* incl. Baiter. del. *iure scriptum* Lambin., Baiter, Klotz. inscriptum p, E. proscriptum g, m. *consulibus* m, g, L. consules. || 69. *ne quae* p, Baiter. *ne qua. oreretur* Halm. ('oreretur' p.) oriretur. || 27, 72. *flagitiis* Baiter. factihis p. factis. || 28, 75. *esset* Faërnus. *essem* C ('esses' Orelli). || 76. *exussit* p, Baiter. excussit. 'ne quis unquam' Halm. *emendanda* C. emenda Orelli. invitanda Mommsen. || 29. *non negent* m, Orelli, Klotz. † *negent* Baiter. ('non' om. p, g, v.). 'quod nemo neget' postulat Baiter. || 77. *pro* om. C. *sui potestatem* Mommsen, Baiter. impietatem s. impietatem C. libertatem Orelli, Klotz. || 30, 78. *referri* Faërnus. *referre*. *Latini nisi* Klotz, Baiter. *Latini*, ni p<sup>2</sup>. *Latini* p<sup>1</sup>. *Latini* hi C. *adigebantur* Halm, Baiter. *faciebant*. || 79. *an vero* Lambin., Baiter, Klotz. *hanc vero*. || 80. *qui propter* Baiter. propter. *pernoctasset* C. *pernoctans* Orelli, Klotz. || 81. *per gratam* Madvig. *per gratiam*. || 31, 82. *ne me meo* Baiter. *ne meo* p<sup>1</sup>. *ne meo* me. *quibus damnatis* P. Faber, al. quibusdam damuatis C. || 83. *ex Clodio* v, β, Baiter. ex Cloelio C. e Sex. Cl. E. || 84. '*ipsis*' om. Baiteri operae. || 32, 85. *et* om. Junt., Baiter, incl. || 33, 87. *et* om. Lambin, Baiter, incl. *cum re publica, redii cum* Pantagathus. *cum reip. dicam* C. *petente* pβ. '*patientem*' Manutius. '*repetente*' Halm. *et temeritatem* Baiter coni. temeritatem. || 90. *ille populus* C.

praeter p<sup>3</sup>, β, Baiter. ille, ille populus. 'homines ordinum' Baiter. 34, 91. '*in Ti. Gracchum*' suppl. Baiter; idem lacunam primus indicavit. *in gerenda re* Halm, Baiter. *in gerenda re publica*. || 92. *res publica venisset* Halm, Baiter. *res pervenisset*. *odium tenebat* Hervagius, Baiter, Klotz. *odium retinebat*. (odiumne tenebat p.). || 35, 93. *mea unius Mommsen, Baiter*. (ea unius C) illius E. || 94. '*quod ego consul*' Halm. (quod ex quo p.) fo: quod ego. || 95. *peccatine* Halm, Baiter. *peccati me. me profugisse* p<sup>1</sup>, Baiter. *profugisse. id* incl. Mommsen. || 36, 96. *remp. recreari* Naegelsbach, Baiter. *recreari*. || 37, 98. *cum dolenter feras et sis* Baiter. *cum dolenter asetsis* C ('assis' p<sup>2</sup>, g). *ut dolenter absis* E. *divina est* g, Baiter ('divina sit' m, v). *divina* p, E. || 99. *dirumpatur* p, v, Baiter. *dirumpatur*. 'atque pestis patriae audiat' Baiter. *remp.* add. Garatoni, Baiter. *qui consul* Garatoni, Baiter. *ut consul*. || 100. *urbis* incl. Ernesti. 'mihi potius' Halm. || 38, 101. *aedem* add. Lambin., Baiter. *et quia illud aequum* Spengel. † *et qui aliud aequum. iustitia poenae* Halm, Baiter. *stultitia poena* C. *est eversa* Baiter. *eversa. publicata est et ev.* Klotz, Baiter. *publ. et ev. est* Lambin. *publicata et eversa* C. *facinoris memoria* Baiter. *facinus memoria*. ('f. memoriae' p<sup>1</sup>). || 102. *ex senatus sent.* Garatoni, Baiter. *et sen. sent.* || 39, 104. *quam tu* Lambin., al. *eum tu* C. || 40, 105. *aspicite* p, v, Baiter. *aspicite, aspicite. quoniam ille* Naegelsbach, Baiter. *cum ille*. || 41, 107. *si honesta deest* Baiter. *si honesta* C. *una* om. g, v, incl. Baiter. *vim* incl. Mommsen, Baiter. || 108. *illa tempestate me* Baiter. *illa tempestatem* p<sup>1</sup>. ('illa me tempestate' Garatoni). *illa tempestate. ut se* Garatoni. *ut te. C. ut a te — collocaretur* E.

(‘collocaret’ C, Garatoni, Baiter.).  
 || 42, 110. *negares* C, E. *vetares*  
 Halm, Baiter. *me* add. Halm, Baiter.  
 h. *obsideres*. Graevius, Baiter. || 42,  
 111. *a Tanagra* Baiter. (a Tanagras  
 p, v, g,  $\beta$ ) a Tanagris E. || 112. ‘isto-  
 rum licentiae’ Markland. *victrix*  
 Ernesti, Baiter. *ultrix*. || 113. *ante*  
 add. Mommsen, Baiter. || 44, 115.  
*cogitavi* Lambin. *excogitavit*. *lici-*  
*tatoribus* Pantagathus, al. *litigato-*  
*ribus*. *aestimabatur* Garatoni, Baiter.  
*aestimabat*. || 116. *in illis* Baiter.  
*illis*. (‘tantis in tenebr.’ Pantaga-  
 thus). *cui* Leon. Usteri, Baiter,  
 (‘qui’ C.) ‘quod’ aut ‘quo’ E. *tan-*  
*tam tam* Halm, Baiter. *tantam* C.  
*tam* E. || 45, 117. *opus erat auctori*  
*tate* Markland. Spengel ‘posuerat  
 auctoritatem.’ lacunam post ‘omni-  
 bus’ notaverunt Mommsen, Baiter. ||  
 118. ‘quanta quanta’ Lambin. ‘alium  
 praeter illum’ supplet Mommsen. ||  
 46, 120. *quem* mei dissimilem p<sup>1</sup>,  
 Baiter. *aliquem* m. d. *dicilis* N. An-  
 gelius. *dicis* C. *reperiet* E. *repper-*  
*erit* p<sup>2</sup>. *repperit* p<sup>1</sup>, g. ‘et ponti-  
 fex et tribunus pl.’ Baiter. et tri-  
 bunus pl. C. (tribunus plebis idem  
 esse non potest pontifex Ernesti.  
 tr. p. i. e. pontifex n. p. Orelli.)  
*valvae* incl. Baiter. || 47, 122. *loquor*  
 — *disputo* Manutius, al. *loquar*  
 — *disputabo* C. *traditis* Madvig.  
*proditis* Naegelsbach, Baiter. *prac-*  
*ditis* C. || 123. *in iniuria*  $\beta$ , al. *ini-*  
*iuria* C. *aeque sollemnibus* Baiter.  
*coni. paene soll.* || 124. *num qua*  
 Baiter. *numquā* C. || 48, 125. *ea*  
*iura* g<sup>2</sup>,  $\beta$ , E. *ci iura* C. *iura* Baiter.  
*nullum habet ius*  $\beta$ , Ernesti, Orelli,  
 Baiter. ‘nullam habet religionem’  
 Lambin., Klotz. *nullum habet* C.  
*verba prisca* Halm, Baiter. *prisca*  
*verba* E. (‘prisca iura’  $\beta$ ). *prisca* C.  
*metum* add. Halm. *timoremque* p<sup>1</sup>,  
 Baiter. *timorem* qui C. *timorem*  
 quid E. *illetibi*. v. E. *ille* C,  $\beta$ , Baiter.  
 || 49, 127. *a gentili tuo* Lambin.,

Orelli, Klotz, Baiter. ‘a gentiliatu’  
 s. ‘a gentili actu’ C. *ius totum* C,  
 Baiter. *iusto tum. religionum* C,  
 Baiter. *religionum perito. deditet*  
 Baiter. *dicit. et qui* Baiter, qui  
 ‘quo modo’ nunc incl. et quid et  
 quo modo. *consecrari* Baiter. *con-*  
*secrare. ipsi ei loco quo* Madvig.  
 ‘ipsi loco quo’ Baiter nunc. || 128.  
 ‘non privata’ Mommsen. ‘ipsae’  
 Naegelsbach, Baiter in ed. || 50,  
 129. *Brogitari* Halm, Baiter. *ro-*  
*gitaris* p<sup>1</sup>. *rogitatis* C. *rogatis*  $\beta$ .  
*regiis* E. || 51, 130. *senatoriae digni-*  
*tatis* Madvig. *senator de dignitate*  
 p<sup>1</sup>. *senatorium de dign.* v. *senato-*  
*rum de dign.* Baiter. || 131. *impu-*  
*dentiae* p, E, Baiter. ‘pudicitiae’  
 Lambin., Ernesti, Klotz. post ‘dedi-  
 cari’ Naegelsbach supplet ‘signum  
 Concordiae’. || 132. *uterere* C.  
 ‘vetere’ Baiter (‘veterem’ m.) ‘more  
 veteri ad p. det.’ Halm. *quodam at-*  
*que inaulito* incl. Baiter. *de dedica-*  
*tione* Halm. *dedicationem*. || 52. *ex-*  
*cellere* Baiter. et *seclere*. || 134. *ca-*  
*pule bustum* Garatoni, Baiter, Klotz.  
*capitibus* tum C,  $\beta$ . *caput bustum* E.  
*tremibunda* p, Baiter. *tremebunda*.  
 || 53, 136. *iudicandi* p, g, v, Baiter.  
*dedicandi. eam* Baiter. *ea*. ‘Fla-  
 minio’ Baiteri operae. *sub saxo* C,  
 Baiter. *sub sacro saxo*  $\beta$ . *sub saxo*  
*sacro. nome* C,  $\beta$ . Baiter. non. ‘per-  
 secutus sit’ post ‘senatus’ supplet  
 Lambin. ‘egerit’ Halm. *cognoscetis*  
 S. C. Baiter. *cognosectis* C,  $\beta$ . *co-*  
*gnoscetis. recita senatusconsult-*  
*tum. SENATUSCONSULTUM.* E. || 137.  
*iam aram* Baiter. *eam aram. reli-*  
*gionis* Markland, Baiter. *res* C. *rei* s.  
*reip. E. in eius civis aedibus* Madvig.  
*in hisce rebus* ut C, Baiter. *in*  
*huiusce rebus* et  $\beta$ . *in civis huiusce*  
*aedibus* E. *qui in urbem* Madvig.  
*ut urbem* p<sup>1</sup>. *ut in urbe* quam. ab  
*equitum* nota C, Baiter. (‘aequitum’  
 p.) ad equitum notam E. *doloris* C,  
 Baiter. *ad dolorem* E. *sublato* Q.



*Catuli* Baiter. sublatoq. catuli C. sublatoque Q. Catuli E. || 138. *eis* Lambin., Baiter. his. *prae re* p<sup>1</sup>, Baiter. praecipere C, β. 'praecipi' Orelli. 'praeiri' Halm. 'praebere' Mommsen. || 139. *e Ti. Coruncanii* Baiter. et coruncanis p. et quorum canii g. ex Coruncanii. *ne valeat* C, β, Baiter. nedum valeat. || 55, 140. *delatum est* C ('delatatum est' p), Baiter. delatum tum est. || 141. *pontifice et magistro*. C, E. et om. Baiter, incl. *inito furore* C. indomito furore Halm, Baiter. ignito f. ('inito' β). || 56, 142. *solis* Lambin., Baiter. solis. *praestantissime* Pantagathus, Baiter. praestantissimi. ('praesentissime' Ernesti.) *omne suum* Garatoni, al. omnes tum C. || 143. *fructum* p, Baiter. fructum ipsum. || 57, 145. *amentium* Mommsen, Baiter. amentia. || 146. cognostis p, g. Baiter. cognoscitis. *urbis patriae visu* Jeep. *urbis patribus* p. *urbis partibus*.

M. TULLII CICERONIS  
DE HARUSPICUM RESPONSO  
IN SENATU ORATIO.

1, 2. *atque* Baiter. ad. p. ac. || 3, 5. *odio dignitatis* om. p. incl. Baiter. || 4, 6. *vinciri* F. Fabricius. vincere. C. || 7. *iecerat* Ernesti. fecerat C. 'ut cogitet' coni. Halm. *esse se iam* Baiter. esse iam C. ('iam se esse' Orelli.) || 5, 9. *ex suorum cubiculo* C. 'ex suarum sororum cubiculo' Halm. || 7, 13. 'iniquum esset' coni. Halm. || 8, 16. *munendam* P. Faber. puniendam C. *putari* Halm. putaret. *in Velia publice* Palmerius. in ulla publice p. in villa publica cett. C. || 17. *ferrī* Halm. ferre C. *in inimici* Baiter. inimici C. contra inimici E. || 9, 18. *voce* add. E. *expiationes* Sigonius. explicationes p. explanationes cett. C. || 10, 20. *postulationes* Orelli. postulationes C. || 21.

*quando* Ernesti. quanto. || 11, 22. *Idaea* Faërnus. dea C (daea p.). *abavi* Fr. Fabricius. abavia. *aedile* F. A. Wolf. aedili. *e fornicibus* Baiter. fornicibus. *eludentium* Klotz. et ludentium C. || 23. *si tensam non tenuit* Ant. Augustinus. si terram non tenuit aut tensam C. *simpuvio* Arnobius adv. nat. IV, 31. simpuio p. simpulo al. codd. || 12, 24. *polluerit* Faërnus. pollueret C. *caveamve venisset* Mommsen. caveam venisset p. (venisset cett. C.) || 13, 27. *sacrificiū* incl. Ernesti. || 29. ante 'alterum putabo' locus de Deiotaro excidit. || 14, 30. *ensoris* Baiter. censoris C. || 31. *ad me nonnulli* C. 'nonnulli ad me' Orelli, Baiter. operae. *magmentarium* Mommsen, Baiter. aementarium C. *armamentarium* E hic et infra. *mea domo* Mommsen. 'mea domu' Baiter. meam domum C. *iudicio* add. m. om. cett. C. *liberata* p, Mommsen. libertatam C. || 15, 32. *nunc cum maxime* coni. Baiter. *anniversaria* Naugerius. anniversarii C, Klotz. || 17, 36. *in periurū poenam* E. in periurium et te ipsum inprime C, Baiter. || 37. *impune* add. Mommsen. *inde* P. *Clodium nemo* Halm, Baiter. ante P. *Clodium* p. nemo ante P. *Clodium*. || 38. 'flagrantis furoris' Nipperdey. 'fl. in sorores' Halm. *tibi iam maiora* Halm. *tibi maiora* p. *tibi at maiora* cett. C. *tibi ac maiora* Orelli, Klotz. 'insania matricidarum' Jeep. || 19, 40. *iam a dis* Halm, Baiter. a dis iam m, Orelli, Klotz. *iam* p. a diis g, e. 'auxilioque deum invitis eis deficiantur' Mommsen. || 41. *honeste* Gryphius, Baiter. homines p, m. et honestis g, e, E. *Saturninus* — *Sulpicio* p, Baiter. L. Saturninus — P. Sulpicio. || 42. *frudaret* p. || 43. *eaque res* Baiter. itaque res C. itaque res Orelli. itaque e, Klotz. *Julio* Manutius. totio s. tutio C. ||

21, 44. 'animi' Camerarius. animi et C. || 45. *senatus* g, e, v, E. *senatu* *senatus* p. *senatus* *senatus* cod. Lambin., Baiter, qui alterum 'senatus' del. in appendice. || 22, 46. *defensi* p, g. 'defensum iri' Halm. || 47. *haerent ea tela* Manutius. *haerentia* tela C. *arbitrabatur* Manutius. *arbitrabamur*. || 23, 49. *elatus est* F. A. Wolfeoni. *elatus*. *altitudines moenium obiectas* Baiter. 'altitudines, omnia moenia obiecta' velit Halm. *altitudines omnium obiecta* C. || 24, 50. *in sinu* N. Angelius. *in senatu* C. *cum eum* Baiter. *cum* p. *cum* illum eett. C, E. || 51. *utrum tandem* N. Angelius. *utrum tamen* C. || 52. *conivebant* E *contuebant* C. 'reditus ei in gratiam' Lambin. *inrepat* N. Angelius. *inerepat* C. || 25, 54. *et potentes* E. ('ac potentes' coni. Baiter) *potentes* C. || 57. *fictis vitis* *conquisitis* Baiter. *fictis* *conquisitis* p. *fictis* *conquisitisque* *vitis*. || 27, 59. *exhauriret gurgites* Halm, Baiter. *exhaurire gurgites* p. 'exh. g. possit' s. 'posset' C, E. || 60. *responso* Baiter. *responso* p. *responsum* g. *responsis*. || 28, 63. 'maria atque terrae' Jeep.

M. TULLII CICERONIS  
PRO M. TULLIO ORATIO.

*Antea sic hanc causam agere statueram recuperatores, ut infitiaturos adversarios arbitrarer, tantam caedem et tam atrocem ad familiam suam pertinere; itaque animo soluto a cura et a cogitatione veneram, quod intellegebam, facile id me testibus planum facere posse: nunc vero, postea quam non modo confessus est vir primarius L. Quinctius, sed etiam iuvare hac confessione causam suam putavit, video aliam mihi defensionis viam esse ineundam: antea enim in eo laborabam, ut quod arguebam, id factum esse ostenderem: nunc in eo consumenda est oratio, ut ne adversarii, quod infitari nullo modo potuerunt, cum maxime cuperent, id cum confessi sunt, meliore loco esse videantur. itaque tum vestrum difficiliter iudicium, mea facilis defensio fore videbatur; ego enim omnia in testibus cum ponerem, facile contra infitiantem dicturus eram, vos in ipsa infitatione adversarii aliquid scrupuli inventuri eratis, nunc contra vobis quid est facilius, quam de eo, qui confitetur, iudicare? mihi autem difficile est satis copiose de eo dicere, quod nec atrocius verbis demonstrari potest quam re ipsa est neque apertius oratione mea fieri quam ipsorum confessione factum est.*

Cum in hac re, quam commemoravi, mihi mutanda ratio defensionis, tum erga P. Fabium paulo temperanda est nimia illa lenitas qua antea famam illius tanto cum studio vel dissimulando vel excusando foveram, ut non minus diligenter illius existimationem, quam rem M. Tullii viderer defendere. nunc quoniam Quinctius ad causam pertinere putavit res ita multas, falsas praesertim et inique confictas, proferre de vita et moribus et existimatione M. Tullii, multis de causis mihi Fabius debet ignoscere, si minus eius famae parcere videbor, quam antea consuli: \* \* primum si L. Quinctius dicens pro homine



*alienissimo, vulgari quorundam patronorum more* putavit ad officium suum pertinere, adversario nulla in re parcere, quid me oportet Tullium pro Tullio facere, homine coniuncto mecum non minus animo quam nomine? ac mihi magis illud laborandum videtur, recuperatores, ut, quod antea nihil in istum dixi, probare *possim*, quam *ne* 5 in eo reprehendar, quod hoc tempore respondeo. verum et tum id feci quod oportuit et nunc faciam quod necesse est. nam cum esset de re pecuniaria controversia, quod damnum datum M. Tullio diceremus, alienum mea natura videbatur quicquam de existimatione P. Fabii dicere, non quia res postulare non videretur. quid ergo est? tametsi postulat causa, tamen, nisi plane cogit ingratius, ad male dicendum non soleo descendere: nunc cum coactus dicam, si quid forte dicam, tamen id ipsum verecunde modiceque faciam, tantum ut, quoniam sibi me non esse inimicum potuit priore actione Fabius iudicare, nunc M. Tullio fidelem certumque amicum esse cognoscat.

3 Unum hoc abs te, L. Quincti, pervelim impetrare —  
6 quod tametsi eo volo, quia mihi utile est, tamen abs te idcirco, quia aequum est, postulo — ut ita tibi multum temporis ad dicendum sumas, ut *his* aliquid ad iudicandum relinquant; namque antea non defensionis tuae modus, sed nox tibi *finem* dicendi fecit: nunc si tibi placere potest, ne idem facias, id abs te postulo. neque hoc idcirco postulo, quod te aliquid censeam praeterire oportere aut non quam ornatissime et copiosissime dicere, verum ut semel una quaque de re dicas; quod si facies, non vereor ne dicendo dies eximatur.

7 Iudicium vestrum est, recuperatores, QUANTAE PECUNIAE PARET DOLO MALO FAMILIAE P. FABII VI HOMINIBUS ARMATIS COACTISVE DAMNUM DATUM ESSE M. TULLIO. eius rei taxationem nos fecimus; aestimatio vestra est; iudicium datum est in quadruplum.

4 Cum omnes leges omniaque iudicia, quae paulo  
8 graviora atque asperiora videntur esse, ex improborum iniquitate et iniuria nata sunt, tum hoc iudicium paucis hisce annis propter hominum malam consuetudinem nimiamque licentiam constitutum est: nam cum multae familiae dicerentur in agris longinquis et pascuis

armatae esse caedesque facere cumque ea consuetudo non solum ad res privatorum, sed ad summam rem publicam pertinere videretur, M. Lucullus, qui summa aequitate et sapientia ius dixit, primus hoc iudicium composuit et id spectavit, ut omnes ita familias suas continerent, ut non modo armati damnum nemini darent, verum etiam lacessiti iure se potius quam armis defenderent; et cum sciret de damno legem esse Aquiliam, tamen hoc ita existimavit, apud maiores nostros cum et res et cupiditates minores essent et familiae non magnae magno metu continerentur, ut perraro fieret ut homo occideretur, idque nefarium ac singulare facinus putaretur, nihil opus fuisse iudicio de vi coactis armatisque hominibus; quod enim usu non veniebat, de eo si quis legem aut iudicium constitueret, non tam prohibere videretur quam admonere: his temporibus cum ex bello diuturno atque domestico res in eam consuetudinem venisset, ut homines minore religione armis uterentur, necesse putavit esse et in universam familiam iudicium dare, quod a familia factum diceretur, et recuperatores dare, ut quam primum res iudicaretur, et poenam graviores constituere, ut metu comprimeretur audacia et illam latebram tollere DAMNUM INIURIA; ut quod in aliis causis debet valere et valet lege Aquilia, id ex huius modi damno, quod vi per servos armatos datum esset, quodque iure unquam dari posse ne putari quidem deberet, iudicio eximeretur, ne facinorosi homines ipsi statuerent quo tempore possent suo iure arma capere, manum cogere, homines occidere. cum iudicium ita daret, ut hoc solum in iudicium veniret, videreturne vi hominibus coactis armatisve damnum dolo malo familiae datum, neque illud adderet INIURIA, putavit se audaciam improborum sustulisse, cum spem defensionis nullam reliquisset.

Quoniam quod iudicium et quo consilio constitutum sit cognostis, nunc rem ipsam, ut gesta sit, dum breviter vobis demonstro, attendite: fundum habet in agro Thurino M. Tullius paternum, recuperatores, quem se habere usque eo non moleste tulit, donec vicinum eius modi nactus est, qui agri finis armis proferre mallet quam iure defendere: nam P. Fabius nuper emit agrum de C. Claudio

- senatore, cui fundo erat adfinis M. Tullius, sane magno, dimidio fere pluris incultum exustis villis omnibus, quam quanti integrum atque ornatissimum carissimis pretiis ipse Claudius emerat; *verum tamen rem sic tuto servare voluit; ex quo enim sub L. Octavio proconsule meruerat sic, ut augendae rei negotiando operam dare posset, iam sae-*
- 15 *pius homines videbantur se clam circumscripsisse isti a consulari Macedonia et Asia. etiam illud addam, quod ad rem pertinet: imperatore mortuo pecuniam nescio quo modo quaesitam, dum volt in praedio ponere, non posuit, sed abiecit. nihil adhuc in . . . . . am*
- calamitate vicinorum corrigit et quod stomachum suum
- 7 damno Tullii explere conatus est. est in eo agro cen-
- 16 turia, quae Populiana nominatur, recuperatores, quae semper M. Tullii fuit, quam etiam pater possederat *sine ulla unquam controversia: iste demum vicinus novus improbae spei eo securior, quod M. Tullius abesset, coepit inhiare, cum ei centuria Populiana videretur satis commode posita esse et ad fundum eius convenire. ac primum quod eum negotii totius et emptionis suae paenitebat, fundum proscripsit; eum autem emptum habebat cum socio Cn. Acerronio viro optimo, cui facile persuaserat, ut fundum iam communem emeret: quod ut compertum est, admonetur a procuratore Tullii Acerronius, venditorem*
- 17 *agri falsum modum proscripsisse. hominem appellat: iste sane adroganter, quod commodum fuit, respondit; neque dum finis auctor demonstraverat. mittit ad procuratorem litteras et ad vilicum Tullius, caverent finiumque demonstrationi interessent admonet: hi Fabium adeunt et cum fines demonstrarentur se ut advocaret, verecunde petunt; at ille se facturum negavit; illis absentibus finis Acerronio demonstravit; neque tamen hanc centuriam Populianam vacuum tradidit. Acerronius, quo modo potuit, se de tota re ex . . . . .*
- . . . . .
- . . . . .
- 18 8 . . mine eius modi semustilatus effugit. adducit iste interea in saltum homines electos maximis animis et viribus et eis arma quae cuique habilia atque apta essent

comparat, prorsus, ut quivis intellegeret non eos ad rem rusticam, verum ad caedem ac pugnam comparari. brevi illo tempore Q. Catii Aemiliani, hominis honesti, quem vos nostis, duo homines occiderunt; multa alia fecerunt; passim vagabantur armati, non obscure, sed ut plane intellegere viderentur ad quam rem parati essent; agros, vias denique infestas habebant. venit in Thurinum interea Tullius: deinde iste pater familias Asiaticus beatus, novus arator et idem pecuarius, cum ambularet in agro, animadvertit in hac ipsa centuria Populiana aedificium non ita magnum servumque M. Tullii *Philinum*. ‘quid vobis’ inquit ‘istic negotii in meo est?’ servus respondit pudenter, at non stulte, dominum esse ad villam; posse eum cum eo disceptare, si quid vellet. rogat Fabius Acerronium — nam ibi tum erat — ut secum simul veniat ad Tullium. venit. ad villam erat Tullius; appellat Fabius, ut aut ipse Tullium deduceret aut ab eo deduceretur. dicit deducturum se Tullius; vadimonium Fabio Romam promissurum. manet in ea condicione Fabius; mature disceditur: proxima nocte iam fere cum lux appropinquaret, ad illud aedificium, de quo antea dixi, quod erat in centuria Populiana, servi P. Fabii frequentes armatique veniunt; introitum ipsi sibi *vi* manuque patefaciunt; homines magni pretii servos M. Tullii necopinantis adoriuntur; quod facile factu fuit, neque tam multos neque repugnantis multi armati paratique occidunt tantumque odii crudelitatisque *habuerunt*, ut eos omnis gurgulionibus insectis relinquerent, ne, si quem semivivum ac spirantem etiam reliquissent, minor eis honor haberetur: praeterea tectum villamque disturbant. hanc rem tam atrocem, tam indignam, tam repentinam nuntiat M. Tullio *Philinus*, quem antea nominavi, qui graviter saucius e caede effugerat. Tullius statim dimittit ad amicos, quorum ea vicinitate tum illa bona atque honesta copia praesto fuit. omnibus acerba res et misera videbatur. cum amici in comm . . . . .

damnum passum esse M. Tullium convenit mihi cum adversario: vici unam rem. vi hominibus armatis rem esse gestam non infitiantur: vici alteram. a familia P. Fabii



commissam negare non audent: vici tertiam. an dolo malo  
 factum sit, ambigitur: de hoc iudicium est. . . . .  
 10 . . . turbant. audite, quaeso, in eas res, quas comine-  
 24 moro, hominum honestorum testimonium: haec, quae mei  
 testes dicunt, fatetur adversarius eos vere dicere; quae mei  
 testes non dicunt, quia non viderunt nec sciunt, ea dicit  
 ipse adversarius. nostri testes dicunt occisos homines;  
 cruorem in locis pluribus, deiectum aedificium se vidisse  
 dicunt; nihil amplius. quid Fabius? horum nihil negat.  
 quid ergo addit amplius? suam familiam fecisse dicit.  
 25 quo modo? vi hominibus armatis. quo animo? ut id  
 fieret, quod factum est. quid est id? ut homines M. Tullii  
 occiderentur. quod ergo eo animo factum est, ut homines  
 unum in locum convenirent, ut arma caperent, ut certo  
 consilio certum in locum proficiscerentur, ut idoneum tem-  
 pus eligerent, ut caedem facerent, id si voluerunt et cogi-  
 tarunt et perfecerunt, potestis eam voluntatem, id consi-  
 26 lium, id factum a dolo malo seiungere? at istuc totum DOLO  
 MALO additur in hoc iudicio eius causa, qui agit, non illius,  
 quicum agitur. id ut intellegatis, recuperatores, quaeso,  
 ut diligenter attendatis; profecto quin ita sit non dubita-  
 11 bitis: si ita iudicium daretur, ut id concluderetur, quod  
 27 a familia factum esset, si quae familia ipsa in caede in-  
 teresse noluisset et homines aut servos aut liberos coë-  
 gisset aut conduxisset, totum hoc iudicium et praetoris  
 severitas dissolveretur; nemo enim posset haec iudicare,  
 qua in re familia non interfuisset, in ea re eam ipsam  
 familiam vi armatis hominibus damnum dedisse. ergo  
 id quia poterat fieri et facile poterat, ideo non satis  
 habitum est quaeri quid familia ipsa fecisset, verum etiam  
 28 illud, quid familiae dolo malo factum esset. nam cum  
 facit ipsa familia vim armatis coactisve hominibus et  
 damnum cuiuspiam dat, id dolo malo fieri necesse est; cum  
 autem rationem init, ut ea fiat, familia ipsa non facit, fit  
 autem dolo malo eius. ergo addito DOLO MALO actoris et  
 petitoris fit causa copiosior; utrum enim ostendere potest,  
 sive eam ipsam familiam sibi damnum dedisse, sive con-  
 silio et opera eius familiae factum esse, vincat necesse  
 12 est. videtis praetores per hos annos interdicare hoc *ex-*  
 29 *emplo velut inter me et L. Claudium: UNDE [DE] DOLO*



MALO TUO, M. TULLI, M. CLAUDIUS AUT FAMILIA AUT PROCURATOR EIUS VI DETRUSUS EST, cetera ex formula. si, ubi ita interdictum est et sponsio facta, ego me ad iudicem sic defendam, ut vi me deiecisse confitear, dolo malo negem, equis me audiat? non opinor equidem; quia, si vi deieci M. Claudium, dolo malo deieci; in vi enim dolus malus inest; at Claudio utrumvis satis est planum facere, vel se a me ipso vi deiectum esse vel me consilium inisse, ut vi deiceretur. plus igitur *valet* Claudii <sup>30</sup> *causa*, si interdicitur, unde dolo malo meo vi deiectus sit, quam si daretur, unde a me vi deiectus esset; nam in hoc posteriori, nisi ipse egomet deiecissem, vincerem sponsionem; in illo priore, ubi dolus malus additur, sive consilium inissem, [ut vi deiceretur,] sive ipse deiecissem, necesse erat te dolo malo meo vi deiectum iudicari: hoc <sup>13</sup> <sup>31</sup> persimile atque adeo plane idem est in hoc iudicio, recuperatores: quaero enim abs te, si ita iudicium datum esset: QUANTAE PECUNIAE PARET A FAMILIA P. FABII VI HOMINIBUS ARMATIS DAMNUM M. TULLIO DATUM, quid haberes quod diceres? nihil, opinor; fateris enim omnia, et familiam P. Fabii fecisse et vi hominibus armatis fecisse: quod additum est DOLO MALO, id te adiuvare putas, in quo opprimitur et excluditur omnis tua defensio? nam si additum id non esset ac tibi libitum esset ita defendere, tuam <sup>32</sup> familiam non fecisse, vinceris, si id probare potuisses: nunc sive illa defensione uti voluisses sive hac, qua uteris, condemneris necesse est; nisi putamus *eum in iudicium* venire, qui consilium inierit, illum, qui fecerit, non venire, cum consilium sine facto intellegi possit, factum sine consilio non possit. an quod factum eius modi est, ut sine occulto consilio, sine nocte, sine vi, sine damno alterius, sine armis, sine caede, sine maleficio fieri non potuerit, id sine dolo malo factum iudicabitur? an, qua in re <sup>33</sup> praetor illi improbam defensionem tolli voluit, in ea re mihi difficiliorem actionem factam putabitis? hic mihi isti <sup>14</sup> singulari ingenio videntur esse, qui et id, quod mihi contra illos datum est, ipsi adripiunt et scopulo atque saxi pro portu stationeque utuntur; nam in dolo malo volunt delitescere, in quo non modo cum omnia ipsi fecerunt, quae fatentur, verum etiam si per alios id fecis-

34 sent, haerent ac tenerentur. ego non in una re sola, quod mihi satis est, neque in universa re solum, quod mihi satis est, sed singillatim in omnibus dolum malum exstare dico. consilium capiunt, ut ad servos M. Tullii veniant: dolo malo faciunt. arma capiunt: dolo malo faciunt. tempus ad insidiandum atque celandum idoneum eligunt: dolo malo faciunt. vi in tectum inruunt: in ipsa vi dolus est. occidunt homines, tectum diruunt: nec homo occidi nec consulto alteri damnum dari sine dolo malo potest. ergo si omnes partes sunt eius modi, ut in singulis dolus malus haereat, universam rem et totum facinus sine dolo malo factum iudicabitis?

15 35 Quid ad haec Quinctius? sane nihil certum neque unum, in quo non modo possit, verum putet se posse consistere. primum enim illud iniecit, nihil posse dolo malo familiae fieri. hoc loco non solum fecit ut defenderet Fabium, sed ut omnino huiusce modi iudicia dissolveret: nam si venit id in iudicium de familia, quod omnino familia nulla potest committere, nullum est iudicium, absolvantur omnes de simili causa necesse est.

36 hoc solum? bona mehercule res, si hoc solum esset! tamen vos, tales viri, nolle deberetis maximam rem, coniunctam cum summa re publica fortunisque privatorum, severissimum iudicium maximaque ratione compositum per vos videri esse dissolutum. sed non id solum agitur . . . . .

. . . . .

. . . . . hoc iudicium sic expectatur, ut non unae rei statui, sed omnibus constitui putetur \* \* . . . .

. . . . .

*Causa Tullii tota continetur praetoris formula, re gesta, adversarii confessione: de his cum satis dictum sit, reliqua in vestra fide ac religione, non in defensione nostra*

37 posita esse ego intellego, et tamen dicendum est ad ea, quae dixit Quinctius, non quo ad rem pertineat, sed ne quid, quia a me praetermissum sit, pro concessio putetur.

16 38 Dicis oportere quaeri homines M. Tullii iniuria occisi essent necne: de quo hoc primum quaero, venerit ea res in hoc iudicium necne: si non venit, quid attinet aut nos dicere aut hos quaerere? si autem venit, quid attinuit te

tam multis verbis a praetore postulare, ut adderet in iudicium INIURIA, et quia non impetrasses, tribunos pl. appellare et hic in iudicio queri praetoris iniquitatem, quod de iniuria non addiderit? haec cum praetorem postula-<sup>39</sup>bas, cum tribunos appellabas, nempe ita dicebas, potestatem tibi fieri oportere, ut, si posses, recuperatoribus persuaderes, non esse iniuria M. Tullio damnum datum. quod ergo ideo in iudicium addi voluisti, ut de eo tibi apud recuperatores dicere liceret, eo non addito nihil minus tamen ita dicis, quasi id ipsum, a quo *depulsus* es, impetraris? at quibus verbis in decernendo Metellus<sup>17</sup> usus est? ceterique quos appellasti? nonne haec omnium fuit oratio, quod vi hominibus armatis coactisve familia fecisse diceretur, id tametsi nullo iure fieri potuerit, tamen se nihil addituros? et recte, recuperatores; nam cum<sup>40</sup> perfligio nullo constituto tamen haec scelera servi audacissime faciant, domini impudentissime confiteantur, quid censetis fore, si praetor iudicet eius modi caedes fieri iure posse? an quicquam interest utrum magistratus peccato defensionem constituent an peccandi potestatem licentiamque permittant? etenim, recuperatores, non damno<sup>41</sup> commoventur magistratus, ut in haec verba iudicium dent: nam si id esset, nec recuperatores potius darent quam iudicem nec in universam familiam, sed in eum, quicum nominatim ageretur, nec in quadruplum, sed in duplum, et ad DAMNUM adderetur INIURIA; neque enim is, qui hoc iudicium dedit, de ceteris damnis ab lege Aquilia recedit, in quibus nihil agitur nisi damnum, qua de re praetor animum debeat advertere: in hoc iudicio videtis agi de<sup>18</sup> vi, videtis agi de hominibus armatis, videtis aedificiorum<sup>42</sup> expugnationes, agri vastationes, hominum trucidationes, incendia, rapinas, sanguinem in iudicium venire, et miramini satis habuisse eos, qui hoc iudicium dederunt, id quaeri, utrum haec tam acerba, tam indigna, tam atrocia facta essent necne, non utrum iure facta an iniuria? non ergo praetores a lege Aquilia recesserunt, quae de damno est, sed de vi et armis severum iudicium constituerunt, nec ius et iniuriam quaeri nusquam putarunt oportere, sed eos, qui armis quam iure agere maluissent, de iure et iniuria disputare noluerunt. neque ideo de iniuria non<sup>43</sup>

- addiderunt, quod in aliis rebus non adderent, sed ne ipsi iudicarent posse homines servos iure arma capere et manum cogere neque quod putarent, si additum esset, posse hoc talibus viris persuaderi non iniuria factum, sed ne quod tamen scutum dare in iudicio viderentur eis, quos
- 19 propter haec arma in iudicium vocavissent. fuit illud in-  
44 terdictum apud maiores nostros de vi, quod hodie quoque est: UNDE TU AUT FAMILIA AUT PROCURATOR TUUS ILLUM AUT FAMILIAM AUT PROCURATOREM ILLIUS IN HOC ANNO VI DEIECISTI. deinde additur illius iam hoc causa, quicum agit: CUM ILLE POSSIDERET, et hoc amplius: QUOD NEC VI NEC
- 45 CLAM NEC PRECARIO POSSIDERET. multa dantur ei, qui vi alterum detrusisse dicitur, quorum si unum quodlibet probare iudici potuerit, etiam si confessus erit se vi deie-  
cisse, vincat necesse est: vel non possedis-  
se eum, qui deiectus sit, vel vi ab se possedis-  
se vel clam vel precario. ei, qui de vi confessus esset, tot defensiones tamen ad causam obtinendam maiores reliquerunt. age illud
- 20 alterum interdictum consideremus, quod item nunc est  
46 constitutum propter eandem iniquitatem temporum nimirumque hominum *licentiam*. . . . .  
. . . . .  
boni debent dicere.
- 47 Atque ille legem mihi de XII tabulis recitavit, quae permittit, ut furem noctu liceat occidere, et luce, si se telo defendat, et legem antiquam de legibus sacratis, quae iubeat impune occidi eum, qui tribunum pl. pulsa-
- 48 verit. nihil, ut opinor, praeterea de legibus. qua in re hoc primum quaero, quid ad hoc iudicium recitari istas leges pertinuerit: num quem tribunum pl. servi M. Tullii pulsaverunt? non opinor. num furatum domum P. Fabii noctu venerunt? ne id quidem. num luce furatum vene-  
runt et se telo defenderunt? dici non potest. ergo istis legibus, quas recitasti, certe non potuit istius familia
- 21 servos M. Tullii occidere. 'non' inquit 'ad eam rem re-  
49 citavi, sed ut hoc intellegeres, non visum esse maioribus nostris tam indignum istuc nescio quid quam tu putas, hominem occidi.' at primum istae ipsae leges, quas recitas, ut mittam cetera, significant quam noluerint maiores nostri, nisi cum perneccesse esset, hominem occidi.



primum ista lex sacrata est, quam rogarunt armati, ut inermes sine periculo possent esse; qua re non iniuria, quo magistratu munitae leges sunt, eius magistratus corpus legibus vallatum esse voluerunt. furem, hoc est, 50 praedonem et latronem, luce occidi vetant XII tabulae, cum intra parietes tuos hostem certissimum teneas, nisi SE TELO DEFENDET, inquit: etiam si cum telo venerit, nisi utetur telo eo ac repugnabit, non occides; quod si repugnat, ENDOPLORATO, hoc est, conclamato, ut aliqui audiant et conveniant. quid ad hanc clementiam addi potest, qui ne hoc quidem permiserint, ut domi suae caput suum sine testibus et arbitris ferro defendere liceret?

Quis est cui magis ignosci conveniat, quoniam me ad 22  
XII tabulas revocas, quam si quis quem imprudens occi- 51  
derit? nemo opinor; haec enim tacita lex est humanitatis, ut ab homine consilii, non fortunae poena repetatur: tamen huiusce rei veniam maiores non dederunt. nam lex est in XII tabulis: SI TELUM MANU FUGIT MAGIS QUAM IECIT . . . . .

si quis furem occiderit, iniuria occiderit. quam ob rem? 52  
quia ius constitutum nullum est. quid, si se telo defenderit? non iniuria. quid ita? quia constitutum est . . .

Si igitur, L. Quincti, ita quoque, si illum ipsum lo- 23  
cum, in quo familia tua M. Tullii servos occidit, tuum 53  
fuisse tamen verum factum esset, tamen in eo ipso loco, qui tuus esset, non modo servos M. Tullii occidere iure non potuisti, verum etiam si tectum hoc insciente aut per vim demolitus esses, quod hic in tuo aedificasset et suum esse defenderet, id vi aut clam factum iudicaretur, tu ipse iam statue, quam verum sit, cum paucas tegulas deicere impune familia tua non potuerit, maximam caedem sine fraude facere potuisse. ego ipse tecto illo disturbato si hodie postulem, quod vi aut clam factum sit, tu aut per arbitrum restituas aut sponsione condemnaris necesse est: nunc hoc probabis viris talibus, cum aedificium tuo iure disturbare non potueris, quod esset, quem ad modum tu vis, in tuo, homines, qui in eo aedificio fuerint, te tuo iure potuisse occidere? 'at 24  
servus meus non comparet, qui visus est cum tuis.' 'at 54



casa mea est incensa a tuis.' quid ad haec respondeam?  
 ostendi falsa esse: verum tamen confitebor. quid postea?  
 hoc sequitur, ut familia M. Tullii concidi oportuerit? vix  
 mehercule, ut corium peti, vix ut gravius expostulari:  
 verum ut esses durissimus, agi quidem usitato iure et  
 cotidiana actione potuit. quid opus fuit vi? quid armatis  
 55 hominibus? quid caede? quid sanguine? 'at enim oppu-  
 gnatum me fortasse venissent.' haec est illorum in causa  
 perditæ extrema non oratio neque defensio, sed coniectura  
 et quasi divinatio. illi oppugnatum venturi erant? quem?  
 Fabium. quo consilio? ut occiderent. quam ob causam?  
 quid ut proficerent? qui comperisti? et ut rem perspi-  
 cuam quam paucissimis verbis agam, dubitari hoc potest,  
 recuperatores, utri oppugnasse videantur, qui ad villam  
 venerunt, an qui in villa manserunt? qui occisi sunt, an  
 ei, ex quorum numero saucius factus est nemo; qui cur  
 facerent causa non fuit, an ei, qui fecisse se confiten-  
 56 tur? verum ut hoc tibi credam metuisse te, ne oppu-  
 gnare, quis hoc statuit unquam aut cui concedi sine  
 summo omnium periculo potest, ut eum iure potuerit oc-  
 cidere, a quo metuisse se dicat, ne ipse posterius occi-  
 deretur? . . . . .  
 . . . . .

---

M. TULII CICERONIS  
PRO M. FONTEIO ORATIO.

\*\*\* oportuisse, an ita dissolvit, ut omnes alii dissol-<sup>1</sup>  
verunt? nam ita ego defendo M. Fonteium, iudices, itaque  
contendo, post legem Valeriam latam . . . te . . . quae-  
store usque ad T. Crispinum quaestorem aliter neminem  
solvisse; hunc omnium superiorum, huius autem omnis,  
qui postea fuerint, auctoritatem dico secutos. quid accu-  
sas? quid reprehendis? nam quod in tabulis dodrantariis<sup>2</sup>  
et quadrantariis, quas ait ab Hirtuleio institutas, Fonteii  
officium desiderat, non possum existimare, utrum ipse  
erret an vos in errorem ducere velit. quaero enim abs te,  
M. Plactori, possitne tibi ipsi probata esse nostra causa,  
si, qua in re abs te M. Fonteius accusatur, auctorem habet  
eum, quem tu maxime laudas, Hirtuleium; qua in re autem  
laudas Hirtuleium, Fonteius idem fecisse reperitur. repre-  
hendis solutionis genus: eodem modo Hirtuleium dissol-  
visse publicae tabulae coarguunt; laudas illum, quod do-  
drantarias tabulas instituerit: easdem Fonteius instituit et  
eodem genere pecuniae. nam ne forte sis nescius et istas  
tabulas existimes *ad diversam veteris aeris alieni rationem*  
*pertinere*, ob unam causam et in uno genere sunt insti-  
tutae; nam cum publicanis, qui Africam, qui Aquileiense  
*portorium* . . . . .

\* cite \* nemo, nemo, inquam, iudices, reperietur qui<sup>2</sup>  
unum se in quaestura M. Fonteio nummum dedisse aut<sup>3</sup>  
illum ex ea pecunia, quae pro aerario solveretur, detraxisse  
dicat; nullius in tabulis ulla huius furti significatio, nul-  
lum in eis nominibus intertrimenti aut deminutionis vesti-  
gium reperietur. atqui omnes, si qui in hoc genere quae-  
stionis accusati sunt, reprehensos videmus primum testi-  
bus; difficile est enim cum, qui magistratui pecuniam  
dederit, non aut induci odio ut dicat aut cogi *religione*;  
deinde si qua gratia testes deterrentur, tabulae quidem

certe incorruptae atque integrae manent. fac omnis amicissimos Fonteio fuisse; tantum hominum numerum ignotissimorum atque alienissimorum pepercisse huius capiti, consuluisse famae; res ipsa tamen ac ratio litterarum confectioque tabularum habet hanc vim, ut ex acceptis et datis quicquid fingatur aut surripiatur aut non constet appareat. acceptas populo Romano pecunias omnis isti rettulerunt: si protinus aliis aeque magnas aut solverunt aut dederunt, ut quod acceptum populo Romano est, id expensum cuiuspiam sit, certe nihil potest esse detractum; sin aliquid domum tulerunt, ex eorum arca, e ra . . . . .

<sup>3</sup> deorum hominumque fidem! testis non invenitur in  
<sup>4</sup> ducenties et triciens sestertio. quam multorum hominum? sescentorum amplius. quibus in terris gestum negotium est? illo, illo, inquam, loco, quem videtis. extra ordinemne pecunia est data? immo vero nummus nullus sine litteris multis commotus est. quae est igitur ista accusatio, quae facilius possit Alpibus quam paucos aerarii gradus ascendere; diligentius Rutenorum quam populi Romani defendat aerarium; libentius ignotis quam notis utatur, alienigenis quam domesticis testibus; planius se confirmare crimen libidine barbarorum quam nostrorum  
<sup>5</sup> hominum litteris arbitretur? duorum magistratuum, quorum uterque in pecunia maxima tractanda procurandaque versatus est, triumviratus et quaesturae, ratio sic redditur, iudices, ut in eis rebus, quae ante oculos gestae sunt, ad multos pertinuerunt, confectae publicis privatisque tabulis sunt, nulla significatio furti, nulla alicuius  
<sup>6</sup> delicti suspitio referatur. Hispaniensis legatio consecuta est, turbulentissimo rei publicae tempore, cum adventu L. Sullae maximi exercitus in Italia civium dissiderent de iudiciis ac legibus; atque hoc rei publicae statu desperato qualis . . . . .

<sup>4</sup>  
<sup>7</sup> si nulla pecunia numerata est, cuius pecuniae quinquagesima est? . . . . .

. . . . .  
<sup>8</sup> frumenti maximus numerus e Gallia, peditatus amplissimae copiae e Gallia, equites numero plurimi e Gallia.

<sup>9</sup> Gallos post haec dilutius esse poturos, quod illi venenum esse arbitrabantur.

Plaetorii matrem, dum vixisset, ludum, postquam 10  
mortua esset, magistros habuisse.

. . . hoc praetore oppressam esse aere alieno Galliam.<sup>5</sup>  
a quibus versuras tantarum pecuniarum factas esse dicunt? <sup>11</sup>  
a Gallis? nihil minus. a quibus igitur? a civibus Roma-<sup>[1]</sup>  
nis, qui negotiantur in Gallia. cur eorum verba non au-  
dimus? cur eorum tabulae nullae proferuntur? insector  
ultro atque insto accusatori, iudices; insector, inquam, et  
flagito testis. plus ego in hac causa laboris et operae  
consumo in poscendis testibus quam ceteri defensores in  
refutandis. audaciter hoc dico, iudices; non temere con-  
firmo. referta Gallia negotiatorum est, plena civium Ro-  
manorum; nemo Gallorum sine cive Romano quicquam  
negotii gerit; nummus in Gallia nullus sine civium Ro-  
manorum tabulis commovetur: videte quo descendam, iu-<sup>12</sup>  
dices, quam longe videar ab consuetudine mea et cau-<sup>[2]</sup>  
tione ac diligentia discedere: unae tabulae proferantur, in  
quibus vestigium sit aliquod, quod significet pecuniam  
M. Fonteio datam; unum ex tanto negotiatorum, colono-  
rum, publicanorum, aratorum, pecuariorum numero testem  
producant: vere accusatum esse concedam. pro di im-  
mortales! quae haec est causa? quae defensio? provin-  
ciae Galliae M. Fonteius praefuit, quae constat ex eis  
generibus hominum et civitatum, qui, ut vetera mittam,  
partim nostra memoria bella cum populo Romano acerba  
ac diuturna gesserunt, partim modo ab nostris impera-  
toribus subacti, modo bello domiti, modo triumphis ac  
monumentis notati, modo ab senatu agris urbibusque  
multati sunt, partim, qui cum ipso M. Fonteio ferrum ac  
manus contulerunt multoque eius sudore ac labore sub  
populi Romani imperium dicionemque ceciderunt. est in <sup>13</sup>  
eadem provincia Narbo Martius, colonia nostrorum ci-<sup>[3]</sup>  
vium, specula populi Romani ac propugnaculum istis  
ipsis nationibus oppositum et obiectum; est item urbs  
Massilia, de qua ante dixi, fortissimorum fidelissimorum-  
que sociorum, qui Gallicorum bellorum pericula populi  
Romani copiis atque praemiis compensarunt; est prae-  
terea numerus civium Romanorum atque hominum ho-  
nestissimorum. huic provinciae, quae ex hac generum <sup>6</sup>  
varietate constaret, M. Fonteius, ut dixi, praefuit: qui <sup>[2]</sup>



erant hostes, subegit; qui proxime fuerant, eos ex eis agris, quibus erant multati, decedere coëgit; ceteris, qui idcirco magnis saepe erant bellis superati, ut semper populo Romano parerent, magnos equitatus ad ea bella, quae tum in toto orbe terrarum a populo Romano gerebantur, magnas pecunias ad eorum stipendium, maximum frumenti numerum ad Hispaniense bellum tolerandum

<sup>14</sup>  
[4] imperavit: is, qui gessit, in iudicium vocatur; vos, qui in re non interfuistis, causam una cum populo Romano cognoscitis; dicunt contra, quibus invitissimis imperatum est; dicunt, qui ex agris ex Cn. Pompei decreto decedere sunt coacti; dicunt, qui ex belli caede et fuga nunc primum audent contra M. Fonteium inermem consistere. quid coloni Narbonenses? quid volunt? quid existimant? hunc per vos volunt, se per hunc incolumis existimant esse. quid Massiliensium civitas? hunc praesentem eis adfecit honoribus, quos habuit amplissimos; vos autem absens orat atque obsecrat, ut sua religio, laudatio, auctoritas aliquid apud vestros animos momenti habuisse

<sup>15</sup>  
[5] videatur. quid? civium Romanorum quae voluntas est? nemo est ex tanto numero quin hunc optime de provincia, de imperio, de sociis et civibus meritum esse arbitretur.

<sup>7</sup>  
[3] quoniam igitur videtis qui oppugnatum M. Fonteium, cognostis qui defensum velint, statuite nunc quid vestra aequitas, quid populi Romani dignitas postulet: utrum colonis vestris, negotiatoribus vestris, amicissimis atque antiquissimis sociis, et credere et consulere malitis an eis, quibus neque propter iracundiam fidem neque propter infidelitatem honorem habere debetis.

<sup>16</sup>  
[6] quid? si maiorem etiam hominum honestissimorum copiam adferam qui huius virtuti atque innocentiae testimonio possint esse, tamenne plus Gallorum consensus valebit quam summae auctoritatis hominum? cum Galliae Fonteius praeesset, scitis, iudices, maximos populi Romani exercitus in duabus Hispaniis clarissimosque imperatores fuisse. quam multi equites Romani, quam multi tribuni militum, quales et quot et quotiens legati ad eos *exierunt*! exercitus praeterea Cn. Pompeii maximus atque ornatissimus hiemavit in Gallia, M. Fonteio imperante. satisne vobis multos, satis idoneos testis et conscios videtur ipsa fortuna esse voluisse



earum rerum, quae M. Fonteio praetore gererentur in Gallia? quem ex tanto hominum numero testem in hac causa producere potestis? quis est ex eo numero, qui vobis auctor placeat? eo nos iam laudatore et teste utemur. dubitabitis etiam diutius, iudices, quin illud, quod <sup>17</sup><sub>[7]</sub> initio vobis proposui, verissimum sit, aliud per hoc iudicium nihil agi nisi ut M. Fonteio oppresso testimoniis eorum, quibus multa rei publicae causa invitissimis imperata sunt, segniore posthac ad imperandum ceteri sint, cum videant eos oppugnare, quibus \* \* populi Romani imperium incolume esse non possit?

Obiectum est etiam, quaestum M. Fonteium ex via- <sup>8</sup><sub>[4]</sub> rum munitione fecisse, ut aut ne cogeret munire aut id, quod munitum esset, ne improbaret. si et coacti sunt munire omnes et multorum opera improbata sunt, certe utrumque falsum est, et ob vacationem pretium datum, cum immunis nemo fuerit, et ob probationem, cum multa improbata sint. quid? si hoc crimen optimis nominibus <sup>18</sup><sub>[8]</sub> delegare possumus et ita, non ut culpam in alios transferamus, sed uti doceamus eos isti munitioni praefuisse, qui facile officium suum et praestare et probare possunt, tamenne vos omnia in M. Fonteium iratis testibus freti conferetis? cum maioribus rei publicae negotiis M. Fontei impediretur et cum ad rem publicam pertineret viam Domitiam muniri, legatis suis, primariis viris, C. Annio Bellieno et C. Fonteio negotium dedit; itaque praefuerunt; imperaverunt pro dignitate sua quod visum est et probaverunt; quod vos, si nulla alia ex re, ex litteris quidem nostris, quas exscripsistis, et missis et adlatis, certe scire potuistis; quas si antea non legistis, nunc ex nobis quid de eis rebus Fontei ad legatos suos scripserit, quid ad eum illi rescripserint cognoscite. L. M. AD C. ANNIUM LEG. AD C. FONTEIUM LEG. L. A. A C. ANNIO LEG. A C. FONTEIO LEG. <sup>19</sup><sub>[9]</sub> satis opinor esse perspicuum, iudices, hanc rationem munitionis neque ad M. Fonteium pertinere et ab eis esse tractatam, quos nemo possit reprehendere. <sup>9</sup>

Cognoscite nunc de crimine vinario, quod illi in- <sup>5</sup><sub>[5]</sub> diosissimum et maximum esse voluerunt: crimen a Placitorio, iudices, ita constitutum est: M. Fonteio non in Gallia primum venisse in mentem ut portorium vini in-

stitueret, sed inita iam ac proposita ratione Roma profectum. itaque Titurium Tolosae quaternos denarios in singulas vini amphoras portorii nomine exegisse, † Croduni Porcium et Munium ternos victoriatos M. Vulchalone Servaeum binos victoriatos M. atque in his locis [sc. Croduni et Vulchalone] ab eis portorium esse exactum, si qui Cobiamacho, qui vicus inter Tolosam et Narbonem est, deverterentur neque Tolosam ire vellent: Elosiodoluscantum senos denarios ab eis, qui ad hostem portarent, exegissent. video, iudices, esse crimen et genere ipso magnum; vectigal enim esse impositum fructibus nostris dicitur et pecuniam permagnam ratione ista cogi potuisse confiteor; et invidia vel *maximum*, maxime enim inimici hanc rem sermonibus divulgari voluerunt; sed ego ita existimo, quo maius crimen sit id, quod ostendatur esse falsum, hoc maiorem ab eo iniuriam fieri, qui id confingat. volt enim magnitudine rei sic occupare animos eorum, qui audiunt, ut difficilis aditus veritati relinquatur.

DE CRIMINE VINARIO. DE BELLO VOCONTIORUM. DE DISPOSITIONE HIBERNORUM.

<sup>10</sup>  
<sup>21</sup>  
[6]  
[11] \* \* 'At hoc Galli negant.' at ratio rerum et vis argumentorum coarguit. potest igitur testibus iudex non credere? cupidis et iratis et coniuratis et ab religione remotis non solum potest, sed etiam debet. etenim si, quia Galli dicunt, idcirco M. Fonteius nocens existimandus est, quid mihi opus est sapiente iudice? quid aequo quaesitore? quid oratore non stulto? dicunt enim Galli; negare non possumus. hic si ingeniosi et periti et aequi iudicis has partis esse existimatis, ut, quoniam quidem testes dicunt, sine ulla dubitatione credendum sit, Salus ipsa virorum fortium innocentiam tueri non potest; sin autem in rebus iudicandis non minimam partem ad unam quamque rem existimandam momentoque suo ponderandam sapientia iudicis tenet, *videte* ne multo vestrae maiores gravioresque partes sint ad cogitandum quam ad dicendum meae. mihi enim semper una quaque de re testis non solum semel, verum etiam breviter interrogandus est, saepe etiam non interrogandus, ne aut irato facultas ad dicendum data aut cupido auctoritas attributa

esse videatur: vos et saepius eandem rem animis agitare et diutius uno de teste cogitare potestis, et, si quem nos interrogare noluimus, quae causa nobis tacendi fuerit existimare debetis. quam ob rem, si hoc iudici praescriptum lege aut officio putatis, testibus credere, nihil est cur alius alio iudice melior aut sapientior existimetur; unum est enim et simplex aurium iudicium et promisce et communiter stultis ac sapientibus ab natura datum. quid est igitur, ubi elucere possit prudentia? ubi discerni<sup>23</sup><sub>[13]</sub> stultus auditor et credulus ab religioso et sapienti iudice? nimirum illud, in quo ea, quae dicuntur a testibus, coniecturae et cogitationi traduntur, quanta auctoritate, quanta animi aequitate, quanto pudore, quanta fide, quanta religione, quanto studio existimationis bonae, quanta cura, quanto timore dicantur. an vero vos id in testimoniis<sup>11</sup><sub>[7]</sub> hominum barbarorum dubitabitis, quod persaepe et nostra et patrum memoria sapientissimi iudices de clarissimis nostrae civitatis viris dubitandum non putaverunt? qui Cn. et Q. Caepionibus, L. et Q. Metellis testibus in Q. Pompeium, hominem novum, non crediderunt; quorum virtuti, generi, rebus gestis fidem et auctoritatem in testimonio cupiditatis atque inimicitiarum suspitio derogavit. eequem hominem vidimus, eequem vere commemorare<sup>24</sup><sub>[14]</sub> possumus parem consilio, gravitate, constantia, ceteris virtutibus, honoris, ingenii, rerum gestarum ornamentis M. Aemilio Scauro fuisse? tamen huius, cuius iniurati nutu prope terrarum orbis regebatur, iurati testimonio neque in C. Fimbriam neque in C. Memmium creditum est. noluerunt ei, qui iudicabant, hanc patere inimicitiiis viam, quem quisque odisset, ut eum testimonio posset tollere. quantus in L. Crasso pudor fuerit, quod ingenium, quanta auctoritas quis ignorat? tamen is, cuius etiam sermo testimonii auctoritatem habebat, testimonio ipso, quae in M. Marcellum inimico animo dixit, probare non potuit. fuit, fuit illis iudicibus divinum ac singulare<sup>25</sup><sub>[15]</sub> [iudicium] consilium, qui se non solum de reo, sed etiam de accusatore debere iudicare arbitrabantur, quid fictum, quid fortuna ac tempore adlatum, quid pretio corruptum, quid spe aut metu depravatum, quid a cupiditate aliqua aut inimicitiiis profectum videretur; quae si

iudex non amplectetur omnia consilio, non animo ac mente circumspiciet, si, ut quidque ex illo loco dicetur, ex oraculo aliquo dici arbitrabitur, profecto satis erit, id quod dixi antea, non surdum [iudicem] huic muneri atque officio praesse; nihil erit, quam ob rem ille nescio quis sapiens homo ac multarum rerum peritus ad res iudicandas requiratur. an vero illi equites Romani, quos  
<sup>12</sup><sub>26</sub> [8] nos vidimus, qui nuper in re publica iudiciisque maximis  
<sup>[8]</sup><sub>[16]</sub> floruerunt, habuerunt tantum animi, tantum roboris, ut M. Scauro testi non crederent; vos Volcarum atque Allobrogum testimoniis non credere timetis? si inimico testi credi non oportuit, inimicior Marcello Crassus aut Fimbriae Scaurus ex civilibus studiis atque obtrectatione domestica quam huic Galli? quorum qui optima in causa sunt, equites, frumentum, pecuniam semel atque iterum ac saepius invitissimi dare coacti sunt; ceteri partim ex veteribus bellis agro multati, partim ab hoc ipso bello  
<sup>27</sup><sub>[17]</sub> superati et oppressi. si, qui ob aliquod emolumentum suum cupidius aliquid dicere videntur, eis credi non convenit, credo maius emolumentum Caepionibus et Metellis propositum fuisse ex Q. Pompeii damnatione, cum studiorum suorum obtrectatorem sustulissent, quam cunctae Galliae ex M. Fonteii calamitate, in qua illa provincia prope suam immunitatem ac libertatem positam esse arbitratur. an si homines ipsos spectare convenit, — id quod in teste profecto valere plurimum debet —, non modo cum summis civitatis nostrae viris, sed cum infimo cive Romano quisquam amplissimus Galliae comparandus est? scit Indutiomarus quid sit testimonium dicere? movetur eo timore, quo nostrum unus quisque, cum in eum  
<sup>13</sup><sub>28</sub> [9] locum productus est? recordamini, iudices, quanto opere  
<sup>[9]</sup><sub>[18]</sub> laborare soleatis non modo quid dicatis pro testimonio, sed etiam quibus verbis utamini, ne quod minus moderate positum, ne quod ab aliqua cupiditate prolapsum verbum esse videatur; vultu denique laboratis ne qua significari possit suspitio cupiditatis, ut, et cum proditis, existimatio sit quaedam tacita de vobis pudoris ac religionis, et cum disceditis, ea diligenter conservata ac retenta videatur.  
<sup>29</sup><sub>[19]</sub> credo haec eadem Indutiomarum in testimonio timuisse aut cogitavisse, qui primum illud verbum consideratis-



sinum nostrae consuetudinis ‘arbitror’, quo nos etiam  
 tunc utimur, cum ea dicimus iurati, quae comperta ha-  
 bemus, quae ipsi vidimus, ex toto testimonio suo sustulit  
 atque omnia se scire dixit. verebatur enim videlicet ne  
 quid apud vos populumque Romanum de existimatione  
 sua deperderet, ne qua fama consequeretur eius modi,  
 Indutiomarum, talem virum, tam cupide, tam temere  
 dixisse; non intellegebat se in testimonio nihil praeter  
 vocem et os [et audaciam] neque civibus suis neque ac-  
 cusatoribus nostris praestare debere. an vero istas na-  
 tiones religione iuris iurandi ac metu deorum immorta-  
 lium in testimoniis dicendis commoveri arbitramini, quae  
 tantum a ceterarum gentium more ac natura dissentiunt?  
 quod ceterae pro religionibus suis bella suscipiunt, istae  
 contra omnium religiones; illae in bellis gerendis ab dis  
 immortalibus pacem ac veniam petunt, istae cum ipsis  
 dis immortalibus bella gesserunt: hae sunt nationes, quae<sup>14</sup>  
 quondam tam longe ab suis sedibus Delphos usque ad  
 Apollinem Pythium atque ad oraculum orbis terrae  
 vexandum ac spoliandum profectae sunt; ab isdem  
 gentibus sanctis et in testimonio religiosis obsessum Ca-  
 pitolium est atque ille Iuppiter, cuius nomine maiores  
 nostri victam testimoniorum fidem esse voluerunt. po-  
 stremo his quicquam sanctum ac religiosum videri potest,  
 qui, etiam si quando aliquo metu adducti deos placandos  
 esse arbitrantur, humanis hostiis eorum aras ac templa  
 funestant? ut ne religionem quidem colere possint, nisi  
 eam ipsam prius scelere violarint. quis enim ignorat eos  
 usque ad hanc diem retinere illam immanem ac barba-  
 ram consuetudinem hominum immolandorum? quam ob  
 rem quali fide, quali pietate existimatis esse eos, qui  
 etiam deos immortalis arbitrentur hominum caede et  
 sanguine facillime posse placari? cum his vos testibus  
 vestram religionem coniungetis? ab his quicquam sancte  
 aut moderate dictum putabitis? hoc vestrae mentes tam<sup>32</sup>  
 castae, tam integrae sibi suscipient, ut, cum omnes le-  
 gati nostri, qui illo triennio in Galliam venerunt, omnes  
 equites Romani, qui in illa provincia fuerunt, omnes ne-  
 gotiatores eius provinciae, denique omnes in Gallia qui  
 sunt socii populi Romani atque amici, M. Fonteium in-



columem esse cupiant, iurati privatim et publice laudent, vos tamen cum Gallis † iurare malitis? quid ut secuti esse videamini? voluntatemne hominum? gravior igitur vobis erit hostium voluntas quam civium? an dignitatem testium? potestis igitur ignotos notis, iniquos aequis, alienigenas domesticis, cupidos moderatis, mercennarios gratuitis, impios religiosis, inimicissimos huic imperio ac nomini bonis ac fidelibus et sociis et civibus anteferre?

<sup>15</sup> an vero dubitatis, iudices, quin insitas inimicitias istae  
<sup>33</sup> [11] gentes omnes et habeant et gerant cum populi Romani  
<sup>[23]</sup> nomine? sic existimatis eos hic sagatos braccatosque versari, animo demisso atque humili, ut solent ei, qui adfecti iniuriis ad opem iudicum supplices inferioresque confugiunt? nihil vero minus: hi contra vagantur laeti atque erecti passim toto foro, cum quibusdam minis et barbaro atque inhumani terrore verborum; quod ego profecto non crederem, nisi aliquotiens ex ipsis accusatoribus vobiscum simul, iudices, audissem: cum praeciperent ut caveretis ne hoc absoluto novum aliquod bellum Gallicum concitaretur. si M. Fonteium, iudices, in causa deficerent omnia; si turpi adulescentia, vita infami, magistratibus, quos ante oculos vestros gessit, convictis virorum bonorum testimoniis, legationibus flagitiose obitis, invisus suis omnibus, in iudicium vocaretur; si in eo iudicio colonorum populi Romani Narbonensium, fidelissimorum sociorum Massiliensium, civium Romanorum omnium testimoniis tabulisque premeretur, tamen esset vobis magno opere providendum ne, quos ita adflictos a vestris patribus maioribusque accepissetis ut contemnendi essent, eos pertinuisse et eorum minis et terrore commoti esse videremini: nunc vero, cum laedat nemo bonus, laudent omnes vestri cives atque socii, oppugnent ei, qui saepissime hanc urbem et hoc imperium oppugnarunt, \* \* cumque inimici M. Fonteii vobis ac populo Romano minentur, amici ac propinqui supplicent vobis, dubitabitis non modo vestris civibus, qui maxime gloria ac laude ducuntur, verum etiam exteris nationibus et gentibus ostendere vos in sententiis ferendis civi parcere quam

<sup>16</sup> hosti cedere maluisse? magna mehercules causa, iudices,  
<sup>36</sup> [12] [26] absolutionis cum ceteris causis haec est, ne quae insignis

huic imperio macula atque ignominia suscipiatur, si hoc ita perlatum erit in Galliam, senatores equitesque populi Romani non testimoniis Gallorum, sed minis commotos rem ad illorum libidinem iudicasse. ita vero, si illi bellum facere conabuntur, excitandus nobis erit ab inferis C. Marius, qui Indutiomaro isti minaci atque adroganti par in bello gerendo esse possit; excitandus Cn. Domitius et Q. Maximus, qui nationem Allobrogum et reliquias suis iterum armis conficiat atque opprimat aut quoniam id quidem non potest, orandus erit nobis amicus meus, M. Plaetorius, ut suos novos clientis a bello faciendo deterreat, ut eorum iratos animos atque horribilis impetus deprecetur, aut, si non poterit, M. Fabium subscriptorem eius rogabimus, ut Allobrogum animos mitiget, quoniam apud illos Fabiorum nomen est amplissimum, ut velint isti aut quiescere, id quod victi ac subacti solent, aut, cum minantur, intellegere se populo Romano non metum belli, sed spem triumphi ostendere.

Quod si in turpi reo patiendum non esset, ut quicquam<sup>37</sup> isti se minis profecisse arbitrarentur, quid faciendum vobis in M. Fonteio arbitramini? de quo homine, iudices, — iam enim mihi videor hoc prope causa duabus actionibus perorata debere dicere — de quo vos homine ne ab inimicis quidem ullum fictum probrosum non modo crimen, sed ne maledictum quidem audistis. cequis umquam reus, praesertim in hac vitae ratione versatus, in honoribus petendis, in potestatibus\*; in imperiis gerendis sic accusatus est, ut nullum probum, nullum facinus, nulla turpitudine, quae a libidine aut a petulantia aut a crudelitate aut ab audacia nata esset, ab accusatore obiceretur, si non vera, at tamen ficta cum aliqua ratione ac suspitione? M. Aemilium Scaurum, summum nostrae civitatis virum, scimus accusatum a M. Bruto; exstant<sup>17</sup> orationes, ex quibus intellegi potest multa in illum ipsum<sup>38</sup> [Scaurum] esse dicta, falso: quis negat? verum tamen ab inimico dicta et obiecta. quam multa M' Aquilius audivit in suo iudicio? quam multa L. Cotta? denique P. Rutilius? qui, etsi damnatus est, mihi videtur tamen inter viros optimos atque innocentissimos esse numerandus — ille igitur ipse homo sanctissimus ac temperantissimus

multa audivit in sua causa, quae ad suspensionem stupro-  
 39 rum ac libidinum pertinerent. exstat oratio hominis, ut  
 opinio mea fert, nostrorum hominum longe ingeniosissimi  
 atque eloquentissimi, C. Gracchi, qua in oratione per-  
 multa in L. Pisonem turpia ac flagitiosa dicuntur: at in  
 quem virum? qui tanta virtute atque integritate fuit, ut  
 etiam illis optimis temporibus, cum hominem invenire  
 nequam neminem posses, solus tamen Frugi nominaretur;  
 quem cum in contionem Gracchus vocari iuberet et viator  
 quaereret, quem Pisonem, [quod erant plures] ‘cogis  
 me’ inquit ‘dicere inimicum meum Frugi.’ is igitur vir,  
 quem ne inimicus quidem satis in appellando significare  
 poterat, nisi ante laudasset, qui uno cognomine declara-  
 batur non modo quis esset, sed etiam qualis esset, tamen  
 40 in falsam atque iniquam probrorum insimulationem voca-  
 [30] batur: M. Fonteius ita duabus actionibus accusatus est,  
 ut obiectum nihil sit quo significari vestigium libidinis,  
 petulantiae, crudelitatis, audaciae possit: non modo nullum  
 facinus huius protulerunt, sed ne dictum quidem aliquod  
 18 reprehenderunt. quod si aut quantam voluntatem habent  
 [44] ad hunc opprimendum aut quantam ad male dicendum  
 licentiam, tantum haberent aut ad ementiendum animi  
 aut ad fingendum ingenii, non meliore fortuna ad probra  
 non audienda M. Fonteius, quam illi, de quibus antea  
 commemoravi, fuisset. frugi igitur hominem, iudices,  
 frugi, inquam, et in omnibus vitae partibus moderatum  
 ac temperantem, plenum pudoris, plenum officii, plenum  
 religionis videtis positum in vestra fide ac potestate, at-  
 que ita, ut commissus sit fidei, permissus potestati.

41 Videte igitur utrum sit aequius hominem honestis-  
 [31] simum, virum fortissimum, civem optimum dedi inimi-  
 cissimis atque immanissimis nationibus an reddi amicis,  
 praesertim cum tot res sint, quae vestris animis pro huius  
 innocentis salute supplicent: primum generis antiquitas,  
 quam [Tusculo] ex clarissimo municipio profectam in  
 monumentis rerum gestarum incisam ac notatam videmus;  
 tum autem continuæ praeturæ, quae et ceteris ornamen-  
 tis et existimatione innocentiae maxime floruerunt; deinde  
 recens memoria parentis, cuius sanguine non solum Ascu-  
 lanorum manus, [a qua interfectus est,] sed totum illud

sociale bellum macula sceleris imbutum est; postremo ipse cum in omnibus vitae partibus honestus atque integer tum in re militari cum summi consilii et maximi animi tum vero usu quoque bellorum gerendorum in primis eorum hominum, qui nunc sunt, exercitatus. qua<sup>19</sup> re si etiam monendi estis a me, iudices, quod non estis, [15]<sup>42</sup> videor hoc leviter pro mea auctoritate vobis praecipere [32] posse, ut ex eo genere homines, quorum cognita virtus, industria, felicitas in re militari sit, diligenter vobis retinendos existimetis. fuit enim maior talium virorum in hac re publica copia; quae cum esset, tamen eorum non modo saluti, sed etiam honori consulebatur. quid nunc vobis faciendum est? studiis militaribus apud iuventutem obsoletis, hominibus \* autem ac summis ducibus partim aetate, partim civitatis discordiis ac rei publicae calamitate consumptis, cum tot bella aut a nobis necessario suscipiantur aut subito atque improvise nascentur, nonne et hominem ipsum ad dubia rei publicae tempora reservandum et ceteros studio laudis ac virtutis inflammandos putatis? <sup>43</sup> recordamini quos legatos nuper in bello L. Iulius, quos P. [32] Rutilius, quos L. Cato, quos Cn. Pompeius habuerit: reperietis fuisse tum M. Cornutum, L. Cinnam, L. Sullam, praetorios homines, belli gerendi peritissimos; praeterea C. Marium, P. Didium, Q. Catulum, P. Crassum, non litteris homines ad rei militaris scientiam, sed rebus gestis ac victoriis eruditos. age vero, nunc inserite oculos in curiam, introspicite penitus in omnis rei publicae partis: utrum videtis nihil posse accidere, ut tales viri desiderandi sint an, si acciderit, eorum hominum copia populum Romanum abundare? quae si diligenter attendetis, profecto, iudices, virum ad labores belli inpigrum, ad pericula fortem, ad usum ac disciplinam peritum, ad consilia prudentem, ad casum fortunamque felicem, domi vobis ac liberis vestris retinere quam inimicissimis populo Romano nationibus et crudelissimis tradere et condonare maletis. at infestis prope signis inferuntur Galli in M. <sup>20</sup> Fonteium et instant atque urgent summo cum studio, [16]<sup>44</sup> summa cum audacia. video, iudices; sed multis et firmis [34] praesidiis vobis adiutoribus isti immani atque intolerandae barbariae resistemus: primum obicitur contra istorum



impetus Macedonia, fidelis et amica populo Romano provincia; quae cum se ac suas urbis non solum consilio, sed etiam manu M. Fonteii conservatam esse dicat, ut illa per hunc a Thraecum adventu ac depopulatione defensa est, sic ab huius nunc capite Gallorum impetus  
<sup>45</sup>  
<sup>[35]</sup> terroresque depellit; constituitur ex altera parte ulterior Hispania, quae profecto non modo religione sua resistere istorum cupiditati potest, sed etiam sceleratorum hominum periuria testimoniis ac laudationibus suis refutare. atque ex ipsa etiam Gallia fidelissima et gravissima auxilia sumuntur: venit huic subsidio misero atque innocenti Massiliensium cuncta civitas, quae non solum ob eam causam laborat, ut huic, a quo ipsa servata est, parem gratiam referre videatur, sed etiam, quod ea condicione atque eo fato se in eis terris conlocatam esse arbitratur, ne quid nostris hominibus istae gentes nocere possint;  
<sup>46</sup>  
<sup>[36]</sup> propugnat pariter pro salute M. Fonteii Narbonensis colonia, quae per hunc ipsa nuper obsidione hostium liberata, nunc eiusdem miseriis ac periculis commovetur; denique ut oportet bello Gallico, ut maiorum iura moresque praescribunt, nemo est civis Romanus qui sibi ulla excusatione utendum putet: omnes illius provinciae publicani, agricolae, pecuarii, ceteri negotiatores uno animo M. Fonteium atque una voce defendunt.

<sup>21</sup>  
<sup>[17]</sup> Quod si tantas auxiliorum nostrorum copias Indutior marus ipse despexerit, [dux Allobrogum ceterorumque Gallorum,] num etiam de matris hunc complexu, lectissimae miserimaeque feminae, vobis inspectantibus, avellet atque abstrahet? praesertim cum virgo Vestalis ex altera parte germanum fratrem complexa teneat vestramque, iudices, ac populi Romani fidem impleret: quae pro vobis liberisque vestris tot annos in dis immortalibus placandis occupata est, ut ea nunc pro salute sua fratrisque sui  
<sup>47</sup>  
<sup>[37]</sup> animos vestros placare possit. cui miserae quod praesidium, quod solacium reliquum est, hoc amisso? nam ceterae feminae gignere ipsae sibi praesidia et habere domi fortunarum omnium socium participemque possunt; huic vero virgini quid est praeter fratrem quod aut iucundum aut carum esse possit? nolite pati, iudices, aras deorum immortalium Vestaeque matris cotidianis virginis

lamentationibus de vestro iudicio commoneri; prospicite ne ille ignis aeternus, nocturnis Fonteiae laboribus vigilibusque servatus, sacerdotis vestrae lacrimis extinctus esse dicatur: tendit ad vos virgo Vestalis manus supplices, easdem, quas pro vobis dis immortalibus tendere consuevit: cavete ne periculosum superbunque sit eius vos obsecrationem repudiare, cuius preces si di asperarentur, haec salva esse non possent. videtisne subito, iudices, virum fortissimum, M. Fonteium, parentis et sororis commemoratione lacrimas profudisse? qui numquam in acie pertimuerit, qui se armatus saepe in hostium manum multitudinemque immiserit, cum in eius modi periculis eadem se solacia suis relinquere arbitraretur, quae suus pater sibi reliquisset, idem nunc conturbato animo pertimescit ne non modo ornamento et adiumento non sit suis, sed etiam cum acerbissimo luctu dedecus aeternum miseris atque ignominiam relinquat. o fortunam longe<sup>48</sup> disparem, M. Fonte! si deligere potuisses, ut potius telis<sup>[38]</sup> tibi Gallorum quam periuriis intereundum esset: tum enim vitae socia virtus, mortis comes gloria fuisset; nunc vero qui est dolor, victoriae te atque imperii poenas ad eorum arbitrium sufferre, qui aut victi armis sunt aut invitissimi paruerunt! a quo periculo defendite, iudices, civem fortem atque innocentem; curate ut nostris testibus plus quam alienigenis credidisse videamini, plus saluti civium quam hostium libidini consuluisse, graviolem duxisse eius obsecrationem, quae vestris sacris praesit, quam eorum audaciam, qui cum omnium sacris delubrisque bella gesserunt. postremo prospicite, iudices, id quod ad dignitatem populi Romani maxime pertinet, ut plus apud vos preces virginis Vestalis quam minae Gallorum valuisse videantur.

---

M. TULLII CICERONIS  
PRO A. CAECINA ORATIO.

<sup>1</sup> Si quantum in agro locisque desertis audacia potest,  
<sup>1</sup> tantum in foro atque in iudiciis impudentia valeret, non  
 minus nunc in causa cederet A. Caecina Sex. Aebutii im-  
 pudentiae, quam tum in vi facienda cessit audaciae; ve-  
 rum et illud considerati hominis esse putavit, qua de re  
 iure disceptari oporteret, armis non contendere, et hoc  
 constantis, quicum vi et armis certare noluisset, eum iure  
<sup>2</sup> iudicioque superare. ac mihi quidem cum audax praeci-  
 pue fuisse videtur Aebutius in convocandis hominibus et  
 armandis tum impudens in iudicio, non solum quod in  
 iudicium venire ausus est, — nam id quidem tametsi im-  
 probe fit in aperta re, tamen malitia est iam usitatum —  
 sed quod non dubitavit id ipsum quod arguitur confiteri:  
 nisi forte hoc rationis habuit, quoniam si facta vis esset  
 moribus, superior in possessione retinenda non fuisset,  
 quia contra ius moremque facta sit, A. Caecinam cum  
 amicis metu perterritum profugisse, nunc quoque in iudi-  
 cio si causa more institutoque omnium defendatur, nos  
 inferiores in agendo non futuros, sin a consuetudine re-  
 cedatur, se, quo impudentius egerit, hoc superiorem dis-  
 cessorum: quasi vero aut idem possit in iudicio improbi-  
 tas quod in vi confidentia aut nos non eo libentius tum  
 audaciae cesserimus, quo nunc impudentiae facilius ob-  
<sup>3</sup> sisteremus. itaque longe alia ratione, recuperatores, ad  
 agendam causam hac actione venio atque initio veneram:  
 tum enim nostrae causae spes erat posita in defensione  
 mea, nunc in confessione adversarii; tum in nostris, nunc  
 vero in illorum testibus; de quibus ego antea laborabam,  
 ne si improbi essent, falsi aliquid dicerent, si probi exi-  
 stimarentur, quod dixissent probarent, nunc sum animo  
 acquissimo: si enim sunt viri boni, me adiuvant, cum id  
 iurati dicunt, quod ego iniuratus insinulo; sin autem mi-

nus idonei, me non laedunt, cum eis sive creditur, *creditur* hoc ipsum, quod nos arguimus, sive fides non habetur, de adversarii testium fide derogatur. verum tamen cum<sup>2</sup><sub>4</sub> illorum actionem causae considero, non video quid impudentius dici possit, cum autem vestram in iudicando dubitationem, vereor ne id, quod videntur impudenter fecisse, astute et callide fecerint. nam si negassent vim hominibus armatis esse factam, facile honestissimis testibus in re perspicua tenerentur; sin confessi essent et id, quod nullo tempore iure fieri potest, tum ab se iure factum esse defenderent, sperarunt, id quod adsecuti sunt, se iniecturos vobis causam deliberandi et iudicandi iustam moram ac religionem; simul illud, quod indignissimum est, futurum arbitrati sunt, ut in hac causa non de improbitate Sex. Aebutii, sed de iure civili iudicium fieri videretur. qua in re si mihi esset unius A. Caecinae causa<sup>5</sup> agenda, profiterer satis idoneum esse me defensorem, propterea quod fidem meam diligentiamque praestarem, quae cum sunt in actore causae, nihil est in re praesertim aperta ac simplici quod excellens ingenium requiratur; sed cum de eo mihi iure dicendum sit, quod pertineat ad omnis, quodque constitutum sit a maioribus, conservatum usque ad hoc tempus, quo sublato non solum pars aliqua iuris deminuta, sed etiam vis ea, quae iuri maxime est adversaria, iudicio confirmata esse videatur, video summi ingenii causam esse, non uti demonstretur, quod ante oculos est, sed ne, si quis vobis error in tanta re sit obiectus, omnes potius me arbitrentur causae quam vos religioni vestrae defuisse. quamquam ego mihi sic per<sup>6</sup>suadeo, recuperatores, non vos tam propter iuris obscuram dubiamque rationem bis iam de eadem causa dubitasse, quam quod videretur ad summam illius existimationem hoc iudicium pertinere, moram ad condemnandum quaesisse, simul et illi spatium ad sese conligendum dedisse. quod quoniam iam in consuetudinem venit et id viri boni, vestri similes, in iudicando faciunt, reprehendendum fortasse minus, querendum vero magis etiam videtur, ideo quod *cum* omnia iudicia aut distrahendarum controversiarum aut poeniendorum maleficiorum causa re-  
perta sint, quorum alterum levius est, propterea quod et



minus laedit et persaepe disceptatore domestico diiudicatur, alterum est vehementissimum, quod et ad graviiores res pertinet et non honorariam operam amici, sed severitate iudicis ac vim requirit, quod est gravius et cuius rei causa maxime iudicia constituta sunt, id iam mala consuetudine dissolutum est: nam ut quaeque res est turpissima, sic maxime et maturissime vindicanda est; at eadem quia existimationis periculum est, tardissime iudicatur. qui igitur convenit, quae causa fuerit ad constituendum iudicium, eandem moram esse ad iudicandum? si quis, quod spopondit, qua in re verbo se obligavit uno, si id non facit, maturo iudicio sine ulla religione iudicis condemnatur: qui per tutelam aut societatem aut rem mandatam aut fiduciae rationem fraudavit quempiam, in eo quo delictum maius est, eo poena est tardior. <sup>8</sup> 'est enim turpe iudicium.' ex facto quidem turpi. videte igitur quam inique accidat, quia res indigna sit, ideo turpem existimationem sequi; quia turpis existimatio sequatur, ideo rem indignam non vindicari. ac si qui mihi hoc iudex recuperatorve dicat: 'potuisti enim leniore actione configere; potuisti ad tuum ius faciliore et commodiore iudicio pervenire: qua re aut muta actionem aut noli mihi instare ut iudicem,' tamen is aut timidior videatur quam fortem aut cupidior quam sapientem iudicem esse aequum est, si aut mihi praescribat quem ad modum meum ius persequar, aut ipse id, quod ad se delatum sit, non audeat iudicare. etenim si [praetor] is, qui iudicia dat, numquam petitori praestituit qua actione illum uti velit, videte quam iniquum sit constituta iam re iudicem quid agi potuerit aut quid possit, non quid actum <sup>9</sup> sit quaerere. verum tamen nimiae vestrae benignitati pareremus, si alia ratione ius nostrum recuperare possemus: hunc vero quis est qui aut vim hominibus armatis factam relinqui putet oportere aut eius rei leniorem actionem nobis aliquam demonstrare possit? ex quo genere peccati, ut illi clamitant, vel iniuriarum vel capitis iudicia constituta sunt, in eo potestis atrocitatem nostram reprehendere, cum videatis nihil aliud actum nisi possessionem <sup>4</sup> per interdictum esse repetitam? verum sive vos existimationis illius periculum sive iuris dubitatio tardiores

fecit adhuc ad iudicandum, alterius rei causam vosmet ipsi iam vobis saepius prolato iudicio sustulistis, alterius ego vobis hodierno die causam profecto auferam, ne diutius de controversia nostra ac de communi iure dubitetis; et si forte videbor altius initium rei demonstrandae petisse, <sup>10</sup> quam me ratio iuris eius, de quo iudicium est, et natura causae coëgerit, quaeso ut ignoscatis; non enim minus laborat A. Caecina, ne summo iure egisse quam ne certum ius non obtinuisse videatur.

M. Fulcinus fuit, recuperatores, e municipio Tarquiniensi, qui et domi suae cum primis honestus existimatus est et Romae argentariam non ignobilem fecit: is habuit in matrimonio Caesenniam, eodem e municipio, summo loco natam et probatissimam feminam, sicut et vivus ipse multis rebus ostendit et in morte sua testamento declaravit. huic [Caesenniae] fundum in agro <sup>11</sup> Tarquiniensi vendidit temporibus illis difficillimis solutionis. cum uteretur uxoris dote numerata, quo mulieres esset cautior, curavit ut in eo fundo [dos] conlocaretur. aliquanto post iam argentaria dissoluta Fulcinus huic fundo uxoris continentia quaedam praedia atque adiuncta mercatur. moritur Fulcinus — multa enim, quae sunt in re, quia remota sunt a causa, praetermittam —, testamento facit heredem quem habebat e Caesennia filium; usum et fructum omnium bonorum suorum Caesenniae legat, ut frueretur una cum filio. magnus honos <sup>12</sup> viri iucundus mulieri fuisset, si diuturnum esse licuisset; frueretur enim bonis cum eo, quem suis bonis heredem esse cupiebat et ex quo maximum fructum ipsa capiebat. sed hunc fructum mature fortuna ademit; nam brevi tempore M. Fulcinus adulescens mortuus est: heredem P. Caesennium fecit; uxori grande pondus argenti matrique partem maiorem bonorum legavit; itaque in partem mulieres vocatae sunt. cum esset haec auctio hereditaria <sup>5</sup> constituta, Aebutius iste, qui iam diu Caesenniae viduitate ac solitudine aleretur ac se in eius familiaritatem insinuasset hac ratione, ut cum aliquo suo compendio negotia mulieris, si qua acciderent, controversiasque susci- <sup>13</sup> peret, versabatur eo quoque tempore in his rationibus auctionis et partitionis atque etiam se ipse inferebat et

intrudebat et in eam opinionem Caesenniam adducebat, ut mulier imperita nihil putaret agi callide posse, ubi non  
 14 adesset Aebutius. quam personam iam e cotidiana vita cognoscitis, recuperatores, mulierum adsentatoris, cognitoris viduarum, defensoris nimium litigiosi, contriti ad Regiam, inepti ac stulti inter viros, inter mulieres periti iuris et callidi, hanc personam imponite Aebutio; is enim, Caesenniae fuit Aebutius. ne forte quaeratis, num propinquus? nihil alienius. amicus a patre aut a viro traditus? nihil minus. quis igitur? ille, ille, quem supra deformavi: voluntarius amicus mulieris, non necessitudine aliqua, sed ficto officio simulataque sedulitate coniunctus, magis opportuna opera non numquam quam aliquando  
 15 fideli. cum esset, ut dicere institueram, constituta auctio Romae, suadebant amici cognatique Caesenniae, id quod ipsi quoque mulieri veniebat in mentem, quoniam potestas esset emendi fundum illum Fulcinianum, qui fundo eius antiquo continens esset, nullam esse rationem amittere eius modi occasionem, cum ei praesertim pecunia ex partitione deberetur, nusquam posse eam melius collocari. itaque hoc mulier facere constituit: mandat ut fundum sibi emat — cui tandem? cui putatis? an non in mentem vobis venit omnibus illius hoc munus esse ad omnia mulieris negotia parati, sine quo nihil satis caute,  
 6 nihil satis callide posset agi? — recte attenditis. Aebutio  
 16 negotium datur; adest ad tabulam, licetur Aebutius; deterrentur emptores multi partim gratia Caesenniae, partim etiam pretio; fundus addicatur Aebutio; pecuniam argentario promittit Aebutius; quo testimonio nunc vir optimus utitur sibi emptum esse: quasi vero aut nos ei negemus addictum aut tum quisquam fuerit qui dubitaret quin emeretur Caesenniae, cum id plerique scirent, omnes fere audissent, *qui non audisset*, is coniectura adsequi posset, cum pecunia Caesenniae ex illa hereditate deberetur, eam porro in praediis collocari maxime expediret, essent autem praedia, quae mulieri maxime convenirent, ea venirent, liceretur is, quem Caesenniae dare operam  
 17 nemo miraretur, sibi emere nemo posset suspicari. hac emptione facta pecunia solvitur a Caesennia; cuius rei putat iste rationem reddi non posse, quod ipse tabulas

averterit, se autem habere argentarii tabulas, in quibus  
 sibi expensa pecunia lata sit acceptaque relata; quasi id  
 aliter fieri oportuerit. cum omnia ita facta essent, quem  
 ad modum nos defendimus, Caesennia fundum possedit  
 locavitque; neque ita multo post A. Caecinae nupsit. ut  
 in pauca conferam, testamento facto mulier moritur; facit  
 heredem ex deunce et semuncia Caecinam, ex duabus  
 sextulis M. Fulcinium libertum superioris viri, Aebutio  
 sextulam aspergit: hanc sextulam illa mercedem isti esse  
 voluit adsiduitatis et molestiae, si quam ceperat; iste  
 autem hac sextula se ansam retinere omnium controver-  
 siarum putat. iam principio ausus est dicere non posse  
 heredem esse Caesenniae Caecinam, quod is deteriore  
 iure esset quam ceteri cives propter incommodum Vola-  
 terranorum calamitatemque civilem; itaque homo timidus  
 imperitusque, qui neque animi neque consilii satis habe-  
 ret, non putavit esse tanti hereditatem, ut de civitate in  
 dubium veniret; concessit, credo, Aebutio, quantum vellet  
 de Caesenniae bonis ut haberet. immo, ut viro forti ac  
 sapienti dignum fuit, ita calumniam stultitiamque eius  
 obtrivit ac contudit: in possessione bonorum cum esset 19  
 et cum iste sextulam suam nimium exaggeraret, nomine  
 heredis arbitrum familiae herciscundae postulavit. itaque  
 illis paucis diebus, postea quam videt nihil se ab A. Caeci-  
 na posse litium terrore abradere, homini Romae in foro  
 denuntiat fundum illum, de quo ante dixi, cuius istum  
 emptorem demonstravi fuisse mandatu Caesenniae, suum  
 esse seseque sibi emisse. quid ais? istius ille fundus est,  
 quem sine ulla controversia quadriennium, [hoc est] ex  
 quo tempore fundus venit, quoad vixit possedit Caesennia?  
 'usus enim' inquit 'eius fundi et fructus testa-  
 mento viri fuerat Caesenniae.' cum hoc novae litis genus 20  
 tam malitiose intenderet, placuit Caecinae de amicorum  
 sententia constituere, quo die in rem praesentem veniret  
 et de fundo Caecina moribus deduceretur. conlo-  
 quuntur; dies ex utriusque commodo sumitur. Caecina  
 cum amicis ad diem venit in castellum Axiam, a quo loco  
 fundus is, de quo agitur, non longe abest. ibi certior fit  
 a pluribus homines permultos, liberos atque servos, coë-  
 gisse et armasse Aebutium. cum id partim mirarentur,



- partim non crederent, ecce ipse Aebutius in castellum venit; denuntiatur Caecinae se armatos habere: abiturum eum non esse, si accessisset. Caecinae placuit et amicis, quoad videretur salvo capite fieri posse, experiri tamen.
- 21 de castello descendunt; in fundum proficiscuntur. videtur temere commissum, verum, ut opinor, hoc fuit causae: tam temere istum re commissurum quam verbis minitabatur nemo putavit.
- 8 atque iste ad omnis introitus, qua adiri poterat non modo in eum fundum, de quo erat controversia, sed etiam in illum proximum, de quo nihil ambigebatur, armatos homines opponit; itaque primo cum in antiquum fundum ingredi vellet, quod ea proxime accedi poterat, frequentes armati obstiterunt; quo loco depulsus Caecina tamen qua potuit ad eum fundum profectus est, in quo ex conventu vim fieri oportebat: eius autem fundi extremam partem oleae directo ordine definiunt: ad eas cum accederetur, iste cum omnibus copiis praesto fuit servumque suum nomine Antiochum ad se vocavit et clara voce ei imperavit, ut eum, qui illum olearum ordinem intrasset, occideret. homo mea sententia prudentissimus Caecina tamen in hac re plus mihi animi quam consilii videtur habuisse; nam cum et armatorum multitudinem videret et eam vocem Aebutii, quam commemoravi, audisset, tamen accessit propius et iam ingrediens intra finem eius loci, quem oleae terminabant, impetum armati Antiochi ceterorumque tela atque incursum refugit; eodem tempore se in fugam conferunt una amici advocatique eius metu perterriti, quem ad modum
- 23 illorum testem dicere audistis. his rebus ita gestis P. Dolabella praetor interdixit, ut est consuetudo, DE VI HOMINIBUS ARMATIS sine ulla exceptione, tantum ut unde deiecisset restitueret. restituisse se dixit; sponsio facta est: hac de sponsione vobis iudicandum est.
- 9 Maxime fuit optandum Caecinae, recuperatores, ut controversiae nihil haberet, secundo loco ut ne cum tam improbo homine, tertio ut cum tam stulto haberet; etenim non minus nos stultitia istius sublevat quam laedit improbitas: improbus fuit, quod homines coëgit, armavit, coactis armatisque vim fecit; laesit in eo Caecinam; sublevat ibidem; nam in eas ipsas res, quas improbissime

fecit, testimonia sumpsit et eis in causa testimoniis utitur. itaque mihi certum est, recuperatores, ante quam ad meam<sup>24</sup> defensionem meosque testis venio, illius uti confessione et testimoniis. quid confitetur atque ita libenter confitetur, ut non solum fateri, sed etiam profiteri videatur, recuperatores? ‘convocavi homines, coëgi, armavi; terrore mortis ac periculo capitis ne accederes obstiti; ferro,’ inquit ‘ferro’ — et hoc dicit in iudicio — ‘te reieci atque proterrui.’ quid? testes quid aiunt? P. Vetilius, propinquus Aebutii, se Aebutio cum armatis servis venisse advocatum. quid praeterea? fuisse compluris armatos. quid aliud? minatum esse Aebutium Caecinae. quid ego de hoc teste dicam nisi hoc, recuperatores, ut ne idcirco minus ei credatis, quod homo minus idoneus habetur, sed ideo credatis, quod ex illa parte id dicit, quod illi causae maxime est alienum? A. Terentius, alter testis, non modo<sup>25</sup> Aebutium, sed etiam se pessimi facinoris arguit: in Aebutium hoc dicit, armatos homines fuisse; de se autem hoc praedicat, Antiocho Aebutii servo *se* imperasse, ut in Caecinam advenientem cum ferro invaderet. quid loquar amplius de hoc homine? in quem ego hoc dicere, cum rogarer a Caecina, numquam volui, ne arguere illum re capitalis viderer, de eo dubito nunc quo modo aut loquar aut taceam, cum ipse hoc de se iuratus praedict. deinde L. Caelius non solum Aebutium cum armatis dixit<sup>26</sup> fuisse compluribus, verum etiam cum advocatis perpaucis eo venisse Caecinam. de hoc ego teste detrahā? cui<sup>10</sup> aequae ac meo testi ut credatis postulo. P. Memmius secutus est, qui suum non parvum beneficium commemoravit in amicos Caecinae, quibus sese viam per fratris [sui] fundum dedisse dixit qua effugere possent, cum essent omnes metu perterriti. huic ego testi gratias agam, quod et in re misericordem se praebuerit et in testimonio religiosum. A. Atilius et eius filius L. Atilius et armatos<sup>27</sup> ibi fuisse et se suos servos adduxisse dixerunt; etiam hoc amplius: cum Aebutius Caecinae malum minaretur, [hoc est mortem minaretur,] ibi tum Caecinam postulasse, ut moribus deductio fieret. hoc idem P. Rutilius dixit et eo libentius dixit, ut aliquo in iudicio eius testimonio creditum putaretur. duo praeterea testes nihil de vi, sed de

re ipsa atque emptione fundi dixerunt: P. Caesennius, auctor fundi, non tam auctoritate gravi quam corpore, et argentarius Sex. Clodius, cui cognomen est Phormio, nec minus niger nec minus confidens quam ille Terentianus est [Phormio], nihil de vi dixerunt, nihil praeterea quod  
 28 ad vestrum iudicium pertineret. decimo vero loco testis expectatus et ad extremum reservatus dixit senator populi Romani, splendor ordinis, decus atque ornamentum iudiciorum, exemplar antiquae religionis, Fideculanius Falcula: qui cum ita vehemens acerque venisset, ut non modo Caecinam periurio suo laederet, sed etiam mihi videretur irasci, ita eum placidum mollemque reddidi, ut non auderet, sicut meministis, iterum dicere, quot milia fundus suus abesset ab urbe; nam cum dixisset minus 1000, populus cum risu acclamavit, ipsa esse. meminerant enim omnes quantum in Albiano iudicio accepisset.  
 29 in eum quid dicam, nisi id quod negare non possit? venisse in consilium publicae quaestionis, cum eius consilii iudex non esset, et in eo consilio, cum causam non audisset et potestas esset ampliandi, dixisse sibi liquere; cum de incognita re iudicare voluisset, maluisse condemnare quam absolvere; cum, si uno minus damnarent, condemnari reus non posset, non ad cognoscendam causam, sed ad explendam damnationem praesto fuisse. utrum gravius aliquid in quempiam dici potest, quam ad hominem condemnandum, quem numquam vidisset neque audisset, adductum esse pretio? an certius quicquam obici potest, quam quod is, cui obicitur, ne nutu quidem  
 30 infirmare conatur? verum tamen is testis, ut facile intellexeretis cum non adfuisse animo, cum causa ab illis ageretur testesque dicerent, sed tantisper de aliquo reo cogitasse, cum omnes ante eum dixissent testes armatos cum Acbutio fuisse compluris, solus dixit non fuisse. visus est mihi primo veterator intellegere praeclare quid causa postularet et tantum modo errare, quod omnis testis infirmaret, qui ante eum dixissent, cum subito, ecce idem qui solet, duos solos servos armatos fuisse dixit.  
 11 quid huic tu homini facias? nonne concedas interdum, ut excusatione summae stultitiae summae improbitatis odium  
 31 deprecetur? utrum, recuperatores, his testibus non cre-

didistis, cum quod liqueret non habuistis? at controversia non erat quin verum dicerent. an in coacta multitudine, in armis, in telis, in praesenti metu mortis perspicuoque periculo caedis dubium vobis fuit inesse vis aliqua videretur neene? quibus igitur in rebus vis intellegi potest, si in his non intellegetur? an vero illa defensio vobis praeclara visa est: 'non deieci, sed obstiti; non enim te sum passus in fundum ingredi, sed armatos homines opposui, ut intellegeres, si in fundo pedem posuisses, statim tibi esse pereundum?' quid ais? is, qui armis proterritus, fugatus, pulsus est, non videtur esse deiectus? posterius <sup>32</sup> de verbo videbimus; nunc rem ipsam ponamus, quam illi non negant, et eius rei ius actionemque quaeramus.

Est haec res posita, quae ab adversario non negatur: Caccinam, cum ad constitutam diem tempusque venisset, ut vis ac deductio moribus fieret, pulsum prohibitumque esse vi coactis hominibus et armatis. cum hoc constet, ego homo imperitus iuris, ignarus negotiorum ac litium, hanc puto me habere actionem, ut per interdictum meum ius teneam atque iniuriam tuam persequar. fac in hoc errare me nec ullo modo posse per hoc interdictum id adsequi, quod velim: te uti in hac re magistro volo; quaero sitne aliqua huius rei actio an nulla. convocari <sup>33</sup> homines propter possessionis controversiam non oportet, armari multitudinem iuris retinendi causa non convenit, nec iuri quicquam tam inimicum quam vis nec aequitati quicquam tam infestum est quam convocati homines et armati. quod cum ita sit resque eius modi sit, ut in primis <sup>12</sup> a magistratibus animadvertenda videatur, iterum quaero sitne eius rei aliqua actio an nulla. nullam esse dices? audire cupio: qui in pace et otio, cum manum fecerit, copias pararit, multitudinem hominum coegerit, armarit, instruxerit, homines inermes, qui ad constitutum experiundi iuris gratia venissent, armis, viris, terrore periculoque mortis reppulerit, fugarit, averterit, hoc dicat: 'feci equidem quae dices omnia, et ea sunt et turbulenta <sup>34</sup> et temeraria et periculosa: quid ergo est? impune feci; nam quod agas mecum ex iure civili ac praetorio non habes.' itane vero, recuperatores? hoc vos audietis, et apud vos dici patiemini saepius? cum maiores nostri tanta



diligentia prudentiaque fuerint, ut omnia omnium non modo tantarum rerum, sed etiam tenuissimarum iura statuerint persecutique sint, \* hoc genus unum vel maximum praetermitterent, ut, si qui me exire domo mea coëgisset armis, haberem actionem, si qui introire prohibuisset, non haberem? nondum de Caccinae causa disputo, nondum de iure possessionis nostrae loquor; tantum de tua  
 35 defensione, C. Piso, quaero: cum ita dicis et ita constituis, si Caccina, cum in fundo esset, inde deiectus esset, tum per hoc interdictum eum restitui oportuisse; nunc vero nullo modo deiectum esse inde, ubi non fuerit; hoc interdicto nihil nos adsecutos esse, quaero, si te hodie domum tuam redeuntem coacti homines et armati non modo limine tectoque aedium tuarum, sed primo aditu vestibuloque prohibuerint, quid acturus sis. monet amicus meus te L. Calpurnius, ut idem dicas, quod ipse antea dixit, iniuriarum. quid *id* ad causam possessionis? quid ad restituendum eum, quem oportet restitui? quid denique ad ius civile? an ad atrocis *rei* notionem atque animadversionem ages iniuriarum? plus tibi ego largiar: non solum egeris, verum etiam condemnaris licet; num quid magis possidebis? actio enim iniuriarum non ius possessionis adsequitur, sed dolorem imminutae libertatis  
 13 iudicio poenaeque mitigat. praetor interea, Piso, tanta de  
 36 re tacebit? quem ad modum te restituat in aedis tuas non habebit? qui dies totos aut vim fieri vetat aut restitui factam iubet, qui de fossis, de cloacis, de minimis aquarum itinerumque controversiis interdicat, is repente obmutescet? in atrocissima re quid faciat non habebit? et C. Pisoni domo tectisque suis prohibito, prohibito, inquam, per homines coactos et armatos, praetor quem ad modum more et exemplo opitulari possit non habebit? quid enim dicet? aut quid tu tam insigni accepta iniuria postulabis? ‘unde vi prohibitus?’ sic nemo umquam interdixit; novum est, non dico inusitatum, verum omnino inauditum. ‘unde deiectus?’ quid proficies, cum illi hoc respondebunt tibi, quod tu nunc mihi: armatos se tibi obstitisse, ne in aedis accederes; deici porro nullo modo  
 37 potuisse qui non accesserit? ‘deicior ego,’ inquis ‘si quis meorum deicitur omnino.’ iam bene agis; a verbis

enim recedis et aequitate uteris; nam verba quidem ipsa si sequi volumus, quo modo tu deiceris, cum servus tuus deicitur? verum ita est, uti dicis: te deiectum debeo intellegere, etiam si tactus non fueris. nonne? age nunc, si ne tuorum quidem quisquam loco motus erit atque omnes in aedibus adservati ac retenti, tu solus prohibitus et a tuis aedibus vi atque armis proterritus, utrum hanc actionem habebis, qua nos usi sumus, an aliam quampiam an omnino nullam? nullam esse actionem dicere in re tam insigni tamque atroci neque prudentiae neque auctoritatis tuae est; alia si quae forte est quae nos fugerit, dic quae sit; cupio discere; haec si est, qua nos usi sumus, te iudice vincamus necesse est. non enim vereor ne hoc dicas, in eadem causa eodem interdicto te oportere restitui, Caecinam non oportere. etenim cui non perspicuum est ad incertum revocari bona, fortunas, possessiones omnium, si ulla ex parte sententia huius interdicti deminuta aut infirmata sit? si auctoritate virorum talium vis armatorum hominum in iudicio approbata videatur, in quo iudicio non de armis dubitatum, sed de verbis quaesitum esse dicatur? isne apud vos obtinebit causam suam, qui se ita defenderit: 'reieci ego te armatis hominibus, non deieci,' ut tantum facinus non in aequitate defensionis, sed in una littera latuisse videatur? huiusce rei vos statuetis nullam esse actionem, nullum experiundi ius constitutum, qui obstiterit armatis hominibus, qui multitudine coacta non introitu, sed omnino aditu quempiam prohibuerit? quid ergo? hoc quam habet vim, ut distare aliquid aut ex aliqua parte differre videatur, utrum pedem cum intulero atque in possessione vestigium fecero, tum expellar ac deiciar, an eadem vi et isdem armis mihi ante occurratur, ne non modo intrare, verum aspicere aut aspirare possim? quid hoc ab illo differt, ut ille cogatur restituere, qui ingressum expulerit, ille, qui ingredientem repplerit, non cogatur? videte, per deos immortalis! quod ius nobis, quam condicionem vobismet ipsis, quam denique civitati legem constituere velitis. huiusce generis una est actio per hoc interdictum, quo nos usi sumus, constituta; ea si nihil valet aut si ad hanc rem non pertinet, quid neglegentius aut quid stultius maioribus nostris

dici potest, qui aut tantae rei praetermiserint actionem aut eam constituerint, quae nequaquam satis verbis causam et rationem iuris amplecteretur? hoc est periculosum, [dissolvi] hoc [interdictum] est captiosum omnibus rem ullam constitui eius modi, quae cum armis gesta sit, rescindi iure non possit, verum tamen illud est turpissimum, tantae stultitiae prudentissimos homines condemnari, ut vos iudicetis huius rei ius atque actionem in mentem maioribus nostris non venisse.

- 41 ‘Queramus’ inquit ‘licet; tamen hoc interdicto Aebutius non tenetur.’ quid ita? ‘quod vis Caecinae facta non est.’ dici in hac causa potest, ubi arma fuerint, ubi coacta hominum multitudo, ubi instructi et certis locis cum ferro homines conlocati, ubi minae, pericula terroresque mortis, ibi vim non fuisse? ‘nemo’ inquit ‘occisus est neque sauciatus.’ quid ais? cum de possessionis controversia et de privatorum hominum contentione iuris loquimur, tu vim negabis factam, si caedes et occisio facta non erit? ego exercitus maximos saepe pulsos et fugatos esse dico terrore ipso impetuque hostium sine cuiusquam  
 15 non modo morte, verum etiam vulnere. etenim, recuperatores, non ea sola vis est, quae ad corpus nostrum  
 42 vitamque pervenit, sed etiam multo maior ea, quae periculo mortis iniecto [formidine animum perterritum] loco saepe et certo de statu demovet. itaque saucii saepe homines cum corpore debilitantur, animo tamen non cedunt neque eum relinquunt locum, quem statuerunt defendere; at alii pelluntur integri, ut non dubium sit quin maior adhibita vis ei sit, cuius animus sit perterritus, quam illi,  
 43 cuius corpus vulneratum sit. quod si vi pulsos dicimus exercitus esse eos, qui metu ac tenui saepe suspitione periculi fugerunt, et si non solum impulsu scutorum neque conflictu corporum neque ictu comminus neque coniectione telorum, sed saepe clamore ipso militum aut instructione aspectuque signorum magnas copias pulsas esse et vidimus et audivimus, quae vis in bello appellatur, ea in otio non appellabitur? et quod vehemens in re militari putatur, id leve in iure civili iudicabitur? et quod exercitus armatos movet, id advocationem togatorum non videbitur movisse? et vulnus corporis magis istam vim

quam terror animi declarabit? et sauciatio quaeretur, cum fugam factam esse constabit? tuus enim testis hoc dixit, 41 metu perterritis nostris advocatis locum se qua effugerent demonstrasse: qui non modo ut fugerent, sed etiam ipsius fugae tutam viam quaesiverunt, his vis adhibita non videbitur? quid igitur fugiebant? propter metum. quid metuebant? vim videlicet. potestis igitur principia negare, cum extrema conceditis? fugisse perterritos confitemini; causam fugae dicitis eandem quam omnes intellegimus, arma, multitudinem hominum, incursionem atque impetum armatorum: haec ubi conceduntur esse facta, ibi vis facta negabitur? at vero hoc quidem iam vetus est et 16 maiorum exemplo multis in rebus usitatum, cum ad vim faciundam veniretur, si quos armatos quamvis procul 45 conspexissent, ut statim testificati discederent, *cum* optime sponsonem facere possent, NI ADVERSUS EDICTUM PRAETORIS VIS FACTA ESSET. itane vero? scire esse armatos satis est, ut vim factam probes; in manus eorum incidere non est satis? aspectus armatorum ad vim probandam valebit; incursus et impetus non valebit? qui abierit, facilius sibi vim factam probabit quam qui effugerit? at ego hoc dico: 46 si ut primo in castello Caccinae dixit Aebutius se homines coëgissee et armasse neque eum, si illo accessisset, abiturum, statim Caccina discessisset, dubitare vos non debuisse quin Caccinae facta vis esset; si vero simul ac procul conspexit armatos, recessisset, eo minus dubitaretis; omnis enim vis est, quae periculo aut decedere nos alicunde cogit aut prohibet accedere. quod si aliter statuetis, videte ne hoc vos statuatis, qui vivus discesserit, ei vim non esse factam; ne hoc omnibus in possessionum controversiis praescribatis, ut confligendum sibi et armis decertandum putent; ne quem ad modum in bello poena ignavis ab imperatoribus constituitur, sic in iudiciis deterior causa sit eorum, qui fugerint, quam qui ad extremum usque contenderint. cum de iure et legitimis hominum controversiis loquimur et in his rebus vim nominamus, 47 pertenuis vis intellegi debet: vidi armatos, quamvis paucos: [magna] vis est; decessi unius hominis telo proteritus: deiectus detrususque sum. hoc si ita statuetis, non modo non erit cur depugnare quisquam posthac posses-



sionis causa velit, sed ne illud quidem, cur repugnare; sin autem vim sine caede, sine volneratione, sine sanguine nullam intellegetis, statuetis homines possessionis cupidiores quam vitae esse oportere.

- 17  
48 Age vero, de vi te ipsum habeo iudicem, Aebutii; responde, si tibi videtur: in fundum Caccina utrum tandem noluit an non potuit accedere? cum te obstitisse et reppulisse dicis, certe hunc voluisse concedis: potes igitur dicere non ei vim fuisse impedimento, cui, cum cuperet eoque consilio venisset, per homines coactos licitum non sit accedere? si enim id, quod maxime voluit, nullo modo potuit, vis profecto quaedam obstiterit necesse est, aut tu dic quam ob rem, cum vellet accedere, non accesserit.
- 49 iam vim factam negare non potes; deiectus quem ad modum sit, qui non accesserit, id quaeritur; demoveri enim et depelli de loco necesse est eum, qui deiciatur; id autem accidere ei qui potest, qui omnino in eo loco, unde se deiectum esse dicit, numquam fuit? quid? si fuisset et ex eo loco metu permotus fugisset, cum armatos videret, diceresne esse deiectum? opinor. ain tu, qui tam diligenter et tam callide verbis controversias, non aequitate diiudicas, et iura non utilitate communi, sed litteris exprimis, poterisne dicere deiectum esse eum, qui tactus non erit? quid? detrusum dicesne? nam eo verbo antea praetores in hoc interdicto uti solebant. quid ais? potestne detrudi quisquam, qui non attingitur? nonne, si verbum sequi volumus, hoc intellegamus necesse est, eum detrudi, cui manus adferantur? necesse est, inquam, si ad verbum rem volumus adiungere, neminem statui detrusum, qui non adhibita vi manu demotus et actus praeceps intellegatur; deiectus vero qui potest esse quisquam,
- 50 nisi in inferiorem locum de superiore motus? potest pulsus, fugatus, eiectus denique; illud vero nullo modo potest, [deiectus esse quisquam] non modo qui tactus non sit, sed ne in aequo quidem et plano loco. quid ergo? hoc interdictum putamus eorum esse causa compositum, qui se praecipitatos ex locis superioribus dicerent — eos enim vere possumus dicere esse deiectos —
- 18 an cum voluntas et consilium et sententia interdicti intellegatur, impudentiam summam aut stultitiam singula-

rem putabimus in verborum errore versari; rem et causam et utilitatem communem non relinquere solum, sed etiam prodere?

An hoc dubium est quin neque verborum tanta copia <sup>51</sup> sit non modo in nostra lingua, quae dicitur esse inops, sed ne in alia quidem ulla, res ut omnes suis certis ac propriis vocabulis nominentur, neque vero quicquam opus sit verbis, cum ea res, cuius causa verba quaesita sint, intellegatur? quae lex, quod senatus consultum, quod magistratus edictum, quod foedus aut pactio, quod, ut ad privatas res redeam, testamentum, quae [iudicia aut stipulationes aut] pacti et conventi formula non infirmari ac convelli potest, si ad verba rem deflectere velimus, consilium autem eorum, qui scripserunt, et rationem et auctoritatem relinquamus? sermo hercule [et] familiaris <sup>52</sup> et cotidianus non cohaerebit, si verba inter nos aucupabimur; denique imperium domesticum nullum erit, si servolis hoc [nostris] concesserimus, ut ad verba nobis oboediant, non ad id, quod ex verbis intellegi possit, obtemperent. exemplis nunc uti videlicet mihi necesse est harum rerum omnium! non occurrit uni cuique vestrum aliud alii in omni genere exemplum quod testimonio sit, non ex verbis aptum pendere ius, sed verba servire hominum consiliis et auctoritatibus? ornate et copiose **L.** <sup>53</sup> Crassus, homo longe eloquentissimus, paulo ante quam nos in forum venimus, iudicio centumvirali hanc sententiam defendit et facile, cum contra eum prudentissimus homo **Q. Mucius** diceret, probavit omnibus **M'. Curium**, qui heres institutus esset ita, **MORTUO POSTUMO FILIO**, cum filius non modo non mortuus, sed ne natus quidem esset, heredem esse oportere. quid? verbis hoc satis erat cautum? minime. quae res igitur valuit? voluntas, quae si tacitis nobis intellegi posset, verbis omnino non uteremur; quia non potest, verba reperta sunt, non quae impedirent, sed quae indicarent voluntatem. lex usum et auctoritatem fundi iubet esse biennium; at utimur eodem <sup>19</sup> iure in aedibus, quae in lege non appellantur. si via sit immunita, iubet qua velit agere iumentum. potest hoc <sup>54</sup> ex verbis intellegi licere, si via sit in **Brittiis** immunita, agere si velit iumentum per **M. Scauri Tusculanum**. actio

est in auctorem praesentem his verbis: QUANDOQUE TE IN IURE CONSPICIO. hac actione Appius ille Caeus uti non posset, si tam vere homines verba consecrarentur, ut rem, cuius causa verba sunt, non considerarent. testamento si recitatus heres esset pupillus Cornelius isque iam annos xx haberet, vobis interpretibus amitteret hereditatem.

55 veniunt in mentem mihi permulta; vobis plura, certo scio; verum ne nimium multa complectamur atque ab eo, quod propositum est, longius aberret oratio, hoc ipsum interdictum, quo de agitur, consideremus; intellegetis enim in eo ipso, si in verbis ius constituamus, utilitatem omnem nos huius interdicti, dum versuti et callidi velimus esse, amissuros. UNDE TU AUT FAMILIA AUT PROCURATOR TUUS. si me vilicus tuus solus deiecerit, non familia deiecerit, ut opinor, sed aliquis de familia. recte igitur diceres te restituisse? quippe: quid enim facilius est quam probare eis, qui modo Latine sciant, in uno servulo familiae nomen non valere? si vero ne habeas quidem servum praeter eum, qui me deiecerit, clames videlicet ‘si habeo familiam, a familia mea fateor te esse deiectum;’ neque enim dubium est quin, si ad rem iudicandam verbo ducimur, non re, familiam intellegamus quae constet ex servis pluribus, quin unus homo familia non sit. verbum certe hoc non modo postulat, sed etiam

56 cogit; at vero ratio iuris interdictique vis et praetorum voluntas et hominum prudentium consilium et auctoritas

20 respuit hanc defensionem et pro nihilo putat. quid ergo? isti homines Latine non loquuntur? immo vero tantum loquuntur, quantum est satis ad intellegendam voluntatem; cum sibi hoc proposuerint, ut sive me tu deieceris sive tuorum quispiam sive servorum sive amicorum, ut servos non numero distinguant, sed appellent uno familiae nomine; de liberis autem quisquis est, procuratoris nomine appelletur; non quo omnes sint aut appellentur procuratores, qui negotii nostri aliquid gerunt, sed in hac re, cognita sententia interdicti, verba subtiliter exquiri omnia noluerunt. non enim alia causa est aequitatis in uno servo et in pluribus; non alia ratio iuris in hoc genere dumtaxat, utrum me tuus procurator deiecerit, is qui legitime procurator dicitur, omnium rerum eius, qui

57

in Italia non sit absitve rei publicae causa, quasi quidam  
 paene dominus, hoc est, alieni iuris vicarius, an tuus co-  
 lonus aut vicinus aut cliens aut libertus aut quivis, qui  
 illam vim deiectionemque tuo rogatu aut tuo nomine fe-  
 cerit. qua re si ad eum restituendum, qui vi deiectus 58  
 est, eandem vim habet acquitatis ratio, ea intellecta certe  
 nihil ad rem pertinet, quae verborum vis sit ac nominum.  
 tam restitues, si tuus me libertus deiecerit, nulli tuo  
 praepositus negotio, quam si procurator deiecerit; non  
 quo omnes sint procuratores, qui aliquid nostri nego-  
 tii gerunt, sed quod *id* in hac re quaeri nihil attinet;  
 tam restitues, si unus servolus, quam si familia fecerit  
 universa; non quo idem sit servolus unus quod familia,  
 verum quia non quibus verbis quidque dicatur quaeritur,  
 sed quae res agatur. etiam si, ut longius a verbo rece-  
 damus, ab acquitate ne tantulum quidem, si tuus servus  
 nullus fuerit et omnes alieni ac mercennarii, tamen ei  
 ipsi tuae familiae genere et nomine continebuntur. perge 21  
 porro hoc idem interdictum sequi: HOMINIBUS COACTIS.  
 neminem coëgeris; ipsi convenerint sua sponte. certe  
 cogit is, qui congregat homines et convocat; coacti sunt  
 ei, qui ab aliquo sunt unum in locum congregati. si non  
 modo convocati non sunt, sed ne convenerunt quidem,  
 sed ei modo fuerunt, qui etiam antea, non vis ut fieret,  
 verum colendi aut pascendi causa esse in agro consue-  
 rant, defendes homines coactos non fuisse, et verbo qui-  
 dem superabis me ipso iudice, re autem ne consistes  
 quidem ullo iudice; vim enim multitudinis restitui volue-  
 runt, non solum convocatae multitudinis, sed, quia ple-  
 runque, ubi multitudine opus est, homines cogi solent,  
 ideo de coactis compositum interdictum est; quod etiam  
 si verbo differre videbitur, re tamen erit unum et omni-  
 bus in causis idem valebit, in quibus perspicitur una at-  
 que eadem causa acquitatis. ARMATISVE. quid dicemus? 60  
 armatos, si Latine loqui volumus, quos appellare vere  
 possumus? opinor eos, qui scutis telisque parati orna-  
 ti sunt. quid igitur? si glebis aut saxis aut fustibus  
 aliquem de fundo praecipitem egeris iussusque sis, quem  
 hominibus armatis deieceris, restituere, restituisse te  
 dices? verba si valent, si causae non ratione, sed verbis



ponderantur, me auctore dicito; vinctes profecto non fuisse armatos eos, qui saxa iacerent quae de terra ipsi tollerent, non esse arma caespites neque glebas; non fuisse armatos eos, qui praetercuntes ramum defrangerent arboris; arma esse suis nominibus alia ad tegendum, alia ad nocendum, quae qui non habuerint, eos inermes fuisse

61 vinctes; verum si quod erit armorum iudicium, tum ista dicito: iuris iudicium cum erit et acquitatis, cave in ista tam frigida, tam ieiuna calumnia delitiscas; non enim reperies quemquam iudicem aut recuperatorem, qui tamquam si arma militis inspicunda sint, ita probet armatum, sed perinde valebit quasi armatissimi fuerint, si reperientur ita parati fuisse, ut vim vitae aut corpori

22 potuerint adferre. atque ut magis intellegas quam verba  
62 nihil valeant, si tu solus aut quivis unus cum scuto et gladio impetum in me fecisset atque ego ita deiectus essem, auderesne dicere interdictum esse de hominibus armatis; hic autem hominem armatum unum fuisse? non, opinor, tam impudens esses. atqui vide ne multo nunc sis impudentior: nam tum quidem omnis mortalis implorare posses, quod homines in tuo negotio Latine obliviscerentur: [quod inermi armati iudicarentur,] quod, cum interdictum esset de pluribus, commissa res esset ab uno, unus homo plures esse homines iudicarentur.

63 verum in his causis non verba veniunt in iudicium, sed ea res, cuius causa verba haec in interdictum coniecta sunt; vim, quae ad caput ac vitam pertineret, restitui sine ulla exceptione voluerunt. ea fit plerumque per homines coactos armatosque: si alio modo, consilio eodem [periculo] facta sit, eodem iure esse voluerunt. non enim maior est iniuria, si tua familia quam si tuus vilicus; non si tui servi quam si alieni ac mercennarii, non si tuus procurator quam si vicinus aut libertus tuus; non si coactis hominibus quam si voluntariis aut etiam adsiduis ac domesticis; non si armatis quam si inermibus, qui vim armorum haberent ad nocendum; non si pluribus quam si uno armato; quibus enim rebus plerumque vis fit eius modi, eae res appellantur in interdicto; si per alias res eadem facta vis est, ea, tametsi verbis interdicti non concluditur, sententia tamen iuris atque auctoritate retinetur.

Venio nunc ad illud tuum: ‘non deieci, non enim sivi<sup>23</sup>  
accedere.’ puto te ipsum, Piso, perspicere quanto ista<sup>64</sup>  
sit angustior iniquiorque defensio quam si illa uterere:  
‘non fuerunt armati, cum fustibus et cum saxis fuerunt.’  
si mehercule mihi, non copioso homini ad dicendum, optio  
detur, utrum malim defendere non esse deiectum eum,  
cui vi et armis ingredienti sit occursum, an armatos non  
fuisse eos, qui sine scutis sineque ferro fuerint, omnino  
ad probandum utramque rem videam infirmam nugato-  
riamque esse, ad dicendum autem in altera videar mihi  
aliquid reperire posse, non fuisse armatos eos, qui neque  
ferri quicquam neque scutum ullum habuerint; hic vero  
haeream, si mihi defendendum sit eum, qui pulsus fuga-  
tusque sit, non esse deiectum. atque illud in tota defen-<sup>65</sup>  
sione tua mihi maxime mirum videbatur, te dicere iuris  
consultorum auctoritati obtemperari non oportere; quod  
ego tametsi non nunc primum neque in hac causa solum  
audio, tamen admodum mirabar abs te quam ob rem di-  
ceretur. nam ceteri tum ad istam orationem decurrunt,  
cum se in causa putant habere aequum et bonum quod  
defendant, si contra verbis et litteris, et, ut dici solet,  
summo iure contenditur: *tum* solent eius modi iniquitati  
aequi et boni nomen dignitatemque opponere; tum illud,  
quod dicitur *sive*, *nive*, inident; tum aucupia verborum  
et litterarum tendiculas in invidiam vocant; tum voci-  
ferantur ex aequo et bono, non ex callido versutoque  
iure rem iudicari oportere; scriptum sequi calumniatoris  
esse, [bonique] iudicis voluntatem scriptoris auctoritatem-  
que defendere; in ista vero causa, cum tu sis is, qui te<sup>66</sup>  
verbo litteraque defendas, cum tuae sint hae partes: ‘unde  
deiectus es? an inde quo prohibitus es accedere? reiectus  
es, non deiectus;’ cum tua sit haec oratio: ‘fateor me  
homines coëgissem, fateor armasse, fateor tibi mortem esse  
minitatum, fateor hoc interdicto praetoris vindicari, si  
voluntas et aequitas valeat, sed ego invenio in interdicto  
verbum unum, ubi delitiscam: non deieci te ex eo loco,  
quem in locum prohibui ne venires.’— in ista defensione  
accusas eos, qui consuluntur, quod aequitatis censeant  
rationem, non verbi haberi oportere? et hoc loco Scae-<sup>24</sup>  
volam dixisti causam apud centumviros non tenuisse,<sup>67</sup>

quem ego antea commemoravi, quod idem faceret quod tu nunc, tametsi ille id aliqua causa faciebat, tu nulla facis, tamen probasse nemini quod defendebat, quia verbis oppugnare aequitatem videbatur. cum id miror, te hoc in hac re alieno tempore et contra quam ista causa postulasset defendisse, tum illud volgo in iudiciis et non nunquam ab ingeniosis hominibus defendi mihi mirum videri solet, nec iuris consultis concedi nec ius civile in  
68 causis semper valere oportere; nam qui hoc disputant, si id dicunt, non recte aliquid statuere eos, qui consulantur, non hoc debent dicere, iuris consultis, sed hominibus stultis obtemperari non oportere; sin illos recte respondere concedunt et aliter iudicari dicunt oportere, male iudicari oportere dicunt; neque enim fieri potest ut aliud iudicari de iure, aliud responderi oporteat, nec ut quisquam iuris numeretur peritus, qui id statuatur esse ius,  
69 quod non oporteat iudicari. 'at est aliquando contra iudicatum.' primum utrum recte an perperam? si recte, id fuit ius, quod iudicatum est; sin aliter, non dubium est utrum iudices an iuris consulti vituperandi sint. deinde si de iure vario quippiam iudicatum est, non potius contra iuris consultos [statuunt, si] aliter pronuntiatum est ac placuit Mucio, quam ex eorum auctoritate, si, ut Manilius statuebat, sic est iudicatum. etenim ipse Crassus non ita causam apud centumviros egit, ut contra iuris consultos diceret, sed ut hoc doceret, illud, quod  
、 Scaevola defendebat, non esse ius, et in eam rem non solum rationes adferret, sed etiam Q. Mucio socero suo multisque peritissimis hominibus auctoribus uteretur.  
25  
70 nam qui ius civile contemnendum putat, is vincula revellit non modo iudiciorum, sed etiam utilitatis vitaeque communis, qui autem interpretes iuris vituperat, si imperitos iuris esse dicit, de hominibus, non de iure civili detrahit; sin peritis non putat esse obtemperandum, non homines laedit, sed leges ac iura labefactat: quod vobis venire in mentem profecto necesse est, nihil esse in civitate tam diligenter quam ius civile retinendum. etenim hoc sublato nihil est qua re exploratum cuiquam possit esse quid suum aut quid alienum sit, nihil est quod aequabile inter omnis atque unum omnibus esse possit.

itaque in ceteris controversiis atque iudiciis, cum quae-  
 ritur aliquid factum necne sit, verum an falsum profera-  
 tur, et fictus testis subornari solet et interponi falsae ta-  
 bulae, non numquam honesto ac probabili nomine bono  
 viro [iudici] error obici, improbo facultas dari, ut, cum  
 sciens perperam iudicarit, testem tamen aut tabulas se-  
 cutus esse videatur: in iure nihil est eius modi, recupera-  
 tores, non tabulae falsae, non testis improbus; denique  
 nimia ista quae dominatur in civitate potentia in hoc  
 solo genere quiescit; quid agat, quo modo adgrediatur  
 iudicem, qua denique digitum proferat non habet. illud 72  
 enim potest dici iudici ab aliquo non tam verecundo ho-  
 mine quam gratioso: 'iudica hoc factum esse aut num-  
 quam esse factum [creatum]; crede huic testi, has com-  
 proba tabulas' — hoc non potest: 'statue, cui filius agna-  
 tus sit, eius testamentum non esse ruptum; iudica, quod  
 mulier sine tutore auctore promiserit, deberi.' non est  
 aditus ad huiusce modi res neque potentiae cuiusquam  
 neque gratiae; denique quo maius hoc sanctiusque videat-  
 ur, ne pretio quidem corrumpi iudex in eius modi causa  
 potest. iste vester testis, qui ausus est dicere, FECISSE 73  
 VIDERI eum, de quo ne cuius rei argueretur quidem scire  
 potuit, is ipse numquam auderet iudicare deberi viro do-  
 tem, quam mulier nullo auctore dixisset. o rem prae-  
 claram vobisque ob hoc retinendam, recuperatores! quid  
 enim est ius civile? quod neque inflecti gratia neque per-  
 fringi potentia neque adulterari pecunia possit; quod si  
 non modo oppressum, sed etiam desertum aut negligen-  
 tius adservatum erit, nihil est quod quisquam sese ha-  
 bere certum aut a patre accepturum aut relicturum liberis  
 arbitretur. quid enim refert aedis aut fundum relictum 74  
 a patre aut aliqua ratione habere bene partum, si incer-  
 tum est, quae patrimonia tua iure mancipii sunt, ea pos-  
 sisne retinere; si parum communitum ius est civile ac  
 publica lege contra alicuius gratiam teneri non potest?  
 quid, inquam, prodest fundum habere, si, quae diligen-  
 tissime descripta a maioribus iura finium, possessionum,  
 aquarum itinerumque sunt, haec perturbari aliqua ratione  
 commutarique possunt? mihi credite, maior hereditas uni  
 cuique nostrum venit in isdem bonis a iure et a legibus



quam ab eis, a quibus illa ipsa bona relicta sunt; nam ut perveniat ad me fundus, testamento alicuius fieri potest; ut retineam quod meum factum est, sine iure civili fieri non potest. fundus a patre relinqui potest; at usucapio fundi, hoc est, finis sollicitudinis ac periculi litium, non a patre relinquitur, sed a legibus. aquae ductus, haustus, iter, actus a patre, sed rata auctoritas harum rerum omnium ab iure civili sumitur. quapropter non minus diligenter ea, quae a maioribus accepistis, publica patrimonialia iuris quam privatae rei vestrae retinere debetis, non solum quod haec iure civili saepe sunt, verum etiam quod patrimonium unius incommodo dimittetur, ius amitti non potest sine magno incommodo civitatis. in hac ipsa causa, recuperatores, si hoc nos non obtinemus, vi armatis hominibus deiectum esse eum, quem vi armatis hominibus pulsum fugatumque esse constet, Caccina rem non amittet, quam ipsam animo forti, si tempus ita ferret, amitteret, in possessionem in praesentia non restitueretur; nihil amplius: populi Romani causa, civitatis ius, bona, fortunae possessionesque omnium in dubium incertumque revocabuntur; vestra auctoritate hoc constituitur, hoc praescribitur: quicum tu posthac de possessione contendes, eum, si ingressum modo in praedium deieceris, restituas oportebit; sin autem ingredienti cum armata multitudine obvius fueris et ita venientem reppuleris, fugaris, averteris, non restitues. *sin* iuris haec vox est, esse vim non in caede solum, sed etiam in animo, libidinis, nisi cruor appareat, vim non esse factam; iuris, deiectum esse, qui prohibitus sit, libidinis, nisi ex eo loco, ubi vestigium impresserit, deici neminem posse; iuris rem et sententiam et aequitatem plurimum valere oportere, libidinis verbo ac littera ius omne intorqueri, vos statuete, recuperatores, utrae voces vobis honestiores et utiliores esse videantur.

Hoc loco percommode accidit, quod non adest is, qui paulo ante adfuit et adesse nobis frequenter in hac causa solet, vir ornatissimus, C. Aquilius — nam ipso praesente de virtute eius et prudentia timidius dicerem, quoniam et ipse pudore quodam adficeretur ex sua laude et me similis ratio pudoris a praesentis laude tardaret — cuius auctori-

tati dictum est ab illa causa concedi nimium non oportere; nec vereor de tali viro ne plus dicam quam vos aut sentiatitis aut apud vos commemorari velitis. quapropter <sup>78</sup> hoc dicam, numquam eius auctoritatem nimium valere, cuius prudentiam populus Romanus in cavendo, non in decipiendo perspexerit; qui iuris civilis rationem numquam ab acuitate seiunxerit; qui tot annos ingenium, laborem, fidem suam populo Romano promptam expositamque praebuerit; qui ita iustus sit et bonus vir, ut natura, non disciplina, consultus esse videatur; ita peritus ac prudens, ut ex iure civili non scientia solum quaedam, verum etiam bonitas nata videatur; cuius tantum sit ingenium, ita prompta fides, ut quicquid inde haurias purum te liquidumque haurire sentias: qua re permagnam <sup>79</sup> initis a nobis gratiam, cum cum auctorem defensionis esse dicitis; illud autem miror cum vos aliquem contra me sentire dicatis, cur meum auctorem vos pro me appelletis, vestrum non nominetis. verum tamen quid ait vester iste auctor? QUIBUS QUIDQUE VERBIS ACTUM PRONUNTIATUMQUE SIT. conveni ego ex isto genere consultorum <sup>80</sup> non neminem, ut opinor, istum ipsum, quo vos auctorem istam agere et defensionem causae constituere vos dicitis; qui cum istam disputationem mecum ingressus esset, non posse probari quemquam esse deiectum, nisi ex eo loco, in quo fuisset, rem et sententiam interdicti mecum facere fatebatur, verbo me excludi dicebat, a verbo autem posse recedi non arbitrabatur. cum exemplis uter <sup>80</sup> multis ex omni memoria antiquitatis, a verbo et ab scripto plurimis saepe in rebus ius et aequi bonique rationem esse seiunctam, semperque id valuisse plurimum, quod in se auctoritatis habuisset acuitatisque plurimum, consolatus est me et ostendit in hac ipsa causa nihil esse quod laborarem; nam verba ipsa sponsionis facere mecum, si vellem diligenter attendere. ‘quonam’ inquam ‘modo?’ ‘quia certe’ inquit ‘deiectus est Caccina vi hominibus armatis aliquo ex loco; si non ex eo loco, quem in locum venire voluit, at ex eo certe, unde fugit.’ ‘quid tum?’ ‘praetor’ inquit ‘interdixit, ut, unde deiectus esset, eo restitueretur, hoc est, quicumque is locus esset, unde deiectus esset; Aebutius autem, qui fatetur aliquo ex loco

deiectum esse Caccinam, is quoniam se restituisse dixit,  
 81 necesse est male fecerit sponsonem.' quid est, Piso?  
 placet tibi nos pugnare verbis? placet causam iuris et  
 aequitatis et non nostrae possessionis, sed omnino pos-  
 sessionum omnium constituere in verbo? ego quid mihi  
 videretur, quid a maioribus factitatum, quid horum aucto-  
 ritate, quibus iudicandum est, dignum esset ostendi: id  
 verum, id aequum, id utile omnibus esse spectari quo  
 consilio et qua sententia, non quibus quidque verbis esset  
 actum. tu me ad verbum vocas: non ante veniam, quam  
 recusaro: nego oportere, nego obtineri posse, nego ullam  
 rem esse quae aut comprehendi satis aut caveri aut ex-  
 cipi possit, si aut praeterito aliquo verbo aut ambigue  
 29 posito re et sententia cognita non id, quod intellegitur,  
 82 sed id, quod dicitur, valebit. quoniam satis recusavi,  
 venio iam quo vocas: quaero abs te simne deiectus, non  
 de Fulciniano fundo; neque enim praetor, si ex eo fundo  
 essem deiectus, ita me restitui iussit, sed eo, unde de-  
 iectus essem; sum ex proximo vicini fundo deiectus, qua  
 adibam ad istum fundum; sum de via, sum certe alicunde,  
 sive de privato sive de publico: eo restitui sum iussus.  
 restituisse te dixti: nego me ex decreto praetoris restitutum  
 esse. quid ad haec dicimus? aut tuo, quem ad modum  
 dicitur, gladio aut nostro defensio tua conficiatur  
 83 necesse est. si ad interdicti sententiam confugis et de quo  
 fundo actum sit tum, cum Aebutius restituere iubebatur,  
 id quaerendum esse dicis neque aequitatem rei verbi la-  
 queo capi putas oportere, in meis castris praesidiisque  
 versaris; mea, mea est ista defensio, ego hoc vociferor,  
 ego omnis homines deosque testor: cum maiores vim ar-  
 matam nulla iuris defensione texerint, non vestigium eius,  
 qui deiectus sit, sed factum illius, qui deiecerit, in iudi-  
 cium venire; deiectum esse qui fugatus sit, vim esse  
 84 factam cui periculum mortis sit iniectum. sin hunc locum  
 fugis et reformidas et me ex hoc, ut ita dicam, campo  
 aequitatis ad istas verborum angustias et ad omnis litte-  
 rarum angulos revocas, in eis ipsis intercludere insidiis,  
 quas mihi conaris opponere: 'non deieci, sed reieci.'  
 peracutum hoc tibi videtur, hic est mucro defensionis  
 tuae: in eum ipsum causa tua incurrat necesse est. ego

enim tibi refero: 'si non sum ex eo loco deiectus, quo prohibitus sum accedere, at ex eo sum deiectus, quo accessi, unde fugi. si praetor non distinxit locum, quo me restitui iuberet, et restitui iussit, non sum ex edicto restitutus. velim, recuperatores, hoc totum si vobis ver-<sup>85</sup> sutius, quam mea consuetudo defendendi fert, videbitur, sic existimetis: primum alium, non me excogitasse, deinde huius rationis non modo non inventorem, sed ne probatorem quidem esse me, idque me non ad meam defensionem attulisse, sed illorum defensionem rettulisse; me posse pro meo iure dicere neque in hac re, quam ego protuli, quaeri oportere, quibus verbis praetor interdixerit, sed de quo loco sit actum, cum interdixit; neque in vi armatorum spectari oportere in quo loco sit facta vis, verum sitne facta; te vero nullo modo posse defendere, in qua re tu velis, verba spectari oportere, in qua re nolis, non oportere. verum tamen eequid mihi respondetur<sup>30</sup> ad illud, quod ego iam antea dixi, non solum re et sententia, sed verbis quoque hoc interdictum ita esse compositum, ut nihil commutandum videretur? attendite, quaeso, diligenter, recuperatores: est enim vestri ingenii non meam, sed maiorum prudentiam cognoscere; non enim id sum dicturus, quod ego invenerim, sed quod illos non fugerit: cum de vi interdicatur, duo genera causarum esse intellegebant, ad quae interdictum pertineret: unum, si qui ex eo loco, ubi fuisset, se deiectum diceret; alterum, si qui ab eo loco, quo veniret; et horum utrumque neque praeterea quicquam potest accidere, recuperatores. id adeo sic considerate: si qui meam familiam de<sup>87</sup> meo fundo deiecerit, ex eo me loco deiecerit; si qui mihi praesto fuerit cum armatis hominibus extra meum fundum et me introire prohibuerit, non ex eo, sed ab eo loco me deiecerit. ad haec duo genera rerum unum verbum, quod satis declararet utrasque res, invenerunt, ut, sive ex fundo sive a fundo deiectus essem, uno atque eodem interdicto restituerer: UNDE TU. hoc verbum UNDE<sup>86</sup> utrumque declarat, et ex quo loco et a quo loco. unde deiectus est Cinna? ex urbe. unde Telesinus? ab urbe. unde deiecti Galli? a Capitolio. unde, qui cum Graccho fuerunt? ex Capitolio. videtis igitur, hoc uno verbo UNDE<sup>88</sup>



significari duas res, et ex quo et a quo. cum autem eo restitui iubet, ita iubet, ut, si Galli a maioribus nostris postularent, ut eo restituerentur, unde deieci essent, et aliqua vi hoc adsequi possent, non, opinor, eos in cuniculum, qua adgressi erant, sed in Capitolium restitui oporteret. hoc enim intellegitur: UNDE DEIECISTI, sive ex quo loco sive a quo loco, EO RESTITUAS. hoc iam simplex est, in eum locum restituas: sive ex hoc loco deiecisti, restitue in hunc locum, sive ab hoc loco, restitue in eum locum, non ex quo, sed a quo deiectus est. ut si qui ex alto cum ad patriam accessisset, tempestate subito reiectus optaret, ut cum a patria deiectus esset, eo restitueretur, hoc, opinor, optaret, ut a quo loco depulsus esset, in eum se fortuna restitueret, non in salum, sed in ipsam urbem, quam petebat, sic, quoniam verborum vim necessario similitudine rerum aucupamur, qui postulat, ut, a quo loco deiectus est, hoc est, unde deiectus est, eo restituatur, hoc postulat, ut in eum ipsum locum restituatur. cum verba nos eo ducunt tum res ipsa hoc sentire atque intellegere cogit. etenim, Piso, — redeo nunc ad illa principia defensionis meae — si quis te ex aedibus tuis vi hominibus armatis deiecerit, quid ages? opinor, hoc interdicto, quo nos usi sumus, persequere. quid? si qui iam de foro redeuntem armatis hominibus domum tuam te introire prohibuerit, quid ages? utere eodem interdicto. cum igitur praetor interdixerit, unde deiectus es, ut eo restituaris, tu hoc idem, quod ego dico et quod perspicuum est, interpretabere: cum illud verbum UNDE in utramque rem valeat, eoque [tu] restitui sis iussus, tam te in aedis tuas restitui oportere, si e vestibulo, quam si ex interiore aedium parte deiectus sis.

90 Ut vero iam, recuperatores, nulla dubitatio sit, sive rem sive verba spectare voltis, quin secundum nos iudicetis, exoritur hic [iam] obrutis rebus omnibus et perditis illa defensio, eum deici posse, qui tum possideat, qui non possideat, nullo modo posse; itaque si ego sim a tuis aedibus deiectus, restitui non oportere, si ipse sis, oportere. numera quam multa in ista defensione falsa sint, Piso; ac primum illud attende, te iam ex illa ratione esse depulsum, quod negabas quemquam deici posse, nisi

inde, ubi tum esset; iam posse concedis: eum qui non possideat, negas deici posse. cur ergo aut in illud cotidianum interdictum UNDE ILLE ME VI DEIECIT, additur CUM EGO POSSIDEREM, si deici nemo potest, qui non possidet, aut in hoc interdictum, DE HOMINIBUS ARMATIS, non additur, si oportet quaeri possederit necne? negas deici, nisi qui possideat: ostendo, si sine armatis coactisve hominibus deiectus quispiam sit, eum, qui fateatur se deiecisse, vincere sponsionem, si ostendat eum non possedissee. negas deici, nisi qui possideat: ostendo ex hoc interdicto DE ARMATIS HOMINIBUS, qui possit ostendere non possedissee eum, qui deiectus sit, condemnari tamen sponsionis necesse esse si fateatur esse *sic* deiectum. dupliciter homines deiciuntur, aut sine coactis armatisve hominibus aut per eius modi rationem atque vim. ad duas dissimilis res duo diiuncta interdicta sunt: in illa vi cotidiana non satis est posse docere se deiectum, nisi ostendere potest, eum possideret, tum deiectum; ne id quidem satis est, nisi docet ita se possedissee, ut nec vi nec clam nec precario possederit. itaque is, qui se restituisse dixit, magna voce saepe confiteri solet se vi deiecisse, verum illud addit: 'non possidebat,' vel etiam, cum hoc ipsum concessit, vincit tamen sponsionem, si planum facit ab se illum aut vi aut clam aut precario possedissee. videtisne quot defensionibus eum, qui sine armis ac multitudine vim fecerit, uti posse maiores voluerint? hunc vero, qui ab iure, officio, [bonis] moribus ad ferrum, ad arma, ad caedem confugerit, nudum in causa destitutum videtis, ut, qui armatus de possessione contendisset, inermis plane de sponsione certaret. ecquid [igitur] interest, Piso, inter haec interdicta? ecquid interest, utrum in hoc sit additum CUM A. CAECINA POSSIDERET, necne? ecquid te ratio iuris, ecquid interdictorum dissimilitudo, ecquid auctoritas maiorum commovet? si esset additum, de eo quaeri oporteret: additum non est, tamen oportebit? atque ego in hoc Caecinam non defendo; possedit enim Caecina, recuperatores, et id, tametsi extra causam est, percurram tamen brevi, ut non minus hominem ipsum quam ius commune defensum velitis. Caesenniam possedissee propter usum fructum non negas: qui colonus habuit conductum de Caesennia

32  
92

93

94

- fundum, cum idem ex eadem conductione fuerit in fundo, dubium est quin, si Caesennia tum possidebat, cum erat colonus in fundo, post eius mortem heres [eodem iure] possederit? deinde ipse Caccina cum circuiret praedia, venit in istum fundum, rationes a colono accepit. sunt
- 95 in eam rem testimonia. postea cur, Aebut, de isto potius fundo quam de alio, si quem habes, Caccinae denuntiabas, si Caccina non possidebat? ipse porro Caccina cur se moribus deduci volebat, idque tibi de amicorum [de his de Aquilii] sententia responderat? et aequum \*\*\*
- 33 At enim Sulla legem tulit. ut nihil de illo tempore, nihil de calamitate rei publicae querar, hoc tibi respondeo, ascripsisse eundem Sullam in eadem lege si QUID IUS NON ESSET ROGARI, EIUS EA LEGE NIHILUM ROGATUM. *ecquid est quod ius non sit, quod populus iubere aut vetare non possit? ut ne longius abeam, declarat ipsa ascriptio esse aliquid; nam nisi esset, hoc in omnibus legibus non*
- 96 *ascriberetur. sed quaero de te putesne, si populus iusserit me tuum aut item te meum servum esse, id iussum ratum atque firmum futurum? perspicis hoc nihil esse et fateris; qua in re primum illud concedis, non quicquid populus iusserit, ratum esse oportere; deinde nihil rationis adfers, quam ob rem, si libertas adimi nullo modo possit, civitas possit; nam et eodem modo de utraque re traditum nobis est, et, si semel civitas adimi potest, retineri libertas non potest. qui enim potest iure Quiritium*
- 97 *liber esse is, qui in numero Quiritium non est? atque ego hanc adolescentulus causam, cum agerem contra hominem disertissimum nostrae civitatis, C. Cottam, probavi: cum Arretinae mulieris libertatem defenderem et Cotta xviris religionem iniecisset non posse nostrum sacramentum iustum iudicari, quod Arretinis adempta civitas esset, [et] ego vehementius contendissem civitatem adimi non potuisse, xviri prima actione non iudicaverunt; postea re quaesita et deliberata sacramentum nostrum iustum iudicaverunt; atque hoc et contra dicente Cotta et Sulla vivo iudicatum est. iam vero in ceteris rebus ut omnes, qui in eadem causa sunt, et lege agant et suum ius persequantur et omni iure civili sine cuiusquam aut magistratus aut iudicis aut periti hominis [aut imperiti]*

dubitatione utantur, quid ego commemorem? dubium esse nemini vestrum certo *scio*. quaeri hoc solere me 98 non praeterit — ut ex me ea, quae tibi in mentem non veniunt, audias — quem ad modum, si civitas adimi non possit, in colonias Latinas saepe nostri cives profecti sint: aut sua voluntate aut legis multa profecti sunt, quam multam si sufferre voluissent, manere in civitate potuissent. quid? quem pater patratu dedit aut suus 34 pater populusve vendidit, quo is iure amittit civitatem? ut religione civitas solvatur, civis Romanus deditur; qui cum est acceptus, est eorum, quibus est deditus; si non accipiunt, ut Mancinum Numantini, retinet integram causam et ius civitatis. si pater vendidit, eum, quem in suam potestatem suscepit, ex potestate dimittit. iam 99 populus cum eum vendit, qui miles factus non est, non adimit ei libertatem, sed iudicat non esse eum liberum, qui ut liber sit, adire periculum noluit; cum autem incensum vendit, hoc iudicat, cum ei, qui in servitute iusta fuerunt, censu liberentur, eum, qui, cum liber esset, censeri noluerit, ipsum sibi libertatem abiudicavisse. quod si maxime hisce rebus adimi libertas aut civitas potest, non intellegunt, qui haec commemorant, si per has rationes maiores adimi posse voluerunt, alio modo noluisse? nam ut haec ex iure civili proferunt, sic adferant velim, 100 quibus lege aut rogatione civitas aut libertas erepta sit. nam quod ad exsilium attinet, perspicue intellegi potest quale sit: exsilium enim non supplicium est, sed perfugium portusque supplicii; nam quia volunt aliquam poenam subterfugere aut calamitatem, eo solum vertunt, hoc est, sedem ac locum mutant. itaque nulla in lege nostra reperietur, ut apud ceteras civitates, maleficium ullum exsilio esse multatum; sed cum homines vincula, necesse ignominiasque vitant, quae sunt legibus constitutae, confugiunt quasi ad aram in exsilium; qui si in civitate legis vim subire vellent, non prius civitatem quam vitam amitterent: quia nolunt, non adimitur eis civitas, sed ab eis relinquitur atque deponitur. nam cum ex nostro iure duarum civitatum nemo esse possit, tum amittitur haec civitas denique, cum is, qui profugit, receptus est in ex- 35 silium, hoc est, in aliam civitatem. non me praeterit, 101



recuperatores, tametsi de hoc iure permulta praetereo, tamen me longius esse prolapsam, quam ratio vestri iudicii postularit; verum id feci, non quo vos hanc in hac causa defensionem desiderare arbitrarer, sed ut omnes intellegerent nec ademptam cuiquam civitatem esse neque adimi posse: hoc cum eos scire volui, quibus Sulla voluit iniuriam facere, tum omnis ceteros novos veteresque civis; neque enim ratio adferri potest, cur, si cuiquam novo civi potuerit adimi civitas, non omnibus patriciis, omnibus antiquissimis civibus possit. nam ad hanc quidem causam nihil hoc pertinuisse primum ex eo intellegi potest, quod vos de ea re iudicare non debetis, deinde quod Sulla ipse ita tulit de civitate, ut non sustulerit horum nexa atque hereditates; iubet enim eodem iure esse, quo fuerint Ariminenses; quos quis ignorat duodecim coloniarum fuisse et a civibus Romanis hereditates capere potuisse?

Quod si adimi civitas A. Caecinae lege potuisset, magis illam rationem tamen omnes boni quaereremus, quem ad modum spectatissimum pudentissimumque hominem, summo consilio, summa virtute, summa auctoritate domestica praeditum, levatum iniuria civem retinere possemus, quam uti nunc, cum de iure civitatis nihil potuerit deperdere, quisquam existat, nisi tui, Sexte, similis et stultitia et impudentia, qui huic ademptam civitatem esse dicat; qui, quoniam, recuperatores, suum ius non deseruit neque quicquam illius audaciae petulantiaeque concessit, de reliquo iam communem causam populi ius in vestra fide ac religione deponit. is homo est, ita se probatum vobis vestrique similibus semper voluit, ut id non minus in hac causa laborarit ne inique contendere aliquid quam ne dissolutius rem relinquere videretur, nec minus veritus sit ne contemnere Aebutium quam ne ab eo contemptus esse existimaretur. quapropter, si quid extra iudicium est, quod homini tribuendum sit, habetis hominem singulari pudore [virtute cognita] et spectata fide, amplissimum totius Etruriae [hominem], in utraque fortuna cognitum multis signis et virtutis et humanitatis; si quid in contraria parte in homine offendendum est, habetis eum, ut nihil dicam am-

plus, qui se homines coëgisse fateatur: sin hominibus remotis de causa quaeritis, cum iudicium de vi sit, is qui arguitur, vim se hominibus armatis fecisse fateatur, verbo se, non aequitate, defendere conetur, id quoque ei verbum ipsum ereptum esse videatis; auctoritatem sapientissimorum hominum facere nobiscum; in iudicium non venire utrum A. Caecina possederit necne, tamen doceri possedissee; multo etiam minus quaeri A. Caecinae fundus sit necne, me tamen id ipsum docuisse, fundum esse Caecinae; cum haec ita sint, statuite quid vos tempora rei publicae de armatis hominibus, quid illius confessio de vi, quid nostra decisio de aequitate, quid ratio interdicti de iure admoneat ut iudicetis.

---

M. TULLII CICERONIS  
DE IMPERIO CN. POMPEII AD QUIRITES  
ORATIO.

<sup>1</sup> Quamquam mihi semper frequens conspectus vester  
<sup>1</sup> multo iucundissimus, hic autem locus ad agendum amplissimus, ad dicendum ornatissimus est visus, Quirites, tamen hoc aditu laudis, qui semper optimo cuique maxime patuit, non mea me voluntas adhuc, sed vitae meae rationes ab ineunte aetate susceptae prohibuerunt: nam cum antea per aetatem nondum huius auctoritatem loci attingere auderem statuereque nihil huc nisi perfectum ingenio, elaboratum industria adferri oportere, omne meum  
<sup>2</sup> tempus amicorum temporibus transmittendum putavi. ita neque hic locus vacuus umquam fuit ab eis, qui vestram causam defenderent, et meus labor in privatorum periculis caste integreque versatus ex vestro iudicio fructum est amplissimum consecutus: nam cum propter dilationem comitiorum ter praetor primus centuriis cunctis renuntiatus sum, facile intellexi, Quirites, et quid de me iudicaretis et quid aliis praescriberetis. nunc cum et auctoritatis in me tantum sit, quantum vos honoribus mandandis esse voluistis, et ad agendum facultatis tantum, quantum homini vigilanti ex forensi usu prope cotidiana dicendi exercitatio potuit adferre, certe et si quid auctoritatis in me est, apud eos utar, qui eam mihi dederunt, et si quid in dicendo consequi possum, eis ostendam potissimum, qui ei quoque rei fructum suo iudicio tribuendum esse  
<sup>3</sup> duxerunt. atque illud in primis mihi laetandum iure esse video, quod in hac insolita mihi ex hoc loco ratione dicendi causa talis oblata est, in qua oratio deesse nemini possit: dicendum est enim de Cn. Pompeii singulari eximiaque virtute; huius autem orationis difficilior est exitum quam principium invenire; ita mihi non tam copia quam modus in dicendo quaerendus est.

Atque ut inde oratio mea proficiscatur, unde haec<sup>2</sup>  
 omnis causa ducitur, bellum grave et periculosum vestris<sup>4</sup>  
 vectigalibus ac sociis a duobus potentissimis regibus in-  
 fertur, Mithridate et Tigrane, quorum alter relictus, alter  
 lacesitus occasionem sibi ad occupandam Asiam oblatam  
 esse arbitrantur. equitibus Romanis, honestissimis viris,  
 adferuntur ex Asia cotidie litterae, quorum magnae res  
 aguntur in vestris vectigalibus exercendis occupatae; qui  
 ad me pro necessitudine, quae mihi est cum illo ordine,  
 causam rei publicae periculaque rerum suarum detule-  
 runt: Bithyniae, quae nunc vestra provincia est, vicos<sup>5</sup>  
 exustos esse compluris; regnum Ariobarzanis, quod fini-  
 timum esse vestris vectigalibus, totum esse in hostium  
 potestate; L. Lucillum magnis rebus gestis ab eo bello  
 discedere; huic qui successerit non satis esse paratum ad  
 tantum bellum administrandum; unum ab omnibus sociis  
 et civibus ad id bellum imperatorem deposci atque expeti,  
 eundem hunc unum ab hostibus metui, praeterea neminem.

Causa quae sit videtis; nunc quid agendum sit con-<sup>6</sup>  
 siderate. primum mihi videtur de genere belli, deinde de  
 magnitudine, tum de imperatore deligendo esse dicendum.

Genus est belli eius modi, quod maxime vestros animos  
 excitare atque inflammare ad persequendi studium debeat;  
 in quo agitur populi Romani gloria, quae vobis a maiori-  
 bus cum magna in omnibus rebus tum summa in re  
 militari tradita est; agitur salus sociorum atque amicorum,  
 pro qua multa maiores vestri magna et gravia bella ges-  
 serunt; aguntur certissima populi Romani vectigalia et  
 maxima, quibus amissis et pacis ornamenta et subsidia  
 belli requiretis; aguntur bona multorum civium, quibus  
 est a vobis et ipsorum et rei publicae causa consulendum.  
 et quoniam semper appetentes gloriae praeter ceteras<sup>3</sup>  
 gentis atque avidi laudis fuistis, delenda est vobis illa<sup>7</sup>  
 macula [Mithridatico] bello superiore concepta, quae pe-  
 nitus iam insedit ac nimis inveteravit in populi Romani  
 nomine, quod is, qui uno die tota in Asia, tot in civitati-  
 bus, uno nuntio atque una significatione [litterarum] civis  
 Romanos necandos trucidandosque denotavit, non modo  
 adhuc poenam nullam suo dignam scelere suscepit, sed  
 ab illo tempore annum iam tertium et vicesimum regnat



- et ita regnat, ut se non Ponti neque Cappadociae latebris occultare velit, sed emergere ex patrio regno atque in  
 8 vestris vectigalibus, hoc est, in Asiae luce versari. etenim adhuc ita nostri cum illo rege contenderunt imperatores, ut ab illo insignia victoriae, non victoriam reportarent: triumphavit L. Sulla, triumphavit L. Murena de Mithridate, duo fortissimi viri et summi imperatores, sed ita triumpharunt, ut ille pulsus superatusque regnaret. verum tamen illis imperatoribus laus est tribuenda quod egerunt, venia danda quod reliquerunt, propterea quod ab eo bello  
 4 Sullam in Italiam res publica, Murenam Sulla revocavit.  
 9 Mithridates autem omne reliquum tempus non ad oblivionem veteris belli, sed ad comparisonem novi contulit; qui [postea] cum maximas aedificasset ornassetque classis exercitusque permagnos quibuscumque ex gentibus potuisset comparasset et se Bosporanis finitimis suis bellum inferre simularet, usque in Hispaniam legatos ac litteras misit ad eos duces, quibuscum tum bellum gerebamus, ut, cum duobus in locis disiunctissimis maximeque diversis uno consilio a binis hostium copiis bellum terra marique gereretur, vos ancipiti contentione districti de imperio  
 10 micaretis. sed tamen alterius partis periculum, Sertorianae atque Hispaniensis, quae multo plus firmamenti ac roboris habebat, Cn. Pompeii divino consilio ac singulari virtute depulsum est; in altera parte ita res a L. Lucullo summo viro est administrata, ut initia illa rerum gestarum magna atque praeclara non felicitati eius, sed virtuti, haec autem extrema, quae nuper acciderunt, non culpae, sed fortunae tribuenda esse videantur. sed de Lucullo dicam alio loco et ita dicam, Quirites, ut neque  
 11 vera laus ei detracta oratione mea neque falsa adfecta esse videatur; de vestri imperii dignitate atque gloria, quoniam is est exorsus orationis meae, videte quem vobis animum suscipiendum putetis.
- 5 Maiores nostri saepe mercatoribus aut naviculariis nostris iniuriosius tractatis bella gesserunt: vos tot milibus civium Romanorum uno nuntio atque uno tempore necatis quo tandem animo esse debetis? legati quod erant appellati superbius, Corinthum patres vestri totius Graeciae lumen exstinctum esse voluerunt: vos eum regem

inultum esse patiemiini, qui legatum populi Romani consularem vinculis ac verberibus atque omni supplicio excruciatum necavit? illi libertatem imminutam civium Romanorum non tulerunt: vos ereptam vitam neglegetis? ius legationis verbo violatum illi persecuti sunt: vos legatum omni supplicio interfectum relinquetis? videte <sup>12</sup> ne, ut illis pulcherrimum fuit tantam vobis imperii gloriam tradere, sic vobis turpissimum sit, id quod accepistis, tueri et conservare non posse.

Quid, quod salus sociorum summum in periculum ac discrimen vocatur, quo tandem animo ferre debetis? regno est expulsus Ariobarzanes rex, socius populi Romani atque amicus; imminent duo reges toti Asiae non solum vobis inimicissimi, sed etiam vestris sociis atque amicis; civitates autem omnes cuncta Asia atque Graecia vestrum auxilium expectare propter periculi magnitudinem coguntur; imperatorem a vobis certum deponere, cum praesertim vos alium miseritis, neque audent neque se id facere sine summo periculo posse arbitrantur. vident et <sup>13</sup> sentiunt hoc idem quod vos, unum virum esse, in quo summa sint omnia, et cum propter esse, quo etiam carent aegrius; cuius adventu ipso atque nomine, tametsi ille ad maritimum bellum venerit, tamen impetus hostium repressos esse intellegunt ac retardatos. hi vos, quoniam libere loqui non licet, tacite rogant, ut se quoque, sicut ceterarum provinciarum socios, dignos existimetis, quorum salutem tali viro commendetis, atque hoc etiam magis, quod ceteros in provinciam eius modi homines cum imperio mittimus, ut etiam si ab hoste defendant, tamen ipsorum adventus in urbis sociorum non multum ab hostili expugnatione differant, hunc audiebant antea, nunc praesentem vident tanta temperantia, tanta mansuetudine, tanta humanitate, ut ei beatissimi esse videantur, apud quos ille diutissime commoratur.

Qua re si propter socios nulla ipsi iniuria lacessiti <sup>6</sup> maiores nostri cum Antiocho, cum Philippo, cum Aetolis, <sup>14</sup> cum Poenis bella gesserunt, quanto vos studio convenit iniuriis provocatos sociorum salutem una cum imperii vestri dignitate defendere, praesertim cum de maximis vestris vectigalibus agatur? nam ceterarum provinciarum

vectigalia, Quirites, tanta sunt, ut eis ad ipsas provincias tutandas vix contenti esse possimus, Asia vero tam opima est ac fertilis, ut et ubertate agrorum et varietate fructuum et magnitudine pastionis et multitudine earum rerum, quae exportantur, facile omnibus terris antecellat. itaque haec vobis provincia, Quirites, si et belli utilitatem et pacis dignitatem retinere vultis, non modo a calamitate, sed  
 15 etiam a metu calamitatis est defendenda; nam in ceteris rebus cum venit calamitas, tum detrimentum accipitur; at in vectigalibus non solum adventus mali, sed etiam metus ipse adfert calamitatem: nam cum hostium copiae non longe absunt, etiam si inruptio nulla facta est, tamen pecuaria relinquitur, agri cultura deseritur, mercatorum navigatio conquiescit; ita neque ex portu neque ex decumis neque ex scriptura vectigal conservari potest: quare saepe totius anni fructus uno rumore periculi atque  
 16 uno belli terrore amittitur. quo tandem igitur animo esse existimatis aut eos, qui vectigalia nobis pensitant, aut eos, qui exercent atque exigunt, cum duo reges cum maximis copiis propter adsint? cum una excursio equitatus perbreve tempore totius anni vectigal auferre possit? cum publicani familias maximas, quas in saltibus habent, quas in agris, quas in portubus atque custodiis, magno periculo se habere arbitrentur? putatisne vos illis rebus frui posse, nisi eos, qui vobis fructui sunt, conservaritis non solum, ut ante dixi, calamitate, sed etiam calamitatis formidine liberatos?

7 Ac ne illud quidem vobis neglegendum est, quod  
 17 mihi ego extremum proposueram, cum essem de belli genere dicturus, quod ad multorum bona civium Romanorum pertinet, quorum vobis pro vestra sapientia, Quirites, habenda est ratio diligenter: nam et publicani, homines honestissimi atque ornatissimi, suas rationes et copias in illam provinciam contulerunt, quorum ipsorum per se res et fortunae vobis curae esse debent — etenim si vectigalia nervos esse rei publicae semper duximus, cum certe ordinem, qui exercet illa, firmamentum ceterorum ordinum recte esse dicemus —; deinde ex ceteris  
 18 ordinibus homines gnavi atque industrii partim ipsi in Asia negotiantur, quibus vos absentibus consulere debe-

tis, partim eorum in ea provincia pecunias magnas conlocatas habent, est igitur humanitatis vestrae magnum numerum eorum civium calamitate prohibere, sapientiae videre multorum civium calamitatem a re publica seiunctam esse non posse; etenim primum illud parvi refert, nos publica his amissis [vectigalia] postea victoria recuperare; neque enim isdem redimendi facultas erit propter calamitatem neque aliis voluntas propter timorem. deinde<sup>19</sup> quod nos eadem Asia atque idem iste Mithridates initio belli Asiatici docuit, id quidem certe calamitate docti memoria retinere debemus: nam tum, cum in Asia res magnas permulti amiserant, scimus Romae solutione impedita fidem concidisse; non enim possunt una in civitate multi rem ac fortunas amittere, ut non plures secum in eandem trahant calamitatem. a quo periculo prohibete rem publicam et mihi credite, id quod ipsi videtis: haec fides atque haec ratio pecuniarum, quae Romae, quae in foro versatur, implicata est cum illis pecuniis Asiaticis et cohaeret; ruere illa non possunt, ut haec non eodem labe facta motu concidant. qua re videte, num dubitandum vobis sit omni studio ad id bellum incumbere, in quo gloria nominis vestri, salus sociorum, vectigalia maxima, fortunae plurimorum civium coniunctae cum re publica defendantur.

Quoniam de genere belli dixi, nunc de magnitudine<sup>8</sup> pauca dicam. potest hoc enim dici, belli genus esse ita<sup>20</sup> necessarium, ut sit gerendum, non esse ita magnum, ut sit pertimescendum: in quo maxime elaborandum est ne forte ea vobis, quae diligentissime providenda sunt, contemnenda esse videantur. atque ut omnes intellegant me L. Lucullo tantum impertire laudis, quantum forti viro et sapienti homini et magno imperatori debeatur, dico eius adventu maximas Mithridati copias omnibus rebus ornatas atque instructas fuisse, urbemque Asiae clarissimam nobisque amicissimam, Cyzicenorum, obsessam esse ab ipso rege maxima multitudine et oppugnatam vehementissime, quam L. Lucullus virtute, adsiduitate, consilio summis obsidionis periculis liberavit: ab eodem imperatore<sup>21</sup> classem magnam et ornatam, quae ducibus Sertorianis ad Italiam studio atque odio inflammata raperetur, supe-



ratam esse atque depressam; magnas hostium praeterea copias multis proeliis esse deletas patefactumque nostris legionibus esse Pontum, qui antea populo Romano ex omni aditu clausus fuisset; Sinopen atque Amisum, quibus in oppidis erant domicilia regis, omnibus rebus ornatas ac refertas ceterasque urbis Ponti et Cappadociae permultas uno aditu adventuque esse captas, regem spoliatum regno patrio atque avito ad alios se reges atque ad alias gentis supplicem contulisse, atque haec omnia salvis populi Romani sociis atque integris vectigalibus esse gesta. satis opinor haec esse laudis atque ita, Quirites, ut hoc vos intellegatis, a nullo istorum, qui huic obtrectant legi atque causae, L. Lucillum similiter ex hoc loco esse laudatum. requiretur fortasse nunc quem ad modum, cum haec ita sint, reliquum possit magnum esse bellum. cognoscite, Quirites; non enim hoc sine causa quaeri videtur. primum ex suo regno sic Mithridates profugit, ut ex eodem Ponto Medea illa quondam profugisse dicitur, quam praedicant in fuga fratris sui membra in eis locis, qua se parens persequeretur, dissipavisse, ut eorum conlectio dispersa maerorque patrius celeritatem persequendi retardaret: sic Mithridates fugiens maximam vim auri atque argenti pulcherrimarumque rerum omnium, quas et a maioribus acceperat et ipse bello superiore ex tota Asia direptas in suum regnum congesserat, in Ponto omnem reliquit: haec dum nostri conligunt omnia diligentius, rex ipse e manibus effugit; ita illum in persequendi studio maeror, hos lactitia tardavit. hunc in illo timore et fuga Tigranes, rex Armenius, excepit diffidentemque rebus suis confirmavit et afflictum crexit perditumque recreavit; cuius in regnum postea quam L. Lucullus cum exercitu venit, plures etiam gentes contra imperatorem nostrum concitatae sunt; erat enim metus iniectus eis nationibus, quas numquam populus Romanus neque lacessendas bello neque temptandas putavit; erat etiam alia gravis atque vehemens opinio, quae animos gentium barbararum pervaserat, fani locupletissimi et religiosissimi diripiendi causa in eas oras nostrum esse exercitum adductum; ita nationes multae atque magnae novo quodam terrore ac metu concitabantur.

noster autem exercitus, tametsi urbem ex Tigrani regno ceperat et proeliis usus erat secundis, tamen nimia longinquitate locorum ac desiderio suorum commovebatur. hic iam plura non dicam; fuit enim illud extremum, ut <sup>24</sup> ex eis locis a militibus nostris reditus magis maturus quam processio longior quaereretur. Mithridates autem et suam manum iam confirmarat, [et eorum, qui se ex ipsius regno conlegerant,] et magnis adventiciis auxiliis multorum regum et nationum iuvabatur. iam hoc fere sic fieri solere accepimus, ut regum adflictae fortunae facile multorum opes adliciant ad misericordiam, maximeque eorum, qui aut reges sunt aut vivunt in regno, ut eis nomen regale magnum et sanctum esse videatur: ita- <sup>25</sup> que tantum victus efficere potuit, quantum incolumis numquam est ausus optare; nam cum se in regnum suum recepisset, non fuit eo contentus, quod ei praeter spem acciderat, ut illam, postea quam pulsus erat, terram unquam attingeret, sed in exercitum nostrum clarum atque victorem impetum fecit. sinite hoc loco, Quirites, sicut poëtae solent, qui res Romanas scribunt, praeterire me nostram calamitatem, quae tanta fuit, ut eam ad auris [Luculli] imperatoris non ex proelio nuntius, sed ex sermone rumor adferret. hic in illo ipso malo gravissima- <sup>26</sup> que belli offensione L. Lucullus, qui tamen aliqua ex parte eis incommodis mederi fortasse potuisset, vestro iussu coactus, qui imperii diuturnitati modum statuendum vetere exemplo putavistis, partem militum, qui iam stipendiis confecti erant, dimisit, partem M' Glabrioni tradidit. multa praetereo consulto, sed ea vos coniectura perspicite, quantum illud bellum factum putetis, quod coniungant reges potentissimi, renorent agitatae nationes, suscipiant integrae gentes, novus imperator noster accipiat vetere exercitu pulso.

Satis mihi multa verba fecisse videor, qua re esset <sup>10</sup> hoc bellum genere ipso necessarium, magnitudine pericu- <sup>27</sup> losum: restat ut de imperatore ad id bellum deligendo ac tantis rebus praeficiendo dicendum esse videatur. utinam, Quirites, virorum fortium atque innocentium copiam tantam haberetis, ut haec vobis deliberatio difficilis esset, quemnam potissimum tantis rebus ac tanto bello prae-

ficiendum putaretis! nunc vero cum sit unus Cn. Pompeius, qui non modo eorum hominum, qui nunc sunt, gloriam, sed etiam antiquitatis memoriam virtute superarit, quae res est quae cuiusquam animum in hac causa  
 28 dubium facere possit? ego enim sic existimo, in summo imperatore quattuor has res inesse oportere, scientiam rei militaris, virtutem, auctoritatem, felicitatem.

Quis igitur hoc homine scientior umquam aut fuit aut esse debuit, qui e ludo atque e pueritiae disciplinis bello maximo atque acerrimis hostibus ad patris exercitum atque in militiae disciplinam profectus est, qui extrema pueritia miles in exercitu fuit summi imperatoris, ineunte adulescentia maximi ipse exercitus imperator; qui saepius cum hoste conflixit quam quisquam cum inimico concertavit, plura bella gessit quam ceteri legerunt, pluris provincias confecit quam alii concepiverunt, cuius adulescentia ad scientiam rei militaris non alienis praeceptis, sed suis imperiis, non offensionibus belli, sed victoriis, non stipendiis, sed triumphis est crudita? quod denique genus esse belli potest, in quo illum non exercuerit fortuna rei publicae? civile, Africanum, Transalpinum, Hispaniense, [mixtum ex civitatibus atque ex bellicosissimis nationibus,] servile, navale bellum, varia et diversa genera et bellorum et hostium, non solum gesta ab hoc uno, sed etiam confecta, nullam rem esse declarant in usu positam militari, quae huius viri scientiam fugere possit.

11  
 29 Iam vero virtuti Cn. Pompeii quae potest oratio par inveniri? quid est quod quisquam aut illo dignum aut vobis novum aut cuiquam inauditum possit adferre? neque enim illae sunt solae virtutes imperatoriae, quae vulgo existimantur, labor in negotiis, fortitudo in periculis, industria in agendo, celeritas in conficiendo, consilium in providendo; quae tanta sunt in hoc uno, quanta in omnibus reliquis imperatoribus, quos aut vidimus aut audivimus,  
 30 non fuerunt. testis est Italia, quam ille ipse victor L. Sulla huius virtute et subsidio confessus est liberatam; testis est Sicilia, quam multis undique cinctam periculis non terrore belli, sed consilii celeritate explicavit; testis est Africa, quae magnis oppressa hostium copiis eorum ipsorum

sanguine redundavit; testis est Gallia, per quam legionibus nostris iter in Hispaniam Gallorum internicione patefactum est; testis est Hispania, quae saepissime plurimos hostis ab hoc superatos prostratosque conspexit; testis est iterum et saepius Italia, quae cum servili bello tetro periculosoque premeretur, ab hoc auxilium absente expectivit, quod bellum expectatione eius attenuatum atque imminutum est, adventu sublatum ac sepultum; testes <sup>31</sup> nunc vero iam omnes orae atque omnes exteræ gentes ac nationes, denique maria omnia cum universa tum in singulis oris omnes sinus atque portus. quis enim toto mari locus per hos annos aut tam firmum habuit praesidium, ut tutus esset, aut tam fuit abditus, ut lateret? quis navigavit qui non se aut mortis aut servitutis periculo committeret, cum aut hieme aut referto praedonum mari navigaret? hoc tantum bellum, tam turpe, tam vetus, tam late divisum atque dispersum quis umquam arbitraretur aut ab omnibus imperatoribus uno anno aut omnibus annis ab uno imperatore confici posse? quam provinciam tenuistis <sup>32</sup> a praedonibus liberam per hosce annos? quod vectigal vobis tutum fuit? quem socium defendistis? cui praesidio classibus vestris fuistis? quam multas existimatis insulas esse desertas? quam multas aut metu relictas aut a praedonibus captas urbis esse sociorum? sed quid ego longinqua commemoro? fuit hoc quondam, fuit proprium <sup>12</sup> populi Romani longe a domo bellare et propugnaculis imperii sociorum fortunas, non sua tecta defendere: sociis ego nostris mare per hos annos clausum fuisse dicam, cum exercitus vestri numquam a Brundisio nisi hieme summa transmiserint? qui ad vos ab exteris nationibus venirent, captos querar, cum legati populi Romani redempti sint? mercatoribus tutum mare non fuisse dicam, cum duodecim securæ in praedonum potestatem pervenerint? Cnidum aut Colophonem aut Samum, nobilissimas <sup>33</sup> urbis, innumerabilisque alias captas esse commemorem, cum vestros portus atque eos portus, quibus vitam ac spiritum ducitis, in praedonum fuisse potestatem sciatis? an vero ignoratis portum Caietae celeberrimum ac plenissimum navium inspectante praetore a praedonibus esse directum, ex Miseno autem eius ipsius liberos, qui cum



praedonibus antea ibi bellum gesserat, a praedonibus esse  
 sublato? nam quid ego Ostiense incommodum atque  
 illam labem atque ignominiam rei publicae querar, cum  
 prope inspectantibus vobis classis ea, cui consul populi  
 Romani praepositus esset, a praedonibus capta atque op-  
 pressa est? pro di immortales! tantamne unius hominis  
 incredibilis ac divina virtus tam brevi tempore lucem ad-  
 ferre rei publicae potuit, ut vos, qui modo ante ostium  
 Tiberinum classem hostium videbatis, ei nunc nullam  
 34 intra Oceani ostium praedonum navem esse audiat? at-  
 que haec qua celeritate gesta sint quamquam videtis, tamen  
 a me in dicendo praetereunda non sunt. quis enim um-  
 quam aut obeundi negotii aut consequendi quaestus stu-  
 dio tam brevi tempore tot loca adire, tantos cursus con-  
 ficere potuit, quam celeriter Cn. Pompeio duce tanti belli  
 impetus navigavit? qui nondum tempestivo ad navigan-  
 dum mari Siciliam adiit, Africam exploravit, inde Sar-  
 diniam cum classe venit atque haec tria frumentaria sub-  
 35 sidia rei publicae firmissimis praesidiis classibusque mu-  
 nivit; inde cum se in Italiam recepisset, duabus Hispaniis  
 et Gallia [transalpina] praesidiis ac navibus confirmata,  
 missis item in oram Illyrici maris et in Achaïam omnem-  
 que Graeciam navibus Italiae duo maria maximis classi-  
 bus firmissimisque praesidiis adornavit, ipse autem ut  
 Brundisio profectus est, undequinquagesimo die totam  
 ad imperium populi Romani Ciliciam adiunxit; omnes,  
 qui ubique praedones fuerunt, partim capti interfectique  
 sunt, partim unius huius se imperio ac potestati dedide-  
 runt; idem Cretensibus, cum ad eum usque in Pamphy-  
 liam legatos deprecatoresque misissent, spem deditionis  
 non ademit obsidesque imperavit. ita tantum bellum,  
 tam diuturnum, tam longe lateque dispersum, quo bello  
 omnes gentes ac nationes premebantur, Cn. Pompeius  
 extrema hieme apparavit, ineunte vere suscepit, media  
 13 aestate confecit. est haec divina atque incredibilis virtus  
 36 imperatoris. quid ceterae, quas paulo ante commemorare  
 coeperam, quantae atque quam multae sunt? non enim  
 bellandi virtus solum in summo ac perfecto imperatore  
 quaerenda est, sed multae sunt artes eximiae huius ad-  
 ministræ comitesque virtutis; ac primum quanta inno-

centia debent esse imperatores, quanta deinde in omnibus rebus temperantia, quanta fide, quanta facilitate, quanto ingenio, quanta humanitate? quae breviter qualia sint in Cn. Pompeio consideremus; summa enim omnia sunt, Quirites, sed ea magis ex aliorum contentione quam ipsa per sese cognosci atque intellegi possunt. quem enim <sup>37</sup> imperatorem possumus ullo in numero putare, cuius in exercitu centuriatus veneant atque venierint? quid hunc hominem magnum aut amplum de re publica cogitare, qui pecuniam ex aerario depromptam ad bellum administrandum aut propter cupiditatem provinciae magistratibus diviserit aut propter avaritiam Romae in quaestu reliquerit? vestra admurmuratio facit, Quirites, ut agnoscere videamini qui haec fecerint; ego autem nomino neminem; quare irasci mihi nemo poterit, nisi qui ante de se voluerit confiteri. itaque propter hanc avaritiam imperatorum quantas calamitates, quocumque ventum est, nostri exercitus ferant quis ignorat? itinera quae per hosce annos <sup>38</sup> in Italia per agros atque oppida civium Romanorum nostri imperatores fecerint recordamini, tum facilius statuētis quid apud exteris nationes fieri existimetis. utrum pluris arbitramini per hosce annos militum vestrorum armis hostium urbis an hibernis sociorum civitates esse deletas? neque enim potest exercitum is continere imperator, qui se ipse non continet, neque severus esse in iudicando, qui alios in se severos esse iudices non vult. hic miramur <sup>39</sup> hunc hominem tantum excellere ceteris, cuius legiones sic in Asiam pervenerint, ut non modo manus tanti exercitus, sed ne vestigium quidem cuiquam pacato nocuisse dicatur? iam vero quem ad modum milites hibernent cotidie sermones ac litterae perferuntur: non modo ut sumptum faciat in militem nemini vis adfertur, sed ne cupienti quidem cuiquam permittitur; hiemis enim, non avaritiae perfugium maiores nostri in sociorum atque amicorum tectis esse voluerunt. age vero ceteris in rebus <sup>14</sup> <sup>40</sup> quali sit temperantia considerate: unde illam tantam celeritatem et tam incredibilem cursum inventum putatis? non enim illum eximia vis remigum aut ars inaudita quaedam gubernandi aut venti aliqui novi tam celeriter in ultimas terras pertulerunt, sed eae res, quae ceteros remo-

rari solent, non retardarunt: non avaritia ab instituto cursu ad praedam aliquam devocavit, non libido ad voluptatem, non amoenitas ad delectationem, non nobilitas urbis ad cognitionem, non denique labor ipse ad quietem; postremo signa et tabulas ceteraque ornamenta Graecorum oppidorum, quae ceteri tollenda esse arbitrantur, ea sibi ille  
 41 ne visenda quidem existimavit. itaque omnes nunc in eis locis Cn. Pompeium sicut aliquem non ex hac urbe missum, sed de caelo delapsum intuentur; nunc denique incipiunt credere fuisse homines Romanos hac quondam continentia, quod iam nationibus exteris incredibile ac falso memoriae proditum videbatur; nunc imperii vestri splendor illis gentibus lucem adferre coepit; nunc intellegunt non sine causa maiores suos tum, cum ea temperantia magistratus habebamus, servire populo Romano quam imperare aliis maluisse. iam vero ita faciles aditus ad cum privatorum, ita liberae querimoniae de aliorum iniuriis esse dicuntur, ut is, qui dignitate principibus ex-  
 42 cellit, facilitate infimis par esse videatur. iam quantum consilio, quantum dicendi gravitate et copia valeat, in quo ipso inest quaedam dignitas imperatoria, vos, Quirites, hoc ipso ex loco saepe cognovistis. fidem vero eius quantam inter socios existimari putatis, quam hostes omnes omnium generum sanctissimam iudicarint? humanitate iam tanta est, ut difficile dictu sit utrum hostes magis virtutem eius pugnantes timuerint an mansuetudinem victi dilexerint. et quisquam dubitabit quin huic hoc tantum bellum transmittendum sit, qui ad omnia nostrae memoriae bella conficienda divino quodam consilio natus esse videatur?

15  
43

Et quoniam auctoritas quoque in bellis administrandis multum atque in imperio militari valet, certe nemini dubium est quin ea re idem ille imperator plurimum possit. vehementer autem pertinere ad bella administranda quid hostes, quid socii de imperatoribus nostris existiment quis ignorat, cum sciamus homines in tantis rebus ut aut contemnant aut metuant aut oderint aut ament, opinione non minus et fama quam aliqua ratione certa commoveri? quod igitur nomen umquam in orbe terrarum clarius fuit? cuius res gestae pares? de quo homine vos, id quod

maxime facit auctoritatem, tanta et tam praeclara iudicia fecistis? an vero ullam usquam esse oram tam desertam<sup>44</sup> putatis quo non illius dici fama pervaserit, cum universus populus Romanus referto foro completisque omnibus templis, ex quibus hic locus conspici potest, unum sibi ad commune omnium gentium bellum Cn. Pompeium imperatorem depoposcit? itaque ut plura non dicam neque aliorum exemplis confirmem quantum [huius] auctoritas valeat in bello, ab eodem Cn. Pompeio omnium rerum egregiarum exempla sumantur: qui quo die a vobis maritimo bello praepositus est imperator, tanta repente vilitas annonae ex summa inopia et caritate rei frumentariae consecuta est unius hominis spe ac nomine, quantam vix in summa ubertate agrorum diuturna pax efficere potuisset. iam accepta in Ponto calamitate ex eo proelio, de quo<sup>45</sup> vos paulo ante invitatus admonui, cum socii pertinuissent, hostium opes animique crevissent, satis firmum praesidium provincia non haberet, amisissetis Asiam, Quirites, nisi ad ipsum discrimen eius temporis divinitus Cn. Pompeium ad eas regiones fortuna populi Romani attulisset. huius adventus et Mithridatem insolita inflammatum victoria continuit et Tigranem magnis copiis minitantem Asiae retardavit. et quisquam dubitabit quid virtute perfecturus sit qui tantum auctoritate perfecit? aut quam facile imperio atque exercitu socios et vectigalia conservaturus sit qui ipso nomine ac rumore defenderit? age<sup>16</sup>  
<sup>46</sup> vero illa res quantam declarat eiusdem hominis apud hostis populi Romani auctoritatem, quod ex locis tam longinquis tamque diversis tam brevi tempore omnes huic se uni dediderunt! quod a communi Cretensium legati, cum in eorum insula noster imperator exercitusque esset, ad Cn. Pompeium in ultimas prope terras venerunt eique se omnis Cretensium civitates dedere velle dixerunt! quid? idem iste Mithridates nonne ad eundem Cn. Pompeium legatum usque in Hispaniam misit? eum, quem Pompeius legatum semper iudicavit, ei, quibus erat [semper] molestum ad eum potissimum esse missum, speculatorem quam legatum iudicari maluerunt. potestis igitur iam constituere, Quirites, hanc auctoritatem multis postea rebus gestis magnisque vestris iudiciis amplificatam, quan-



tum apud illos reges, quantum apud exterarum nationum valiturum esse existimetis.

47 Reliquum est ut de felicitate, quam praestare de se ipso nemo potest, meminisse et commemorare de altero possumus, sicut aequum est homines de potestate deorum, timide et pauca dicamus. ego enim sic existimo: Maximo, Marcello, Scipioni, Mario, et ceteris magnis imperatoribus non solum propter virtutem, sed etiam propter fortunam saepius imperia mandata atque exercitus esse commissos; fuit enim profecto quibusdam summis viris quaedam ad amplitudinem et ad gloriam et ad res magnas bene gerendas divinitus adiuncta fortuna; de huius autem hominis felicitate, de quo nunc agimus, hac utar moderatione dicendi, non ut in illius potestate fortunam positam esse dicam, sed ut praeterita meminisse, reliqua sperare videamur, ne aut invisae dis immortalibus oratio nostra  
48 aut ingrata esse videatur. itaque non sum praedicaturus quantas ille res domi militiae, terra marique, quantaque felicitate gesserit; ut eius semper voluntatibus non modo cives adsenserint, socii obtemperarint, hostes oboedierint, sed etiam venti tempestatesque obsecundarint: hoc brevissime dicam, neminem unquam tam impudentem fuisse, qui ab dis immortalibus tot et tantas res tacitus auderet optare, quot et quantas di immortales ad Cn. Pompeium detulerunt. quod ut illi proprium ac perpetuum sit, Quirites, cum communis salutis atque imperii tum ipsius hominis causa, sicuti facitis, velle et optare debetis.

49 Qua re cum et bellum sit ita necessarium, ut negligi non possit, ita magnum, ut accuratissime sit administrandum, et cum ei imperatorem praeficere possitis, in quo sit eximia belli scientia, singularis virtus, clarissima auctoritas, egregia fortuna, dubitatis, Quirites, quin hoc tantum boni, quod vobis ab dis immortalibus oblatum et datum est, in rem publicam conservandam atque ampli-  
17  
50 ficandam conferatis? quod si Romae Cn. Pompeius privatus esset hoc tempore, tamen ad tantum bellum is erat deligendus atque mittendus; nunc cum ad ceteras summas utilitates haec quoque opportunitas adiungatur, ut in eis ipsis locis adsit, ut habeat exercitum, ut ab eis, qui habent, accipere statim possit, quid exspectamus? aut cur

non ducibus dis immortalibus eidem, cui cetera summa cum salute rei publicae commissa sunt, hoc quoque bellum regium committamus?

At enim vir clarissimus, amantissimus rei publicae, 51  
vestris beneficiis amplissimis adfectus, Q. Catulus, item-  
que summis ornamentis honoris, fortunae, virtutis, in-  
genii praeditus, Q. Hortensius, ab hac ratione dissentiunt:  
quorum ego auctoritatem apud vos multis locis plurimum  
valuisse et valere oportere confiteor, sed in hac causa,  
tametsi cognoscetis auctoritates contrarias virorum fortis-  
simorum et clarissimorum, tamen omissis auctoritatibus  
ipsa re ac ratione exquirere possumus veritatem, atque  
hoc facilius, quod ea omnia, quae a me adhuc dicta sunt,  
eidem isti vera esse concedunt, et necessarium bellum  
esse et magnum et in uno Cn. Pompeio summa esse omnia.  
quid igitur ait Hortensius? si uni omnia tribuenda sint, 52  
dignissimum esse Pompeium, sed ad unum tamen omnia  
deferri non oportere. obsolevit iam ista oratio, re multo  
magis quam verbis refutata; nam tu idem, Q. Hortensi,  
multa pro tua summa copia ac singulari facultate dicendi  
et in senatu contra virum fortem, A. Gabinium, graviter  
ornateque dixisti, cum is de uno imperatore contra prae-  
dones constituendo legem promulgasset, et ex hoc ipso  
loco permulta item contra eam legem verba fecisti. quid? 53  
tum, per deos immortalis! si plus apud populum Roma-  
num auctoritas tua quam ipsius populi Romani salus et  
vera causa valuisset, hodie hanc gloriam atque hoc orbis  
terrae imperium teneremus? an tibi tum imperium hoc  
esse videbatur, cum populi Romani legati, quaestores  
praetoresque capiebantur, cum ex omnibus provinciis  
conmeatu et privato et publico prohibebamur, cum ita  
clausa nobis erant maria omnia, ut neque privatam rem  
transmarinam neque publicam iam obire possemus? quae 18  
civitas antea umquam fuit, non dico Atheniensium, quae 54  
satis late quondam mare tenuisse dicitur, non Kartha-  
giniensium, qui permultum classe ac maritimis rebus va-  
luerunt, non Rhodiorum, quorum usque ad nostram me-  
morian disciplina navalis et gloria remansit; — sed quae  
civitas umquam antea tam tenuis, quae tam parva insula  
fuit quae non portus suos et agros et aliquam partem re-  
gionis atque orae maritimae per se ipsa defenderet? at  
hercule aliquot annos continuos ante legem Gabiniam  
ille populus Romanus, cuius usque ad nostram memoriam  
nomen invictum in navalibus pugnis permanserit, magna

ac multo maxima parte non modo utilitatis, sed dignitatis  
 55 atque imperii caruit; nos, quorum maiores Antiochum  
 regem classe Persenque superarunt, omnibusque navali-  
 bus pugnis Karthaginensis, homines in maritimis rebus  
 exercitatissimos paratissimosque, vicerunt, ei nullo in  
 loco iam praedonibus pares esse poteramus; nos, qui  
 antea non modo Italiam tutam habebamus, sed omnis  
 socios in ultimis oris auctoritate nostri imperii salvos  
 praestare poteramus, tum, cum insula Delos, tam procul  
 a nobis in Aegaeo mari posita, quo omnes undique cum  
 mercibus atque oneribus commeabant, referta divitiis,  
 parva, sine muro, nihil timebat, eidem non modo pro-  
 vinciiis atque oris Italiae maritimis ac portubus nostris,  
 sed etiam Appia iam via carebamus; et eis temporibus  
 non pudebat magistratus populi Romani in hunc ipsum  
 locum descendere, cum cum nobis maiores nostri exuviis  
 19 nauticis et classium spoliis ornatum reliquissent. bono  
 56 te animo tum, Q. Hortensi, populus Romanus et ceteros,  
 qui erant in eadem sententia, dicere existimavit ea, quae  
 sentiebatis; sed tamen in salute communi idem populus  
 Romanus dolori suo maluit quam auctoritati vestrae ob-  
 temperare: itaque una lex, unus vir, unus annus non  
 modo nos illa miseria ac turpitudine liberavit, sed etiam  
 effecit, ut aliquando vere videremur omnibus gentibus ac  
 57 nationibus terra marique imperare. quo mihi etiam in-  
 dignius videtur obtrectatum esse adhuc, Gabinio dicam  
 anne Pompeio, an utrique, id quod est verius, ne lega-  
 retur A. Gabinius Cn. Pompeio expetenti ac postulanti.  
 utrum ille, qui postulat ad tantum bellum legatum quem  
 velit, idoneus non est qui impetret, cum ceteri ad ex-  
 pilandos socios diripiendasque provincias quos voluerunt  
 legatos eduxerint, an ipse, cuius lege salus ac dignitas  
 populo Romano atque omnibus gentibus constituta est,  
 expers esse debet gloriae eius imperatoris atque eius exer-  
 58 citus, qui consilio ipsius ac periculo est constitutus? an  
 C. Falcidius, Q. Metellus, Q. Caelius Latiniensis, Cn.  
 Lentulus, quos omnis honoris causa nomino, cum tribuni  
 plebi fuissent, anno proximo legati esse potuerunt; in  
 uno Gabinio sunt tam diligentes, qui in hoc bello, quod  
 lege Gabinia geritur, in hoc imperatore atque exercitu,  
 quem per vos ipse constituit, etiam praecipuo iure esse  
 deberet? de quo legando consules spero ad senatum re-  
 laturos: qui si dubitabunt aut gravabuntur, ego me pro-  
 fiteor relaturum, neque me impediet cuiusquam inimicum

edictum, quo minus vobis fretus vestrum ius beneficiumque defendam, neque praeter intercessionem quicquam audiam, de qua, ut arbitror, isti ipsi, qui minantur, etiam atque etiam quid liceat considerabunt. mea quidem sententia, Quirites, unus A. Gabinius belli maritimi rerumque gestarum Cn. Pompeio socius ascribitur, propterea quod alter uni illud bellum suscipiendum vestris suffragiis detulit, alter delatum susceptumque confecit.

Reliquum est ut de Q. Catuli auctoritate et sententia dicendum esse videatur; qui cum ex vobis quaereret, si in uno Cn. Pompeio omnia poneretis, si quid eo factum esset, in quo spem essetis habituri, cepit magnum suae virtutis fructum ac dignitatis, cum omnes una prope voce in [eo] ipso vos spem habituros esse dixistis. etenim talis est vir, ut nulla res tanta sit ac tam difficilis, quam ille non et consilio regere et integritate tueri et virtute conficere possit: sed in hoc ipso ab eo vehementissime dissentio, quod quo minus certa est hominum ac minus diuturna vita, hoc magis res publica, dum per deos immortalis licet, frui debet summi viri vita atque virtute. ‘at enim ne quid novi fiat contra exempla atque instituta maiorum.’ non dicam hoc loco maiores nostros semper in pace consuetudini, in bello utilitati paruisse, semper ad novos casus temporum novorum consiliorum rationes adcommodasse, non dicam duo bella maxima, Punicum atque Hispaniense, ab uno imperatore esse confecta duasque urbis potentissimas, quae huic imperio maxime minitabantur, Karthaginem atque Numantiam, ab eodem Scipione esse deletas; non commemorabo nuper ita vobis patribusque vestris esse visum, ut in uno C. Mario spes imperii poneretur, ut idem cum Iugurtha, idem cum Cimbris, idem cum Teutonis bellum administraret: in ipso Cn. Pompeio, in quo novi constitui nihil volt Q. Catulus, quam multa sint nova summa Q. Catuli voluntate constituta recordamini: quid tam novum quam adulescentulum privatum exercitum difficili rei publicae tempore conficere? confecit. huic praeesse? praefuit. rem optime ductu suo gerere? gessit. quid tam praeter consuetudinem quam homini peradulescenti, cuius aetas a senatorio gradu longe abesset, imperium atque exercitum dari, Siciliam permitti atque Africam bellumque in ea provincia administrandum? fuit in his provinciis singulari innocentia, gravitate, virtute; bellum in Africa maximum confecit, victorem exercitum deportavit. quid vero tam in-

20  
59

60

61

21



auditum quam equitem Romanum triumphare? at eam quoque rem populus Romanus non modo vidit, sed omnium  
62 etiam studio visendam et concelebrandam putavit. quid tam inusitatum quam ut, cum duo consules clarissimi fortissimique essent, eques Romanus ad bellum maximum formidolosissimumque pro consule mitteretur? missus est: quo quidem tempore, cum esset non nemo in senatu qui diceret non oportere mitti hominem privatum pro consule, L. Philippus dixisse dicitur non se illum sua sententia pro consule, sed pro consulibus mittere. tanta in eo rei publicae bene gerendae spes constituebatur, ut duorum consulum munus unius adulescentis virtuti committeretur. quid tam singulare quam ut ex senatus consulto legibus solutus consul ante fieret, quam ullum alium magistratum per leges capere licuisset? quid tam incredibile quam ut iterum eques Romanus ex senatus consulto triumpharet? quae in omnibus hominibus nova post hominum memoriam constituta sunt, ea tam multa non  
63 sunt quam haec, quae in hoc uno homine videmus: atque haec tot exempla tanta ac tam nova profecta sunt in eundem hominem a Q. Catuli atque a ceterorum eiusdem  
22 dignitatis amplissimorum hominum auctoritate. qua re videant ne sit periniquum et non ferundum, illorum auctoritatem de Cn. Pompeii dignitate a vobis comprobata semper esse, vestrum ab illis de eodem homine iudicium populi que Romani auctoritatem improbari, praesertim cum iam suo iure populus Romanus in hoc homine suam auctoritatem vel contra omnis, qui dissentiunt, possit defendere, propterea quod isdem istis reclamantibus vos unum illum ex omnibus delegistis quem bello praedonum  
64 praeponeretis. hoc si vos temere fecistis et rei publicae parum consulistis, recte isti studia vestra suis consiliis regere conantur; sin autem vos plus tum in re publica vidistis, vos eis repugnantibus per vosmet ipsos dignitatem huic imperio, salutem orbi terrarum attulistis, aliquando isti principes et sibi et ceteris populi Romani universi auctoritati parendum esse fateantur. atque in hoc bello Asiatico et regio non solum militaris illa virtus, quae est in Cn. Pompeio singularis, sed aliae quoque virtutes animi magnae et multae requiruntur: difficile est in Asia, Cilicia, Syria regnisque interiorum nationum ita versari nostrum imperatorem, ut nihil aliud nisi de hoste ac de laude cogitet; deinde etiam si qui sunt pudore ac temperantia moderatiores, tamen eos esse talis propter

multitudinem cupidorum hominum nemo arbitratur. diffi- 65  
 cile est dictu, Quirites, quanto in odio simus apud ex-  
 teras nationes propter eorum, quos ad eas per hos annos  
 cum imperio misimus, libidines et iniurias. quod enim  
 fanum putatis in illis terris nostris magistratibus religio-  
 sum, quam civitatem sanctam, quam domum satis clau-  
 sam ac munitam fuisse? urbes iam locupletes et copiosae  
 requiruntur, quibus causa belli propter diripiendi cupidi-  
 tatem inferatur. libenter haec coram cum Q. Catulo et 66  
 Q. Hortensio, summis et clarissimis viris, disputarem;  
 noverunt enim sociorum volnera, vident eorum calamita-  
 tes, querimonias audiunt: pro sociis vos contra hostis  
 exercitum mittere putatis an hostium simulatione contra  
 socios atque amicos? quae civitas est in Asia quae non  
 modo imperatoris aut legati, sed unius tribuni militum  
 animos ac spiritus capere possit? qua re, etiam si quem 23  
 habetis qui conlatis signis exercitus regios superare posse  
 videatur, tamen nisi erit idem, qui [se] a pecuniis socio-  
 rum, qui ab eorum coniugibus ac liberis, qui ab orna-  
 mentis fanorum atque oppidorum, qui ab auro gazaque  
 regia manus, oculos, animum cohibere possit, non erit 67  
 idoneus qui ad bellum Asiaticum regiumque mittatur.  
 ecquam putatis civitatem pacatam fuisse quae locuples  
 sit? ecquam esse locupletem quae istis pacata esse vi-  
 deatur? ora maritima, Quirites, Cn. Pompeium non solum  
 propter rei militaris gloriam, sed etiam propter animi  
 continentiam requisivit. videbat enim praetores locuple-  
 tari quot annis pecunia publica praeter paucos, neque eos  
 quicquam aliud adsequi classium nomine nisi ut detri-  
 mentis accipiendis maiore adfici turpitudine videremur.  
 nunc qua cupiditate homines in provincias, quibus iactu-  
 ris et quibus condicionibus proficiscantur ignorant vide-  
 licet isti, qui ad unum deferenda omnia esse non arbi-  
 trantur? quasi vero Cn. Pompeium non cum suis virtutibus  
 tum etiam alienis vitiis magnum esse videamus. qua re 68  
 nolite dubitare quin huic uni credatis omnia, qui inter  
 tot annos unus inventus sit quem socii in urbis suas cum  
 exercitu venisse gaudeant.

Quod si auctoritatibus hanc causam, Quirites, confir-  
 mandam putatis, est vobis auctor vir bellorum omnium  
 maximarumque rerum peritissimus, P. Servilius, cuius  
 tantae res gestae terra marique exstiterunt, ut cum de  
 bello deliberetis, auctor vobis gravior nemo esse debeat;  
 est C. Curio, summis vestris beneficiis maximisque rebus

gestis, summo ingenio et prudentia praeditus; est Cn. Lentulus, in quo omnes pro amplissimis vestris honoribus summum consilium, summam gravitatem esse cognovistis, est C. Cassius, integritate, virtute, constantia singulari, qua re videte ut horum auctoritatibus illorum orationi, qui dissentiunt, respondere posse videamur.

- <sup>24</sup>  
<sup>69</sup> Quae cum ita sint, C. Manili, primum istam tuam et legem et voluntatem et sententiam laudo vehementissimeque comprobo; deinde te hortor, ut auctore populo Romano mancas in sententia neve cuiusquam vim aut minas pertimescas. primum in te satis esse animi perseverantiaeque arbitror; deinde cum tantam multitudinem cum tanto studio adesse videamus, quantam iterum nunc in eodem homine praeficiendo videmus, quid est quod aut de re aut de perficiendi facultate dubitemus? ego autem quicquid est in me studii, consilii, laboris, ingenii, quicquid hoc beneficio populi Romani atque hac potestate praetoria, quicquid auctoritate, fide, constantia possum, id omne ad hanc rem conficiendam tibi et populo Romano
- <sup>70</sup> polliceor ac deferor; testorque omnis deos et eos maxime, qui huic loco temploque praesident, qui omnium mentis eorum, qui ad rem publicam adeunt, maxime perspiciunt, me hoc neque rogatu facere cuiusquam neque quo Cn. Pompeii gratiam mihi per hanc causam conciliari putem neque quo mihi ex cuiusquam amplitudine aut praesidia periculis aut adiumenta honoribus quaeram, propterea quod pericula facile, ut hominem praestare oportet, innocentia tecti repellemus, honorem autem neque ab uno neque ex hoc loco, sed eadem illa nostra laboriosissima ratione vitae, si vestra voluntas feret, consequemur.
- <sup>71</sup> quam ob rem quicquid in hac causa mihi susceptum est, Quirites, id ego omne me rei publicae causa suscepisse confirmo, tantumque abest, ut aliquam mihi bonam gratiam quaesisse videar, ut multas me etiam simultates partim obscuras, partim apertas intellegam mihi non necessarias, vobis non inutilis suscepisse. sed ego me hoc honore praeditum, tantis vestris beneficiis adfectum statui, Quirites, vestram voluntatem et rei publicae dignitatem et salutem provinciarum atque sociorum meis omnibus commodis et rationibus praeferre oportere.
-

M. TULLII CICERONIS  
PRO A. CLUENTIO HABITO ORATIO  
AD IUDICES.

Animadverti, iudices, omnem accusatoris orationem <sup>1</sup>  
in duas divisam esse partis, quarum altera mihi niti et  
magno opere confidere videbatur invidia iam inveterata  
iudicii Iuniani, altera tantum modo consuetudinis causa  
timide et diffidenter attingere rationem veneficii criminum,  
qua de re lege est haec quaestio constituta. itaque mihi  
certum est hanc eandem distributionem invidiae et cri-  
minum sic in defensione servare, ut omnes intellegant  
nihil me nec subterfugere voluisse reticendo nec obse-  
rare dicendo. sed cum considero quo modo mihi in utra- <sup>2</sup>  
que re sit elaborandum, altera pars et ea, quae propria  
est iudicii vestri et legitimae veneficii quaestionis, per  
mihi brevis et non magnae in dicendo contentionis fore  
videtur, altera autem, quae procul ab iudicio remota est,  
quae contionibus seditiose concitatis adcommodatior est  
quam tranquillis moderatisque iudiciis, perspicio quan-  
tum in agendo difficultatis et quantum laboris sit habi-  
tura. sed in hac difficultate illa me res tamen, iudices, <sup>3</sup>  
consolatur, quod vos de criminibus sic audire consuestis,  
ut eorum omnem dissolutionem ab oratore quaeratis, ut  
non existimetis plus vos ad salutem reo largiri oportere,  
quam quantum defensor purgandis criminibus consequi  
et dicendo probare potuerit. de invidia autem sic inter  
nos\* disceptare debetis, ut non quid dicatur a nobis, sed  
quid oporteat dici consideretis. agitur enim in criminibus  
A. Cluentii proprium periculum, in invidia causa com-  
munis; quam ob rem alteram partem causae sic agemus  
ut vos doceamus, alteram sic ut oremus; in altera dili-  
gentia vestra nobis adiungenda est, in altera fides im-  
ploranda. nemo est enim qui invidiae sine vestro [ac



4 sine] talium virorum subsidio possit resistere. equidem  
 quod ad me attinet, quo me vertam nescio: negem fuisse  
 illam infamiam iudicii corrupti? negem esse illam rem  
 agitatam in contionibus, iactatam in iudiciis, commemo-  
 ratam in senatu? evellam ex animis hominum tantam  
 opinionem, tam penitus insitam, tam vetustam? non est  
 nostri ingenii: vestri auxilii est, iudices, huius innocentiae  
 sic in hac calamitosa fama quasi in aliqua perniciosissima  
 2 flamma atque in communi incendio subvenire. etenim  
 5 sicut aliis in locis parum firmamenti et parum virium  
 veritas habet, sic in hoc loco falsa invidia imbecilla esse  
 debet; dominetur in contionibus, iaceat in iudiciis; valeat  
 in opinionibus ac sermonibus imperitorum, ab ingeniis  
 prudentium repudietur; vehementis habeat repentinos im-  
 petus, spatio interposito et causa cognita consenescat;  
 denique illa definitio iudiciorum aequorum, quae nobis a  
 maioribus tradita est, retineatur, ut in iudiciis et sine  
 invidia culpa plectatur et sine culpa invidia ponatur.  
 6 quam ob rem a vobis, iudices, ante quam de ipsa causa  
 dicere incipio, haec postulo: primum id, quod acquisissi-  
 mum est, ut ne quid huc praeiudicati adferatis; etenim  
 non modo auctoritatem, sed etiam nomen iudicium amit-  
 temus, [nisi hic ex ipsis causis iudicabimus,] si ad cau-  
 sas iudicia iam facta domo deferemus; deinde si quam  
 opinionem iam vestris mentibus comprehendistis, si eam  
 ratio convellet, si oratio labefactabit, si denique veritas  
 extorquebit, ne repugnetis eamque animis vestris aut  
 libentibus aut aequis remittatis; tum autem, cum ego una  
 quaque de re dicam et diluam, ne ipsi, quae contraria  
 sint, taciti cogitationi vestrae subiciatis, sed ad extremum  
 exspectetis meque meum dicendi ordinem servare patia-  
 mini; cum peroraro, tum, si quid erit praeteritum, [animo]  
 3 requiratis. ego me, iudices, ad eam causam accedere,  
 7 quae iam per annos octo continuos ex contraria parte  
 audiatur atque ipsa opinione hominum tacita prope con-  
 victa atque damnata sit, facile intellego; sed si qui mihi  
 deus vestram ad me audiendum benevolentiam concilia-  
 rit, efficiam profecto, ut intellegatis nihil esse homini  
 tam timendum quam invidiam, nihil innocenti suscepta  
 invidia tam optandum quam aequum iudicium, quod in

hoc uno denique falsae infamiae finis aliqui atque exitus reperiatur. quam ob rem magna me spes tenet, si quae sunt in causa, explicare atque omnia dicendo consequi potuero, hunc locum consessumque vestrum, quem illi horribilem A. Cluentio ac formidolosum fore putaverunt, eum tandem eius fortunae miserae multumque iactatae portum ac perfugium futurum. tametsi permulta sunt, <sup>8</sup> quae mihi, ante quam de causa dico, de communibus invidiae periculis dicenda esse videantur, tamen, ne diutius oratione mea suspensa exspectatio vestra teneatur, adgrediar ad crimen cum illa deprecatione, iudices, qua mihi saepius utendum esse intellego, sic ut me audiat, quasi hoc tempore haec causa primum dicatur, sicuti dicitur, non quasi saepe iam dicta et numquam probata sit: hodierno enim die primum [veteris] ipsius criminis diluendi potestas est data, ante hoc tempus error in hac causa atque invidia versata est. quam ob rem dum multorum annorum accusationi breviter dilucideque respondeo, quaeso, ut me, iudices, sicut facere instituitis, benigne attenteque audiat.

Corrupsisse dicitur A. Cluentius iudicium pecunia, quo <sup>4</sup>  
inimicum innocentem Statium Albium condemnaret. <sup>9</sup>  
ostendam, iudices, primum, quoniam caput illius atrocitatis atque invidiae fuit, innocentem pecunia circumventum, neminem umquam maioribus criminibus, gravioribus testibus esse in iudicium vocatum; deinde ea de eo praeiudicia esse facta ab ipsis iudicibus, a quibus condemnatus est, ut non modo ab isdem, sed ne ab aliis quidem ullis absolvi ullo modo posset; cum haec docuero, tum illud ostendam, quod maxime requiri intellego, iudicium illud pecunia esse temptatum non a Cluentio, sed contra Cluentium, faciamque ut intellegatis in tota illa causa quid res ipsa tulerit, quid error adfinxerit, quid invidia conflarit.

Primum igitur illud est, ex quo intellegi possit, debuisse Cluentium magno opere causae confidere, quod <sup>10</sup>  
certissimis criminibus et testibus fretus ad accusandum descenderit. hoc loco faciendum mihi, iudices, est, ut vobis breviter illa, quibus Albius est condemnatus, crimina exponam. abs te peto, Oppianice, ut me invitum

de patris tui causa dicere existimes, adductum fide atque officio defensionis. etenim tibi si in praesentia non potuero, tamen multae mihi ad satis faciendum reliquo tempore facultates dabuntur; Cluentio nisi nunc satis fecero, postea mihi satis faciendi potestas non erit. simul et illud quis est qui dubitare debeat, contra damnatum et mortuum pro incolumi et [pro] vivo dicere, cum illi, in quem dicitur, damnatio omne ignominiae periculum iam abstulerit, mors vero etiam doloris, hic autem, pro quo dicimus, nihil possit offensionis accipere sine acerbissimo animi sensu ac molestia et sine summo dedecore vitae et  
 11 turpitudine? atque ut intellegatis Cluentium non accusatorio animo, non ostentatione aliqua aut gloria adductum, sed nefariis iniuriis, cotidianis insidiis, proposito ante oculos vitae periculo, nomen Oppianici detulisse, paulo longius exordium rei demonstrandae petam; quod quaeso, iudices, ne moleste patiamini, principiis enim cognitis multo facilius extrema intellegetis.

5 A. Cluentius Habitus fuit, pater huiusce, iudices, homo non solum municipii Larinatis, ex quo erat, sed etiam regionis illius et vicinitatis virtute, existimatione, nobilitate facile princeps. is cum esset mortuus Sulla et Pompeio consulibus, reliquit hunc annos xv natum, grandem autem et nubilem filiam, quae brevi tempore post patris mortem nupsit A. Aurio Melino, consobрино suo, adolescenti in primis, ut tum habebatur, inter suos et  
 12 honesto et nobili. cum essent eae nuptiae plenae dignitatis, plenae concordiae, repente est exorta mulieris importunae nefaria libido non solum dedecore, verum etiam scelere coniuncta: nam Sassia, mater huius Habiti — mater enim a me in omni causa, tametsi in hunc hostili odio et crudelitate est, mater, inquam, appellabitur, neque unquam illa ita de suo scelere et immanitate audiet, ut naturae nomen amittat; quo enim est ipsum nomen amantius indulgentiusque maternum, hoc illius matris, quae multos iam annos et nunc cum maxime filium interfectum cupit, singulare scelus maiore odio dignum esse ducetis — ea igitur mater Habiti, Melini illius adolescentis, generi sui, contra quam fas erat, amore capta, primo, neque id ipsum diu, quoquo modo poterat, in illa cupi-

ditate se continebat; deinde ita flagrare coepit amentia,  
 sic inflammata ferri libidine, ut eam non pudor, non  
 pietas, non macula familiae, non hominum fama, non filii  
 dolor, non filiae maeror a cupiditate revocaret: animum <sup>13</sup>  
 adolescentis nondum consilio ac ratione firmatum pellexit  
 eis omnibus rebus, quibus illa aetas capi ac deliniri  
 potest. filia, quae non solum illo communi dolore mu-  
 liebri in eius modi viri iniuriis angeretur, sed nefarium  
 matris pelicatum ferre non posset, de quo ne queri qui-  
 dem se sine scelere posse arbitraretur, ceteros sui tanti  
 mali ignaros esse cupiebat, in huius amantissimi sui fra-  
 tris manibus et gremio maerore et lacrimis consenescebat.  
 ecce autem subitum divortium, quod solacium malorum <sup>14</sup>  
 omnium fore videbatur: discedit a Melino Cluentia, ut in  
 tantis iniuriis non invita, ut a viro non libenter. tum vero  
 illa egregia et praeclara mater palam exsultare laetitia,  
 triumphare gaudio coepit; victrix filiae [non libidinis]  
 diutius suspicionibus obscuris laedi famam suam noluit:  
 lectum illum genialem, quem biennio ante filiae suae nubenti  
 straverat, in eadem domo sibi ornari et sterni expulsa at-  
 que exturbata filia iubet; nubit genero socrus nullis auspi-  
 cibus, nullis auctoribus, funestis ominibus omnium. o mu- <sup>6</sup>  
 lieris scelus incredibile et praeter hanc unam in omni vita <sup>15</sup>  
 inauditum! o libidinem effrenatam et indomitam! o auda-  
 ciam singularem! nonne timuisse, si minus vim deorum  
 hominumque famam, at illam ipsam noctem facesque  
 illas nuptialis? non limen cubiculi? non cubile filiae? non  
 parietes denique ipsos, superiorum testis nuptiarum? per-  
 fregit ac prostravit omnia cupiditate ac furore; vicit pu-  
 dorem libido, timorem audacia, rationem amentia. tulit <sup>16</sup>  
 hoc commune dedecus familiae, cognationis, nominis  
 graviter filius; augebatur autem eius molestia cotidianis  
 querimoniis et adsiduo fletu sororis: statuit tamen nihil  
 sibi in tantis iniuriis ac tanto scelere matris gravius esse  
 faciendum, quam ut illa ne uteretur, ne quae videre sine  
 summo animi dolore non poterat, ea, si matre uteretur,  
 non solum videre, verum etiam probare suo iudicio pu-  
 taretur. initium quod huic cum matre fuerit simultatis <sup>17</sup>  
 audistis. pertinuisse hoc ad causam tum, cum reliqua  
 cognoveritis, intellegitis; nam illud me non praeterit,



cuiuscumque modi sit mater, tamen in iudicio filii de turpitudine parentis dici vix oportere. non essem ad ullam causam idoneus, iudices, si hoc, quod in communibus hominum sensibus atque ipsa natura positum atque infixum est, id ego, qui ad hominum pericula depellenda adiungerer, non viderem: facile intellego non modo reticere homines parentum iniurias, sed etiam animo aequo ferre oportere. sed ego ea, quae ferri possunt, ferenda, 18 quae taceri, tacenda esse arbitror: nihil in vita vidit calamitatis A. Cluentius, nullum periculum mortis adiit, nihil mali timuit, quod non totum a matre esset conflatum et profectum; quae hoc tempore sileret omnia, atque ea, si oblivione non posset, tamen taciturnitate sua tecta esse pateretur: sed vero sic agitur, ut prorsus reticere nullo modo possit. hoc enim ipsum iudicium, hoc periculum, illa [accusatio] omnis testium copia, quae futura est, a matre initio est adornata, a matre hoc tempore instruitur atque omnibus eius opibus et copiis comparatur; ipsa denique nuper Larino huius opprimendi causa Romam advolavit; praesto est mulier audax, pecuniosa, crudelis; instituit accusatores, instruit testis; squalore huius et sordibus laetatur, exitium exoptat, sanguinem suum profundere omnem cupit, dum modo profusum huius ante videat. haec nisi omnia perspexeritis in causa, temere a nobis illam appellari putatote; sin erunt et aperta et nefaria, Cluentio ignoscere debebitis, quod haec a me dici patiatur; mihi ignoscere non debere- 7 tis, si tacerem.

7 Nunc iam summatim exponam quibus criminibus Op-  
 19 pianicus damnatus sit, ut et constantiam A. Cluentii et rationem accusationis perspicere possitis, ac primum causa accusandi quae fuerit ostendam, ut id ipsum A. Cluentium vi ac necessitate coactum fecisse videatis.  
 20 cum manifesto venenum deprehendisset, quod vir matris Oppianicus ei paravisset, et res non coniectura, sed oculis ac manibus teneretur, neque in causa ulla dubitatio posset esse, accusavit Oppianicum; quam constanter et quam diligenter, postea dicam; nunc hoc scire vos volui, nullam huic aliam accusandi causam fuisse, nisi uti propositum vitae periculum et cotidianas capitis in-

sidias hac una ratione vitaret. atque ut intellegatis eis accusatum esse criminibus Oppianicum, ut neque accusator timere neque reus sperare debuerit, pauca vobis illius iudicii crimina exponam, quibus cognitis nemo vestrum mirabitur illum diffidentem rebus suis ad Staionum atque ad pecuniam confugisse. Larinas quaedam <sup>21</sup> fuit Dinaea, socrus Oppianici, quae filios habuit M. et N. Aurios et Cn. Magium et filiam Magiam, nuptam Oppianico. M. Aurius adulescentulus bello Italico captus apud Asculum in Q. Sergii senatoris, eius qui inter sicarios damnatus est, manus incidit et apud eum in ergastulo fuit; N. autem Aurius frater eius mortuus est heredemque Cn. Magium fratrem reliquit; postea Magia uxor Oppianici mortua est; postremo unus, qui reliquus erat Dinaeae filius, Cn. Magius est mortuus. is heredem fecit illum adulescentem Oppianicum sororis suae filium eumque partiri cum Dinaca matre iussit. interim venit index ad Dinaeam neque obscurus neque incertus, qui nuntiaret ei filium eius, M. Aurium, vivere et in agro Gallico esse in servitute. mulier amissis liberis cum unius <sup>22</sup> recuperandi filii spes esset ostentata, omnis suos propinquos filique sui necessarios convocavit et ab eis flens petivit, ut negotium susciperent, adulescentem investigarent, sibi restituerent eum filium, quem tamen unum ex multis fortuna reliquum esse voluisset. haec cum agere instituisset, oppressa morbo est; itaque testamentum fecit eius modi, ut illi filio HS cccc milia legaret, heredem institueret eundem illum Oppianicum, nepotem suum; atque eis diebus paucis est mortua. propinqui tamen illi, quem ad modum viva Dinaea instituerant, ita mortua illa ad investigandum M. Aurium cum eodem illo indice in agrum Gallicum profecti sunt. interim Oppianicus, ut <sup>8</sup> erat, sicuti ex multis rebus reperietis, singulari scelere <sup>23</sup> et audacia, per quendam Gallicanum, familiarem suum, primum illum indicem pecunia corruptit; deinde ipsum M. Aurium non magna iactura facta tollendum interficiendumque curavit; illi autem, qui erant ad propinquum investigandum et recuperandum profecti, litteras Larinum ad Aurios illius adulescentis suosque necessarios mittunt, sibi difficilem esse investigandi rationem, quod intellege-

- rent indicem ab Oppianico esse corruptum; quas litteras A. Aurius, vir fortis et experiens et domi nobilis et M. illius Auri perpropinquus in foro, palam, multis audientibus, cum adesset Oppianicus, recitat et clarissima voce se nomen Oppianici, si interfectum M. Aurium esse com-
- 24 perisset, delaturum esse testatur. interim brevi tempore illi, qui erant in agrum Gallicum profecti, Larinum revertuntur; interfectum esse M. Aurium renuntiant: animi non solum propinquorum, sed etiam omnium Larinatum odio Oppianici et illius adulescentis misericordia commoventur; itaque cum Aurius, is qui antea denuntiabat, clamore hominem ac minis insequi coepisset, Larino profugit et se in castra clarissimi viri, Q. Metelli, contulit.
- 25 post illam autem fugam et sceleris et conscientiae testem numquam inermem se inimicis committere ausus est, sed per illam L. Sullae vim atque victoriam Larinum in summo timore omnium cum armatis advolavit; IV viros, quos municipes fecerant, sustulit; se a Sulla et tris praeterea factos esse dixit, et ab eodem sibi esse imperatum, ut A. Aurium illum, qui sibi delationem nominis et capitis periculum ostentarat, et alterum A. Aurium et eius L. filium et Sex. Vibium, quo sequestre in illo indice corrumpendo dicebatur esse usus, proscribendos interficiendosque curaret; itaque illis crudelissime interfectis non mediocri ab eo ceteri proscriptionis et mortis metu tenebantur. his rebus in causa iudicioque patefactis quis
- 9 est qui illum absolvi potuisse arbitretur? atque haec parva sunt: cognoscite reliqua, ut non aliquando condemnatum esse Oppianicum, sed aliquam diu incolumem
- 26 fuisse miremini. primum videte hominis audaciam: Sassiam in matrimonium ducere, Habiti matrem, illam, cuius virum A. Aurium occiderat, concupivit. utrum impudentior hic, qui postulet, an crudelior illa, si nubat, difficile dictu est; sed tamen utriusque humanitatem constantiamque cognoscite: petit Oppianicus, ut sibi Sassia nubat, et id magno opere contendit; illa autem non admiratur audaciam, non impudentiam aspernatur, non denique illam Oppianici domum viri sui sanguine redundantem reformidat, sed quod haberet ille tris filios, idcirco se ab eis nuptiis abhorrere respondit. Oppianicus,
- 27

qui pecuniam Sassiae concupivisset, domo sibi quaerendum remedium existimavit ad eam moram, quae nuptiis adferebatur; nam cum haberet ex Novia infantem filium, alter autem eius filius, Papia natus, Teani, quod abest a Larino XVIII milia passuum, apud matrem educaretur, arcessit subito sine causa puerum Teano: quod facere nisi ludis aut festis diebus antea non solebat; mater misera nihil mali suspicans mittit; ille se Tarentum proficisci cum simulasset, eo ipso die puer, hora undecima cum valens in publico visus esset, ante noctem mortuus et postridie ante quam luceret combustus est; atque hunc tantum maerorem matri prius hominum rumor quam quisquam ex Oppianici familia nuntiavit: illa cum uno tempore audisset sibi non solum filium, sed etiam exsequiarum munus ereptum, Larinum confestim exanimata venit et ibi de integro funus iam sepulto filio fecit. dies nondum decem intercesserant, cum ille alter filius infans necatur: itaque nubit Oppianico continuo Sassia, lactanti iam animo et spe optime confirmato; nec mirum, quae se non nuptialibus donis, sed filiorum funcibus esse delinitam videret. ita quod ceteri propter liberos pecuniae cupidiores esse solent, ille propter pecuniam liberos amittere iucundum esse duxit. sentio, iudices, vos pro vestra humanitate his tantis sceleribus breviter a me demonstratis vehementer esse commotos: quo tandem igitur animo fuisse illos arbitramini, quibus eis de rebus non modo audiendum fuit, verum etiam iudicandum? vos auditis de eo, in quem iudices non estis, de eo, quem non videtis, de eo, quem odisse iam non potestis, de eo, qui et naturae et legibus satis fecit, quem leges exsilio, natura morte multavit; auditis non ab inimico, auditis sine testibus, auditis, cum ea, quae copiosissime dici possunt, breviter a me strictimque dicuntur: illi audiebant de eo, de quo iurati sententias ferre debebant, de eo, cuius praesentis nefarium et consceleratum voltum intuebantur, de eo, quem omnes oderant propter audaciam, de eo, quem omni supplicio dignum esse ducebant; audiebant ab accusatoribus, audiebant verba multorum testium, audiebant, cum una quaque de re a P. Cannutio, homine eloquentissimo, graviter et diu diceretur: et est quisquam 30



qui cum haec cognoverit, suspicari possit Oppianicum iudicio oppressum et circumventum esse innocentem?

Acervatim iam reliqua, iudices, dicam, ut ad ea, quae propiora huiusce causae et adiunctiora sunt, perveniam; vos, quaeso, memoria teneatis non mihi hoc esse propositum, ut accusem Oppianicum mortuum, sed cum hoc persuadere vobis velim, iudicium ab hoc non esse corruptum, hoc uti initio ac fundamento defensionis, Oppianicum hominem sceleratissimum et nocentissimum esse damnatum; qui uxori suae Cluentiae, quae amita huius Habiti fuit, cum ipse poculum dedisset, subito illa in media potione exclamavit se maximo cum dolore emori; nec diutius vixit quam locuta est; nam in ipso sermone hoc et vociferatione mortua est; et ad hanc mortem repentinam vocesque morientis omnia praeterea, quae solent esse indicia et vestigia veneni, in illius mortuae corpore fuerunt. eodemque veneno C. Oppianicum fratrem  
 11 necavit; neque est hoc satis; tametsi in ipso fraterno  
 31 parricidio nullum scelus praetermissum videtur, tamen, ut ad hoc nefarium facinus accederet, aditum sibi aliis sceleribus ante munivit: nam cum esset gravida Auria, fratris uxor, et iam appropinquare partus putaretur, mulierem veneno interfecit, ut una illud, quod erat ex fratre conceptum, necaretur; post fratrem adgressus est; qui sero, iam exhausto illo poculo mortis, cum et de suo et de uxoris interitu clamaret testamentumque mutare cuperet, in ipsa significatione huius voluntatis est mortuus. ita mulierem, ne partu eius ab hereditate fraterna excluderetur, necavit; fratris autem liberos prius vita privavit quam illi hanc a natura lucem accipere potuerunt; ut omnes intellegerent nihil ei clausum [nihil ei sanctum] esse posse, a cuius audacia fratris liberos ne materni quidem corporis custodiae tegere potuissent. memoria  
 32 teneo Milesiam quandam mulierem, cum essem in Asia, quod ab heredibus accepta pecunia partum sibi ipsa medicamentis abegisset, rei capitalis esse damnatam; nec iniuria, quae spem parentis, memoriam nominis, subsidium generis, heredem familiae, designatum rei publicae civem sustulisset. quanto est Oppianicus in eadem iniuria maiore supplicio dignus? si quidem illa, cum

suo corpori vim attulisset, se ipsa cruciavit, hic autem idem illud effecit per alieni corporis mortem atque cruciatum. ceteri non videntur in singulis hominibus multa parricidia suscipere posse, Oppianicus inventus est qui in uno corpore pluris necaret. itaque, cum hanc eius consuetudinem audaciamque cognosset avunculus illius adolescentis Oppianici, Cn. Magius, isque cum gravi morbo adfectus esset, heredem illum sororis suae filium faceret, adhibitis amicis, praesente matre sua, Dinaea, uxorem suam interrogavit, essetne praegnas; quae cum se esse respondisset, ab ea petivit, ut se mortuo apud Dinaeam, quae tum ei mulieri socrus erat, quoad pareret, habitaret diligentiamque adhiberet, ut id, quod conceperat, servare et salvum parere posset; itaque ei testamento legat grandem pecuniam a filio, si qui natus esset; ab secundo herede nihil legat. quid de Oppianico suspicatus sit, videtis; quid iudicarit, obscurum non est; nam cuius filium faceret heredem, cum tutorem liberis non ascripsit. quid Oppianicus fecerit, cognoscite, ut illum Magium intellegatis non longe animo prospexisse morientem: quae pecunia mulieri legata erat a filio, si qui natus esset, eam praesentem Oppianicus non debitam mulieri solvit, si haec solutio legatorum et non merces abortionis appellanda est; quo illa pretio accepto multisque praeterea muneribus, quae tum ex tabulis Oppianici recitabantur, spem illam, quam in alvo commendatam a viro continebat, victa avaritia sceleri Oppianici vendidit. nihil posse iam ad hanc improbitatem addi videtur: attendite exitum: quae mulier obtestatione viri decem illis mensibus ne domum quidem ullam nisi socrus suae nosse debuit, haec quinto mense post viri mortem ipsi Oppianico nupsit; quae nuptiae non diuturnae fuerunt: erant enim non matrimonii dignitate, sed sceleris societate coniunctae. quid? illa caedes Asuvii Larinatis, adolescentis pecuniosi, quam clara tum recenti re fuit, quam omnium sermone celebrata? fuit Avillius quidam Larino perdita nequitia et summa egestate, arte quadam praeditus ad libidines adolescentulorum excitandas adcommodata, qui ut se blanditiis et adsentationibus in Asuvii consuetudinem penitus immersit, Oppianicus continuo

12  
33

34

35

13  
36

sperare coepit, hoc se Avillio tamquam aliqua machina admota capere Asuvii adulescentiam et fortunas eius patrias expugnare posse. ratio excogitata Larini est, res translata Romam; inire enim consilium facilius in solitudine, perficere rem eius modi commodius in turba posse arbitrati sunt. Asuvius cum Avillio Romam est profectus; hos vestigiis Oppianicus consecutus est. iam ut Romae vixerint, quibus conviviis, quibus flagitiis, quantis et quam profusis sumptibus, non modo conscio, sed etiam convivae et adiutore Oppianico, longum est dicere mihi, praesertim ad alia properanti; exitum huius adsimulatae familiaritatis cognoscite: cum esset adulescens apud mulierculam quandam atque ibi pernoctaret, *ibidem* diem posterum commoraretur, Avillius, ut erat constitutum, simulat se aegrotare et testamentum facere velle; Oppianicus obsignatores ad eum, qui neque Asuvium neque Avillium nossent, adducit et illum Asuvium appellat; testamento Asuvii nomine obsignato disceditur; Avillius *ipse* ilico convalescit; Asuvius autem *ab eo* [brevis illo tempore] quasi in hortulos [iret] in arenarias quasdam

37 extra portam Esquilinam perductus occiditur: qui cum unum iam et alterum diem desideraretur neque in eis locis, ubi ex consuetudine quaerebatur, inveniretur, et Oppianicus in foro Larinatum dictitaret nuper se et suos amicos testamentum eius obsignasse, liberti Asuvii et non nulli amici, quod eo die, quo postremum Asuvius visus erat, Avillium cum eo fuisse et a multis visum esse constabat, in eum invadunt et hominem ante pedes Q. Manlii, qui tum erat IIvir, constituunt; atque illic continuo, nullo teste, nullo indice, recentis maleficii conscientia perterritus omnia, ut a me paulo ante dicta sunt, exponit Asuviumque a sese consilio Oppianici interfectum

39 fatetur. extrahitur domo latitans Oppianicus a Manlio; index Avillius ex altera parte coram tenetur. hic quid iam reliqua quaeritis? Manlium plerique noratis: non ille honorem a pueritia, non studia virtutis, non ullum existimationis bonae fructum umquam cogitarat: ex petulantia atque improbo scurra in discordiis civitatis ad eam columnam, ad quam multorum saepe convitiis perductus erat, tum suffragiis populi pervenerat: itaque [tum] rem

cum Oppianico transigit, pecuniam ab eo accipit, causam et susceptam et tam manifestam relinquit. ac tum in Oppianici causa crimen hoc Asuvianum cum testibus multis tum vero indicio Avillii comprobabatur; in quo adligatum Oppianici nomen primum esse constabat, eius, quem vos miserum atque innocentem falso iudicio circumventum esse dicitis. quid? aviam tuam, Oppianice, Dinaeam, <sup>14</sup>/<sub>40</sub> cui tu es heres, pater tuus non manifesto necavit? ad quam cum adduxisset medicum illum suum, iam cognitum et saepe victorem, [per quem interfecerat plurimos,] mulier exclamat se ab eo nullo modo curari velle, quo curante omnis suos perdidisset. tum repente Anconitanum quendam, L. Clodium, pharmacopolam [circumforaneum], qui casu tum Larinum venisset, adgreditur et cum eo duobus milibus HS, id quod ipsius tabulis tum est demonstratum, transigit. L. Clodius, cum properaret, cui fora multa restarent, simul atque introductus est, rem confecit: prima potione mulierem sustulit, neque postea Larini punctum est temporis commoratus. eadem <sup>41</sup> hac Dinaea testamentum faciente, cum tabulas prehendisset Oppianicus, qui gener eius fuisset, digito legata delevit et cum id multis locis fecisset, post mortem eius, ne lituris coargui posset, testamentum in alias tabulas transscriptum signis adulterinis obsignavit. multa praetereo consulto: etenim vereor ne haec ipsa nimium multa esse videantur; vos tamen similem sui cum fuisse in ceteris quoque vitae partibus existimare debetis. illum tabulas publicas Larini censorias corrupisse decuriones universi iudicaverunt; cum illo nemo iam rationem, nemo rem ullam contrahebat; nemo illum ex tam multis cognatis et adfinibus tutorem umquam liberis suis scripsit; nemo illum aditu, nemo congressione, nemo sermone, nemo convivio dignum iudicavit; omnes aspernabantur, omnes abhorrebant, omnes ut aliquam immanem ac perniciosam bestiam pestemque fugiebant. hunc tamen hominem tam <sup>42</sup> audacem, tam nefarium, tam nocentem numquam accusasset Habitus, iudices, si id praetermittere suo salvo capite potuisset: erat huic inimicus Oppianicus; sed tamen erat vitricus; crudelis et huic infesta mater, at mater. postremo nihil tam remotum ab accusatione quam Cluen-



tius et natura et voluntate et instituta ratione vitae; sed cum esset haec ei proposita condicio, ut aut iuste pieque accusaret aut acerbè indigneque moreretur, accusare, quo-  
 43 quo modo posset, quam illo modo emori maluit. atque ut hoc ita esse perspicere possitis, exponam vobis Oppianici facinus manifesto compertum atque deprehensum; ex quo simul utrumque et huic accusare et illi con-  
 15 demnari necesse fuisse intellegitis. Martiales quidam Larini appellabantur, ministri publici Martis atque ei deo veteribus institutis religionibusque Larinatium consecrati; quorum cum satis magnus numerus esset, cumque item, ut in Sicilia permulti Venerii sunt, sic illi Larini in Martis familia numerarentur, repente Oppianicus eos omnis liberos esse civisque Romanos coepit defendere. graviter id decuriones Larinatium cunctique municipes tulerunt; itaque ab Habito petiverunt, ut eam causam susciperet publiceque defenderet. Habitus cum se ab omni eius modi negotio removisset, tamen pro loco, pro antiquitate generis sui, pro eo, quod se non suis commodis, sed etiam suorum municipum ceterorumque necessariorum natum esse arbitrabatur, tantae voluntati universorum Larinatium deesse noluit.  
 44 suscepta causa Romanque delata magnae cotidie contentiones inter Habitem et Oppianicum ex utriusque studio defensionis excitabantur. erat ipse immani acerbique natura Oppianicus; incendebat eius amentiam infesta atque inimica filio mater Habiti; magni autem illi sua interesse arbitrabantur hunc a causa Martialium removeri. suberat etiam alia causa maior, quae Oppianici hominis avarissimi mentem maxime com-  
 45 movebat: nam Habitus usque ad illius iudicii tempus nullum testamentum umquam fecerat: neque legare quicquam eius modi matri poterat animum inducere, neque testamento nomen omnino praetermittere parentis. id cum Oppianicus sciret — neque enim erat obscurum —, intellegebat Habito mortuo bona eius omnia ad matrem esse ventura; quae ab sese postea aucta pecunia maiore praemio, orbata filio minore periculo necaretur: itaque his rebus incensus, qua ratione Habitem veneno tollere  
 16 conatus sit cognoscite: C. et L. Fabricii fratres gemini  
 46 fuerunt ex municipio Aletrinati, homines inter se cum

forma tum moribus similes, municipum autem suorum dissimillimi, in quibus quantus splendor sit, quam prope acquabilis, quam fere omnium constans et moderata ratio vitae, nemo vestrum, ut mea fert opinio, ignorat. his Fabriciis semper est usus Oppianicus familiarissime. iam hoc fere scitis omnes, quantam vim habeat ad coniungendas amicitias studiorum ac naturae similitudo: cum illi ita viverent, ut nullum quaestum esse turpem arbitrantur, cum omnis ab eis fraus, omnes insidiae circumscriptionesque adulescentium nascerentur, cumque essent vitiis atque improbitate omnibus noti, studiose, ut dixi, ad eorum se familiaritatem multis iam ante annis Oppianicus applicarat; itaque tum sic statuit, per C. Fabricium <sup>47</sup> — nam Lucius erat mortuus — insidias Habito comparare. erat illo tempore infirma valetudine Habitus; utebatur autem medico non ignobili et spectato homine, Cleophanto; cuius servum Diogenem Fabricius ad venenum Habito dandum spe et pretio sollicitare coepit. servus non incallidus et, ut res ipsa declaravit, frugi atque integer, sermonem Fabricii non est aspernatus; rem ad dominum detulit; Cleophrantus autem cum Habito est conlocutus; Habitus statim cum M. Baebio senatore, familiarissimo suo, communicavit; qui qua fide, qua prudentia, qua diligentia fuerit, meminisse vos arbitror: ei placuit ut Diogenem Habitus emeret a Cleophanto, quo facilius aut comprehenderetur res eius indicio aut falsa esse cognosceretur. ne multa: Diogenes emitur; venenum diebus paucis comparatur; multi viri boni cum ex occulto intervenissent, pecunia obsignata, quae ob eam rem dabatur, in manibus Scamandri liberti Fabriciorum deprehenditur. pro di immortales! Oppianicum quisquam his <sup>48</sup> rebus cognitis circumventum esse dicet? quis umquam <sup>17</sup> audacior? quis nocentior? quis apertior in iudicium ad ductus est? quod ingenium, quae facultas dicendi, quae a quoquam excogitata defensio huic uni crimini potuit obsistere? simul et illud quis est qui dubitet, quin hac re comperta manifesteque deprehensa aut obeunda mors Cluentio aut suscipienda accusatio fuerit?

Satis esse arbitror demonstratum, iudices, eis criminibus <sup>49</sup> accusatum esse Oppianicum, uti honeste absolvi

nullo modo potuerit: cognoscite nunc ita reum citatum esse illum, ut re semel atque iterum praeiudicata condemnatus in iudicium venerit. nam Cluentius, iudices, primum nomen eius detulit, cuius in manibus venenum deprehenderat; is erat libertus Fabriciorum Scamander. integrum consilium, iudicii corrupti nulla suspitio: simplex in iudicium causa, certa res, unum crimen adlatum est. hic tum C. Fabricius, is, de quo ante dixi, qui liberto damnato sibi illud impendere periculum videret, quod mihi cum Aletrinatibus vicinitatem et cum plerisque eorum magnum usum esse sciebat, frequentis eos ad me domum adduxit; qui quamquam de homine, sicut necesse erat, existimabant, tamen, quod erat ex eodem municipio, suae dignitatis esse arbitrabantur eum quibus rebus possent defendere; idque a me ut facerem et ut causam Scamandri susciperem petebant; in qua causa

50 patroni omne periculum continebatur. ego, qui neque illis talibus viris ac tam amantibus mei rem possem ullam negare neque illud crimen tantum ac tam manifestum esse arbitrarer, sicut ne illi ipsi quidem, qui mihi tum illam causam commendabant, arbitrabantur, pollicitus eis

18 sum me omnia quae vellent esse facturum. res agi coepta est: citatus est Scamander reus. accusabat P. Cannutius, homo in primis ingeniosus et in dicendo exercitatus; accusabat autem ille quidem Scamandrum verbis tribus VENENUM ESSE DEPREHENSUM; omnia tela totius accusationis in Oppianicum coniciebantur, aperiebatur causa insidiarum, Fabriciorum familiaritas commemorabatur, hominis vita et audacia proferebatur, denique omnis accusatio varie graviterque tractata ad extremum manifesta veneni

51 deprehensione conclusa est. hic ego tum ad respondendum surrexi, qua cura, di immortales! qua sollicitudine animi! quo timore! semper equidem magno cum metu incipio dicere; quotienscumque dico, totiens mihi videor in iudicium venire non ingenii solum, sed etiam virtutis atque officii, ne aut id profiteri videar, quod non possim, quod est impudentiae, aut non id efficere, quod possim, quod est aut perfidiae aut neglegentiae: tum vero ita sum perturbatus, ut omnia timerem: si nihil dixissem, ne infantissimus, si multa in eius modi causa dixissem, ne

impudentissimus existimarer. conlegi me aliquando et 19  
ita constitui, fortiter esse agendum, illi aetati, qua tum  
eram, solere laudi dari, etiam si in minus firmis causis  
hominum periculis non defuissem; itaque feci; sic pu-  
gnavi, sic omni ratione contendi, sic ad omnia confugi,  
quantum ego adsequi potui, remedia ac perfugia causa-  
rum, ut hoc, quod timide dicam, consecutus sim, ne quis  
illi causae patronum defuisse arbitraretur: sed ut quid- 52  
que ego apprehenderam, statim accusator extorquebat e  
manibus: si quaesiveram quae inimicitiae Scamandro cum  
Habito *fuisent*, fatebatur nullas fuisse, sed Oppianicum,  
cuius ille minister fuisset, huic inimicissimum fuisse at-  
que esse dicebat; sin autem illud egeram, nullum ad  
Scamandrum morte Habiti venturum emolumentum fuisse,  
concedebat, sed ad uxorem Oppianici, hominis in uxori-  
bus necandis exercitati, omnia bona Habiti ventura fuisse  
dicebat. cum illa defensione usus essem, quae in liber-  
tinorum causis honestissima semper existimata est, Sca-  
mandrum patrono esse probatum, fatebatur, sed quaere-  
bat cui probatus esset ipse patronus. cum ego pluribus 53  
verbis in eo commoratus essem, Scamandro insidias factas  
esse per Diogenem constitutumque inter eos alia de re  
fuisse, ut medicamentum, non venenum Diogenes ad-  
ferret, hoc cuivis usu venire posse, quaerebat cur in  
eius modi locum, tam abditum, cur solus, cur cum ob-  
signata pecunia venisset. denique hoc loco causa testi-  
bus honestissimis hominibus premebatur: M. Baebius  
de suo consilio Diogenem emptum, se praesente Sca-  
mandrum cum veneno pecuniaque deprehensum esse di-  
cebat; P. Quintilius Varus, homo summa religione et  
summa auctoritate praeditus, de insidiis, quae fierent  
Habito, et de sollicitatione Diogenis recenti re secum  
Cleophantum conlocutum esse dicebat. atque in illo iu- 54  
dicio cum Scamandrum nos defendere videremur, verbo  
ille reus erat, re quidem vera et periculo tota accusatione  
Oppianicus; neque id obscure ferebat nec dissimulare  
ullo modo poterat: aderat frequens, advocabat, omni stu-  
dio gratiaque pugnabat; postremo, id quod maximo malo  
illi causae fuit, hoc ipso in loco, quasi reus ipse esset,  
sedebat. oculi omnium iudicum non in Scamandrum, sed



in Oppianicum coniciebantur; timor eius, perturbatio, suspensus incertusque voltus, crebra coloris mutatio, quae erant antea suspitiosa, haec aperta et manifesta faciebant. cum in consilium iri oporteret, quaesivit ab reo  
20 C. Iunius quaesitor ex lege illa Cornelia, quae tum erat,  
55 clam an palam de se sententiam ferri vellet: de Oppianici sententia responsum est, quod is Habiti familiarem Iunium esse dicebat, clam velle ferri. itum est in consilium; omnibus sententiis praeter unam, quam suam Stacienus esse dicebat, Scamander prima actione condemnatus est. quis tum erat omnium qui Scamandro condemnato non iudicium de Oppianico factum esse arbitraretur? quid est illa damnatione iudicatum, nisi venenum [id], quod Habito daretur, esse quaesitum? quae porro tenuissima suspitio conlata in Scamandrum est aut conferri potuit, ut  
56 is sua sponte necare voluisse Habitu putaretur? atque hoc tum iudicio facto et Oppianico re et existimatione iam, lege et pronuntiatione nondum condemnato, tamen Habitus Oppianicum reum statim non fecit: voluit cognoscere utrum iudices in eos solos essent severi, quos venenum habuisse ipsos comperissent, an etiam consilia conscientiasque eius modi facinorum supplicio dignas iudicarent; itaque C. Fabricium, quem propter familiaritatem Oppianici conscius illi facinori fuisse arbitrabatur, reum statim fecit, utique ei locus primus constitueretur propter causae coniunctionem impetravit. hic tum Fabricius non modo ad me meos vicinos et amicos Aletrinatibus non adduxit, sed ipse eis neque defensoribus uti postea  
57 neque laudatoribus potuit: rem enim integram hominis non alieni quamvis suspitosam defendere humanitatis esse putabamus, iudicatam labefactare conari impudentiae. itaque tum ille inopia et necessitate coactus in causa eius modi ad Caepasios fratres confugit, homines industrios atque eo animo, ut quaecumque dicendi potestas esset data, in honore atque in beneficio ponerent.  
21 nam hoc prope iniquissime comparatum est, quod in morbis corporis, ut quisque est difficillimus, ita medicus nobilissimus atque optimus quaeritur, in periculis capitis, ut quaecumque causa difficillima est, ita deterrimus obscurissimusque patronus adhibetur; nisi forte hoc causae est,

quod medici nihil praeter artificium, oratores etiam auctoritatem praestare debent. citatur reus, paucis verbis accusat, ut de re iudicata, Canutius: incipit longo et alte petito prooemio respondere maior Caepasius. primo attente auditur eius oratio; erigebat animum iam demissum et oppressum Oppianicus; gaudebat ipse Fabricius: non intellegebat animos iudicum non illius eloquentia, sed defensionis impudentia commoveri. postea quam de re coepit dicere, ad ea, quae erant in causa, addebat etiam ipse nova quaedam volnera, ut quamquam sedulo faciebat, tamen interdum non defendere, sed praevaricari [accusationi] videretur: itaque cum callidissime se dicere putaret et cum illa verba gravissima ex intimo artificio deprompsisset ‘respicite, iudices, hominum fortunas, respicite dubios variosque casus, respicite C. Fabricii senectutem’, cum hoc ‘respicite’ ornandae orationis causa saepe dixisset, respexit ipse; at C. Fabricius a subselliis demisso capite discesserat. hic iudices ridere, stomachari atque acerbe ferre patronus, causam sibi eripi et se cetera de illo loco ‘respicite, iudices’, non posse dicere; nec quicquam propius est factum, quam ut illum persequeretur et collo obtorto ad subsellia reduceret, ut reliqua posset perorare. ita tum Fabricius primum suo iudicio, quod est gravissimum, deinde legis vi et sententiis iudicum est condemnatus.

Quid est quod iam de Oppianici persona causaque plura dicamus? apud eosdem iudices reus est factus, cum his duobus praeiudiciis iam damnatus esset; ab isdem autem iudicibus, qui Fabriciorum damnatione de Oppianico iudicabant, locus ei primus est constitutus; accusatus est criminibus gravissimis et eis, quae a me breviter dicta sunt, et praeterea multis, quae ego omnia [nunc] omitto; accusatus est apud eos, qui Scamandrum ministrum Oppianici, C. Fabricium conscium maleficii condemnarant. utrum, per deos immortalis! magis est mirandum, quod is condemnatus est, an quod omnino respondere ausus est? quid enim illi iudices facere potuerunt? qui si innocentis Fabricios condemnassent, tamen in Oppianico sibi constare et superioribus consentire iudiciis debuerunt. an vero illi sua [per se] ipsi iudicia

rescinderent, cum ceteri soleant in iudicando ne ab aliorum iudiciis discrepent providere? et ei, qui Fabricii libertum, quia minister in maleficio fuerat, patronum, quia conscius, condemnassent, ipsum principem atque architectum sceleris absolverent? et qui ceteros nullo praeiudicio facto tamen ex ipsa causa condemnassent, hunc, 61 quem bis iam condemnatum acceperant, liberarent? tum vero illa iudicia senatoria non falsa invidia, sed vera atque insigni turpitudine notata atque operta dedecore et infamia defensionis locum nullum reliquissent. quid enim tandem illi iudices responderent, si qui ab eis quaereret: 'condemnastis Scamandrum: quo crimine?' 'nempe, quod Habitu per servum medici veneno necare voluisset.' 'quid Habiti morte Scamander consequeretur?' 'nihil, sed administer erat Oppianici.' 'et condemnastis C. Fabricium: quid ita?' 'quia, cum ipse familiarissime Oppianico usus, libertus autem eius in maleficio deprehensus esset, illum expertem eius consilii fuisse non probabatur.' si igitur ipsum Oppianicum bis suis iudiciis condemnatum absolvissent, quis tantam turpitudinem iudiciorum, quis tantam inconstantiam rerum iudicatarum, quis tantam libidinem iudicum ferre potuisset?

62 Quod si hoc videtis, quod iam hac omni oratione patefactum est, illo iudicio reum condemnari, praesertim ab isdem iudicibus, qui duo praeiudicia fecissent, necesse fuisse, simul illud videatis necesse est, nullam accusatoris esse causam potuisse cur iudicium vellet corrumpere. 23 quaero enim de te, T. Acci, relictis iam ceteris argumentis omnibus, num Fabricios quoque innocentis condemnatos existimes, num etiam illa iudicia pecunia corrupta esse dicas, quibus in iudiciis alter a Staieno solo absolutus est, alter etiam ipse se condemnavit. age, si nocentes, cuius maleficii? num quid praeter venenum quaesitum, quo Habitus necaretur, obiectum est? num quid aliud in illis iudiciis versatum est praeter hasce insidias Habitu ab Oppianico per Fabricium factas? nihil, nihil, inquam, aliud, iudices, reperietis. exstat memoria; sunt tabulae publicae; redargue me, si mentior; testium dicta recita; doce in illorum iudiciis quid praeter hoc venenum Oppianici non modo in criminis, sed in male

dicti loco sit obiectum. multa dici possunt qua re ita <sup>63</sup>  
necesse fuerit iudicari, sed ego occurram expectationi  
vestrae, iudices. nam etsi a vobis sic audior, ut num-  
quam benignius neque attentius quemquam auditum pu-  
tem, tamen vocat me alio iam dudum tacita vestra ex-  
spectatio, quae mihi obloqui videtur: ‘quid ergo? negasne  
illud iudicium corruptum esse?’ ‘non nego, sed ab hoc  
corruptum non esse confirmo.’ ‘a quo igitur est cor-  
ruptum?’ opinor, primum, si incertum fuisset quisnam  
exitus illius iudicii futurus esset, veri similis tamen  
esset, eum potius corrupisse, qui metuisset ne ipse con-  
demnaretur, quam illum, qui veritus esset ne alter ab-  
solveretur; deinde eum esset non dubium quid iudicari  
necesse esset, eum certe potius, qui sibi alia ratione dif-  
fideret, quam eum, qui omni ratione confideret; postremo  
certe potius eum, qui bis apud eos iudices offendisset,  
quam illum, qui bis causam eis probavisset. unum qui- <sup>64</sup>  
dem certe nemo erit tam inimicus Cluentio qui mihi non  
concedat: si constet corruptum illud iudicium esse, aut  
ab Habito aut ab Oppianico esse corruptum: si doceo  
non ab Habito, vinco ab Oppianico; si ostendo ab Op-  
pianico, purgo Habitem. qua re, etsi satis docui ratio-  
nem nullam huic corrumpendi iudicii fuisse, ex quo in-  
tellegitur ab Oppianico esse corruptum, tamen de illo  
ipso separatim cognoscite. atque ego illa non argumen- <sup>24</sup>  
tabor, quae sunt gravia vehementer: eum corrupisse, qui  
in periculo fuerit; eum, qui metuerit; eum, qui spem sa-  
lutis in alia ratione non habuerit; eum, qui semper sin-  
gulari fuerit audacia: multa sunt eius modi; verum eum  
habeam rem non dubiam, sed apertam atque manifestam,  
enumeratio singulorum argumentorum non est necessaria:  
dico C. Aelio Staieno iudici pecuniam grandem Statium <sup>65</sup>  
Albium ad corrumpendum iudicium dedisse. num quis  
negat? te, Oppianice, appello; te, T. Acci; quorum alter  
eloquentia damnationem illam, alter tacita pietate deplorat.  
audete negare ab Oppianico Staieno iudici pecuniam da-  
tam: negate, inquam, meo loco. quid tacetis? an negare  
non potestis, quod repetistis, quod confessi estis, quod  
abstulistis? quo tandem igitur ore mentionem corrupti  
iudicii facitis, eum ab ista parte iudici pecuniam ante iu-



dicium datam, post iudicium ereptam esse fateamini?  
 66 quonam igitur haec modo gesta sunt? repetam paulo al-  
 tius, iudices, et omnia, quae in diuturna obscuritate  
 latuerunt, sic aperiā, ut ea cernere oculis videamini.  
 vos, quaeso, ut adhuc me attente audistis, ut item, quae  
 reliqua sunt, audiatis; profecto nihil a me dicitur, quod  
 non dignum hoc conventu et silentio, dignum vestris  
 studiis atque auribus esse videatur.

Nam ut primum Oppianicus ex eo, quod Scamander  
 reus erat factus, quid sibi impenderet coepit suspicari,  
 statim se ad hominis egentis, audacis, in iudiciis corrup-  
 pendis exercitati, tum autem iudicis, Staieni familiarita-  
 tem se applicavit; ac primum Scamandro reo tantum  
 datis muneribus perfecerat, ut eo fautore uteretur cupi-  
 67 diore, quam fides iudicis postulabat; post autem cum  
 esset Scamander unius Staieni [sententia absolutus], pa-  
 tronus autem Scamandri ne sua quidem sententia libera-  
 tus, acrioribus saluti suae remediis subveniendum puta-  
 vit. tum ab Staieno, sicut ab homine ad excogitandum  
 acutissimo, ad audendum impudentissimo, ad efficiendum  
 acerrimo — haec enim ille et aliqua ex parte habebat et  
 maiore ex parte se habere simulabat — auxilium capiti  
 25 ac fortunis suis petere coepit. iam hoc non ignoratis, iu-  
 dices, ut etiam bestiae fame monitae plerumque ad eum  
 68 locum, ubi pastae sunt aliquando, revertantur. Staienus  
 ille biennio ante, cum causam bonorum Safinii Atellae  
 recepisset, sescentis milibus nummum se iudicium cor-  
 rupturum esse dixerat: quae cum accepisset a pupillo,  
 suppressit, iudicioque facto nec Safinio nec bonorum  
 emptoribus reddidit: quam cum pecuniam profudisset et  
 sibi nihil non modo ad cupiditates suas, sed ne ad ne-  
 cessitatem quidem reliquisset, statuit ad easdem esse sibi  
 praedas ac suppressiones iudicialis revertendum; itaque  
 cum Oppianicum iam perditum et duobus iugulatum prae-  
 iudiciis videret, promissis suis eum excitavit abiectum et  
 simul saluti desperare vetuit; Oppianicus autem orare  
 hominem coepit, ut sibi rationem ostenderet iudicii cor-  
 69 rumpendi. ille autem, quem ad modum ex ipso Oppianico  
 postea est auditum, negavit quemquam esse in civitate  
 praeter se, qui id efficere posset; sed primo gravari coepit,

quod aedilitatem se petere cum hominibus nobilissimis et invidiam atque offensionem timere dicebat; post exoratus initio permagnam pecuniam poposcit; deinde ad id pervenit, quod confici potuit: HS sescenta quadraginta milia deferri ad se domum iussit. quae pecunia simul atque ad eum delata est, homo impurissimus statim coepit in eius modi mente et cogitatione versari, nihil esse suis rationibus utilius quam Oppianicum condemnari: illo absoluto pecuniam illam aut iudicibus dispartendam aut ipsi esse reddendam; damnato repetiturum esse neminem. itaque rem excogitat singularem — atque haec, iudices, 70 quae vera dicuntur a nobis, facilius credetis, si cum animis vestris longo intervallo recordari C. Staieni vitam et naturam volueritis; nam perinde ut opinio est de cuiusque moribus, ita quid ab eo factum aut non factum sit, existimari potest —: cum esset egens, sumptuosus, audax, 26 callidus, perfidiosus, et cum domi suae miserrimus in loculis ante inanissimis tantum nummorum positum videret, ad omnem malitiam et fraudem versare suam mentem coepit: ‘ego dem iudicibus? mihi ipsi igitur praeter periculum et infamiam quid quaeretur? nihil excogitem quam ob rem Oppianicum damnari necesse sit? quid tandem,— nihil enim est quod non fieri possit — si quis cum forte casus ex periculo eripuerit, nonne reddendum est? praecipitantem igitur impellamus’ inquit ‘et perditum proster- 71 namus.’ capit hoc consilii, ut pecuniam quibusdam iudicibus levissimis polliceatur, deinde eam postea supprimat, ut, quoniam gravis homines sua sponte severe iudicatu- putabat, eos, qui leviores erant, destitutione iratos Oppianico redderet: itaque, ut erat semper praeposterus atque perversus, initium facit a Bulbo, et eum, quod iam diu nihil quaesierat, tristem atque oscitantem leviter impellit. ‘quid tu?’ inquit ‘ecquid me adiuvas, Bulbe, ne gratis rei publicae serviamus?’ ille vero, simul atque hoc audit ‘ne gratis,’ ‘quo voles,’ inquit ‘sequar: sed quid adfers?’ tum ei quadraginta milia, si esset absolutus Oppianicus, pollicetur, et eum, ut ceteros appellet, quibuscum loqui consuesset, rogat, atque etiam ipse conditor totius negotii Guttam aspergit huic Bulbo: itaque 72 minime amarus eis visus est, qui aliquid ex eius sermone

speculae degustarant. unus et alter dies intercesserat, cum res parum certa videbatur: sequester et confirmator pecuniae desiderabatur. tum appellat hilario vultu hominem Bulbus, ut blandissime potest, 'quid tu,' inquit 'Paete?' — hoc enim sibi Staienus cognomen ex imaginibus Aeliorum delegerat, ne, si se Ligurem fecisset, nationis magis quam generis uti cognomine videretur — 'qua de re mecum locutus es, quaerunt a me ubi sit pecunia.' hic ille planus improbissimus, quaestu iudiciario pastus, qui illi pecuniae, quam condiderat, spe iam atque animo incubaret, contrahit frontem: — recordamini faciem atque illos eius fictos simulatosque voltus — queritur se ab Oppianico destitutum, et, qui esset totus ex fraude et mendacio factus quique ea vitia, quae a natura habebat, etiam studio atque artificio quodam malitiae dividisset, pulchre adseverat [sese ab Oppianico destitutum], atque hoc addit testimonii, sua illum sententia, cum  
<sup>27</sup> palam omnes laturos essent, condemnatum iri. manarat  
<sup>73</sup> sermo in consilio pecuniae quandam mentionem inter iudices esse versatam: res neque tam fuerat occulta quam erat occultanda neque tam erat aperta quam rei publicae causa aperienda. in ea obscuritate ac dubitatione omnium Cannutio, perito homini, qui quodam odore suspicionis Staienum corruptum esse sensisset neque dum rem perfectam arbitraretur, placuit repente pronuntiari DIXERUNT. hic tum Oppianicus non magno opere pertimuit: rem a  
<sup>74</sup> Staieno perfectam esse arbitrabatur. in consilium erant ituri iudices xxxii; sententiis xvi absolutio confici poterat: quadragena milia nummum in singulos iudices distributa cum numerum sententiarum conficere debebant, ut ad cumulum spe maiorum praemiorum ipsius Staieni sententia septima decima accederet. atque etiam casu tum, quod illud repente erat factum, Staienus ipse non aderat: causam nescio quam apud iudicem defendebat. facile hoc Habitus patiebatur, facile Cannutius; at non Oppianicus neque patronus eius L. Quinctius: qui cum esset illo tempore tribunus plebis, convitium C. Iunio iudici quaestionis maximum fecit, ut ne sine illo in consilium iretur; cumque id ei per viatores consulto negligentius agi videretur, ipse e publico iudicio ad privatum Staieni

iudicium profectus est et illud pro potestate dimitti iussit; Staienum ipse ad subsellia adduxit. consurgitur in consilium, cum sententias Oppianicus, quae tum erat potestas, palam ferri velle dixisset, ut Staienus scire posset quid cuique deberetur. varia iudicum genera: nummarii pauci, sed omnes irati: ut qui accipere in campo consuerunt, eis candidatis, quorum nummos suppressos esse putant, inimicissimi solent esse, sic eius modi iudices infesti tum reo venerant; ceteri nocentissimum esse arbitrabantur, sed exspectabant sententias eorum, quos corruptos esse putabant, ut ex eis constituerent a quo iudicium corruptum videretur: ecce tibi eius modi sortitio, ut in primis Bulbo et Staieno et Guttiae esset iudicandum: summa omnium exspectatio quidnam sententiae ferrent leves ac nummarii iudices: atque illi omnes sine ulla dubitatione condemnant. hic tum iniectus est hominibus scrupulus et quaedam dubitatio quidnam esset actum: deinde homines sapientes et ex vetere illa disciplina iudiciorum, qui neque absolvere hominem nocentissimum possent neque eum, de quo esset orta suspitio pecunia oppugnatum, re illa incognita primo condemnare vellent, non liquere dixerunt; non nulli autem severi homines, qui hoc statuerunt, quo quisque animo quid faceret, spectari oportere, etsi alii pecunia accepta verum iudicabant, tamen nihilo minus se superioribus suis iudiciis constare putabant oportere; itaque damnarunt; quinque omnino fuerunt, qui illum vestrum innocentem Oppianicum sive imprudentia sive misericordia sive aliqua suspitione sive ambitione adducti absolverunt.

Condemnato Oppianico statim L. Quinctius, homo maxime popularis, qui omnis rumorum et contionum ventos conligere consuesset, oblatam sibi facultatem putavit, ut ex invidia senatoria posset crescere, quod eius ordinis iudicia minus iam probari populo arbitrabatur. habetur una atque altera contio vehemens et gravis: accepisse pecuniam iudices, ut innocentem reum condemnarent, tribunus plebis clamabat; agi fortunas omnium dicebat; nulla iudicia esse; qui pecuniosum inimicum haberet, incolumem esse neminem posse. homines totius ignari negotii, qui Oppianicum numquam vidissent, virum optimum



et hominem pudentissimum pecunia oppressum esse arbitrantur, incensi suspitione rem in medium vocare  
 78 coeperunt et causam illam totam deposcere. atque illo ipso tempore in aedis T. Annii, hominis honestissimi, necessarii et amici mei, noctu Staienus, arcessitus ab Oppianico venit: iam cetera nota sunt omnibus: ut cum illo Oppianicus egerit de pecunia, ut ille se redditurum esse dixerit, ut cum sermonem audierint omnem viri  
 boni, qui tum consulto propter in occulto stetissent, ut res patefacta et in forum prolata et pecunia omnis Staieno  
 29 extorta atque erepta sit. huius Staieni persona populo iam nota atque perspecta ab nulla turpi suspitione abhorrebat: suppressam esse ab eo pecuniam, quam pro reo pronuntiasset, qui erant in contione, non intellegebant; neque enim docebantur; versatam esse in iudicio mentionem pecuniae sentiebant; innocentem reum condemnatum audiebant; Staieni sententia condemnatum videbant; non gratis id ab eo factum esse, quod hominem norant, iudicabant. similis in Bulbo, in Gutta, in aliis  
 79 non nullis suspitio consistebat. itaque confiteor — licet enim iam impune, hoc praesertim in loco, confiteri — quod Oppianici non modo vita, sed etiam nomen ante illud tempus populo ignotum fuisset, indignissimum porro videretur circumventum esse innocentem pecunia, hanc deinde suspitionem auget Staieni improbitas et non nullorum eius similitum iudicum turpitudine, causam autem ageret L. Quinctius, homo cum summa potestate, tum ad inflammandos animos multitudinis adcommo-  
 tus, summam illi iudicio invidiam infamiamque esse conflata, atque in hanc flammam recentem tum C. Iunium [qui illi quaestioni praefuerat] esse iniectum memini et illum hominem aedilicium iam praetorem opinionibus hominum constitutum, non disceptatione dicendi, sed clamore de foro atque adeo de civitate esse sublatum.  
 80 neque me paenitet hoc tempore potius quam illo causam A. Cluentii defendere: causa enim manet eadem, quae mutari nullo modo potest, temporis iniquitas atque invidia recessit, ut, quod in tempore mali fuit, nihil obsit, quod in causa boni fuit, prosit. itaque nunc quem ad modum audiar sentio, non modo ab eis, quorum iudicium

ac potestas est, sed etiam ab illis, quorum tantum est existimatio; at tum si dicerem, non audirer, non quod alia res esset, immo eadem, sed tempus aliud. id adeo sic cognoscite: quis tum auderet dicere nocentem condemnatum esse Oppianicum? quis nunc audet negare? quis tum posset arguere ab Oppianico temptatum esse iudicium pecunia? quis id hoc tempore infitiri potest? cui tum liceret docere Oppianicum reum factum esse tum denique, cum duobus proximis praeiudiciis condemnatus esset? quis est qui id hoc tempore infirmare conetur? qua re invidia remota, quam dies mitigavit, oratio mea deprecata est, vestra fides atque aequitas a veritatis disceptatione reiecit, quid est praeterea quod in causa relinquatur? versatam esse in iudicio pecuniam constat: ea quaeritur unde profecta sit, ab accusatore an ab reo. dicit accusator haec: 'primum gravissimis criminibus accusabam, ut nihil opus esset pecunia; deinde condemnatum adducebam, ut ne eripi quidem pecunia posset; postremo, etiam si absolutus fuisset, mearum tamen omnium fortunarum status incolumis maneret.' quid contra reus? 'primum ipsam multitudinem criminum et atrocitatem pertimescebam; deinde Fabriciis propter conscientiam mei sceleris condemnatis me esse condemnatum sentiebam; postremo in eum casum veneram, ut omnis mearum fortunarum status unius iudicii periculo contineretur.'

Age, quoniam corrumpendi iudicii causas ille multas et gravis habuit, hic nullam, profectio ipsius pecuniae requiratur: confecit tabulas diligentissime Cluentius; haec autem res habet hoc certe, ut nihil possit neque additum neque detractum de re familiari latere. anni sunt octo, cum ista causa in ista meditatione versatur, cum omnia, quae ad eam rem pertinent, et ex huius et ex aliorum tabulis agitat, tractatis, inquiritis, cum interea Cluentianae pecuniae vestigium nullum invenitis. quid, Albiana pecunia vestigiisne nobis odoranda est an ad ipsum cubile vobis ducibus venire possumus? tenentur uno in loco HS IOCXL; tenentur apud hominem audacissimum; tenentur apud iudicem: quid voltis amplius? 'at enim Staienus non fuit ab Oppianico, sed a Cluentio ad iudicium corrumpendum constitutus.' cur cum, cum in consilium

iretur, Cluentius et Cannutius abesse patiebantur? cur cum in consilium mittebant, Staienum iudicem qui pecuniam dederant non requirebant; Oppianicus querebatur; Quintus flagitabat; sine Staieno ne in consilium iretur, tribunicia potestate effectum est? 'at condemnavit.' hanc enim condemnationem dederat obsidem Bulbo et ceteris, ut destitutus ab Oppianico videretur. qua re si istinc causa corrumpendi iudicii, si istinc pecunia, istinc Staienus, istinc denique omnis fraus et audacia est, hinc pudor, honesta vita, nulla suspitio pecuniae, nulla corrumpendi iudicii causa, patiamini veritate patefacta atque omni errore sublato eo transire illius turpitudinis infamiam, ubi cetera maleficia consistunt; ab eo invidiam discedere aliquando, ad quem numquam accessisse culpam videtis. 'at enim pecuniam Staieno dedit Oppianicus non ad corrumpendum iudicium, sed ad conciliationem gratiae.' tene hoc, Acci, dicere, tali prudentia, etiam usu atque exercitatione praeditum? sapientissimum esse dicunt cum, cui quod opus sit ipsi veniat in mentem; proxime accedere illum, qui alterius bene inventis obtemperet: in stultitia contra est: minus enim stultus est is, cui nihil in mentem venit, quam ille, qui, quod stulte alteri venit in mentem, comprobatur. istam conciliationem gratiae Staienus tum recenti re, cum faucibus premeretur, excogitavit, sive, ut homines tum loquebantur, a P. Cethego admonitus est. nam fuisse hunc tum hominum sermonem recordari potestis: Cethegum, quod hominem odisset et quod eius improbitatem versari in re publica nollet et quod videret eum, qui se ab reo pecuniam, cum iudex esset, clam atque extra ordinem accepisse confessus esset, salvum esse non posse, minus ei fidele consilium dedisse. in hoc si improbus Cethegus fuit, videtur mihi adversarium remove voluisse; sin erat eius modi causa, ut Staienus nummos se accepisse negare non posset, nihil autem erat periculosius nec turpius quam ad quam rem accepisset confiteri, non est consilium Cethegi reprehendendum. verum alia causa tum Staieni fuit, alia nunc, Acci, tua est: ille cum re premeretur, quodcumque diceret, honestius diceret, quam si, quod erat factum, fateretur; te vero illud idem, quod

tum explosum et eiectum est, nunc rettulisse demiror. qui enim poterat tum in gratiam redire cum Oppianico Cluentius? qui cum matre? haerebat in tabulis publicis reus et accusator; condemnati erant Fabricii; nec elabi alio accusatore poterat Albius nec sine ignominia calumniae relinquere accusationem Cluentius. an ut prae-<sup>32</sup>  
varicaretur? nam id quoque ad corrumpendum iudicium<sup>87</sup> pertinet. sed quid opus erat ad eam rem iudice sequestre? et omnino quam ob rem tota ista res per Staienum potius, hominem ab utroque alienissimum, sordidissimum, turpissimum, quam per bonum aliquem virum ageretur et amicum necessariumque communem? sed quid ego haec pluribus quasi de re obscura disputo, cum ipsa pecunia, quae Staieno data est, numero ac summa sua non modo quanta fuerit, sed etiam ad quam rem fuerit ostendat? sedecim dico iudices, ut Oppianicus absolveretur, corrumpendos fuisse; ad Staienum sescenta quadraginta milia nummum esse delata: si, ut tu dicis, gratiae conciliandae causa, quadraginta istorum accessio milium quid valet? si, ut nos dicimus, ut quadragena milia sedecim iudicibus darentur, non Archimedes melius potuit describere.

‘At enim iudicia facta permulta sunt, a Cluentio iu-<sup>88</sup>  
dicium esse corruptum.’ immo vero ante hoc tempus omnino ista ipsa res suo nomine in iudicium numquam est vocata; ita multum agitata, ita diu iactata [ista res] est, ut hodierno die primum causa illa defensa sit, hodierno die primum veritas vocem contra invidiam his iudicibus freta miserit. verum tamen ista multa iudicia quae sunt? ego enim me ad omnia confirmavi et sic paravi, ut docerem, quae facta postea iudicia de illo iudicio dicerentur, partim ruinae similiora aut tempestatum quam iudicio et disceptationi fuisse, partim nihil contra Habitum valere, partim etiam pro hoc esse, partim esse eius modi, ut neque appellata umquam iudicia sint neque existimata. hic ego magis ut consuetudinem servem, quam<sup>89</sup> quod vos non vestra hoc sponte faciatis, petam a vobis, ut me, dum de his singulis disputo iudiciis, attente audiat. condemnatus est C. Iunius, qui ei quaestioni<sup>33</sup> praefuerat; adde etiam illud, si placet: tum est con-



demnatus, cum esset iudex quaestionis: non modo cau-  
 sae, sed ne legi quidem quicquam per tribunum plebis  
 laxamenti datum est: quo tempore illum a quaestione ad  
 nullum aliud rei publicae munus abduci licebat, eo tem-  
 pore ad quaestionem ipse abreptus est. at *ad* quam  
 quaestionem? voltus enim vestri, iudices, me invitant,  
 ut, quae reticenda putaram, libeat iam libere dicere.  
 90 quid? illa tandem quaestio aut disceptatio aut iudicium  
 fuit? putabo fuisse: dicat qui volt hodie de illo populo  
 concitato, cui tum populo mos gestus est, qua de re Iu-  
 nius causam dixerit; quemcumque rogaveris, hoc respon-  
 debit: quod pecuniam acceperit, quod innocentem cir-  
 cumvenerit. est haec opinio: at, si ita esset, hac lege  
 accusatum oportuit, qua accusatur Habitus. 'at ipse ea  
 lege quaerebat.' paucos dies exspectasset Quinctius. 'at  
 neque privatus accusare nec sedata invidia volebat.' vide-  
 tis igitur non in causa, sed in tempore ac potestate spem  
 91 omnem accusatoris fuisse. multam petivit. qua lege?  
 quod in legem non iurasset, quae res nemini umquam  
 fraudi fuit et quod C. Verres, praetor urbanus, homo  
 sanctus et diligens, subsortitionem eius in eo codice non  
 haberet, qui tum interlitus proferebatur. his de causis  
 C. Iunius condemnatus est, iudices, levissimis et infir-  
 missimis, quas omnino in iudicium adferri non oportuit;  
 34  
 92 itaque oppressus est, non causa, sed tempore. hoc vos  
 Cluentio iudicium putatis obesse oportere? quam ob cau-  
 sam? si ex lege subsortitus non erat Iunius aut si in ali-  
 quam legem aliquando non iuraverat, idcirco illius damna-  
 tione aliquid de Cluentio iudicabatur? 'non,' inquit 'sed  
 ille idcirco illis legibus condemnatus est, quod contra  
 aliam legem commiserat.' qui hoc confitentur, possunt  
 eidem illud iudicium fuisse defendere? 'ergo' inquit 'id-  
 circo infestus tum populus Romanus fuit C. Iunio, quod  
 illud iudicium corruptum per eum putabatur.' num igitur  
 hoc tempore causa mutata est? num alia res, alia ratio  
 illius iudicii, alia natura totius negotii nunc est ac tum  
 fuit? non opinor ex eis rebus, quae gestae sunt, rem  
 93 ullam potuisse mutari. quid ergo est causae quod nunc  
 nostra defensio audiatur tanto silentio, tum Iunio defen-  
 dendi sui potestas erepta sit? quia tum in causa nihil

erat praeter invidiam, errorem, suspicionem, contiones cotidianas seditione ac populariter concitatas: accusabat tribunus plebis idem in contionibus, idem ad subsellia; ad iudicium non modo de contione, sed etiam cum ipsa contione veniebat; gradus illi Aurelii tum novi quasi pro theatro illi iudicio aedificati videbantur: quos ubi accusator concitatis hominibus complerat, non modo dicendi ab reo, sed ne surgendi quidem potestas erat. nuper<sup>94</sup> apud C. Orchivium, conlegam meum, locus ab iudicibus Fausto Sullae de pecuniis residuis non est constitutus, non quo illi aut exlegem esse Sullam aut causam pecuniae publicae contemptam atque abiectam putarent, sed quod accusante tribuno plebis condicione aequa disceptari posse non putarunt. quid? conferam Sullamne cum Iunio? an hunc tribunum plebis cum Quintio? an vero tempus cum tempore? Sulla maximis opibus, cognatis, adfinibus, necessariis, clientibus plurimis; haec autem apud Iunium parva et infirma et ipsius labore quaesita atque conlecta; hic tribunus plebis modestus, prudens, non modo non seditiosus, sed etiam seditiosis adversarius: ille autem acerbus, crimosus, popularis homo ac turbulentus; tempus hoc tranquillum atque pacatum: illud omnibus invidiae tempestatibus concitatum. quae cum ita essent, in Fausto tamen illi iudices statuerunt, iniqua condicione reum causam dicere, cum adversario eius ad ius accusationis summa vis potestatis accederet. quam quidem rationem vos, iudices, diligenter pro vestra sapientia cogitare et penitus perspicere debetis, quid mali, quantum periculi uni cuique nostrum inferre possit vis tribunicia, conflata praesertim invidia et contionibus seditiose concitatis. optimis hercule temporibus, tum, cum homines se non iactatione populari, sed dignitate atque innocentia tuebantur, tamen nec P. Popilius neque Q. Metellus, clarissimi viri atque amplissimi, vim tribuniciam sustinere potuerunt; nedum his temporibus, his moribus, his magistratibus sine vestra sapientia ac sine iudiciorum remediis salvi esse possimus. non fuit illud igitur iudicium<sup>96</sup> iudicii simile, iudices, non fuit, in quo non modus ullus est adhibitus, non mos consuetudoque servata, non causa defensa: vis illa fuit et, ut saepe iam dixi, ruina quae-

dam atque tempestas et quidvis potius quam iudicium aut disceptatio aut quaestio. quod si quis est qui illud iudicium fuisse arbitretur et qui his rebus iudicatis standum putet, is tamen hanc causam ab illa debet sciungere: ab illo enim, sive quod in legem non iurasset sive quod e lege subsortitus [iudicem] non esset, multa petita esse dicitur; Cluentii autem ratio cum illis legibus, quibus a Iunio multa petita est, nulla potest ex parte esse coniuncta.' 'at enim etiam Bulbus est condemnatus.' adde maiestatis, ut intellegas hoc iudicium cum illo non esse coniunctum. 'at est hoc illi crimen obiectum.' fateor, sed etiam legionem esse ab eo sollicitatam in Illyrico C. Cosconii litteris et multorum testimoniis planum factum est, quod crimen erat proprium illius quaestionis et quae res lege maiestatis tenebatur. 'at hoc obfuit ei maxime.' iam ista divinatio est, qua si uti licet, vide ne mea coniectura multo sit verior: ego enim sic arbitror, Bulbum, quod homo nequam, turpis, improbus, multis flagitiis contaminatus in iudicium sit adductus, idcirco facilius esse damnatum; tu mihi ex tota causa Bulbi, quod tibi commodum est, eligis, ut id esse secutos iudices dicas. 36  
98 quapropter hoc Bulbi iudicium non plus huic obesse causae debet quam illa, quae commemorata sunt ab accusatore, duo iudicia, P. Popilii et Ti. Guttae, qui causam de ambitu dixerunt, qui accusati sunt ab eis, qui erant ipsi ambitus condemnati: quos ego non idcirco esse arbitror in integrum restitutos, quod planum fecerint illos ob rem iudicandam pecuniam accepisse, sed quod iudicibus probaverint, cum in eodem genere, in quo ipsi offendissent, alios reprehendissent, se ad praemia legis venire oportere; quapropter neminem dubitare existimo quin illa damnatio ambitus nulla ex parte cum causa Cluentii 99 vestroque iudicio coniuncta esse possit. quid, quod Staienus est condemnatus? non dico hoc tempore, iudices, id quod nescio an dici oporteat, illum maiestatis esse condemnatum; non recito testimonia hominum honestissimorum, quae in Staienum sunt dicta ab eis, qui M. Aemilio, clarissimo viro, legati et praefecti et tribuni militares fuerunt; quorum testimoniis planum factum est maxime eius opera, cum quaestor esset, in exercitu sedi-

tionem esse conflatam; ne illa quidem testimonia recito, quae dicta sunt, de HS  $\overline{100}$ , quae ille cum accepisset nomine iudicii Safniani, sicut in Oppianici iudicio postea, reticuit atque suppressit; omitto et haec et alia permulta, <sup>100</sup> quae illo iudicio in Staienum dicta sunt; hoc dico, eandem tum fuisse P. et L. Cominiis, equitibus Romanis, honestis hominibus et disertis, controversiam cum Staieno, quem accusabant, quae nunc mihi est cum Accio; Cominii dicebant idem, quod ego dico: Staienum ab Oppianico pecuniam accepisse, ut iudicium corrumpere; Staienus conciliandae gratiae causa accepisse *se* dicebat. inridebatur haec illius reconciliatio et persona viri boni <sup>101</sup> suscepta, sicut in statu is inauratis, quas posuit ad Iuturnae; quibus subscripsit reges a se in gratiam esse reductos; exagitabantur eius omnes fraudes atque fallaciae, tota vita in eius modi ratione versata aperiebatur, egestas domestica, quaestus forensis in medium proferebatur, nummarius interpret pacis et concordiae non probabatur: itaque tum Staienus, cum idem defenderet quod Accius, condemnatus est; Cominii cum hoc agerent, quod nos in <sup>102</sup> tota causa egimus, probaverunt. quam ob rem si Staieni damnatione Oppianicum iudicium corrumpere voluisse, Oppianicum iudici ad emendas sententias dedisse pecuniam iudicatum est, cum ita constitutum sit, ut in illa culpa aut Cluentius sit aut Oppianicus, Cluentii nummus nullus iudici datus ullo vestigio reperietur, Oppianici pecunia post iudicium factum ab iudice ablata est, potest esse dubium, quin illa damnatio Staieni non modo non sit contra Cluentium, sed maxime nostram causam defensionemque confirmet?

Ergo adhuc Iunii iudicium video esse eius modi, ut <sup>37</sup> incursionem potius seditionis, vim multitudinis, impetum <sup>103</sup> tribunicium, quam iudicium appellandum putem: quod si quis illud iudicium appellet, tamen hoc confiteatur necesse est, nullo modo illam multam, quae ab Iunio petita est, cum Cluentii causa posse coniungi. illud igitur Iunianum per vim factum est, Bulbi et Popilli et Guttiae contra Cluentium non est; Staieni etiam pro Cluentio est.

Videamus ecquod aliud iudicium, quod pro Cluentio sit, proferre possimus: dixitne tandem causam C. Fidi-



culanius Falcula, qui Oppianicum condemnarat, cum praesertim, id quod fuit in illo iudicio invidiosissimum, paucos dies ex subsortitione sedisset? dixit et bis quidem dixit; in summam enim L. Quinctius invidiam contionibus eum cotidianis seditiosis et turbulentis adduxerat: uno iudicio multa est ab eo petita, sicut ab Iunio, quod non suae decuriae munere neque ex lege sedisset; paulo sedatiore tempore est accusatus, quam Iunius, sed eadem fere lege et crimine: quia nulla in iudicio seditio neque vis nec turba versata est, prima actione facillime est absolutus. non numero hanc absolutionem: nihilo minus enim potest, ut illam multam non commiserit, accepisse tamen ob rem iudicandam \* \* capta nusquam Staienus eadem lege dixit; proprium crimen illud quaestionis eius non  
104 fuit. Fidiculanus quid fecisse dicebatur? accepisse a Cluentio HS cccc. cuius erat ordinis? senatorii. qua lege in eo genere a senatore ratio repeti solet, de pecuniis repetundis, ea lege accusatus honestissime est absolutus; acta est enim causa more maiorum, sine vi, sine metu, sine periculo; dicta et exposita et demonstrata sunt omnia; adducti iudices sunt non modo potuisse honeste ab eo reum condemnari, qui non perpetuo sedisset, sed, aliud si is iudex nihil scisset, nisi quae praeciudicia de eo facta esse constarent, audire praeterea nihil debuisse.  
38 tum etiam illi quinque, qui, imperitorum hominum rum-  
105 musculos aucupati tum illum absolverunt, iam suam clementiam laudari magno opere nolebant, a quibus si qui quaereret sedissentne iudices in C. Fabricium, sedisse se dicerent; si interrogarentur num quo crimine is esset accusatus praeterquam veneni eius, quod quaesitum Habito diceretur, negarent; si deinde essent rogati quid iudicassent, condemnasse se dicerent; nemo enim absolvit. eodem modo quaesitum si esset de Scamandro, certe idem respondissent; tametsi ille una sententia est absolutus, sed illam unam nemo tum istorum suam dici vellet.  
106 uter igitur facilius suae sententiae rationem redderet: isne, qui se et sibi et rei iudicatae constitisse dicit, an ille, qui se in principem maleficii lenem, in adiutores eius et conscios vehementissimum esse respondet? quorum ego de sententia non debeo disputare; neque enim

dubito quin ei tales viri suspitione aliqua perculsi repentina de statu suo declinarint. qua re eorum, qui absolverunt, misericordiam non reprehendo, eorum, qui in iudicando superiora iudicia secuti sunt sua sponte, non Staieni fraude, constantiam comprobo, eorum vero, qui sibi non liquere dixerunt, sapientiam laudo, qui absolute eum, quem nocentissimum cognorant, et quem ipsi bis antea condemnarant, nullo modo poterant, condemnare, cum tanta consilii infamia et tam atrocis rei suspitio esset iniecta, paulo posterius patefacta re maluerunt. ac ne ex facto solum sapientis illos iudicetis, sed etiam ex hominibus ipsis, quod hi fecerunt, rectissime ac sapientissime factum probetis, quis P. Octavio Balbo ingenio prudentior, iure peritior, fide, religione, officio diligentior aut sanctior commemorari potest? non absolvit. quis Q. Considio constantior? quis iudiciorum atque eius dignitatis, quae in iudiciis publicis versari debet, peritior? quis virtute, consilio, auctoritate praestantior? ne is quidem absolvit. longum est de singulorum virtute ita dicere, quae, quia cognita sunt ab omnibus, verborum ornamenta non quaerunt. qualis vir M. Iuventius Peditus fuit ex vetere illa iudicum disciplina? qualis L. Caecilius Mergus? M. Basilus? C. Caudinus? qui omnes in iudiciis publicis iam tum, florente re publica, floruerunt. ex eodem numero L. Cassius, Cn. Heius, pari et integritate et prudentia; quorum nullius sententia est Oppianicus absolutus. atque in his omnibus natus minimus, ingenio et diligentia et religione par eis, quos antea commemoravi, P. Sestius, in eadem sententia fuit. o innocentiam Oppianici singularem! quo in reo, qui absolvit ambitiosus, qui distulit cautus, qui condemnavit constans existimatur. haec tum agente Quintio neque in contione neque in iudicio demonstrata sunt; neque enim ipse dici patiebatur nec per multitudinem concitatam consistere cuiquam in dicendo licebat: itaque ipse postquam Iunium pervertit, totam causam reliquit; paucis enim diebus illis et ipse privatus est factus et hominum studia defervisse intellegebat. quod si per quos dies Iunium accusavit, Fidiculanum accusare voluisset, respondendi Fidiculano potestas facta non esset. ac primo quidem omnibus illis

109 iudicibus, qui Oppianicum condemnarant, minabatur. iam insolentiam noratis hominis; noratis animos eius ac spiritus tribunicios. quod erat odium, di immortales! quae superbia! quanta ignorantia sui! quam gravis atque intolerabilis adrogantia! qui illud iam ipsum acerbè tulerit, ex quo illa nata sunt omnia non sibi ac defensioni suae condonatum esse Oppianicum, proinde quasi non satis signi esse debuerit ab omnibus eum fuisse desertum, qui se ad patronum illum contulisset. erat enim Romae summa copia patronorum, hominum eloquentissimorum atque amplissimorum, quorum certe aliquis defendisset equitem Romanum, in municipio suo nobilem, si honeste putasset

40  
110 eius modi causam posse defendi. nam Quinctius quidem quam causam umquam antea dixerat, cum annos ad quinquaginta natus esset? quis eum umquam non modo in patroni, sed in laudatoris aut advocati loco viderat? qui quod rostra iam diu vacua locumque illum post adventum L. Sullae a tribunicia voce desertum oppresserat, multitudinemque desuefactam iam a contionibus ad veteris consuetudinis similitudinem revocarat, idcirco cuidam hominum generi paulisper iucundior fuit; at idem quanto in odio postea suis ipsis fuit, per quos in altiore locum

111 ascenderat! neque iniuria: facite enim ut non solum mores et adrogantiam eius, sed etiam voltum atque amictum atque etiam illam usque ad talos demissam purpuram recordemini: is, quasi non esset ullo modo ferendum se ex iudicio discessisse victum, rem a subselliis ad rostra detulit. etiam querimur saepe hominibus novis non satis magnos in hac civitate esse fructus? nego usquam umquam fuisse maiores, ubi si quis ignobili loco natus ita vivit, ut nobilitatis dignitatem virtute tueri posse videatur, usque eo pervenit, quoad eum industria cum inno-

112 centia prosecuta est; si quis autem hoc uno nititur, quod sit ignobilis, procedit saepe longius, quam si idem ille esset cum isdem suis vitiis nobilissimus. ut Quinctius — nihil enim dicam de ceteris — si fuisset homo nobilis, quis eum cum illa superbia atque intolerantia ferre potuisset? quod eo loco fuit, ita tulerunt, ut, si quid haberet a natura boni, prodesse ei putarent oportere; superbiam autem atque adrogantiam eius deridendam magis arbitrarentur

propter humilitatem hominis quam pertimescendam. sed, 41  
ut illuc revertar, quo tempore Fidiculanus absolutus est,  
tu, qui iudicia facta commemoras, quaero, quid tum esse  
existimas iudicatum? certe gratis iudicasse. at con- 113  
demnarat; at causam totam non audierat; at in contioni-  
bus a L. Quinctio vehementer erat et saepe vexatus. illa  
igitur omnia Quinctiana iniqua, falsa, turbulenta, popula-  
ria, seditiosa iudicia fuerunt. esto: potuit esse innocens  
Falcula. iam ergo aliqui Oppianicum gratis condemnavit;  
iam non eos Iunius subsortitus est, qui pecunia accepta  
condemnarent; iam putabitur aliqui ab initio non sedisse  
et tamen Oppianicum gratis condemnasse. verum, si in-  
nocens Falcula, quaero qui sit nocens? si hic gratis con-  
demnavit, quis accepit? nego rem esse ullam in quem-  
quam illorum obiectam, quae Fidiculano non obiecta sit,  
aliquid fuisse in Fidiculani causa, quod idem non esset  
in ceterorum. aut hoc iudicium reprehendas tu, cuius 114  
accusatio rebus iudicatis nitebatur, necesse est, aut, si  
hoc verum esse concedis, Oppianicum gratis condemna-  
tum esse fateare. quamquam satis magno argumento  
esse debet, quod ex tam multis iudiciis absoluto Fal-  
cula nemo reus factus est. quid enim mihi damnatos am-  
bitus conligitis, alia lege, certis criminibus, plurimis  
testibus? cum primum illi ipsi debuerint potius accusari  
de pecuniis repetundis quam ambitus: nam si in ambitus  
iudiciis hoc eis obfuit, cum alia lege causam dicerent,  
certe, si propria lege huius peccati adducti essent, multo  
plus obfuisset. deinde si tanta vis fuit istius criminis, ut, 115  
qua quisque lege ex illis iudiciis reus factus esset, tamen  
hac plaga periret, cur in tanta multitudine accusatorum,  
tantis praemiis, ceteri rei facti non sunt? hic profertur  
id, quod iudicium appellari non oportet, P. Septimio  
Scaevolae litem eo nomine esse aestimatum; cuius rei  
quae consuetudo sit, quoniam apud homines peritissimos  
dico, pluribus verbis docere non debeo: numquam enim  
ea diligentia, quae solet adhiberi in cetero iudicio, eadem  
reo damnato adhibita est: in litibus aestimandis fere iu- 116  
dices aut, quod sibi cum, quem semel condemnarunt,  
inimicum putant esse, si quae in eum lis capitis inflata  
est, non admittunt, aut, quod se perfunctos iam esse ar-



bitrantur, cum de reo iudicarunt, negligentius attendunt cetera. itaque et maiestatis absoluti sunt permulti, quibus damnatis de pecuniis repetundis lites maiestatis essent aestimatae, et hoc cotidie fieri videmus, ut reo damnato de pecuniis repetundis, ad quos pervenisse pecunias in litibus aestimandis statutum sit, eos eidem iudices absolvant; quod cum fit, non iudicia rescinduntur, sed hoc statuitur, aestimationem litium non esse iudicium. Scaevola condemnatus est aliis criminibus, frequentissimis Apuliae testibus; omni contentione pugnatum est, uti lis haec capitis aestimaretur: quae res si rei iudicatae pondus habuisset, ille postea vel isdem vel aliis inimicis reus hac lege ipsa factus esset.

42  
117

Sequitur id, quod illi iudicium appellant, maiores autem nostri numquam neque iudicium nominarunt neque proinde ut rem iudicatam observarunt, animadversionem atque auctoritatem censoriam. qua de re ante quam dicere incipio, perpauca mihi de meo officio verba faciunda sunt, ut a me cum huiusce periculo ceterorum quoque officiorum et amicitiarum ratio conservata esse videatur; nam mihi cum viris fortibus, qui censores proxime fuerunt, ambobus est amicitia, cum altero vero, sicuti plerique vestrum sciunt, magnus usus et summa utriusque officii constituta necessitudo. qua re quicquid de subscriptionibus eorum mihi dicendum erit, eo dicam animo, ut omnem orationem meam non de illorum facto, sed de ratione censoria habitam existimari velim; a Lentulo autem, familiari meo, qui a me pro eximia sua virtute summisque honoribus, quos a populo Romano adeptus est, honoris causa nominatur, facile hoc, iudices, impetrabo, ut, quam ipse adhibere consuevit in amicorum periculis cum fidem et diligentiam tum vini animi libertatemque dicendi, ex hac mihi concedat ut tantum mihi sumam, quantum sine huius periculo praeterire non possim. a me tamen, ut aequum est, omnia caute pedetemptimque dicentur, ut neque fides huius defensionis relicta neque cuiusquam aut dignitas laesa aut amicitia violata esse videatur. video igitur, iudices, animadvertisse censores in iudices quosdam illius consilii Iuniani, cum istam ipsam causam subscriberent. hic illud primum commune pro-

ponam, nunquam animadversionibus censoriis hanc civitatem ita contentam ut rebus iudicatis fuisse; neque in re nota consumam tempus; exempli causa ponam unum illud: C. Getam, cum a L. Metello et Cn. Domitio censoribus ex senatu eiectus esset, censorem esse ipsum postea factum, et cuius mores erant a censoribus reprehensi, hunc postea et populi Romani et eorum, qui in ipsum animadverterant, moribus praefuisse. quod si illud iudicium putaretur, ut ceteri turpi iudicio damnati in perpetuum omni honore ac dignitate privantur, sic hominibus ignominia notatis neque ad honorem aditus neque in curiam reditus esset: nunc si quem Cn. Lentuli aut L. Gellii libertus furti condemnarit, is omnibus ornamentis amissis numquam ullam honestatis suae partem recuperabit; quos autem ipse L. Gellius et Cn. Lentulus, duo censores, clarissimi viri sapientissimique homines, furti et captarum pecuniarum nomine notaverunt, ei non modo in senatum redierunt, sed etiam illarum ipsarum rerum iudiciis absoluti sunt. neminem voluerunt maiores nostri non modo de existimatione cuiusquam, sed ne pecuniaria quidem de re minima esse iudicem, nisi qui inter adversarios convenisset; quapropter in omnibus legibus, quibus exceptum est, de quibus causis aut magistratum capere non liceat aut iudicem legi aut alterum accusare, haec ignominiae causa praetermissa est; timoris enim causam, non vitae poenam in illa potestate esse voluerunt. itaque non solum illud ostendam, quod iam videtis, populi Romani suffragiis saepe numero censorias subscriptiones esse sublatas, verum etiam iudiciis eorum, qui iurati statuere maiore cum religione et diligentia debuerunt. primum iudices, senatores equitesque Romani, in compluribus iam reis, quos contra leges pecunias accepisse subscriptum est, suae potius religioni quam censorum opinioni paruerunt; deinde praetores urbani, qui iurati debent optimum quemque in lectos iudices referre, nunquam sibi ad eam rem censoriam ignominiam impedimento esse oportere duxerunt; censores denique ipsi saepe numero superiorum censorum iudiciis, si ista iudicia appellare voltis, non steterunt; atque etiam ipsi inter se censores sua iudicia tanti esse arbitrantur, ut alter alterius

iudicium non modo reprehendat, sed etiam rescindat; ut alter de senatu movere velit, alter retineat et ordine amplissimo dignum existimet; ut alter in aerarios referri aut tribu moveri iubeat, alter vetet. qua re qui vobis in mentem venit haec appellare iudicia, quae a populo rescindi, ab iuratis iudicibus repudiari, a magistratibus negligi, ab eis, qui eandem potestatem adepti sunt, commutari, inter conlegas discrepare videatis? quae cum ita sint, videamus quid tandem censores de illo iudicio corrupto iudicasse dicantur. ac primum illud statuamus, utrum quia censores subscripserint, ita sit, an, quia ita fuerit, illi subscripserint. si quia subscripserint, videte quid agatis, ne in unum quemque nostrum censoribus in posterum potestatem regiam permittatis; ne subscriptio censoria non minus calamitatis civibus quam illa acerbissima proscriptio possit adferre; ne censorium stilum, cuius mucronem multis remediis maiores nostri rettulerunt, aequae posthac atque illum dictatorium pertimescamus. sin autem, quod subscriptum est, quia verum est, 124 idcirco grave debet esse, hoc quaeramus, verum sit an falsum; removeantur auctoritates censoriae; tollatur id ex causa, quod in causa non est; doce quam pecuniam Cluentius dederit, unde dederit, quem ad modum dederit, unum denique a Cluentio profectae pecuniae vestigium ostende; vince deinde bonum virum fuisse Oppianicum, hominem integrum, nihil de illo umquam secus esse existimatum, nihil denique praeiudicatum: tum auctoritatem censoriam amplexato; tum illorum iudicium coniunctum 125 cum re esse defendito. dum vero eum fuisse Oppianicum constabit, qui tabulas publicas municipii manu sua corrupisse iudicatus sit, qui testamentum interleverit, qui supposita persona falsum testamentum obsignandum curaverit, qui eum, cuius nomine id obsignatum est, interfecerit, qui avunculum filii sui in servitute ac vinculis necaverit, qui municipes suos proscribendos occidendosque curaverit, qui eius uxorem, quem occiderat, in matrimonium duxerit, qui pecuniam pro abortione dederit, qui socrum, qui uxores, qui uno tempore fratris uxorem speratosque liberos fratremque ipsum, qui denique suos liberos interfecerit, qui cum venenum privigno suo dare

vellet, manifesto deprehensus sit, cuius ministris consciisque damnatis ipse adductus in iudicium pecuniam iudici dederit ad sententias iudicum corrumpendas — dum haec, inquam, de Oppianico constabunt, neque ullo argumento Cluentianae pecuniae crimen tenebitur, quid est quod te ista censoria, sive voluntas sive opinio fuit, adiuuare aut hunc innocentem opprimere posse videatur? quid igitur censores secuti sunt? ne ipsi quidem, ut gravissime dicam, quicquam aliud dicent praeter sermonem atque famam; nihil se testibus, nihil tabulis, nihil aliquo gravi argumento comperisse, nihil denique causa cognita statuuisse dicent: quod si ita fecissent, tamen id non ita fixum esse deberet, ut convelli non liceret. non utar exemplorum copia, quae summa est, non rem veterem, non hominem potentem aliquem aut gratiosum proferam: nuper hominem tenuem, scribam aedilicium, D. Matrinium, cum defendissem apud M. Iunium Q. Publicium praetores et M. Plaetorium C. Flaminium aedilis curulis, persuasi, ut scribam iurati legerent eum, quem eidem isti censores aerarium reliquisse se subscripserunt; cum enim in homine nulla culpa inveniretur, quid ille meruisset, non quid de eo statutum esset, quaerendum esse duxerunt; nam haec quidem, quae de iudicio corrupto subscripse-<sup>127</sup> runt, quis est qui ab illis satis cognita et diligenter iudicata arbitretur? in M'. Aquilium et in Ti. Guttam video esse subscriptum. quid est hoc? duos esse corruptos solos pecunia? dicant; ceteri videlicet gratis condemnarunt. non est igitur circumventus, non oppressus pecunia, non, ut illae Quinctianae contiones habebantur, omnes, qui Oppianicum condemnarunt, in culpa sunt ac suspitione ponendi: duos solos video auctoritate censorum ad finis ei turpitudini iudicari: aut illud adferant, aliquid sese, quod de his duobus habuerint compertum, de ceteris *non* comperisse. nam illud quidem minime probandum est,<sup>46</sup>  
<sup>128</sup> ad notationes auctoritatemque censoriam exemplum illos e consuetudine militari transtulisse. statuerunt enim ita maiores nostri, ut, si a multis esset flagitium rei militaris admissum, sortito in quosdam animadverteretur, ut metus videlicet ad omnis, poena ad paucos perveniret; quod idem facere censores in delectu dignitatis et in iudicio



civium et in animadversione vitiorum qui convenit? nam miles, qui locum non tenuit, qui hostium impetum vimque pertimuit, potest idem postea et miles esse melior et vir bonus et civis utilis; qua re qui in bello propter hostium metum deliquerat, amplior ei mortis et supplicii metus est a maioribus constitutus; ne autem nimium multi poenam capitis subirent, idcirco illa sortitio comparata est: hoc tu idem facies censor in senatu legendo? si erunt plures, qui ob innocentem condemnandum pecuniam acceperint, tu non animadvertes in omnis, sed carpes, ut velis, et paucos ex multis ad ignominiam sortiere? habebit igitur te sciente et vidente curia senatorem, populus Romanus iudicem, res publica civem sine ignominia quemquam, qui ad perniciem innocentis fidem suam et religionem pecunia commutarit? et, qui pretio adductus eripuerit patriam, fortunas, liberos civi innocenti, is censoriae severitatis nota non inuretur? tu es praefectus moribus, tu magister veteris disciplinae ac severitatis, si aut retines quemquam sciens in senatu scelere tanto contaminatum aut statuis, qui in eadem culpa sit, non eadem poena adfici convenire? aut quam condicionem supplicii maiores in bello timiditati militis propositam esse voluerunt, eandem tu in pace constitues improbitati senatoris? quod si hoc exemplum ex re militari ad animadversionem censoriam transferendum fuit, sortitione id ipsum factum esse oportuit; sin autem sortiri ad poenam et hominum delictum fortunae iudicio committere minime censorium est, certe in multorum peccato carpi paucos ad ignominiam non oportet. verum omnes intellegimus in istis subscriptionibus ventum quendam popularem esse quaesitum: iactata res erat in contione; incognita causa probatum erat illud multitudini; nemini licitum est contradicere; nemo denique, ut defenderet contrariam partem, laborabat. in invidiam porro magnam illa iudicia venerant: etenim paucis postea mensibus alia vehemens erat in iudiciis ex notatione tabellarum invidia versata: praetermitti ab censoribus et neglegi macula iudiciorum posse non videbatur. homines, quos ceteris vitiis atque omni dedecore infamis videbant, eos hac quoque subscriptione notare voluerunt, et eo magis, quod illo ipso tempore,

illis censoribus, erant iudicia cum equestri ordine communicata, ut viderentur per hominum idoneorum ignominiam sua auctoritate iudicia reprehendisse. quod si<sup>131</sup> hanc apud eosdem ipsos censores mihi aut alii causam agere licuisset, hominibus tali prudentia praeditis certe probavisset; res enim indicat nihil ipsos habuisse cogniti, nihil comperti; ex tota ista subscriptione rumorem quendam et plausum popularem esse quaesitum: nam in P. Popilium, qui Oppianicum condemnarat, subscripsit L. Gellius, quod is pecuniam accepisset, quo innocentem condemnaret. iam id ipsum quantae divinationis est scire innocentem fuisse reum, quem fortasse numquam viderat, cum homines sapientissimi, iudices, ut nihil dicam de eis, qui condemnarunt, causa cognita sibi dixerint non liquere? verum esto: condemnat Popilium Gellius; iudicat<sup>132</sup> accepisse a Cluentio pecuniam: negat hoc Lentulus. nam Popilium, quod erat libertini filius, in senatum non legit; locum quidem senatorium ludis et cetera ornamenta relinquit, et cum omni ignominia liberat; quod cum facit, iudicat eius sententia gratis esse Oppianicum condemnatum. et eundem Popilium postea Lentulus in ambitus iudicio pro testimonio diligentissime laudat. qua re si neque L. Gellii iudicio stetit Lentulus neque Lentuli existimatione contentus fuit Gellius, et, si uterque censor censoris opinione standum non putavit, quid est quam ob rem quisquam nostrum censorias subscriptiones omnis fixas et in perpetuum ratas putet esse oportere? ‘at in ipsum<sup>48</sup>  
<sup>133</sup> Habitum animadverterunt.’ nullam quidem ob turpitudinem, nullum ob totius vitae non dicam vitium, sed erratum: neque enim hoc homine sanctior neque probior neque in omnibus officiis retinendis diligentior esse quisquam potest; neque illi aliter dicunt, sed eandem illam famam iudicii corrupti secuti sunt; neque ipsi secus existimant quam nos existimari volumus de huius pudore, integritate, virtute; sed putarunt praetermitti accusatorem non potuisse, cum animadversum esset in iudices. qua de re si unum factum ex omni antiquitate protulero, plura non dicam; non enim mihi exemplum summi et clarissimi viri, P. Africani, praetereundum videtur, qui cum esset censor et in equitum censu C. Licinius Sacerdos prodisset,

clara voce, ut omnis contio audire posset, dixit se scire illum verbis conceptis peierasse; si qui contra vellet dicere, usurum esse eum suo testimonio: deinde cum nemo contra diceret, iussit equum traducere. ita is, cuius arbitrio et populus Romanus et exteræ gentes contentæ esse consueverant, ipse sua scientia ad ignominiam alterius contentus non fuit. quod si hoc Habito facere licuisset, facile illis ipsis iudicibus et falsæ suspicioni et invidiæ populariter excitatæ restitisset.

135 Unum etiam est, quod me maxime perturbat, cui loco respondere vix videor posse, quod elogium recitasti de testamento Cn. Egnatii patris, hominis honestissimi videlicet et sapientissimi: idcirco se exheredasse filium, quod is ob Oppianici condemnationem pecuniam acceperat: de cuius hominis levitate et inconstantia plura non dicam: hoc testamentum ipsum, quod recitas, eius modi est, ut ille, cum eum filium exheredaret, quem oderat, ei filio coheredes homines alienissimos adiungeret, quem diligebat. sed tu, Acci, consideres, censeo, diligenter, utrum censorum iudicium grave velis esse an Egnatii: si Egnatii, leve est, quod censores de ceteris subscripserunt; ipsum enim Cn. Egnatium, quem tu gravem esse vis, ex senatu eiecerunt: sin autem censorum, hunc Egnatium, quem pater censoria subscriptione exheredavit, censores in senatu, cum patrem eicerent, retinuerunt.

49  
136 'At enim senatus universus iudicavit illud corruptum esse iudicium.' quo modo? 'suscepit causam.' an potuit rem delatam eius modi repudiare? cum tribunus plebis populo concitato rem paene ad manus revocasset, cum vir optimus et homo innocentissimus pecunia circumventus diceretur, cum invidia flagraret ordo senatorius, potuit nihil decerni? potuit illa concitatio multitudinis sine summo periculo rei publicæ repudiari? at quid est decretum? quam iuste! quam sapienter! quam diligenter! SI QUI SUNT, QUORUM OPERA FACTUM SIT, UT IUDICIUM PUBLICUM CORRUMPERETUR. utrum videtur id senatus factum iudicare, an, si factum sit, moleste graviterque ferre? si ipse A. Cluentius sententiam de iudiciis rogaretur, aliam non diceret, atque ei dixerunt, quorum sententiis Cluentium condemnatum esse dicitis. sed quaero a vobis num istam legem ex

isto senatus consulto L. Lucullus consul, homo sapientissimus, tulerit, num anno post M. Lucullus et C. Cassius, in quos tum consules designatos idem illud senatus decreverat? non tulerunt; et quod tu Habiti pecunia factum esse arguis neque id ulla tenuissima suspitione confirmas, factum est primum illorum aequitate et sapientia consulum, ut id, quod senatus decreverat ad illud invidiae praesens incendium restinguendum, id postea referendum ad populum non arbitrarentur; ipse deinde populus Romanus, qui L. Quinctii fictis querimoniis antea concitatus rem illam et rogationem flagitarat, idem C. Iunii filii, pueri parvoli, lacrimis commotus, maximo clamore et concursu totam quaestionem illam et legem repudiavit; ex quo intellegi potuit id, quod saepe dictum <sup>138</sup> est: ut mare, quod natura sua tranquillum sit, ventorum vi agitari atque turbari, sic populum Romanum sua sponte esse placatum, hominum seditiosorum vocibus ut violentissimis tempestatibus concitari.

Est etiam reliqua permagna auctoritas, quam ego turpiter paene praeterii: mea enim esse dicitur. recitavit ex oratione nescio qua Accius, quam meam esse dicebat, cohortationem quandam iudicum ad honeste iudicandum et commemorationem cum aliorum iudiciorum, quae probata non essent, tum illius ipsius iudicii Iuniani: proinde quasi ego non ab initio huius defensionis dixerim invidiosum illud iudicium fuisse, aut, cum de infamia iudiciorum disputarem, potuerim illud, quod tam populare esset illo tempore, praeterire. ego vero, si quid eius modi dixi, <sup>139</sup> neque cognitum commemoravi neque pro testimonio dixi, et illa oratio potius temporis mei quam iudicii et auctoritatis fuit. cum enim accusarem et mihi initio proposuissem, ut animos et populi Romani et iudicum commoverem, cumque omnes offensiones iudiciorum non ex mea opinione, sed ex hominum rumore proferrem, istam rem, quae tam populariter esset agitata, praeterire non potui. sed errat vehementer, si quis in orationibus nostris, quas in iudiis habuimus, auctoritates nostras consignatas se habere arbitratur: omnes enim illae causarum ac temporum sunt, non hominum ipsorum aut patronorum; nam si causae ipsae pro se loqui possent, nemo adhiberet ora-



torem: nunc adhibemur, ut ea dicamus, non quae nostra auctoritate constituentur, sed quae ex re ipsa causaque  
140 ducantur. hominem ingeniosum, M. Antonium, aiunt solitum esse dicere idcirco se nullam umquam orationem scripsisse, ut, si quid aliquando non opus esset ab se esse dictum, posset negare dixisse: proinde quasi si quid a nobis dictum aut actum sit, id nisi litteris mandarimus,  
51 hominum memoria non comprehendatur. ego vero in isto genere libentius cum multorum tum hominis eloquentissimi et sapientissimi, L. Crassi, auctoritatem sequor, qui cum Cn. Plancum defenderet, accusante M. Bruto, homine in dicendo vehementi et callido, cum Brutus duobus recitatoribus constitutis ex duabus eius orationibus capita alterna inter se contraria recitanda curasset, quod in dissuasione rogationis eius, quae contra coloniam Narbonensem ferebatur, quantum potest, de auctoritate senatus detrahit, in suasionem legis Serviliae summis ornat senatum laudibus, et multa in equites Romanos cum ex ea oratione asperius dicta recitasset, quo animi illorum iudicium in Crassum incenderentur, aliquantum esse commotus dicitur. itaque in respondendo primum exposuit utriusque rationem temporis, ut oratio ex re et ex causa habita videretur, deinde ut intellegere posset Brutus, quem hominem et non solum qua eloquentia, verum etiam quo lepore et quibus facetiis praeditum lacescisset, tris ipse excitavit recitatores cum singulis libellis, quos M. Brutus, pater illius accusatoris, de iure civili reliquit. eorum initia cum recitarentur, ea, quae vobis nota esse arbitror: ‘forte evenit, ut ruri in Privernati essemus ego et Brutus filius,’ fundum Privernatem flagitabat; ‘in Albano eramus ego et Brutus filius,’ Albanum posebat; ‘in Tiburti forte cum adsedimus ego et Brutus filius,’ Tiburtem fundum requirebat; Brutum autem, hominem sapientem, quod filii nequitiam videret, quae praedia ei relinqueret, testificari voluisse dicebat; quod si potuisset honeste scribere se in balneis cum id aetatis filio fuisse, non praeterisset: eas se tamen ab eo balneas non ex libris patris, sed ex tabulis et ex censu quaerere. Crassus tum ita Brutum ultus est, ut illum recitationis suae paeniteret; moleste enim fortasse tulerat se in eis orationibus reprehensum, quas

de re publica habuisset, in quibus forsitan magis requiratur constantia: ego autem illa recitata esse non moleste <sup>142</sup> fero; neque enim ab illo tempore, quod tum erat, neque ab ea causa, quae tum agebatur, aliena fuerunt; neque mihi quicquam oneris suscepi, cum ita dixi, quo minus honeste hanc causam et libere possem defendere. quod si velim confiteri me causam A. Cluentii nunc cognosse, antea fuisse in illa populari opinione, quis tandem id possit reprehendere? praesertim, iudices, cum a vobis quoque ipsis hoc impetrari sit aequissimum, quod ego et ab initio petivi et nunc peto, ut, si quam huc graviolem de illo iudicio opinionem attulistis, hanc causa perspecta atque omni veritate cognita deponatis.

Nunc, quoniam ad omnia, quae abs te dicta sunt, T. <sup>52</sup> Acci, de Oppianici damnatione respondi, confiteare necesse est te opinionem multum fefellisse, quod existimaris me causam A. Cluentii non facto eius, sed lege defensorum. nam hoc persaepe dixisti tibi sic renuntiari, me habere in animo causam hanc praesidio legis defendere. itane est? ab amicis imprudentes videlicet prodimur, et est nescio quis de eis, quos amicos nostros arbitramur, qui nostra consilia ad adversarios deferat? quisnam hoc tibi renuntiavit? quis tam improbus fuit? cui ego narravi? nemo, ut opinor, in culpa est, sed nimirum tibi istud lex ipsa renuntiavit. sed num tibi ita defendisse videor, ut tota in causa mentionem ullam legis fecerim? num secus hanc causam defendisse, ac si lege Habitus teneretur? certe, ut hominem confirmare oportet, nullus est locus a me purgandi istius invidiosi criminis praetermissus. quid ergo est? quaeret fortassis quispiam, dis- <sup>144</sup> pliceatne mihi legum praesidio capitis periculum propulsare? mihi vero, iudices, non displicet, sed utor instituto meo. in hominis honesti prudentisque iudicio non solum meo consilio uti consuevi, sed multum etiam eius, quem defendo, et consilio et voluntati obtempero. nam ut haec ad me causa delata est, qui leges eas, ad quas adhibemur et in quibus versamur, nosse deberem, dixi Habito statim eo capite QUI COISSET QUO QUIS CONDEMNARETUR, illum esse liberum, teneri autem nostrum ordinem: atque ille me orare atque obsecrare coepit, ne se lege defenderem. cum

ego quae mihi videbantur dicerem, traduxit me ad suam sententiam; adfirmabat enim lacrimans non se cupidiorē  
145 esse civitatis retinendae quam existimationis. morem homini gessi, et tamen idcirco feci — neque enim id semper facere debemus — quod videbam per se ipsam causam sine lege copiosissime posse defendi. videbam in hac defensione, qua iam sum usus, plus dignitatis, in illa, qua me hic uti noluit, minus laboris futurum: quod si nihil aliud esset actum nisi ut hanc causam obtinere-  
mus, lege recitata perorassem.

53 Neque me illa oratio commovet, quod ait Accius indignum esse facinus, si senator iudicio quempiam circum-  
venerit, legibus eum teneri, si eques Romanus hoc idem  
146 fecerit, non teneri. ut tibi concedam hoc indignum esse, quod cuius modi sit iam videro, tu mihi concedas necesse est multo esse indignius in ea civitate, quae legibus con-  
tineatur, discedi ab legibus: hoc enim vinculum est huius dignitatis, qua fruimur in re publica, hoc fundamentum libertatis, hic fons aequitatis; mens et animus et consi-  
lium et sententia civitatis posita est in legibus; ut cor-  
pora nostra sine mente, sic civitas sine lege suis partibus, ut nervis et sanguine et membris, uti non potest. legum ministri magistratus, legum interpretes iudices, legibus  
denique idcirco omnes servimus, ut liberi esse possimus.  
147 quid est, Q. Naso, cur tu in isto loco sedeas? quae vis est, qua abs te hi iudices tali dignitate praediti coërcean-  
tur? vos autem, iudices, quam ob rem ex tanta multitu-  
dine civium tam pauci de hominum fortunis sententiam fertis? quo iure Accius quae voluit dixit? cur mihi tam diu potestas dicendi datur? quid sibi autem illi scribae, quid lictores, quid ceteri, quos apparere huic quaestioni video, volunt? opinor haec omnia lege fieri totumque hoc iudicium, ut ante dixi, quasi mente quadam regi legis et administrari. quid ergo? haec quaestio sola ita guber-  
natur? quid M. Plaetorii et C. Flaminii inter sicarios? quid C. Orchivii peculatus? quid mea de pecuniis repe-  
tundis? quid C. Aquilii, apud quem nunc ambitus causa dicitur? quid reliquae quaestiones? circumspicite omnis  
rei publicae partis: omnia legum imperio et praescripto  
148 fieri videbitis. si quis apud me, T. Acci, te reum velit

facere, clames te lege pecuniarum repetundarum non teneri; neque haec tua recusatio confessio sit captae pecuniae, sed laboris et periculi non legitimi declinatio. nunc quid agatur et quid abs te iuris constituatur vide. 54 iubet lex ea, qua lege haec quaestio constituta est, iudicem quaestionis, hoc est, Q. Voconium, cum eis iudicibus, qui ei obvenerint — vos appellat, iudices — quaerere de veneno. in quem quaerere? infinitum est. QUICUMQUE FECERIT, VENDIDERIT, EMERIT, HABUERIT, DEDERIT. quid eadem lex statim adiungit? recita. DEQUE EIUS CAPITE QUAE- RITO. cuius? qui coierit? convenerit? non ita est. quid ergo est? dic. QUI TRIBUNUS MILITUM LEGIONIBUS QUATTUOR PRIMIS, QUIVE QUAESTOR, TRIBUNUS PLEBIS — deinceps omnis magistratus nominavit — QUIVE IN SENATU SENTENTIAM DIXIT, DIXERIT. quid tum? QUI EORUM COIT, COIERIT, CONVENIT, CON- VENERIT, QUO QUIS IUDICIO PUBLICO CONDEMNARETUR. QUI EO- RUM. quorum? videlicet, qui supra scripti sunt. quid in- tersit utro modo scriptum sit, etsi est apertum, ipsa tamen lex nos docet. ubi enim omnis mortalis adligat, ita lo- quitur: QUI VENENUM MALUM FECIT, FECERIT: omnes viri, mulieres, liberi, servi in iudicium vocantur; si idem de coitione voluisset, adiunxisset: QUIVE COIERIT. nunc ita est: DEQUE EIUS CAPITE QUAE RITO, QUI MAGISTRATUM HABUERIT INVE SENATU SENTENTIAM DIXERIT: QUI EORUM COIT, COIERIT. num is est Cluentius? certe non est. quis ergo est Cluen- 149 tius? qui tamen defendi causam suam lege noluit. itaque abicio legem; morem Cluentio gero; tibi tamen, Acci, pauca, quae ab huius causa seiuncta sunt, respondebo; est enim quiddam in hac causa quod Cluentius ad se, est aliquid quod ego ad me putem pertinere: hic sua putat interesse se re ipsa et gesto negotio, non lege defendi; ego autem mea existimo interesse me nulla in disputa- tione ab Accio videri esse superatum; non enim mihi haec causa sola dicenda est; omnibus hic labor meus proposi- tus est, quicumque hac facultate defensionis contenti esse possunt; nolo quemquam eorum, qui adsunt, existimare me, quae de lege ab Accio dicta sunt, si reticuerim, com- probare. quam ob rem, Cluenti, de te tibi obsequor, ne- que enim legem recito neque hoc loco pro te dico, sed ea, quae a me desiderari arbitror, non relinquam.



<sup>55</sup> Iniquum tibi videtur, Acci, esse non isdem legibus  
<sup>150</sup> omnis teneri. primum, ut id iniquissimum esse confitear, eius modi est, ut commutatis eis opus sit legibus, non ut his, quae sunt, non pareamus. deinde quis unquam hoc senator recusavit, ne, cum altiore gradum dignitatis beneficio populi Romani esset consecutus, eo se putaret durioribus legum condicionibus uti oportere? quam multa sunt commoda, quibus caremus, quam multa molesta et difficilia, quae subimus! atque haec omnia tantum honoris et amplitudinis commodo compensantur. converte nunc ad equestrem ordinem atque in ceteros ordines easdem vitae condiciones: non perferent; putant enim minus multos sibi laqueos legum et condicionum ac iudiciorum propositos esse oportere, qui summum locum civitatis aut non potuerunt ascendere aut non petiverunt.

<sup>151</sup> atque ut omittam leges alias omnis, quibus nos tenemur, ceteri autem sunt ordines liberati, hanc ipsam legem NE QUIS IUDICIO CIRCUMVENIRETUR, C. Gracchus tulit: eam legem pro plebe, non in plebem tulit. postea L. Sulla, homo a populi causa remotissimus, tamen, cum eius rei quaestionem hac ipsa lege constitueret, qua vos hoc tempore iudicatis, populum Romanum, quem ab hoc genere liberum acceperat, adligare novo quaestionis genere ausus non est: quod si fieri posse existimasset, pro illo odio, quod habuit in equestrem ordinem, nihil fecisset libentius quam omnem illam acerbiterat proscriptionis suae, qua est usus in veteres iudices, in hanc unam quaestionem contulisset.

<sup>152</sup> nec nunc quicquam agitur — mihi credite, iudices, et prospicite id, quod providendum est, — nisi ut equester ordo in huiusce legis periculum concludatur. neque hoc agitur ab omnibus, sed a paucis. nam ei senatores, qui se facile tuentur integritate et innocentia, quales, ut vere dicam, vos estis, et ceteri, qui sine cupiditate vixerunt, equites ordini senatorio dignitate proximos, concordia coniunctissimos esse cupiunt; sed ei, qui sese volunt posse omnia neque praeterea quicquam esse aut in homine ullo aut in ordine, hoc uno metu se putant equites Romanos in potestatem suam redacturos, si constitutum sit, ut de eis, qui rem iudicarint, huiusce modi iudicia fieri possint. vident enim auctoritatem huius or-

dinis confirmari; vident iudicia comprobari; hoc metu  
 proposito evellere se aculeum severitatis vestrae posse  
 confidunt. quis enim de homine audeat paulo maioribus <sup>153</sup>  
 opibus praedito vere et fortiter iudicare, cum videat sibi  
 de eo, quod coierit aut consenserit, causam esse dicen-  
 dam? o viros fortis, equites Romanos, qui homini cla- <sup>56</sup>  
 rissimo ac potentissimo, M. Druso, tribuno plebis, restite-  
 runt, cum ille nihil aliud ageret cum illa cuncta, quae tum  
 erat, nobilitate, nisi ut ei, qui rem iudicassent, huiusce  
 modi quaestionibus in iudicium vocarentur. tunc C. Fla-  
 vius Pusio, Cn. Titinius, C. Maecenas, illa robora po-  
 puli Romani equestrisque ordinis, non fecerunt idem,  
 quod nunc Cluentius, ut aliquid culpaе suscipere se pu-  
 tarent recusando, sed apertissime repugnarunt, cum haec  
 recusarent et palam fortissime atque honestissime dicerent  
 se potuisse iudicio populi Romani in amplissimum locum  
 pervenire, si sua studia ad honores petendos conferre  
 voluissent; sese vidisse, in ea vita qualis splendor inesset,  
 quanta ornamenta, quae dignitas; quae se non contem-  
 pnisse, sed ordine suo patrumque suorum contentos fuisse  
 et vitam illam tranquillam et quietam, remotam a pro-  
 cellis invidiarum et huiusce modi iudiciorum sequi ma-  
 luisse: aut sibi ad honores petendos aetatem integram <sup>154</sup>  
 restitui oportere, aut, quoniam id non posset, eam con-  
 dicionem vitae, quam secuti petitionem reliquissent, ma-  
 nere; iniquum esse eos, qui honorum ornamenta propter  
 periculorum multitudinem praetermisissent, populi bene-  
 ficiis esse privatos, iudiciorum novorum periculis non ca-  
 rere; senatorem hoc queri non posse, propterea quod ea  
 condicione proposita petere coepisset, quodque permulta  
 essent ornamenta, quibus eam mitigare molestiam posset,  
 locus, auctoritas, domi splendor, apud exteris nationes  
 nomen et gratia, toga praetexta, sella curulis, [insignia,]  
 fasces, [exercitus,] imperia, provinciae: quibus in rebus  
 cum summa recte factis maiores nostri praemia tum plura  
 peccatis pericula proposita esse voluerunt. illi non hoc  
 recusabant, ne ea lege accusarentur, qua nunc Habitus  
 accusatur, quae tunc erat Sempronia, nunc est Cornelia;  
 intellegebant enim ea lege equestrem ordinem non teneri,  
 sed ne nova lege adligarentur laborabant: Habitus ne hoc <sup>155</sup>

quidem umquam recusavit, quo minus vel ea lege rationem vitae suae redderet, qua non tenetur; quae si vobis condicio placet, omnes id agamus, ut haec quam primum  
57 in omnis ordines quaestio perferatur. interea quidem, per deos immortalis! quoniam omnia commoda nostra, iura, libertatem, salutem denique legibus obtinemus, a legibus non recedamus; simul et illud quam sit iniquum cogitemus populum Romanum aliud nunc agere; vobis rem publicam et fortunas suas commisisse; ipsum sine cura esse; non metuere, ne lege ea, quam nunquam ipse iusserit, et quaestione, qua se solutum liberumque esse arbitretur, per paucos iudices astringatur; agit enim sic  
156 causam T. Accius, adulescens bonus et disertus, omnis civis legibus teneri omnibus. vos attenditis et auditis silentio, sicut facere debetis; A. Cluentius causam dicit eques Romanus ea lege, qua senatores et ei, qui magistratum habuerunt, soli tenentur; mihi per eum recusare et in arce legis praesidia constituere defensionis meae non licet: si obtinuerit causam Cluentius, sicuti vestra acquitate nixi confidimus, omnes existimabunt, id quod erit, obtinuisse propter innocentiam, quoniam ita defensus sit; in lege autem, quam attingere noluerit, praesidii nihil  
157 fuisse. hic nunc est quiddam, quod ad me pertineat, de quo ante dixi, quod ego populo Romano praestare debeam, quoniam is vitae meae status est, ut omnis mihi cura et opera posita sit in hominum periculis defendendis: video quanta et quam periculosa et quam infinita quaestio temptetur ab accusatoribus, cum eam legem, quae in nostrum ordinem scripta sit, in populum Romanum transferre conentur; qua in lege est QUI COIERIT, quod quam late pateat videtis; CONVENERIT aequae incertum et infinitum est; CONSENSERIT, hoc vero cum infinitum tum obscurum et occultum: FALSUMVE TESTIMONIUM DIXERIT; quis de plebe Romana testimonium dixit umquam, cui non hoc periculum T. Accio auctore paratum esse videatis? nam dicturum quidem certe, si hoc iudicium plebi Romanae propositum  
158 sit, neminem umquam esse confirmo. sed hoc polliceor omnibus, si cui forte hac lege negotium facessetur, qui lege non teneatur, si is uti me defensore voluerit, me eius causam legis praesidio defensurum, et vel his iudi-

cibus vel horum similibus facillime probaturum et omni me defensione usurum esse legis, qua nunc ut utar, ab eo, cuius voluntati mihi obtemperandum est, non conceditur. non enim debeo dubitare, iudices, quin, si qua ad 58 vos causa eius modi delata sit eius, qui lege non teneatur, etiam si is invidiosus aut multis offensus esse videatur, etiam si cum oderitis, etiam si inviti absoluturi sitis, tamen absolvatis et religioni potius vestrae quam odio pareatis. est enim sapientis iudicis [meminisse se ho- 159 minem] cogitare tantum sibi a populo Romano esse permissum, quantum commissum sit et creditum, et non solum sibi potestatem datam, verum etiam fidem habitam esse meminisse; posse quem oderit absolvere, quem non oderit condemnare, et semper non quid ipse velit, sed quid lex et religio cogat cogitare; animadvertere qua lege reus citetur, de quo reo cognoscat, quae res in quaestione versetur. cum haec sunt videnda tum vero illud est hominis magni, iudices, atque sapientis, cum illam iudicandi causa tabellam sumpserit, non se reputare solum esse neque sibi quodcumque concupierit licere, sed habere in consilio legem, religionem, aequitatem, fidem; libidinem autem, odium, invidiam, metum cupiditatesque omnis amovere maximique aestimare conscientiam mentis suae, quam ab dis immortalibus accepimus, quae a nobis divelli non potest; quae si optimorum consiliorum atque factorum testis in omni vita nobis erit, sine ullo metu et summa cum honestate vivemus. haec si T. Accius aut cogno- 160 visset aut cogitasset, profecto ne conatus quidem esset dicere, id quod multis verbis egit, iudicem, quod ei videatur, statuere et non devinctum legibus esse oportere; quibus de rebus mihi pro Cluentii voluntate nimium, pro rei dignitate parum, pro vestra prudentia satis dixisse videor. reliqua perpauca sunt, quae, quia vestrae quaestionis erant, idcirco illi statuerunt fingenda esse sibi et proferenda, ne omnium turpissimi reperirentur, si in iudicium nihil praeter invidiam attulissent. atque ut existi- 59 metis me necessario de his rebus, de quibus iam dixerim, pluribus egisse verbis, attendite reliqua: profecto intellegetis ea, quae paucis demonstrari potuerint, brevissime esse defensa.



- 161 Cn. Decitio Samniti, ei, qui proscriptus est, iniuriam in calamitate eius ab huius familia factam esse dixisti: ab nullo ille liberalius quam a Cluentio tractatus est: huius illum opes in rebus eius incommodissimis sublevarunt, atque hoc cum ipse tum eius amici necessariique omnes cognorunt. Ancharii et Paceni pastoribus huius vilicum vim et manus attulisse: cum quaedam in callibus, ut solet, controversia pastorum esset orta, Habiti vilici rem domini et privatam possessionem defenderunt: cum esset expostulatio facta, causa illis demonstrata, sine iudicio controversiaque discessum est.
- 162 'P. Aelii testamento propinquus exheredatus cum esset, heres hic alienior institutus est.' P. Aelius Habiti merito fecit, neque hic in testamento faciendo interfuit, idque testamentum ab huius inimico Oppianico est obsignatum. Floro legatum ex testamento infitiatum esse: non est ita; sed cum IIS xxx scripta essent pro IIS ccc, neque ei cautum satis videretur, voluit eum aliquid acceptum referre liberalitati suae: primo debere negavit; post sine controversia solvit. Ceii cuiusdam Samnitis uxorem post bellum ab hoc esse repetitam: mulierem cum emisset a sectoribus, quo tempore eam primum liberam esse audivit, sine iudicio reddidit Ceio.
- 163 Ennium esse quendam, cuius bona teneat Habitus: est hic Ennius egens quidam calumniator, mercennarius Oppianici, qui permultos annos quievit; deinde aliquando cum servis Habiti furti egit; nuper ab ipso Habito petere coepit: hic illo privato iudicio, mihi credite, vobis isdem fortasse patronis, calumniam non effugiet. atque etiam, ut nobis renuntiatur, hominem multorum hospitem, Ambivium quendam, coponem de via Latina, subornatis, qui sibi a Cluentio servisque eius in taberna sua manus adlatas esse dicat: quo de homine nihil etiam nunc dicere nobis est necesse: si invitaverit, id quod solet, sic hominem accipiemus, ut moleste ferat
- 164 se de via decessisse. habetis, iudices, quae in totam causam de moribus A. Cluentii, quem illi invidiosum esse reum volunt, annos octo meditati accusatores conlegerunt, quam levia genere ipso! quam falsa re! quam
- 60 brevia responsu! cognoscite nunc id, quod ad vestrum ius iurandum pertinet, quod vestri iudicii est, quod vobis

oneris imposuit ea lex, qua coacti huc convenistis, de criminibus veneni; ut omnes intellegant quam paucis verbis haec causa perorari potuerit et quam multa a me dicta sint, quae ad huius voluntatem maxime, ad vestrum iudicium minime pertinerent.

Obiectum est Vibium Capacem ab hoc A. Cluentio <sup>165</sup> veneno esse sublatum. opportune adest homo summa fide et omni virtute praeditus, L. Plaetorius, senator, qui illius Vibii hospes fuit et familiaris. apud hunc ille Romae habitavit, apud hunc aegrotavit, huius domi est mortuus. intestatum dico esse mortuum possessionemque eius bonorum, ex edicto praetoris, huic, illius sororis filio, adulescenti pudentissimo et in primis honesto, equiti Romano datam, Numerio Cluentio, quem videtis.

Alterum veneficii crimen Oppianico huic adulescenti, <sup>166</sup> cum eius in nuptiis more Larinatum multitudo hominum pranderet, venenum Habiti consilio paratum; id cum daretur in mulso, Balbutium quendam, eius familiarem, interceptisse, bibisse statimque esse mortuum. hoc ego si sic agerem, tamquam mihi crimen esset diluendum, haec pluribus verbis dicerem, per quae nunc paucis percurrit oratio mea. quid umquam Habitus in se admisit, ut hoc <sup>167</sup> tantum ab eo facinus non abhorreere videatur? quid autem magno opere Oppianicum metuebat, cum ille verbum omnino in hac ipsa causa nullum facere potuerit, huic autem accusatores viva matre deesse non possint? id quod iam intellegetis. an ut de causa eius periculi nihil decederet, ad causam novum crimen accederet? quod autem tempus veneni dandi illo die, illa frequentia? per quem porro datum? unde sumptum? quae deinde interceptio poculi? cur non de integro autem datum? multa sunt, quae dici possunt; sed non committam ut videar non dicendo voluisse dicere; res enim se ipsa defendit: nego <sup>168</sup> illum adulescentem, quem statim epoto poculo mortuum esse dixistis, omnino illo die esse mortuum: magnum crimen et impudens mendacium: [perspicite cetera:] dico illum, cum ad illud prandium crudior venisset et, ut aetas illa fert, sibi tum non pepercisset, aliquot dies aegrotasse et ita esse mortuum. quis huic rei testis est? idem, qui sui luctus, pater; pater, inquam, illius adulescentis; quem

propter animi dolorem pertenuis suspitio potuisset ex illo loco testimonio sublevat, quod recita. tu autem, nisi molestum est, paulisper exsurge; perfer hunc dolorem commemorationis necessariae; in qua ego diutius non morabor, quoniam, quod fuit viri optimi, fecisti, ut ne cui innocentis maeror tuus calamitatem et falsum crimen adferret.

61  
169.

Unum etiam mihi reliquum eius modi crimen est, iudices, ex quo illud perspicere possitis, quod a me initio orationis meae dictum est: quicquid mali per hosce annos A. Cluentius viderit, quicquid hoc tempore habuerit sollicitudinis ac negotii, id omne a matre esse conflatum. Oppianicum veneno necatum esse, quod ei datum sit in pane per M. Asellium quendam, familiarem illius, idque Habiti consilio factum esse dicitis; in quo primum illud quaero, quae causa Habito fuerit, cur interficere Oppianicum vellet; inimicitias enim fuisse confiteor, sed homines inimicos suos morte adfici volunt aut quod eos  
170 metuunt aut quod oderunt: quo tandem igitur Habitus metu adductus tantum in se facinus suscipere conatus est? quid erat quod iam Oppianicum poena adfectum pro maleficiis et eiectum e civitate quisquam timeret? quid metuebat? ne oppugnaretur a perdito? an ne accusaretur a damnato? an ne exsulis testimonio laederetur? si autem quod oderat Habitus inimicum, ideoque illum vita frui noluit, adeone erat stultus, ut illam, quam tum ille vivebat, vitam esse arbitraretur, damnati, exsulis, deserti ab omnibus? quem propter animi importunitatem nemo recipere tecto, nemo adire, nemo adloqui, nemo aspicere vellet?  
171 huius igitur Habitus vitae invidebat? hunc si acerbe et penitus oderat, non eum quam diutissime vivere velle debebat? huic mortem maturabat inimicus, quod illi unum in malis erat perfugium calamitatis? qui si quid animi et virtutis habuisset, ut multi saepe fortes viri in eius modi dolore, mortem sibi ipse conscisset, huic quam ob rem id vellet inimicus offerre, quod ipse sibi optare deberet? nam nunc quidem quid tandem illi mali mors attulit? nisi forte ineptis fabulis ducimur, ut existimemus illum apud inferos impiorum supplicia perferre ac pluris illic offendisse inimicos, quam hic reliquisse; a socrus, ab uxorum,

a fratris, a liberum Poenis actum esse praecepitem in  
 sceleratorum sedem ac regionem: quae si falsa sunt, id  
 quod omnes intellegunt, quid ei tandem eripuit mors praeter  
 sensum doloris? age vero, per quem venenum datum? per <sup>172</sup>  
 M. Asellium. quid huic cum Habito? nihil; atque adeo, 62  
 quod ille Oppianico familiarissime est usus, potius etiam  
 similtas. eine igitur, quem sibi offensiozem, Oppianico  
 familiarissimum sciebat esse, potissimum et scelus suum  
 et illius periculum committebat? cur igitur tu, qui pietate  
 ad accusandum excitatus es, hunc Asellium esse inultum  
 tam diu sinis? cur non Habiti exemplo usus es, ut per  
 illum, qui attulisset venenum, de hoc praeiudicaretur?  
 iam vero illud quam non probabile, quam inusitatum, iu- <sup>173</sup>  
 dices, quam novum, in pane datum venenum! faciliusne  
 potuit quam in poculo, latius potuit abditum aliqua in  
 parte panis, quam si totum conliquefactum in potione  
 esset, celerius potuit comestum quam epotum in venas  
 atque in omnis partis corporis permanare, facilius fallere  
 in pane, si esset animadversum, quam in poculo, cum ita  
 confusum esset, ut secerni nullo modo posset? ‘at re-  
 pentina morte periit.’ quod si esset ita factum, tamen ea <sup>174</sup>  
 res propter multorum eius modi casum minime firmam  
 veneni suspicionem haberet; si esset suspiciosum, tamen  
 potius ad alios quam ad Habitu pertineret. verum in  
 eo ipso homines impudentissime mentiuntur; id ut intellegatis,  
 et mortem eius et quem ad modum post mortem  
 in Habitu sit crimen a matre quaesitum cognoscite: cum <sup>175</sup>  
 vagus et exsul erraret atque undique exclusus Oppianicus  
 in Falernum se ad C. Quinctium contulisset, ibi primum  
 in morbum incidit ac satis vehementer diuque aegrotavit.  
 cum esset una Sassia eaque Sex. Albio quodam colono,  
 homine valenti, qui simul esse solebat, familiarius uteretur,  
 quam vir dissolutissimus incoluui fortuna pati posset,  
 et ius illud matrimonii castum atque legitimu damnatione  
 viri sublatum arbitraretur, Nicostratus quidam, fidelis  
 Oppianici servolus, percuriosus et minime mendax, multa  
 dicitur domino renuntiare solitus esse. interea Oppianicus  
 cum iam conualesceret neque improbitatem coloni in Falerno  
 diutius ferre posset et huc ad urbem profectus esset  
 — solebat enim extra portam aliquid habere conducti —,



cecidisse de equo dicitur et homo infirma valetudine latus offendisse vehementer, et, postea quam ad urbem cum febris venerit, paucis diebus esse mortuus. mortis ratio, iudices, eius modi est, ut aut nihil habeat suspicionis aut, si quid habet, id intra parietes in domestico scelere ver-  
 63  
 176 setur. post mortem eius [Sassia] moliri statim nefaria mulier coepit insidias filio: quaestionem habere de viri morte constituit. emit de A. Rupilio, quo erat usus Oppianicus medico, Stratonem quendam, quasi ut idem faceret quod Habitus in emendo Diogene fecerat. de hoc Stratone et de Ascla quodam servo suo quaesituram esse dixit; praeterea servum illum Nicostratum, quem nimium loquacem fuisse ac nimium domino fidelem arbitrabatur, ab hoc adolescente Oppianico in quaestionem postulavit. hic cum esset illo tempore puer et illa quaestio de patris sui morte constitui diceretur, etsi illum servum et sibi benevolum esse et patri fuisse arbitrabatur, nihil tamen est ausus recusare. advocantur amici et hospites Oppianici et ipsius mulieris multi, homines honesti atque omnibus rebus ornati; tormentis omnibus vehementissime quaeritur. cum essent animi servorum et spe et metu temptati, ut aliquid in quaestione dicerent, tamen, ut arbitror, auctoritate advocatorum [et vi tormentorum] adducti in veritate manserunt neque se quicquam scire dixe-  
 177 runt: quaestio illo die de amicorum sententia dimissa est. satis longo intervallo [post] iterum advocantur; habetur de integro quaestio; nulla vis tormentorum acerrimorum praetermittitur; adversari advocati et iam vix ferre posse; furere crudelis atque importuna mulier, sibi nequaquam, ut sperasset, ea, quae cogitasset, procedere. cum iam tortor atque essent tormenta ipsa defessa neque tamen illa finem facere vellet, quidam ex advocatis, homo et honoribus populi ornatus et summa virtute praeditus, intellegere se dixit non id agi, ut verum inveniretur, sed ut aliquid falsi dicere cogerentur. hoc postquam ceteri comprobaverunt, ex omnium sententia constitutum est satis  
 178 videri esse quaesitum. redditur Oppianico Nicostratus, Larinum ipsa proficiscitur cum suis maerens, quod iam certe incolumem filium fore putabat, ad quem non modo verum crimen, sed ne ficta quidem suspitio perveniret et

cui non modo aperta inimicorum oppugnatio, sed ne occultae quidem matris insidiae nocere potuissent. Larinum postquam venit, quae a Stratone illo venenum antea viro suo datum sibi persuasum esse simulasset, instructam ei continuo et ornatam Larini medicinae exercendae causa tabernam dedit. unum, alterum, tertium annum Sassia quiescebat, ut velle atque optare aliquid calamitatis filio potius quam id struere et moliri videretur. tum interim Q. Hortensio Q. Metello consulibus, ut hunc Oppianicum aliud agentem ac nihil eius modi cogitantem ad hanc accusationem detraheret, invito despondit ei filiam suam, illam, quam ex genere susceperat, ut eum nuptiis adligatum simul et testamenti spe devinctum posset habere in potestate. hoc ipso fere tempore Strato ille medicus domi furtum fecit et caedem eius modi: cum esset in aedibus armarium, in quo sciret esse nummorum aliquantum et auri, noctu duos conservos dormientis occidit in piscinamque deiecit; ipse armarii fundum exsecuit, et HS \* et auri quinque pondo abstulit, uno ex servis puero non grandi conscio. furto postridie cognito omnis suspitio in eos servos, qui non comparebant, commovebatur; cum exsecutio illa fundi in armario animadverteretur, quaerebant homines quonam modo fieri potuisset: quidam ex amicis Sassiae recordatus est se nuper in auctione quadam vidisse in rebus minutis aduncam ex omni parte dentatam et tortuosam venire serrulam, qua illud potuisse ita circumsecari videretur: ne multa: perquiritur a coactoribus; invenitur ea serrula ad Stratonem pervenisse. hoc initio suspicionis orto et aperte insimulato Stratone puer ille conscius pertimuit; rem omnem dominae indicavit, homines in piscina inventi sunt, Strato in vincula coniectus est atque etiam in taberna eius nummi, nequaquam omnes, reperiuntur. constituitur quaestio de furto; nam quid quisquam suspicari aliud potest? an hoc dicitis, armario expilato, pecunia ablata, non omni recuperata, occisis hominibus, institutam esse quaestionem de morte Oppianici? cui probatis? quid est quod minus veri simile proferre potuistis? deinde, ut omittam cetera, triennio post mortem Oppianici de eius morte quaerebatur. \* \* atque etiam incensa odio pristino Nicostratum eundem

illum tum sine causa in quaestionem postulavit. Oppianicus primo recusavit: postea cum illa abducturam se filiam, mutaturam esse testamentum minaretur, mulieri crudelissimae servum fidelissimum non in quaestionem tulit, sed  
65 plane ad supplicium dedit. post triennium igitur agitata  
182 denuo quaestio de viri morte habebatur, et de quibus servis habebatur? nova, credo, res obiecta, novi quidam homines in suspicionem vocati sunt? de Stratone et de Nicostrato. quid? Romae quaesitum de istis hominibus non erat? itane tandem mulier iam non morbo, sed scelere furiosa, cum quaestionem habuisses Romae, cum de T. Annii, L. Rutilii, P. Saturii, ceterorum honestissimorum virorum sententia constitutum esset satis quaesitum videri, eadem de re triennio post, isdem de hominibus, nullo adhibito non dicam viro, ne colonum forte adfuisse dicatis, sed bono viro, in filii caput quaestionem habere  
183 conata es? an hoc dicitis — mihi enim venit in mentem quid dici possit, tametsi adhuc non esse hoc dictum mementote —: cum haberetur de furto quaestio, Stratonem aliquid de veneno esse confessum? hoc uno modo, iudices, saepe multorum improbitate depressa veritas emergit et innocentiae defensio interclusa respirat, quod aut ei, qui ad fraudem callidi sunt, non tantum audent, quantum excogitant, aut ei, quorum eminet audacia atque proiecta est, a consiliis malitiae deseruntur: quod si aut confidens astutia aut callida esset audacia, vix ullo eis obsisti modo posset. utrum furtum factum non est? at nihil clarius Larini. an ad Stratonem suspitio non pertinuit? at is et ex serrula insimulatus et a puero conscio est indicatus. an id actum non est in quaerendo? quae fuit igitur alia causa quaerendi? an, id quod vobis dicendum est et quod tum Sassia dictitavit, cum de furto quaereretur, tum Stratonem isdem in tormentis dixisse de veneno? en hoc  
184 illud est, quod ante dixi: mulier abundat audacia, consilio et ratione deficitur; nam tabellae quaestionis plures proferuntur, quae recitatae vobisque editae sunt, illae ipsae, quas tum obsignatas esse dixit; in quibus tabellis de furto littera nulla invenitur. non venit in mentem, primum orationem Stratonis conscribere de furto, post aliquod dictum adiungere de veneno, quod non percon-

tatione quaesitum, sed per dolorem expressum videretur. quaestio de furto est; veneni iam suspitio superiore quaestione sublata: quod ipsum haec eadem mulier iudicarat, quae ut Romae de amicorum sententia statuerat satis esse quaesitum, postea per triennium maxime ex omnibus servis Stratonem illum dilexerat, in honore habuerat, commodis omnibus adfecerat. cum igitur de furto quac-<sup>185</sup> reretur et eo furto, quod ille sine controversia fecerat, tum ille de eo, quod quaerebatur, verbum nullum fecit? de veneno statim dixit? de furto si non eo loco, quo debuit, ne in extrema quidem aut media aut aliqua denique parte quaestionis verbum fecit ullum? iam videtis illam<sup>66</sup> nefariam mulierem, iudices, eadem manu, qua, si detur potestas, interficere filium cupiat, hanc fictam quaestionem conscripsisse. atque istam ipsam quaestionem dicite, qui obsignarit, unum aliquem nominatim: neminem reperietis, nisi forte eius modi hominem, quem ego proferri malim quam neminem nominari. quid ais, T. Acci?<sup>186</sup> tu periculum capitis, tu indicium sceleris, tu fortunas alterius litteris conscriptas in iudicium adferas, neque earum auctorem litterarum neque obsignatorem neque testem ullum nominabis? et quam tu pestem innocentissimo filio de matris sinu deprompseris, hanc hi tales viri comprobabunt? esto: in tabellis nihil est auctoritatis: quid, ipsa quaestio iudicibus, quid, amicis hospitibusque Oppianici, quos adhibuerat antea, quid, huic tandem ipsi tempori cur non servata est? quid istis hominibus factum est [Stratone et Nicostrato]? quaero abs te, Oppianice,<sup>187</sup> servo tuo Nicostrato quid factum esse dicas; quem tu, cum hunc brevi tempore accusaturus esses, Romam deducere, dare potestatem indicandi, incolumem denique servare quaestioni, servare his iudicibus, servare huic tempori debuisti; nam Stratonem quidem, iudices, in crucem esse actum exsecta scitote lingua; quod nemo Larinatum est qui nesciat; timuit mulier amens non suam conscientiam, non odium municipum, non famam omnium, sed quasi non omnes eius sceleris testes essent futuri, sic metuit, ne condemnaretur extrema servi voce morientis.

Quod hoc portentum, di immortales! quod tantum<sup>188</sup> monstrum in ullis locis, quod tam infestum scelus et im-



mane aut unde natum esse dicamus? iam enim videtis profecto, iudices, non sine necessariis me ac maximis causis principio orationis meae de matre dixisse: nihil est enim mali, nihil sceleris quod illa non ab initio filio voluerit, optaverit, cogitaverit, effecerit. mitto illam primam libidinis iniuriam, mitto nefarias generi nuptias, mitto cupiditate matris expulsam ex matrimonio filiam, quae nondum ad huiusce vitae periculum, sed ad commune familiae dedecus pertinebant; nihil de alteris Oppianici nuptiis queror, quarum illa cum obsides filios ab eo mortuos acceperisset, tum denique in familiae luctum atque in privignorum funus nupsit; praetereo, quod A. Aurium, cuius illa quondam socrus, paulo ante uxor fuisset, cum Oppianici esse opera proscriptum occisumque cognosset, eam sibi domum sedemque delegit, in qua cotidie superioris viri mortis indicia et spolia fortunarum videret: 189 illud primum queror, de illo scelere, quod nunc denique patefactum est, Fabriciani veneni; quod iam tum recens suspiciosum ceteris, huic incredibile, nunc vero apertum iam omnibus ac manifestum videtur: non est profecto de illo veneno celata mater; nihil est ab Oppianico sine consilio mulieris cogitatum; quod si esset, certe postea, deprehensa re non illa ut a viro improbo discessisset, sed ut a crudelissimo hoste fugisset domumque illam in per- 190 petuum scelerum omnium adfluentem reliquisset: non modo id non fecit, sed ab illo tempore nullum locum praetermisit, in quo non strueret insidias aliquas ac dies omnis atque noctis tota mente mater de pernicie filii cogitaret; quae primum ut illum confirmaret Oppianicum accusatorem filio suo, donis, muneribus, conlocatione filiae, spe 67 hereditatis obstrinxit. ita quod apud ceteros novis inter propinquos susceptis inimicitiis saepe fieri divortia atque adfinitatum discidia vidimus, haec mulier satis firmum accusatorem filio suo fore neminem putavit, nisi qui in matrimonium sororem eius antea duxisset; ceteri novis adfinitatibus adducti veteres inimicitias saepe deponunt; illa sibi ad confirmandas inimicitias adfinitatis coniunctio- 191 nem pignori fore putavit. neque in eo solum diligens fuit, ut accusatorem filio suo compararet, sed etiam cogitavit, quibus eum rebus armaret; hinc enim illae solli-

citationes servorum et minis et promissis, hinc illae infinitae crudelissimaeque de morte Oppianici quaestiones; quibus finem aliquando non mulieris modus, sed amicorum auctoritas fecit. ab eodem scelere illae triennio post habitae Larini quaestiones; eiusdem amentiae falsae conscriptiones quaestionum; ex eodem furore etiam illa conscelerata exsectio linguae; totius denique huius ab illa est et inventa et adornata comparatio criminis. atque his<sup>192</sup> rebus cum instructum accusatorem filio suo Romam misisset, ipsa paulisper conquirendorum et conducendorum testium causa Larini est commorata; postea autem quam appropinquare huius iudicium ei nuntiatum est, confestim huc advolavit, ne aut accusatoribus diligentia aut pecunia testibus deesset aut ne forte mater hoc sibi optatissimum spectaculum huius sordium atque luctus et tanti squaloris amitteret. iam vero quod iter Romam eius mulieris fuisse<sup>68</sup> existimatis? quod ego propter vicinitatem Aquinatium et Fabraternorum ex multis audiui et comperi; quos concursus in his oppidis? quantos et virorum et mulierum gemitus esse factos? mulierem quandam Larino atque illam usque a mari supero Romam proficisci cum magno comitatu et pecunia, quo facilius circumvenire iudicio capitis atque opprimere filium possit! nemo erat illorum, paene dicam, quin expiandum illum locum esse arbitraretur, quaecumque illa iter fecisset; nemo quin terram ipsam<sup>193</sup> violari, quae mater est omnium, vestigiis consceleratae matris putaret. itaque nullo in oppido consistendi potestas ei fuit; nemo ex tot hospitibus inventus est qui non contagionem aspectus fugeret: nocti se potius ac solitudini quam ulli aut urbi aut hospiti committebat. nunc vero<sup>194</sup> quid agat, quid moliatur, quid denique cotidie cogitet quem ignorare nostrorum putat? quos appellarit, quibus pecuniam promiserit, quorum fidem pretio labefactare conata sit tenemus; quin etiam nocturna sacrificia, quae putat occultiora esse, sceleratasque eius preces et nefaria vota cognovimus; quibus illa etiam deos immortalis de suo scelere testatur neque intellegit pietate et religione et iustis precibus deorum mentis, non contaminata superstitione neque ad scelus perficiendum caesis hostiis posse placari: cuius ego furorem atque crudelitatem deos im-

69 mortalis a suis aris atque templis aspernatos esse confido.  
 195 vos iudices, quos huic A. Cluentio quasi aliquos deos ad  
 omne vitae tempus fortuna esse voluit, huius importuni-  
 tatem matris a filii capite depellite. multi saepe in iudi-  
 cando peccata liberum parentum misericordiae concesse-  
 runt: vos ne huius honestissime actam vitam matris  
 crudelitati condonetis rogamus, praesertim cum ex altera  
 parte totum municipium videre possitis. omnes scitote,  
 iudices, — incredibile dictu est, sed a me verissime dice-  
 tur — omnis Larinatis, qui valuerunt, venisse Romam,  
 ut hunc studio frequentiaque sua quantum possent in tanto  
 eius periculo sublevarent: pueris illud hoc tempore et  
 mulieribus oppidum scitote esse traditum, idque in prae-  
 sentia, communi Italiae pace, non domesticis copiis esse  
 tutum; quos tamen ipsos aeque et eos, quos praesentis  
 videtis, huius expectatio iudicii dies noctisque sollicitat:  
 196 non illi vos de unius municipis fortunis arbitrantur, sed  
 de totius municipii statu, dignitate commodisque omnibus  
 sententias esse laturos; summa est enim, iudices, hominis  
 in communem municipii rem diligentia, in singulos muni-  
 cipes benignitas, in omnis homines iustitia et fides; prae-  
 terea nobilitatem illam inter suos locumque a maioribus  
 traditum sic tuetur, ut maiorum gravitatem, constantiam,  
 gratiam, liberalitatem adsequatur; itaque eis cum verbis  
 publice laudant, ut non solum testimonium suum iudi-  
 ciumque significant, verum etiam curam animi ac dolo-  
 rem; quae dum laudatio recitatur, vos quaeso, qui cam  
 197 detulistis, adsurgite. ex lacrimis horum, iudices, existi-  
 mare potestis, omnis haec decuriones decrevisse lacri-  
 mantis. age vero, vicinorum quantum studium, quam  
 incredibilis benevolentia, quanta cura est! non illi in  
 libellis laudationem decretam miserunt, sed homines ho-  
 nestissimos, quos nossemus omnes, huc frequentis adesse  
 et hunc praesentis laudare voluerunt. adsunt Ferentani,  
 homines nobilissimi, Marrucini item pari dignitate; Teano  
 Apulo atque Luceria equites Romanos, homines honestis-  
 simos, laudatores videtis; Boviano totoque ex Samnio  
 cum laudationes honestissimae missae sunt tum homines  
 198 amplissimi nobilissimique venerunt. iam qui in agro La-  
 rinati praedia, qui negotia, qui res pecuarias habent, ho-

nesti homines et summo splendore praediti, difficile dictu est quam sint solliciti, quam laborent: non multi mihi ab uno sic diligere videntur, ut hic ab his universis. quam 70 doleo abesse ab huius iudicio L. Volusienum, summo splendore hominem ac virtute praeditum! vellem praesentem possem P. Helvidium Rufum, equitem Romanum omnium ornatissimum, nominare! qui cum huius causa dies noctisque vigilaret et cum me hanc causam doceret, in morbum gravem periculosumque incidit; in quo tamen non minus de capite huius quam de sua vita laborat. Cn. Tudicii senatoris, viri optimi et honestissimi, par studium ex testimonio et laudatione cognoscetis. eadem spe, sed maiore verecundia de te, P. Volumni, quoniam iudex es in A. Cluentium, dicimus; et, ne longum sit, omnium vicinorum summam esse in hunc benevolentiam confirmamus. horum omnium studium, curam, diligentiam 199 meumque una laborem, qui totam hanc causam vetere instituto solus peroravi vestramque simul, iudices, aequitatem et mansuetudinem una mater oppugnat. at quae mater? quam caecam crudelitate et scelere ferri videtis, cuius cupiditatem nulla umquam turpitudine retardavit, quae vitiis animi in deterrimas partis iura hominum convertit omnia, cuius ea stultitia est, ut eam nemo hominem, ea vis, ut nemo feminam, ea crudelitas, ut nemo matrem appellare possit. atque etiam nomina necessitudinum, non solum naturae nomen et iura mutavit: uxor generi, noverca filii, filiae pelex; eo iam denique adducta est, uti sibi praeter formam nihil ad similitudinem hominis reservarit.

Qua re, iudices, si scelus odistis, prohibete aditum 200 matris a filii sanguine, date parenti hunc incredibilem dolorem ex salute, ex victoria liberum; patimini matrem, ne orbata filio laetetur, victam potius vestra aequitate discedere. sin autem, id quod vestra natura postulat, pudorem, veritatem virtutemque diligitis, levate hunc aliquando supplicem vestrum, iudices, tot annos in falsa invidia periculisque versatum, qui nunc primum post illam flammam aliorum facto et cupiditate excitatam spe vestrae aequitatis erigere animum et paulum respirare a metu coepit, cui posita sunt in vobis omnia, quem ser-



vatum esse plurimi cupiunt, servare soli vos potestis.  
201 orat vos Habitus, iudices, et flens obsecrat, ne se invidiae, quae in iudiciis valere non debet, ne matri, cuius vota et preces a vestris mentibus repudiare debetis, ne Oppianico, homini nefario, condemnato iam et mortuo,  
71 condonetis. quod si qua calamitas hunc in hoc iudicio afflixerit innocentem, ne iste miser, si, id quod difficile factu est, in vita remanebit, saepe et multum queretur deprehensum esse illud quondam Fabricianum venenum: quod si tum indicatum non esset, non huic acerrimissimo venenum illud fuisset, sed multorum medicamentum maerorum; postremo etiam fortassis mater exsequias illius funeris prosecuta mortem se filii lugere simulasset. nunc vero quid erit profectum, nisi ut huius ex mediis mortis insidiis vita ad luctum conservata, mors sepulcro patris  
202 privata esse videatur? satis diu fuit in miseris, iudices; satis multos annos ex invidia laboravit; nemo huic tam iniquus praeter parentem fuit, cuius non animum iam expletum esse putemus. vos, qui aequi estis omnibus, qui, ut quisque crudelissime oppugnatur, eum lenissime sublevatis, conservate A. Cluentium; restituite incolumem municipio; amicis, vicinis, hospitibus, quorum studia videtis, reddite; vobis in perpetuum liberisque vestris obstringite. vestrum est hoc, iudices, vestrae dignitatis, vestrae clementiae; recte hoc repetitur a vobis, ut virum optimum atque innocentissimum plurimisque mortalibus carissimum atque iucundissimum his aliquando calamitatibus liberetis, ut omnes intellegant in contionibus esse invidiae locum, in iudiciis veritati.

---

M. TULLII CICERONIS  
DE LEGE AGRARIA ORATIO PRIMA  
CONTRA P. SERVILIUM RULLUM TR. PLEB.  
IN SENATU.

DESUNT PERMULTA.

1. Praedam, manubias, sectionem, castra denique Cn. Pompei sedente imperatore xviri vendent. .

2. imberba iuventute.

3. venibit igitur sub praecone tota Propontis atque Hellespontus; addicetur omnis ora Lyciorum atque Ciliicum; Mysia et Phrygia eidem condicioni legique parebunt.

\* quae res aperte petebatur, ea nunc [occulte] cuni-<sup>1</sup>  
culis oppugnatur. dicent enim xviri, id quod et dici-<sup>1</sup>  
tur a multis et saepe dictum est, post eosdem consules  
regis Alexandri testamento regnum illud populi Romani  
esse factum. dabitis igitur Alexandriam clam petentibus  
his, quibus apertissime pugnantibus restitistis? haec, per  
deos immortalis! utrum esse vobis consilia siccorum an  
vinolentorum somnia, et utrum cogitata sapientium an  
optata furiosorum videntur?

Videte nunc proximo capite ut impurus heluo turbet<sup>2</sup>  
rem publicam, ut a maioribus nostris possessiones re-  
lictas disperdat ac dissipet, ut sit non minus in populi  
Romani patrimonio nepos quam in suo. perscribit in sua  
lege vectigalia, quae xviri vendant, hoc est, perscribit  
auctionem publicorum bonorum: agros emi volt qui divi-  
dantur; quaerit pecuniam. videlicet excogitabit aliquid  
atque adferet. nam superioribus capitibus dignitas po-  
puli Romani violabatur, nomen imperii in commune odium  
orbis terrae vocabatur, urbes pacatae, agri sociorum,  
regum status xviris donabantur; nunc praesens, certa  
pecunia numerata quaeritur. exspecto quid tribunus<sup>3</sup>  
plebis vigilans et acutus excogitet. 'veneat' inquit 'silva  
Scantia.' utrum tandem hanc silvam in relictis posses-

sionibus an in censorum pascuis invenisti? si quid est quod indagaris, inveneris, ex tenebris erueris, quamquam iniquum est, tamen consume sane, quando commodum est, quando quidem tu attulisti: silvam vero tu Scantiam vendas nobis consulibus atque hoc senatu? tu ullum vectigal attingas? tu populo Romano subsidia belli, tu ornamenta pacis eripias? tum vero hoc me inertiores consules iudicabo quam illos fortissimos viros, qui apud maiores nostros fuerunt, quod, quae vectigalia illis consulibus populo Romano parta sunt, ea me consule ne retineri quidem potuisse iudicabuntur. vendit Italiae possessiones ex ordine omnis. sane est in eo diligens; nullam enim praetermittit. persequitur in tabulis censoriis totam Siciliam; nullum aedificium, nullos agros relinquit. audistis auctionem populi Romani proscriptam a tribuno plebis, constitutam in mensem Ianuarium et, credo, non dubitabitis quin idcirco haec aerarii causa non vendiderint ei, qui armis et virtute pepererunt, ut esset quod nos largitionis causa venderemus.

5 Videte nunc quod adfectent iter apertius quam antea. nam superiore parte legis quem ad modum Pompeium oppugnarent a me indicati sunt; nunc iam se ipsi indicabunt. iubent venire agros Attalensium atque Olympenorum, quos populo Romano P. Servilii, fortissimi viri, victoria adiunxit; deinde agros in Macedonia regiones, qui partim T. Flaminii, partim L. Pauli [qui Persen vicit,] virtute parti sunt; deinde agrum optimum et fructuosissimum Corinthium, qui L. Mummii imperio ac felicitate ad vectigalia populi Romani adiunctus est; post autem agros in Hispania apud Karthaginem novam, duorum Scipionum eximia virtute possessos; tum ipsam veterem Karthaginem vendunt, quam P. Africanus nudatam tectis atque moenibus, sive ad notandam Karthaginensium calamitatem sive ad testificandam nostram victoriam sive ad oblatam aliquam religionem, ad aeternam hominum  
6 memoriam consecravit. his insignibus atque infulis imperii venditis, quibus ornatam nobis maiores nostri rem publicam tradiderunt, iubent eos agros venire, quos rex Mithridates in Paphlagonia, Ponto Cappadociaque possederit. num obscure videntur prope hasta praeconis insectari

Cn. Pompeii exercitum qui venire iubeant eos ipsos agros, in quibus ille etiam nunc bellum gerat atque versetur?

Hoc vero cuius modi est, quod eius auctionis, quam<sup>3</sup><sub>7</sub> constituunt, locum sibi nullum definiunt? nam xviris, quibus in locis ipsis videatur, vendendi potestas lege permittitur. censoribus vectigalia locare nisi in conspectu populi Romani non licet: his vendere vel in ultimis terris licebit? at hoc etiam nequissimi homines consumptis patrimoniis faciunt, ut in atriis auctionariis potius quam in triviis aut in compitis auctionentur: hic permittit sua lege xviris, ut in quibus commodum sit tenebris, ut in qua velint solitudine bona populi Romani possint divendere. iam illa omnibus in provinciis, regnis, liberis<sup>8</sup> populis quam acerba, quam formidolosa, quam quaestuosa concursatio xviralis futura sit non videtis? hereditatum obeundarum causa quibus vos legationes dedistis, qui et privati et privatum ad negotium exierunt, non maximis opibus neque summa auctoritate praediti, tamen auditis profecto quam graves eorum adventus sociis nostris esse soleant: quam ob rem quid putatis impendere hac<sup>9</sup> lege omnibus gentibus terroris et mali, cum mittantur in orbem terrarum xviiri summo cum imperio, summa cum avaritia infinitaque omnium rerum cupiditate? quorum cum adventus gravis, cum fascēs formidolosi, tum vero iudicium ac potestas erit non ferenda; licebit enim quod videbitur publicum iudicare, quod iudicarint vendere. etiam illud, quod homines sancti non facient, ut pecuniam accipiant, ne vendant, tamen id eis ipsum per legem licebit: hinc vos quas spoliationes, quas pactiones, quam denique in omnibus locis nundinationem iuris ac fortunarum fore putatis? etenim quod superiore parte<sup>10</sup> legis praefinitum fuit, SULLA ET POMPEIO CONSULIBUS, id rursus liberum infinitumque fecerunt: iubet eosdem<sup>4</sup> xviros omnibus agris publicis pergrande vectigal imponere, ut eidem possint et liberare agros quos commodum sit et quos ipsis libeat publicare; quo in iudicio perspici non potest, utrum severitas acerbior an benignitas quaestuosior sit futura. sunt tamen in tota lege exceptiones duae, non tam iniquae quam suspitiosae: excipit [enim] in vectigali imponendo agrum Recentoricum Siciliensem,



in vendendis agris eos agros, de quibus cautum sit foedere: hi sunt in Africa, qui ab Hiempsale possidentur.  
 11 hic quaero: si Hiempsali satis est cautum foedere et Recentoricus ager privatus est, quid attinet excipi? sin et foedus illud habet aliquam dubitationem et ager Recentoricus dicitur non numquam esse publicus, quem putat existimaturum duas causas in orbe terrarum repertas, quibus gratis parceret?

Num quisnam tandem abstrusus nummus usquam videtur, quem non architecti huiusce legis olfecerint? provincias, civitates liberas, socios, amicos, reges denique exhauriunt; admovent manus vectigalibus populi Romani:  
 12 non est satis: audite vos, qui amplissimo populi senatusque iudicio exercitus habuistis et bella gessistis: QUOD AD QUEMQUE PERVENIT AUT PERVENERIT EX PRAEDA, EX MANUBIIS, EX AURO CORONARIO, QUOD NEQUE CONSUMPTUM IN MONUMENTO NEQUE IN AERARIUM RELATUM SIT, ID AD XVIROS REFERRI iubet. hoc capite multa sperant: in omnis imperatores heredesque eorum quaestionem suo iudicio comparant, sed maximam pecuniam se a Fausto ablaturus arbitrantur: quam causam suscipere iurati iudices noluerunt, hanc isti xviros suscipere \*. idcirco a iudicibus fortasse praetermissam esse arbitrantur, quod sit ipsis reservata.  
 13 deinde etiam in reliquum tempus diligentissime sancit, ut, quod quisque imperator habeat pecuniae, protinus ad xviros deferat. hic tamen excipit Pompeium, similime, ut mihi videtur, atque [ut] illa lege, qua peregrini Roma eiciuntur, Glaucippus excipitur; non enim hac exceptione unus adficitur beneficio, sed unus privatur iniuria. sed cui manubias remittit, in huius vectigalia invadit; iubet enim pecuniam, si qua post nos consules ex novis vectigalibus recipiatur, hac uti xviros; quasi vero non intellegamus haec eos vectigalia, quae Cn. Pompeius adiunxerit, [vendere] cogitare.

5  
 14 Videtis iam, patres conscripti, omnibus rebus et modis constructam et coacervatam pecuniam xviralem. minuetur huius pecuniae invidia; consumetur enim in agrorum emptionibus. optime. quis ergo emet agros istos? eidem xviri: tu, Rulle — missos enim facio ceteros — emes quod voles; vendes quod voles; utrum-

que horum facies quanti voles. cavet enim vir optimus ne emat ab invito; quasi vero non intellegamus ab invito emere iniuriosum esse, ab non invito quaestuosum. quantum tibi agri vendet, ut alios omittam, socer tuus? et, si ego eius aequitatem animi probe novi, vendet non invitus? facient idem ceteri libenter, ut possessionis invidiam pecunia commutent, accipiant quod cupiunt, dent quod retinere vix possunt.

Nunc prospicite omnium rerum infinitam atque intolerandam licentiam: pecunia coacta est ad agros emendos: ei porro ab invitis non ementur. si consenserint possessores non vendere, quid futurum est? referetur pecunia? non licet. exigetur? vetat. verum esto: nihil est quod non emi possit, si tantum des, quantum velit venditor. spoliemus orbem terrarum, vendamus vectigalia, effundamus aerarium, ut locupletatis aut invidiae aut pestilentiae possessoribus, agri tamen emantur. quid tum? quae erit in istos agros deductio? quae totius rei ratio atque descriptio? 'deducentur' inquit 'coloniae.' quo? quorum hominum? in quae loca? quis enim non videt in coloniis esse haec omnia considerata? tibi nos, Rulle, et istis tuis harum omnium rerum machinatoribus totam Italiam inermem tradituros existimasti, quam praesidiis confirmaretis, coloniis occuparetis, omnibus vinclis devinctam et constrictam teneretis? ubi enim cavetur ne in Ianiculo coloniam constituatis, ne urbem hanc urbe alia premere atque urgere possitis? 'non faciemus' inquit. primum nescio; deinde timeo; postremo non committam, ut vestro beneficio potius quam nostro consilio salvi esse possimus. quod vero totam Italiam vestris coloniis complere voluistis, id neminem nostrum cuius modi esset intellecturum existimastis? scriptum est enim: QUAE IN MUNICIPIA QUASQUE IN COLONIAS XVIRI VELINT, DEDUCANT COLONOS QUOS VELINT ET EIS AGROS ADSIGNENT QUIBUS IN LOCIS VELINT; ut, cum totam Italiam militibus suis occuparint, nobis non modo dignitatis retinendae, sed ne libertatis quidem recuperandae spes relinquatur. atque haec a me suspicionibus et coniectura coarguuntur: iam omnis omnium tolletur error; iam aperte ostendent sibi nomen huius rei publicae, sedem urbis atque imperii,

denique hoc templum Iovis Optimi Maximi atque hanc arcem omnium gentium displicere: Capuam deduci colonos volunt; illam urbem huic urbi rursus opponere, illuc opes suas deferre et imperii nomen transferre cogitant. qui locus propter ubertatem agrorum abundantiamque rerum omnium, superbiam et crudelitatem genuisse dicitur, ibi nostri coloni delecti ad omne facinus a xviris conlocabuntur, et, credo, qua in urbe homines in vetere dignitate fortunaque nati copiam rerum moderate ferre non potuerunt, in ea isti vestri satellites modesti insolentiam suam continebunt. maiores nostri Capua magistratus, senatum, consilium commune, omnia denique insignia rei publicae sustulerunt, neque aliud quicquam nisi inane nomen Capuae reliquerunt, non crudelitate — quid enim illis fuit clementius, qui etiam externis hostibus victis sua saepissime reddiderunt? — sed consilio, quod videbant, si quod rei publicae vestigium illis moenibus contineretur, urbem ipsam imperio domicilium praebere posse. vos haec, nisi evertere rem publicam cuperitis ac vobis novam dominationem comparare, credo, quam <sup>7</sup> perniciosa essent non videretis? quid enim cavendum est <sup>20</sup> in colonis deducendis? si luxuries, Hannibalem ipsum Capua corripuit; si superbia, nata esse ibi ex Campanorum fastidio videtur; si praesidium, non praeponitur huic urbi ista colonia, sed opponitur. at quem ad modum armatur, di immortales! nam bello Punico, quicquid potuit Capua, potuit ipsa per sese: nunc omnes urbes, quae circum Capuam sunt, a colonis per eosdem xviros occupabuntur; hanc enim ob causam permittit ipsa lex, IN OMNIA QUAE VELINT OPPIDA COLONOS UT XVIRI DEDUCANT QUOS VELINT.

Atque his colonis agrum Campanum ac Stellatensem campum dividi iubet. non queror diminutionem vectigalium, non flagitium huius iacturae atque damni, praetermitto illa, quae nemo est quin gravissime et verissime conqueri possit, nos caput patrimonii publici, pulcherrimam populi Romani possessionem, subsidium annonae, horreum belli, sub signo claustrisque rei publicae positum [vectigal] servare non potuisse; eum denique nos agrum P. Rullo concessisse, qui ager ipse per sese et Sullanæ

dominationi et Gracchorum largitioni restitisset; non dico hoc solum in re publica vectigal esse, quod amissis aliis remaneat, intermissis non conquiescat, in pace niteat, in bello non obsolescat, militem sustentet, hostem non pertimescat; praetermitto omnem hanc orationem et contioni reservo; de periculo salutis ac libertatis loquor: quid enim existimatis integrum nobis in re publica fore aut in nostra libertate ac dignitate retinendum, cum Rullus atque ei, quos multo magis quam Rullum timetis, cum omni egentium atque improborum manu, cum omnibus copiis, cum omni argento et auro Capuam et urbis circa Capuam occuparint? his ego rebus, patres conscripti, resistam vehementer atque acriter neque patiar homines ea me consule expromere, quae contra rem publicam iam diu cogitarunt.

Errastis, Rulle, vehementer et tu et non nulli consules tui, qui sperastis vos contra consulem veritate, non ostentatione popularem posse in evertenda re publica populares existimari. lacesso vos; in contionem voco; populo Romano disceptatore uti volo. etenim, et circumspiciamus omnia, quae populo grata atque iucunda sunt, nihil tam populare quam pacem, quam concordiam, quam otium reperiemus. sollicitam mihi civitatem suspitione, suspensam metu, perturbatam vestris legibus et contionibus et deductionibus tradidistis; spem improbis ostendistis, timorem bonis inieciistis; fidem de foro, dignitatem de re publica sustulistis: hoc metu atque hac perturbatione animorum atque rerum, cum populo Romano vox et auctoritas consulis repente in tantis tenebris inluxerit, cum ostenderit nihil esse metuendum, nullum exercitum, nullam manum, nullas colonias, nullam venditionem vectigalium, nullum imperium novum, nullum regnum xvirale, nullam alteram Romanam neque aliam sedem imperii nobis consulibus futuram summamque tranquillitatem pacis atque otii, verendum, credo, nobis erit ne vestra ista praeclara lex agraria magis popularis esse videatur; cum vero scelera consiliorum vestrorum fraudemque legis et insidias, quae ipsi populo Romano a popularibus tribunis plebis fiant, pertimescam, credo, ne mihi non liceat contra vos in contione consistere, praesertim cum mihi deliberatum et constitutum sit, ita gerere consulatum, quo



uno modo geri graviter et libere potest, ut neque provinciam neque honorem neque ornamentum aliquod aut commodum neque rem ullam, quae a tribuno plebis impediri possit, appetiturus sim: dicit frequentissimo senatu  
26 consul Kalendis Ianuariis sese, si status hic rei publicae maneat neque aliud negotium exstiterit quod honeste subterfugere non possit, in provinciam non iturum: sic me in hoc magistratu geram populi Romani, ut possim tribunum plebis rei publicae iratum coërcere, mihi iratum contemnere.

9 Quam ob rem, per deos immortalis! conligite vos, tribuni plebis; deserite eos, a quibus, nisi prospicitis, brevi tempore deseremini; conspirate nobiscum; consentite cum bonis; communem rem publicam communi studio atque amore defendite. multa sunt occulta rei publicae volnera, multa nefariorum civium pernicio consilia, nullum externum periculum est, non rex, non gens ulla, non natio pertimescenda est: inclusum malum, intestinum ac domesticum est: huic pro se quisque nostrum mederi  
27 atque hoc omnes sanare velle debemus. erratis, si senatum probare ea, quae a me dicuntur, putatis, populum autem esse in alia voluntate: omnes, qui se incolumis volent, sequuntur auctoritatem consulis, soluti a cupiditatibus, liberi a deliciis, cauti in periculis, non timidi in contentionibus. quod si qui vestrum spe ducitur se posse turbulenta ratione honori velificari suo, primum me consule id sperare desistat, deinde habeat ipsum me sibi documento, quem equestri ortum loco consulem videt, quae vitae via facillime viros bonos ad honorem dignitatemque perducatur. quod si vos vestrum mihi studium, patres conscripti, ad communem dignitatem defendendam profiteremini, perficiam profecto id, quod maxime res publica desiderat, ut huius ordinis auctoritas, quae apud maiores nostros fuit, eadem nunc intervallo rei publicae restituta esse videatur.

---

M. TULLII CICERONIS  
DE LEGE AGRARIA ORATIO SECUNDA  
CONTRA P. SERVILIUM RULLUM TR. PLEB.  
AD POPULUM.

Est hoc in more positum, Quirites, institutoque maiorum, ut ei, qui beneficio vestro imagines familiae suae consecuti sunt, eam primam habeant orationem, qua gratiam beneficii vestri cum suorum laude coniungant; qua in oratione non nulli aliquando digni maiorum loco reperiuntur, plerique autem hoc perficiunt, ut tantum maioribus eorum debitum esse videatur, unde etiam quod posteris solveretur, redundaret. mihi quidem apud vos de meis maioribus dicendi facultas non datur, non quo non tales fuerint, qualis nos illorum sanguine creatos disciplinae institutos videtis, sed quod laude populari atque honoris vestri luce caruerunt. de me autem ipso vereor ne adrogantis sit apud vos dicere, ingrati tacere; nam et quibus studiis hanc dignitatem consecutus sim memet ipsum commemorare perquam grave est et silere de tantis vestris beneficiis nullo modo possum; qua re adhibebitur a me certa ratio moderatioque dicendi, ut quid a vobis acceperim commemorem; qua re dignus vestro summo honore sim singularique iudicio, [ipse modice dicam, si necesse erit,] vos eosdem existimatuos putem, qui iudicavistis. me perlongo intervallo prope memoriae temporumque nostrorum primum hominem novum consulem fecistis et eum locum, quem nobilitas praesidiis firmatum atque omni ratione obvallatum tenebat, me duce rescidistis virtutisque in posterum patere voluistis; nec me tantum modo consulem, quod ipsum est per se amplissimum, sed ita fecistis, quo modo pauci [nobiles] in hac civitate consules facti sunt, novus ante me nemo. nam profecto si recordari volueritis de novis hominibus,

reperietis eos, qui sine repulsa consules facti sunt, diuturno labore atque aliqua occasione esse factos, cum multis annis post petissent, quam praetores fuissent, aliquanto serius, quam per aetatem ac per leges liceret; qui autem anno suo petierunt, sine repulsa non esse factos: me esse unum ex omnibus novis hominibus, de quibus meminisse possumus, qui consulatum petierim, cum primum licitum sit, consul factus sim, cum primum petierim, ut vester honos ad mei temporis diem petitus, non ad alienae petitionis occasionem interceptus, nec diuturnis precibus efflagitatus, sed dignitate impetratus esse videatur. est illud amplissimum, quod paulo ante commemoravi, Quirites, quod hoc honore ex novis hominibus primum me multis posthabitis adfecistis, quod prima petitione, quod anno meo; sed tamen magnificentius atque ornatius esse illo nihil potest, quod meis comitiis non tabellam vindicem tacitae libertatis, sed vocem unam prae vobis indicem vestrarum erga me voluntatum ac studiorum tulistis: itaque me non extrema [tribus] suffragiorum, sed primi illi vestri concursus, neque singulae voces praeconum, sed una voce universus populus Romanus consulem declaravit. hoc ego tam insigne, tam singulare vestrum beneficium, Quirites, cum ad animi mei fructum atque laetitiam duco esse permagnum, tum ad curam sollicitudinemque multo maius; versantur enim, Quirites, in animo meo multae et graves cogitationes, quae mihi nullam partem neque nocturnae neque diurnae quietis imperiunt: primum tuendi consulatus, quae cum omnibus est difficilis et magna ratio, tum vero mihi praeter ceteros, cuius errato nulla venia, recte facto exigua laus et ab invitis expressa proponitur; non dubitanti fidele consilium, non laboranti certum subsidium nobilitatis ostenditur.

<sup>3</sup> quod si solus in discrimen aliquod adducerer, ferrem,

<sup>6</sup> Quirites, animo aequiore, sed mihi videntur certi homines, si qua in re me non modo consilio, verum etiam casu lapsum esse arbitrabuntur, vos universos, qui me antetuleritis nobilitati, vituperaturi; mihi autem, Quirites, omnia potius perpetienda esse duco, quam non ita gerendum consulatum, ut in omnibus meis factis atque consiliis vestrum de me factum consiliumque laudetur. acce-

dit etiam ille mihi summus labor ac difficillima ratio consulatus gerendi, quod non eadem mihi qua superioribus consulibus lege et condicione utendum esse decrevi, qui aditum huius loci conspectumque vestrum partim magno opere fugerunt, partim non vehementer secuti sunt; ego autem non solum hoc in loco dicam, ubi est dictu [id] facillimum, sed in ipso senatu, in quo esse locus huic voci non videbatur, popularem me futurum esse consulem prima illa mea oratione Kalendis Ianuariis dixi; neque enim 7 ullo modo facere possum, ut, cum me intellegam non hominum potentium studio, non excellentibus gratiis paucorum, sed universi populi Romani iudicio consulem ita factum, ut nobilissimis hominibus longe praeponerem, non et in hoc magistratu et in omni vita sim popularis. sed mihi ad huiusce *verbi* vim et interpretationem vehementer opus est vestra sapientia: versatur enim magnus error propter insidiosas non nullorum simulationes, qui cum populi non solum commoda, verum etiam salutem oppugnant et impediunt, oratione adsequi volunt, ut populares esse videantur. ego qualem Kalendis Ianuariis 8 acceperim rem publicam, Quirites, intellego: plenam sollicitudinis, plenam timoris; in qua nihil erat mali, nihil adversi, quod non boni metuerent, improbi exspectarent: omnia turbulenta consilia contra hunc rei publicae statum et contra vestrum otium partim iniri, partim nobis consulibus designatis inita esse dicebantur; sublata erat de foro fides, non ictu aliquo novae calamitatis, sed suspicionem ac \* [perturbationem iudiciorum, infirmationem rerum iudicatarum] novae dominationes, extraordinaria non imperia, sed regna quaeri putabantur. quae cum ego non 4 solum suspicarer, sed plane cernerem, neque enim obscure gerebantur, dixi in senatu in hoc magistratu me popularem consulem futurum. quid enim est tam populare quam pax? qua non modo ei, quibus natura sensum dedit, sed etiam tecta atque agri mihi laetari videntur. quid tam populare quam libertas? quam non solum ab hominibus, verum etiam a bestiis expeti atque omnibus rebus anteponi videtis. quid tam populare quam otium? quod ita iucundum est, ut et vos [et maiores vestri] et fortissimus quisque vir maximos labores susci-



- piendos putet, ut aliquando in otio possit esse, praesertim in imperio ac dignitate; quin idcirco etiam maioribus nostris praecipuam laudem gratiamque debemus, quod eorum labore est factum, ut impune in otio esse possimus. qua re qui possum non esse popularis, cum videam haec omnia, Quirites, pacem externam, libertatem propriam generis ac nominis vestri, otium domesticum, denique omnia, quae vobis cara atque ampla sunt, in fidem et quodam modo in patrocinium mei consulatus esse conlata?
- 10 neque enim, Quirites, illud vobis iucundum aut populare debet videri, largitio aliqua promulgata, quae verbis ostentari potest, re vera fieri nisi exhausto aerario nullo pacto potest; neque vero illa popularia sunt existimanda, iudiciorum perturbationes, rerum iudicatarum infirmationes, restitutio damnatorum, qui civitatum adflictarum perditis iam rebus extremi exitiorum solent esse exitus; neque si qui agros populo Romano pollicentur, si aliud quiddam obscure moliantur, aliud spe ac specie simulationis ostentant, populares existimandi sunt.
- 5 Nam vere dicam, Quirites, genus ipsum legis agrariae vituperare non possum. venit enim mihi in mentem, duos clarissimos, ingeniosissimos, amiceissimos plebi Romanae viros, Tiberium et Gaium Gracchos, plebem in agris publicis constituisse, qui agri a privatis antea possidebantur; non sum autem ego is consul, qui, ut plerique, nefas esse arbitrer Gracchos laudare, quorum consiliis, sapientia, legibus multas esse video rei publicae
- 11 partis constitutas. itaque, ut initio mihi designato consuli nuntiabatur legem agrariam tribunos plebis designatos conscribere, cupiebam quid cogitarent cognoscere; etenim arbitrabar, quoniam eodem anno gerendi nobis essent magistratus, esse aliquam oportere inter nos rei publicae
- 12 bene administrandae societatem: cum familiariter me in eorum sermonem insinuarem ac darem, celabar, excluderem, et cum ostenderem, si lex utilis plebi Romanae mihi videretur, auctorem me atque adiutorem futurum, tamen aspernabantur hanc liberalitatem meam; negabant me adduci posse, ut ullam largitionem probarem. finem feci offerendi mei, ne forte mea sedulitas aut insidiosa aut impudens videretur. interea non desistebant clam inter

se convenire, privatos quosdam adhibere, ad suos coetus occultos noctem adiungere et solitudinem; quibus rebus quanto in metu fuerimus ex vestra sollicitudine, in qua illis temporibus fuistis, facile adsequi coniectura poteritis. ineunt tandem magistratus tribuni plebis concitata iam pridem expectatione P. Rulli, quod et princeps erat agrariae legis et truculentius se gerebat quam ceteri. iam designatus alio vultu, alio vocis sono, alio incessu esse meditabatur, vestitu obsoletiore, corpore inculto et horrido, capillatio quam ante barbaque maiore, ut oculis et aspectu denuntiare omnibus vim tribuniciam et minitari rei publicae videretur. legem hominis contionemque expectabam. lex initio nulla proponitur: contionem in primis advocari iubet; summa cum expectatione concurratur: explicat orationem sane longam et verbis valde bonis: unum erat quod mihi vitiosum videbatur, quod tanta ex frequentia inveniri nemo potuit qui intellegere posset quid diceret — hoc ille utrum insidiarum causa fecerit, an hoc genere eloquentiae delectetur, nescio — tametsi si qui acutiores in contione steterant, de lege agraria nescio quid voluisse eum dicere suspicabantur. aliquando tandem, me designato, lex in publicum proponitur; concurrunt iussu meo plures uno tempore librarii; descriptam [ad me] legem adferunt. omni hoc vobis ratione confirmare possum, Quirites, hoc animo me ad legendam legem cognoscendamque venisse, ut, si eam vobis adcommodatam atque utilem esse intellegerem, auctor eius atque adiutor essem. non enim natura neque studio neque odio penitus insito bellum nescio quod habet susceptum consulatus cum tribunatu, quia persaepe scditiosis atque improbis tribunis plebis boni et fortes consules obstiterunt et quia vis tribunicia non numquam libidini restitit consulari: non potestatum dissimilitudo, sed animorum disiunctio dissensionem facit. itaque hoc animo legem sumpsit in manus, ut eam cuperem esse aptam vestris commodis et eius modi quam consul re, non oratione popularis et honeste et libenter posset defendere: atqui ego a primo capite legis usque ad extremum reperio, Quirites, nihil aliud cogitatum, nihil aliud susceptum, nihil aliud actum, nisi uti decem reges ae-

rarii, vectigalium, provinciarum omnium, totius rei publicae, regnorum, liberorum populorum, orbis denique terrarum domini constituerentur legis agrariae simulatione ac nomine. sic confirmo, Quirites, hac lege agraria, pulchra atque populari, dari vobis nihil, condonari certis hominibus omnia; ostentari populi Romani agros, eripi etiam libertatem; privatorum pecunias augeri, publicas exhauriri; denique, quod est indignissimum, per tribunum plebis, quem maiores praesidem libertatis custodem-  
 16 que esse voluerunt, reges in civitate constitui. quae cum exposuero, si falsa vobis videbuntur esse, sequar auctoritatem vestram, mutabo meam sententiam: sin insidias fieri libertati vestrae simulatione largitionis intellegetis, nolite dubitare plurimo sudore et sanguine maiorum vestrorum partam vobisque traditam libertatem nullo labore vestro consule adiutore defendere.

7 Primum caput est legis agrariae, quo, ut illi putant, temptamini leviter quo animo libertatis vestrae diminutionem ferre possitis: iubet enim tribunum plebis, qui eam legem tulerit, creare xviiros per tribus xvii, ut,  
 17 quem viii tribus fecerint, is xvir sit. hic quaero quam ob causam initium legum ac rerum suarum hinc duxerit, ut populus Romanus suffragio privaretur: totiens legibus agrariis curatores constituti sunt, iii viri, v viri, x viri; quaero a populari tribuno plebis, ecquando nisi per xxxv tribus creati sint; etenim cum omnis potestates, imperia, curationes ab universo populo Romano proficisci convenit tum eas profecto maxime, quae constituuntur ad populi fructum aliquem et commodum, in quo et universi deligant quem populo Romano maxime consulturum putent et unus quisque studio et suffragio suo viam sibi ad beneficium impetrandum munire possit: hoc tribuno plebis potissimum venit in mentem, populum Romanum universum privare suffragiis, paucas tribus, non certa condicione iuris, sed sortis beneficio fortuito ad usur-  
 18 pandam libertatem vocare. ITEM inquit EODEMQUE MODO, capite altero, UT COMITIS PONTIFICIS MAXIMI. ne hoc quidem vidit, maiores nostros tam fuisse popularis, ut, quod per populum creari fas non erat propter religionem sacrorum, in eo tamen propter amplitudinem sacerdotii voluerint

populo supplicari; atque hoc idem de ceteris sacerdotiis Cn. Domitius, tribunus plebis, vir clarissimus, tulit, quod populus per religionem sacerdotia mandare non poterat, ut minor pars populi vocaretur; ab ea parte qui esset factus, is a collegio cooptaretur. videte quid intersit inter <sup>19</sup> Cn. Domitium, tribunum plebis, virum nobilissimum, et P. Rullum, qui temptavit, ut opinor, patientiam vestram, cum se nobilem esse diceret: Domitius, quod per caerimonias populi fieri non poterat, ratione adsecutus est, ut id, quoad posset, quoad fas esset, quoad liceret, populi ad partes daret; hic, quod populi semper [proprium] fuit, quod nemo imminuit, nemo mutavit quin ei, qui populo agros essent adsignaturi, ante acciperent a populo beneficium quam darent, id totum eripere vobis atque e manibus extorquere conatus est. ille, quod dari populo nullo modo poterat, tamen quodam modo dedit; hic, quod adimi nullo pacto potest, tamen quadam ratione eripere conatur. quaeret quispiam in tanta iniuria tantaque impudentia quid spectarit: non defuit consilium; fides <sup>8</sup> erga plebem Romanam, aequitas in vos libertatemque <sup>20</sup> vestram vehementer defuit: iubet enim habere comitia xviris creandis eum, qui legem tulerit. hoc dicam planius: iubet Rullus, homo non cupidus neque appetens, habere comitia Rullum. nondum reprehendo; video fecisse alios: illud, quod nemo fecit, de minore parte populi, quo pertineat videte: habebit comitia; volet eos renuntiare, quibus regia potestas hac lege quaeritur; universo populo neque ipse committit neque illi horum consiliorum auctores committi recte putant posse: sortietur <sup>21</sup> tribus idem Rullus; homo felix educet quas volet [tribus]; quos novem tribus xviros fecerint, [ab eodem Rullo eductae] hos omnium rerum ut iam ostendam, dominos habebimus; atque hi, ut grati ac memores beneficii esse videantur, aliquid se novem tribuum notis hominibus debere confitebuntur, reliquis vero vi et xx tribubus nihil erit quod non putent posse suo iure denegare. quos tandem igitur xviros fieri volt? se primum. qui licet? leges enim sunt veteres neque eae consulares, si quid interesse hoc arbitramini, sed tribuniciae vobis maioribusque vestris vehementer gratae atque iucundae: Licinia



est lex et altera Aebutia, quae non modo eum, qui tulerit de aliqua curatione ac potestate, sed etiam conlegas eius, cognatos, adfinis excipit, ne eis ea potestas curatiove  
 22 mandetur. etenim si populo consulis, remove te a suspicionem alicuius tui commodi; fac fidem te nihil nisi populi utilitatem et fructum quaerere; sine ad alios potestatem, ad te gratiam beneficii tui pervenire; nam hoc quidem  
 9 ficientiae: quis legem tulit? Rullus. quis maiorem partem populi suffragiis prohibuit? Rullus. quis comitiis praefuit? quis tribus quas voluit vocavit nullo custode sortitus? quis xviros quos voluit renuntiavit? idem Rullus. quem principem renuntiavit? Rullum. vix mehercule servis hoc eum suis, non vobis omnium gentium dominis probaturum arbitrarer. optimae leges igitur hac lege sine ulla suspicionem *periculi* tollentur; idem lege sibi sua curationem petet; idem maiore parte populi suffragiis spoliata comitia habebit; *idem* quos volet atque in eis se ipsum renuntiabit et videlicet conlegas suos ascriptores legis agrariae non repudiabit, a quibus ei locus primus in indice et in praescriptione legis concessus est; ceteri fructus omnium rerum, qui in spe legis [huius] positi sunt, communi cautione atque aequa ex parte retinentur.

23 At videte hominis diligentiam, si aut Rullum cogitasse aut si Rullo potuisse in mentem venire arbitramini: viderunt ei, qui haec machinabantur, si vobis ex omni populo deligendi potestas esset data, quaecumque res esset, in qua fides, integritas, virtus, auctoritas quaeretur, vos eam sine dubitatione ad Cn. Pompeium principem delaturos. etenim quem unum ex cunctis delegissetis, ut cum omnibus omnium gentium bellis terra et mari praeponeretis, certe in xviris faciendis sive fides haberetur sive honos, et committi huic optime et ornari  
 24 hunc iustissime posse intellegebant. itaque excipitur hac lege non adulescentia, non legitimum aliquod impedimentum, non potestas, non magistratus ullus aliis negotiis [ac legibus] impeditus; reus denique, quo minus xvir fieri possit, non excipitur: Cn. Pompeius excipitur, ne cum P. Rullo, tacco de ceteris, xvir fieri possit: praesentem enim profiteri iubet, quod nulla alia in lege un-

quam fuit, ne in eis quidem magistratibus, quorum certus ordo est; ne, si accepta lex esset, illum sibi conlegam ascriberetis, custodem ac vindicem cupiditatum. hic 10 quoniam video vos hominis dignitate et contumelia legis esse commotos, renovabo illud, quod initio dixi, regnum comparari, funditus libertatem vestram hac lege tolli. an vos aliter existimabatis; cum ad omnia vestra pauci 25 homines [cupiditatis] oculos adiecissent, non eos in primis id acturos, ut ex omni custodia vestrae libertatis, ex omni potestate, curatione, patrocinio vestrorum commodorum Cn. Pompeius depelleretur? viderunt et vident, si per imprudentiam vestram, negligentiam meam, legem incognitam acciperetis, fore, ut postea, cognitis insidiis, cum xviros crearetis, tum vitiis omnibus et sceleribus legis Cn. Pompeii praesidium opponendum putaretis. et hoc parvum argumentum vobis erit a certis hominibus dominationem potestatemque omnium rerum quaeri, cum videatis eum, quem custodem vestrae libertatis fore videant, expertem fieri dignitatis?

Cognoscite nunc quae potestas xviris et quanta detur. 26 primum lege curiata xviros ornat. iam hoc inauditum et plane novo more, ut ei curiata lege magistratus detur, cui nullis comitiis ante sit datus. eam legem ab eo praetore populi Romani, qui sit primus factus, ferri iubet. at quo modo? ut ei xviratum habeant, quos plebs designaverit. oblitus est nullos ab plebe designari. et is orbem terrarum constringit novis legibus, qui, quod in secundo capite scriptum est, non meminit in tertio? atque hic perspicuum est quid iuris a maioribus acceperitis, quid ab hoc tribuno plebis vobis relinquatur: maiores de sin- 11 gulis magistratibus bis vos sententiam ferre voluerunt: nam cum centuriata lex censoribus ferebatur, cum curiata ceteris patriciis magistratibus, tum iterum de eisdem iudicabatur, ut esset reprehendendi potestas, si populum beneficii sui paeniteret; nunc, Quirites, illa prima comi- 27 tia tenetis, [centuriata et tributa,] curiata tantum auspiorum causa remanserunt; hic autem tribunus plebis, quia videbat potestatem neminem iniussu populi aut plebis posse habere, curiatis eam comitiis, quae vos non initis confirmavit; tributa, quae vestra erant, sustulit; ita, cum

maiores binis comitiis voluerint vos de singulis magistratibus iudicare, hic homo popularis ne unam quidem populo comitorum potestatem reliquit. sed videte hominis religionem et diligentiam: vidit et perspexit sine curiata lege xviros habere potestatem non posse, quoniam per novem tribus essent constituti; iubet ferre de his legem curiatam: praetori imperat. quam id ipsum absurde nihil ad me attinet; iubet enim, QUI PRIMUS SIT PRAETOR FACTUS, EUM LEGEM CURIATAM FERRE; SIN IS FERRE NON POSSIT, QUI POSTREMUS SIT, ut aut lusisse in tantis rebus aut profecto nescio quid spectasse videatur: verum hoc, quod est aut ita perversum, ut ridiculum, aut ita malitiosum, ut obscurum sit, relinquamus; ad religionem hominis revertamur: videt sine lege curiata nihil agi per xviros posse: 29 quid postea, si ea lata non erit? attendite ingenium: TUM EI XVIRI INQUIT EODEM IURE SENT, QUO QUI OPTIMA LEGE. si hoc fieri potest, ut in hac civitate, quae longe iure libertatis ceteris civitatibus antecellit, quisquam nullis comitiis imperium aut potestatem adsequi possit, quid attinet tertio capite legem curiatam ferre iubere, cum quarto permittas, ut sine lege curiata idem iuris habeant, quod haberent, si optima lege a populo essent creati? reges constituuntur, non xviri, Quirites, itaque ab his initiis fundamentalisque nascuntur, ut non modo cum gerere coeperint, sed etiam cum constituentur omne nostrum ius, potestas libertasque tollatur.

12  
30

At videte quam diligenter retineat ius tribuniciae potestatis: consulibus legem curiatam ferentibus a tribunis plebis saepe est intercessum; neque tamen nos id querimur, esse hanc tribunorum plebis potestatem; tantum modo, si quis ea potestate temere est usus, existimamus: hic tribunus plebis legi curiatae, quam praetor ferat, adimit intercedendi potestatem. atque hoc cum in eo reprehendendum est, quod per tribunum plebis tribunicia potestas minuitur, tum in eo deridendum, quod consuli, si legem curiatam non habet, attingere rem militarem non licet; huic, cui vetat intercedere, potestatem, etiam si intercessum sit, tamen eandem constituit quam si lata esset lex, ut non intellegam qua re aut hic vetet intercedere aut quemquam intercessurum putet, cum inter-

cessio stultitiam intercessoris significatura sit, non rem impeditura.

Sint igitur xviri neque veris comitiis, hoc est, populi suffragiis, neque illis ad speciem atque usurpationem vetustatis per xxx lictores auspiciorum causa adumbratis constituti: videte nunc eos, qui a vobis nihil potestatis acceperunt, quanto maioribus ornamentis adficiat, quam omnes nos adfecti sumus, quibus vos amplissimas potestates dedistis: iubet [auspicia] coloniarum deducendarum causa xv viros habere pullarios. EODEM IURE, inquit QUO HABUERUNT IUVIRI LEGE SEMPRONIA. audes etiam, Rulle, mentionem facere legis Semproniae? nec te ea lex ipsa commonet iuviros illos xxxv tribuum suffragio esse creatos? et, cum tu a Ti. Gracchi aequitate ac pudore longissime remotus sis, id, quod dissimillima ratione factum sit, eodem iure putas esse oportere? dat praeterea potestatem, verbo praetoriam, re vera regiam: definit in quinquennium, facit sempiternam; tantis enim confirmat opibus et copiis, ut in vitis eripi nullo modo possit; deinde ornat apparitoribus, scribis, librariis, praeconibus, architectis; praeterea mulis, tabernaculis, [centuriis,] suppellectili; sumptum haurit ex aerario, suppeditat a sociis; finitores ex equestri loco ducentos in annos singulos stipatores corporis constituit, eosdem ministros et satellites potestatis.

Formam adhuc habetis, Quirites, et speciem ipsam tyrannorum; insignia videtis potestatis, nondum ipsam potestatem: dixerit enim fortasse quispiam: 'quid me ista laedunt, scribe, lictor, praeco, pullarius?' omnia sunt haec huius modi, Quirites, ut ea qui habeat sine vestris suffragiis, aut rex non ferundus aut privatus furiosus esse videatur. at perspicite quanta potestas permittatur: non privatorum insaniam, sed intolerantiam regum esse dicetis. primum permittitur infinita potestas innumeralis pecuniae conficiendae de vestris vectigalibus non fruendis, sed alienandis; deinde orbis terrarum gentiumque omnium datur cognitio sine consilio, poena sine provocatione, animadversio sine auxilio; iudicare per quinquennium vel de consulibus vel de ipsis tribunis plebis poterunt, de illis interea nemo iudicabit; magistratus his



petere licebit, causam dicere non licebit; emere agros a quibus volent vel quos volent quam volent magno poterunt; colonias deducere novas, renovare veteres, totam Italiam suis coloniis ut complere liceat, permittitur; omnis provincias obeundi, liberos populos agris multandi, re-  
 gnorum vel dandorum summa potestas datur; cum velint Romae esse, cum commodum sit, quacumque velint summo cum imperio iudicioque rerum omnium vagari ut liceat, conceditur; interea dissolvant iudicia publica; de consiliis abducant quos velint; singuli de maximis rebus iudicent; quaestori permittant; finitorem mittant; ratum sit, quod finitor uni illi, a quo missus erit, renuntiaverit.  
<sup>14</sup> verbum mihi deest, Quirites, cum ego hanc potestatem  
<sup>35</sup> regiam appello, sed profecto maior est quaedam; nullum enim regnum fuit unquam quod non si minus iure aliquo, at regionibus tamen certis contineretur: hoc vero infinitum est, quo et regna omnia et imperium vestrum, quod latissime patet, et ea, quae partim libera a vobis, partim etiam ignorata vobis sunt, permissu legis continentur.

Datur igitur eis primum, ut eis liceat vendere omnia, de quibus vendendis senatus consulta facta sunt M. Tullio  
<sup>36</sup> Cn. Cornelio consulibus, postea. cur hoc tam est obscurum atque caecum? quid? ista omnia, de quibus senatus censuit, nominatim in lege perscribi nonne potuerunt? duae sunt huius obscuritatis causae, Quirites: una pudoris, si quis pudor esse potest in tam insigni impudentia, altera sceleris; nam neque ea, quae senatus nominatim vendenda censuit, audet appellare; sunt enim loca publica urbis, sunt sacella, quae post restitutam tribuniciam potestatem nemo attigit, quae maiores in urbe partim periculi perfugia esse voluerunt: haec lege tribunicia xviri vendent; accedit eo mons Gaurus; accedunt salicta ad Minturnas; adiungetur etiam illa via vendibilis Herculanea, multarum deliciarum et magnae pecuniae; per multa alia, quae senatus propter angustias aerarii vendenda censuit, consules propter invidiam non vendiderunt.  
<sup>37</sup> verum haec fortasse propter pudorem in lege reticentur; sed illud magis est credendum et pertimescendum, quod audaciae xvirali corrumpendarum tabularum publi-

carum fingendorumque senatus consultorum, quae numquam facta sunt, cum ex eo numero, qui per eos annos consules fuerunt, multi mortui sint, magna permittitur potestas; nisi forte nihil est aequum nos de eorum audacia suspicari, quorum cupiditati nimium angustus orbis terrarum esse videatur.

Habetis unum venditionis genus, quod magnum videri <sup>15</sup>  
vobis intellego; sed attendite animos ad ea, quae consequuntur: hunc quasi gradum quendam atque aditum <sup>33</sup>  
ad cetera factum intellegetis. QUI AGRI, QUAE LOCA, AEDIFICIA. quid est praeterea? multa in mancipiis, in pecore, auro, argento, ebore, veste, suppellectili, ceteris rebus. quid dicam? invidiosum putasse hoc fore, si omnia nominasset? non metuit invidiam. quid ergo? longum putavit et timuit ne quid praeteriret: ascripsit ALIUDVE <sup>39</sup>  
quid; qua brevitate rem nullam esse exceptam videtis. quicquid ergo sit extra Italiam, quod publicum populi Romani factum sit L. Sulla Q. Pompeio consulibus aut postea, id xviros iubet vendere. hoc capite, Quirites, omnis gentis, nationes, provincias, regna xvirum dicioni iudicio potestatique permissa et condonata esse dico; primum enim hoc quaero, qui tandem locus usquam sit quem xviri non possint dicere publicum populi Romani esse factum; nam cum idem possit iudicare qui dixerit, quid est quod non liceat ei dicere, cui liceat idem iudicare? commodum erit Pergamum, Smyrnam, Trallis, Ephesum, Miletum, Cyzicum, totam denique Asiam, quae post L. Sullam Q. Pompeium consules recuperata est, populi Romani factam esse dicere: utrum oratio ad <sup>40</sup>  
eius rei disputationem deerit an, cum idem et disseret et iudicabit, impelli non poterit, ut falsum iudicet? an, si condemnare Asiam nolet, terrorem damnationis et minas non quanti volet existimabit? quid? quod disputari contra nullo pacto potest, quod iam statutum a nobis est et iudicatum, quam hereditatem iam crevimus, regnum Bithyniae? quod certe publicum est populi Romani factum; num quid causae est quin omnis agros, urbis, stagna, portus, totam denique Bithyniam xviri vendituri sint? quid Mytilenae? quae certe vestrae, Quirites, belli lege <sup>16</sup>  
ac victoriae iure factae sunt; urbs et natura ac situ et

discriptione aedificiorum et pulchritudine in primis nobilis, agri iucundi et fertiles: nempe eodem capite inclusae continentur. quid Alexandria cunctaque Aegyptus?  
 41 ut occulte latet! ut recondita est! ut furtim tota x viris traditur! quis enim vestrum hoc ignorat dici illud regnum testamento regis Alexandri populi Romani esse factum? hic ego consul populi Romani non modo nihil iudico, sed ne quid sentiam quidem profero; magna enim mihi res non modo ad statuendum, sed etiam ad dicendum videtur esse: video qui testamentum factum esse confirmet; auctoritatem senatus exstare hereditatis aditae sentio, tum, quando Alexandro mortuo legatos Tyrum misimus qui ab  
 42 illo pecuniam depositam nostris recuperarent; haec L. Philippum saepe in senatu confirmasse memoria teneo; cum, qui regnum illud teneat hoc tempore neque genere neque animo regio esse, inter omnis fere video convenire. dicitur contra nullum esse testamentum; non oportere populum Romanum omnium regnorum appetentem videri, demigraturos in illa loca nostros homines propter agrorum  
 43 bonitatem et omnium rerum copiam. hac tanta de re P. Rullus cum ceteris x viris conlegis suis iudicabit? et verum iudicabit? nam utrumque ita magnum est, ut nullo modo neque concedendum neque ferendum sit. volet esse popularis; populo Romano adiudicabit: ergo idem ex sua lege vendet Alexandriam, vendet Aegyptum; urbis copiosissimae pulcherrimorumque agrorum iudex, arbiter, dominus, rex denique opulentissimi regni reperietur. non sumet sibi tantum, non appetet? iudicabit Alexandriam regis esse; a populo Romano abiudicabit.  
 17  
 44 primum cur populi Romani hereditatem x viri iudicent, cum vos volueritis de privatis hereditatibus c viros iudicare? deinde quis aget causam populi Romani? ubi res ista agetur? qui sunt isti x viri, quos perspiciamus regnum Alexandriae Ptolemaeo gratis adiudicatu-  
 45 ros? quod si Alexandria petebatur, cur non eosdem cursus hoc tempore, quos L. Cotta L. Torquato consulibus cucurrerunt? cur non aperte, ut antea? cur non item ut tum, decreto et palam regionem illam petierunt? an qui etesiis, qui per cursum rectum [regnum] tenere non potuerunt, nunc caecis tenebris et caligine se Alexandriam perventuros

arbitrati sunt? atque illud circumspicite vestris mentibus <sup>45</sup>  
 animisque: legatos vestros, homines auctoritate tenui,  
 qui rerum privatarum causa legationes liberas obeunt,  
 tamen exterae nationes ferre vix possunt; grave est enim  
 nomen imperii atque id etiam in levi persona pertimesci-  
 tur, propterea quod vestro, non suo nomine, cum hinc  
 egressi sunt, abutuntur: quid censetis, cum isti xviri  
 cum imperio, cum fascibus, cum illa delecta finitorum  
 iuventute per [totum] orbem terrarum vagabuntur? quo  
 tandem animo, quo metu, quo periculo miseris nationes  
 futuras? est in imperio terror: patientur; est in adventu <sup>46</sup>  
 sumptus: ferent; imperabitur aliquid muneris: non recu-  
 sabunt; illud vero quantum est, Quirites, cum is xvir,  
 qui aliquam in urbem aut exspectatus ut hospes aut re-  
 pente ut dominus venerit, illum ipsum locum, quo venerit,  
 illam ipsam sedem hospitalem, in quam erit deductus,  
 publicam populi Romani esse dicet? quanta calamitas  
 populo, si dixerit? quantus ipsi quaestus, si negarit? at-  
 que eidem, qui haec appetunt, queri non numquam solent,  
 omnis terras Cn. Pompeio atque omnia maria esse per-  
 missa. simile vero est multa committi et condonari  
 omnia, labori et negotio praeponi an praedae et quaestui,  
 mitti ad socios liberandos an ad opprimendos. denique,  
 si quis est honos singularis, nihilne interest utrum po-  
 pulus Romanus eum, cui velit, deferat, an is imprudente  
 populo Romano per legis fraudem surripiatur?

Intellexistis quot res et quantas xviri legis permissu <sup>18</sup>  
 vendituri sint: non est satis: cum se sociorum, cum ex- <sup>47</sup>  
 terarum nationum, cum regum sanguine implerint, inci-  
 dant nervos populi Romani, adhibeant manus vectigali-  
 bus vestris, inrumpant in aerarium: sequitur enim caput,  
 quo capite ne permittit quidem, si forte desit pecunia,  
 quae tanta ex superioribus recipi potest ut deesse non  
 debeat, sed plane, quasi ea res nobis saluti futura sit, ita  
 cogit atque imperat, ut xviri vestra vectigalia vendant  
 nominatim. quam tu mihi ex ordine recita de legis scripto <sup>48</sup>  
 populi Romani auctionem: quam mehercule ego [praeconi]  
 huic ipsi luctuosam et acerbam praedicationem futuram  
 puto. ut in suis rebus, ita in re publica luxuriosus est  
 nepos, qui prius silvas vendat quam vineas — Italiam



percensuisti: perge in Siciliam: nihil est in hac provincia quod aut in oppidis aut in agris maiores nostri proprium  
49 nobis reliquerunt quin id venire iubeat. quod partum recenti victoria maiores vobis in sociorum urbibus ac finibus et vinculum pacis et monumentum belli reliquerunt, id vos ab illis acceptum hoc auctore vendetis? hic mihi parumper mentis vestras, Quirites, commovere videor, dum patefacio vobis quas isti penitus abstrusas insidias se posuisse arbitrantur contra Cn. Pompeii dignitatem. et mihi, quaeso, ignoscite, si appello talem virum sapius: vos mihi praetori biennio ante, Quirites, hoc eodem in loco personam hanc imposuistis, ut, quibuscumque rebus possem, illius absentis dignitatem vobiscum una tuerer. feci adhuc quae potui, neque familiaritate illius adductus neque spe honoris atque amplissimae dignitatis, quam ego, etsi libente illo, tamen absente per  
50 vos consecutus sum. quam ob rem cum intellegam hanc totam fere legem ad illius opes evertendas tamquam machinam comparari, et resistam consiliis hominum et perficiam profecto, quod ego video comparari ut id vos universi non solum videre, verum etiam tenere possitis.  
19 iubet venire quae Attalensium, quae Phaselitum, quae Olympenorum fuerint agrumque Aperensem et Oroandicum et Eleusanum; haec clarissimi viri, P. Servilii, imperio et victoria vestra facta sunt; adiungit agros Bithyniae regiones, quibus nunc publicani fruuntur; deinde Attalicos agros in Cherroneso; in Macedonia, qui regis Philippi sive Persae fuerunt, qui [item] a censoribus locati  
51 sunt \* et certissimum vectigal. ascribit item auctioni Corinthios agros, opimos et fertilis, et Cyrenensis, qui Apionis fuerunt, et agros in Hispania propter Karthaginem novam et in Africa ipsam veterem Karthaginem vendit; quam videlicet P. Africanus non propter religionem sedum illarum ac vetustatis de consilii sententia consecravit nec ut ipse locus eorum, qui cum hac urbe de imperio decertarunt, vestigia calamitatis ostenderet, sed non fuit tam diligens, quam est Rullus, aut fortasse emptorem ei loco reperire non potuit. verum inter hos agros [regios] captos veteribus bellis virtute summorum imperatorum, adiungit regiones agros Mithridatis, qui in

Paphlagonia, qui in Ponto, qui in Cappadocia fuerunt, ut eos xviri vendant. itane vero? non legibus datis, non <sup>52</sup> auditis verbis imperatoris, nondum denique bello confecto, cum rex [Mithridates], amisso exercitu, regno expulsus, tamen in ultimis terris aliquid etiam nunc molia-  
 tur atque ab invicta Cn. Pompeii manu Macote et illis paludibus et itinerum angustiis atque altitudine montium defendatur, cum imperator in bello versetur, in locis autem illis etiam nunc belli nomen reliquum sit, eos agros, quorum adhuc penes Cn. Pompeium omne iudicium et potestas more maiorum debet esse, xviri vendent? et, credo, P. Rullus — is enim sic se gerit, ut sibi <sup>53</sup> iam xvir designatus esse videatur — ad eam auctionem potissimum proficiscetur. is videlicet ante quam veniat <sup>20</sup> in Pontum, litteras ad Cn. Pompeium mittet, quarum ego iam exemplum ab istis compositum esse arbitror: P. SERVILIUS RULLUS, TRIBUNUS PLEBIS, XVIR, S. D. CN. POMPEIO, CN. F. — non credo ascripturum esse MAGNO: non enim videtur id, quod imminuere lege conatur, concessurus verbo — TE VOLO CURARE, UT MIHI SINOPAE PRAESTO SIS AUXILIUMQUE ADDUCAS, DUM EOS AGROS, QUOS TUO LABORE CEPISTI, EGO MEA LEGE VENDAM. an Pompeium non adhibebit? in eius provincia vendet manubias imperatoris? ponite ante oculos vobis Rullum in Ponto, inter nostra atque hostium castra hasta posita, cum suis formosis finitoribus auctionantem. neque in hoc solum inest contumelia, <sup>54</sup> quae vehementer et insignis est et nova, ut ulla res parta bello, nondum legibus datis, etiam tum imperatore bellum administrante, non modo venierit, verum etiam locata sit: plus spectant homines certe quam contumeliam: sperant, si concessum sit inimicis Cn. Pompeii cum imperio, cum iudicio omnium rerum, cum infinita potestate, cum innumerabili pecunia non solum illis in locis vagari, verum etiam ad ipsius exercitum pervenire, aliquid illi insidiarum fieri, aliquid de eius exercitu, copiis, gloria detrahi posse; putant, si quam spem in Cn. Pompeio exercitus habeat aut agrorum aut aliorum commodorum, hanc non habiturum, cum viderit earum rerum omnium potestatem ad xviros esse translata. patior <sup>55</sup> non moleste cum stultos esse qui hoc sperant, tum ini-

puidentis qui conentur: illud queror, tam me ab eis esse contemptum, ut haec portenta me consule potissimum cogitarent.

Atque in omnibus his agris aedificiisque vendendis permittitur xviris, ET VENDANT QUIBUSCUMQUE IN LOCIS VIDEATUR. o perturbatam rationem, o libidinem refrenandam, 21 o consilia dissoluta atque perditā! vectigalia locare nusquam licet nisi in hac urbe, hoc aut illo ex loco, hac vestrum frequentia: venire nostras res proprias et in perpetuum ab nobis alienari in Paphlagoniae tenebris atque 56 in Cappadociae solitudine licebit? L. Sulla cum bona indemnatorum civium funesta illa auctione sua venderet et se praedam suam diceret vendere, tamen ex hoc loco vendidit, nec quorum oculos offendeat, eorum ipsorum conspectum fugere ausus est: xviri vestra vectigalia non modo [ne] vobis [quidem] arbitris, sed ne praecone quidem publico teste vendent?

Sequitur OMNIS AGROS EXTRA ITALIAM, infinito ex tempore, non ut ante, a Sulla et Pompeio consulibus. cognitio xvirum privatus sit an publicus; eique agro per 57 grande vectigal imponitur. hoc quantum iudicium, quam intolerandum, quam regium sit quem praeterit? posse quibuscumque locis velint nulla disceptatione, nullo consilio privata publicare, publica liberare? excipitur hoc capite ager in Sicilia Recentoricus, quem ego excipi et propter hominum necessitudinem et propter rei aequitatem, Quirites, ipse vehementer gaudeo. sed quae est haec impudentia? qui agrum Recentoricum possident, vetustate possessionis se, non iure, misericordia senatus, non agri condicione defendunt; nam illum agrum publicum esse fatentur; se moveri possessionibus, amicissimis sedibus ac dis penatibus negant oportere: ac, si est privatus ager Recentoricus, quid eum excipis? sin autem publicus, quae est ista aequitas, ceteros, etiam si privati sint, permittere ut publici iudicentur, hunc excipere nominatim, † qui publicus esse fateatur? ergo eorum ager excipitur, qui apud Rullum aliqua ratione valuerunt: ceteri agri omnes, qui ubique sunt, sine ullo delectu, sine populi Romani notione, sine iudicio senatus xviris addicentur. 22 58 atque etiam est alia superiore capite, quo omnia

vencunt, quaestuosa exceptio, quae teget eos agros, de quibus foedere cautum est: audivit hanc rem non a me, sed ab aliis agitari saepe in senatu, non numquam ex hoc loco, possidere agros in ora maritima regem Hiempsalem, quos P. Africanus populo Romano adiudicavit, ei tamen postea per C. Cottam consulem cautum esse foedere: hoc quia vos foedus non iusseritis, veretur Hiempsal ut satis firmum sit et ratum. quid? cuius modi est illud? tollitur vestrum iudicium; foedus totum accipitur; comprobatur. quod minuit auctionem xviralem, laudo; quod regi amico cavet, non reprehendo; quod non gratis fit, indico: volitat enim ante oculos istorum Iuba<sup>59</sup> regis filius, adulescens non minus bene nummatus quam bene capillatus.

Vix iam videtur locus esse qui tantos acervos pecuniae capiat. auget, addit, adcumulat: AURUM, ARGENTUM EX PRAEDA, EX MANUBIIS, EX CORONARIO, AD QUOSCUQUE PERVENIT NEQUE RELATUM EST IN PUBLICUM NEQUE IN MONUMENTO CONSUMPTUM, id profiteri apud xviros et ad eos referre iubet. hoc capite etiam quaestionem de clarissimis viris, qui populi Romani bella gesserunt, iudiciumque de pecuniis repetundis ad xviros translatum videtis: horum erit nullum iudicium, quantae cuiusque manubiae fuerint, quid relatum, quid residuum sit; in posterum vero lex haec imperatoribus vestris constituitur, ut quicumque de provincia decesserit, apud eosdem xviros quantum habeat praedae, manubiarum, auri coronarii profiteatur. hinc<sup>60</sup> tamen vir optimus eum, quem amat, excipit, Cn. Pompeium. unde iste amor tam improvisus ac tam repentinus? qui honore xviratus excluditur prope nominatim, cuius iudicium legumque datio, captorum agrorum ipsius virtute cognitio tollitur, cuius non in provinciam, sed in ipsa castra xvir cum imperio, infinita pecunia, maxima potestate et iudicio rerum omnium mittuntur, cui ius imperatorium, quod semper omnibus imperatoribus est conservatum, soli eripitur, is excipitur unus, ne manubias referre debeat. utrum tandem hoc capite honos haberi homini an invidia quaeri videtur? remittit hoc Rullo Cn.<sup>23</sup> Pompeius; beneficio isto legis, benignitate xvirali nihil<sup>61</sup> utitur. nam si est aequum praedam ac manubias suas



imperatores non in monumenta deorum immortalium neque in urbis ornamenta conferre, sed ad xviros tamquam ad dominos reportare, nihil sibi appetit praecipue Pompeius, nihil: vult se in communi atque in eodem quo ceteri iure versari; sin est iniquum, Quirites, si turpe, si intolerandum hos xviros portitores omnibus omnium pecuniis constitui, qui non modo reges atque exterarum nationum homines, sed etiam imperatores nostros excutiant, non mihi videntur honoris causa excipere Pompeium, sed metuere ne ille eandem contumeliam quam  
 62 ceteri ferre non possit. Pompeius autem hoc animo est, ut, quicquid vobis placeat, sibi ferendum putet; quod vos ferre non poteritis, id profecto perficiet, ne diutius inviti ferre cogamini. verum tamen cavet, ut, si qua pecunia post nos consules ex novis vectigalibus recipiatur, ea xviri utantur; nova porro vectigalia videt ea fore, quae Pompeius adiunxerit: ita remissis manubiis, vectigalibus eius virtute partis se frui putat oportere.

Parta sit pecunia, Quirites, xviris tanta, quanta est in terris, nihil praetermissum sit; omnes urbes, agri, regna denique, postremo etiam vectigalia vestra venierint; accesserint in cumulum manubiae vestrorum imperatorum; quantae et quam immanes divitiae xviris in tantis auctionibus, tot iudiciis, tam infinita potestate  
 24 rerum omnium quaerantur videtis. cognoscite nunc alios  
 63 immensos atque intolerabilis quaestus, ut intellegatis ad certorum hominum importunam avaritiam hoc populare legis agrariae nomen esse quaesitum: hac pecunia iubet agros emi, quo deducamini. non consuevi homines appellare asperius, Quirites, nisi lacessitus; vellem fieri posset, ut a me sine contumelia nominarentur ei, qui se xviros sperant futuros: iam videretis quibus hominibus  
 64 omnium rerum et vendendarum et emendarum potestatem permetteretis. sed quod ego nondum statuo mihi esse dicendum, vos tamen id potestis cum animis vestris cogitare. unum hoc certe videor mihi verissime posse dicere: tum, cum haberet haec res publica Luscinos, Calatinos, Acidinos, homines non solum honoribus populi rebusque gestis, verum etiam patientia paupertatis ornatos, et tum, cum erant Catones, Philii, Laelii, quo-

rum sapientiam temperantiamque in publicis privatisque, forensibus domesticisque rebus perspexeratis, tamen huiusce modi res commissæ nemini est, ut idem iudicaret et venderet et hoc faceret per quinquennium toto in orbe terrarum idemque agros vectigalis populi Romani abalienaret, et cum summam tantæ pecuniæ, nullo teste, sibi ipse ex sua voluntate fecisset, tum denique emeret a quibus vellet quod videretur. committite nunc vos, Quirites, his hominibus hæc omnia, quos odorari hunc xviratum suspicamini: reperietis partem esse eorum, quibus ad habendum, partem, quibus ad consumendum nihil satis esse videatur. hic ego iam illud, quod expeditissimum est, ne disputo quidem, Quirites, non esse hanc nobis a maioribus relictam consuetudinem, ut emanatur agri a privatis quo plebes publice deducatur; omnibus legibus agris publicis privatos esse deductos; huiusce modi me aliquid ab hoc horrido ac truce tribuno plebis fateor exspectasse; hanc vero emendi et vendendi quæstuosissimam ac turpissimam mercaturam alienam actione tribunicia, alienam dignitate populi Romani semper putavi. iubet agros emi. primum quaero quos agros et quibus in locis? nolo suspensam et incertam plebem Romanam obscura spe et cæca exspectatione pendere. Albanus ager est, Setinus, Privernas, Fundanus, Vescinus, Falernus, Literninus, Cumanus, Ancerranus. audio. ab alia porta Capenas, Faliscus, Sabinus ager, Reatinus; ab alia Venafranus, Allifanus, Trebulanus. habes tantam pecuniam, qua hosce omnis agros et ceteros horum similis non modo emere, verum etiam coacervare possis: cur eos non definis neque nominas, ut saltem deliberare plebes Romana possit, quid intersit sua, quid expediat, quantum tibi in emendis et vendendis rebus committendum putet? 'definio' inquit 'Italiam.' satis certa regio. etenim quantulum interest, utrum in Massici radices, an in Italiam aliove deducamini? age, non definis locum. quid? naturam agri? 'vero,' inquit, 'QUI ARARI AUT COLI POSSIT.' 'qui possit arari' inquit 'aut coli:' non qui aratus aut cultus sit. utrum hæc lex est an tabula Neratianæ auctionis? in qua scriptum fuisse aiunt IUGERA CC, IN QUIBUS OLIVETUM FIERI POTEST; IUGERA CCC, UBI INSTITUI

VINEAE POSSUNT. hoc tu emes ista innumerabili pecunia quod arari aut coli possit? quod solum tam exile aut marum est quod aratro perstringi non possit? aut quod est tam asperum saxetum in quo agricolarum cultus non claboret? 'idcirco' inquit 'agros nominare non possum, quia tangam nullum ab invito.' hoc quoque multo est quaestuosius, quam si ab invito sumeret; inveniatur enim ratio quaestus de nostra pecunia, et tum denique ager emetur, cum idem expediet emptori et venditori. sed videte vim legis agrariae: ne ei quidem, qui agros publicos possident, decedent de possessione, nisi erunt deducti optima condicione et pecunia maxima. conversa ratio: antea, cum erat a tribuno plebis mentio legis agrariae facta, continuo, qui agros publicos aut [qui] possessiones invidiosas tenebant, pertimescebant: haec lex eos homines fortunis locupletat, invidia liberat: quam multos enim, Quirites, existimatis esse qui latitudinem possessionum tueri, qui invidiam Sullanorum agrorum ferre non possint? qui vendere cupiant, emptorem non reperiant? perdere iam denique illos agros ratione aliqua velint? qui paulo ante diem noctemque tribunicium nomen horrebant, vestram vim metuebant, mentionem legis agrariae pertimescebant, ei nunc etiam ultro rogabuntur atque orabuntur, ut agros partim publicos, partim plenos invidiae, plenos periculi quanti ipsi velint xviris tradant. atque hoc carmen hic tribunus plebis non vobis, sed sibi intus

69 canit: habet socerum, virum optimum, qui tantum agri in illis rei publicae tenebris occupavit, quantum concupivit: huic subvenire volt succumbenti iam et oppresso, Sullanis oneribus gravi, sua lege, ut liceat illi invidiam deponere, pecuniam condere. et vos [non] dubitatis quin vectigalia vestra vendatis, [plurimo maiorum vestrorum sanguine et sudore quaesita,] ut Sullanos possessores divitiis augeatis, periculo liberetis? nam ad hanc empti-

70 nem xviralem duo genera agrorum spectant, Quirites: eorum unum propter invidiam domini fugiunt, alterum propter vastitatem: Sullanus ager a certis hominibus latissime continuatus tantam habet invidiam, ut veri ac fortis tribuni plebis stridorem unum perferre non possit; hic ager omnis, quoquo pretio emptus erit, tamen ingenti

pecunia vobis inducetur: alterum genus agrorum propter sterilitatem incultum, propter pestilentiam vastum atque desertum emetur ab eis, qui eos vident sibi esse, si non vendiderint, relinquendos. et nimirum id est, quod ab hoc tribuno plebis dictum est in senatu, urbanam plebem nimium in re publica posse; exhauriendam esse; hoc enim est usus, quasi de aliqua sentina ac non de optimorum civium genere loqueretur. vos vero, Quirites, si<sup>27</sup>  
 me audire voltis, retinete istam possessionem gratiae, 71  
 libertatis, suffragiorum, dignitatis, urbis, fori, ludorum, festorum dierum, ceterorum omnium commodorum; nisi forte mavoltis relictis his rebus atque hac luce rei publicae in Sipontina siccitate aut in Salpinorum pestilentiae finibus Rullo duce conlocari, aut dicat quos agros empturus sit; ostendat et quid et quibus daturus sit: ut vero, cum omnis urbis, agros, vectigalia, regna vendiderit, tum arenam aliquam aut paludes emat, id vos potestis, quaeso, concedere? quamquam illud est egregium, quod hac lege ante omnia veneunt, ante pecuniae coguntur et coacervantur, quam gleba una ematur; deinde emi iubet, ab invito vetat. quaero, si qui velint vendere 72  
 non fuerint, quid pecuniae fiet? referre in aerarium lex vetat; exigi prohibet. igitur pecuniam omnem xviri tenebunt; vobis ager non emetur; vectigalibus abalienatis, sociis vexatis, regibus atque omnibus gentibus exinanitis illi pecunias habebunt, vos agros non habebitis. ‘facile’ inquit ‘adducuntur pecuniae magnitudine, ut velint vendere.’ ergo ea lex est, qua nostra vendamus quanti possimus, aliena emamus quanti possessores velint.

Atque in hos agros, qui hac lege empti sint, colonias 73  
 ab his xviris deduci iubet. quid? omniscne locus eius modi est, ut nihil intersit rei publicae, colonia deducatur in eum locum necne, an est locus qui coloniam postulet, est qui plane recuset? quo in genere, sicut in ceteris rei publicae partibus, est operae pretium diligentiam maiorum recordari, qui colonias sic [idoneis in locis] contra suspicionem periculi conlocarunt, ut esse non oppida Italiae, sed propugnacula imperii viderentur: hi deducunt colonias in eos agros, quos emerint. etiamne si rei publicae non expediat? ET IN QUAE LOCA PRAETEREA VIDEBITUR. 74



quid igitur est causae quin coloniam in Ianiculum possint deducere et suum praesidium in capite atque cervicibus nostris conlocare? tu non definias quo colonias, in quae loca, quo numero colonorum deduci velis? tu occupes locum quem idoneum ad vim tuam iudicaris? compleas numero, confirmes praesidio quo velis? populi Romani vectigalibus atque omnibus copiis ipsum populum Romanum coercereas, opprimas, redigas in istam xviralem dicionem ac potestatem? ut vero totam Italiam suis opibus et praesidiis obsidere atque occupare cogitet, quaeso, Quirites, cognoscite: permittit xviris, ut in omnia municipia, in omnis colonias totius Italiae colonos deducant quos velint, eisque colonis agros dari iubet. num obscure maiores opes, quam libertas vestra pati potest, ac maiora praesidia quaeruntur? num obscure regnum constituitur? num obscure libertas vestra tollitur? nam cum eidem [omnem pecuniam, maximam multitudinem, id est,] totam Italiam suis opibus obsidebunt, eidem [vestram libertatem] suis praesidiis et coloniis interclusam tenebunt, quae spes tandem, quae facultas recuperandae vestrae libertatis relinquetur?

76 At enim ager Campanus hac lege dividetur orbi terrae pulcherimus et Capuam colonia deducetur, urbem amplissimam atque ornatissimam; at quid ad haec possumus dicere? de commodo prius vestro dicam, Quirites; deinde ad amplitudinem et dignitatem rei revertar, ut, si quis agri aut oppidi bonitate delectatur, ne quid exspectet, si quem rei dignitas commovet, ut huic simulatae largitioni resistat. ac primum de oppido dicam, si quis est forte quem Capua magis quam Roma delectet: quinque milia colonorum Capuam scribi iubet; ad hunc numerum quin-  
77 genos sibi singuli sumunt. quaeso, nolite vosmet ipsos consolari; vere et diligenter considerate: num vobis aut vestri similibus integris, quietis, otiosis hominibus in hoc numero locum fore putatis? si est omnibus vobis aut maiori vestrum parti, quamquam me vester honos vigilare dies atque noctis et intentis oculis omnis rei publicae partis intueri iubet, tamen paulisper, si ita commodum vestrum fert, conivebo; sed si quinque hominum milibus ad vim, facinus caedemque delectis locus atque urbs,

quae bellum facere atque instruere possit, quaeritur, tamenne patiemini vestro nomine contra vos firmari opes, firmari praesidia, urbis, agros, copias comparari? nam <sup>78</sup> agrum quidem Campanum, quem vobis ostentant, ipsi concupiverunt; deducunt suos, quorum nomine ipsi teneant et fruuntur; coëment praeterea; ista dena iugera continuabunt. nam si dicent per legem id non licere, ne per Corneliam quidem licet; at videmus, ut longinqua mittamus, agrum Praenestinum a paucis possideri; neque istorum pecuniis quicquam aliud deesse video, nisi eius modi fundos, quorum subsidio familiarum magnitudines et Cumanorum ac Puteolanorum praediorum sumptus sustentare possint. quod si vestrum commodum spectat, veniat et coram mecum de agri Campani divisione disputet. quaesivi ex eo Kalendis Ianuariis, quibus hominibus et <sup>29</sup> quem ad modum illum agrum esset distributurus. <sup>79</sup> respondit a Romulia tribu se initium esse facturum. primum quae est ista superbia et contumelia, ut populi pars amputetur, ordo tribuum neglegatur? ante rusticis detur ager, qui habent, quam urbanis, quibus ista agri spes et iucunditas ostenditur? aut, si hoc ab se dictum negat et satis facere omnibus vobis cogitat, proferat; in iugera dena discribat; a Suburana usque ad Aniensem nomina vestra proponat. si non modo dena iugera dari vobis, sed ne constipari quidem tantum numerum hominum posse in agrum Campanum intellegetis, tamenne vexari rem publicam, contemni maiestatem populi Romani, deludi vosmet ipsos diutius a tribuno plebis patiemini? quod si <sup>80</sup> posset ager iste ad vos pervenire, nonne cum tamen in patrimonio vestro remanere malletis? unumne fundum pulcherrimum populi Romani, caput vestrae pecuniae, pacis ornamentum, subsidium belli, fundamentum vectigalium, horreum legionum, solacium annonae disperire patiemini? an obliti estis, Italico bello, amissis ceteris vectigalibus quantos agri Campani fructibus exercitus alueritis? an ignoratis cetera illa magnifica populi Romani vectigalia perlevi saepe momento fortunae, inclinatione temporis pendere? quid vos Asiae portus, quid scriptura, quid omnia transmarina vectigalia iuvabunt tenuissima suspitione praedonum aut hostium iniecta? at si

vero hoc agri Campani vectigal cum eius modi est, ut et domi sit et omnibus praesidiis oppidorum tegatur, tum nec bellis infestum nec fructibus varium nec caelo ac loco calamitosum esse solet. maiores nostri non solum id, quod de Campanis ceperant, non imminuerunt, verum etiam id, quod ei tenebant, quibus adimi iure non poterat, coëmerunt; qua de causa nec duo Gracchi, qui de plebis Romanae commodis plurimum cogitaverunt, nec L. Sulla, qui omnia sine ulla religione quibus voluit est dilargitus, agrum Campanum attingere ausus est: Rullus exstitit qui ex ea possessione rem publicam demoveret, ex qua nec Gracchorum benignitas eam nec Sullae dominatio deie-

30 cisset. quem agrum nunc praetereuntes vestrum esse dicitis et qui ea iter faciunt [externi homines] vestrum esse audiunt, is cum erit divisus, \* \* neque vester dice-

82 tur. at qui homines possidebunt? primum quidem acres, ad vim prompti, ad seditionem parati, qui, simul ac xviri inerepuerint, armati in civis et expediti ad urbem esse possint; deinde ad paucos opibus et copiis adfluentis totum agrum Campanum perferri videbitis; vobis interea, qui illas a maioribus pulcherrimas vectigalium sedis armis captas accepistis, gleba nulla de paternis atque avitis *his* possessionibus relinquetur. at tantum intererit inter vestram et privatorum diligentiam? [quod] cum a maioribus nostris P. Lentulus, *is* qui princeps senatus *fuit*, in ea loca missus esset, uti privatos agros, qui in publicum Campanum incurrebant, pecunia publica coëmeret, dicitur renuntiasse, nulla se pecunia fundum cuiusdam emere potuisse; eumque, qui nollet vendere, ideo negasse se adduci posse, uti venderet, quod, cum pluris fundos haberet, ex illo solo fundo numquam malum nuntium audisset.

83 itane vero? privatum haec causa commovit \* \* populum Romanum ne agrum Campanum privatis gratis Rullo rogante tradat non commovebit? at idem populus Romanus de hoc vectigali potest dicere, quod ille de suo fundo dixisse dicitur: Asia multos annos vobis fructum Mithridatico bello non tulit; Hispaniarum vectigal temporibus Sertorianis nullum fuit; Siciliae civitatibus bello fugitivorum M. Aquilius etiam mutuum frumentum dedit: at ex hoc vectigali numquam malus nuntius audi-

tus est. cetera vectigalia belli difficultatibus adfliguntur; hoc vectigali etiam belli difficultates sustentantur. deinde <sup>81</sup> in hac adsignatione agrorum ne illud quidem dici potest, quod in ceteris, agros desertos a plebe atque a cultura hominum liberorum esse non oportere: sic enim dico: si <sup>31</sup> Campanus ager dividatur, exturbari et expelli plebem ex agris, non constitui et conlocari; totus enim ager Campanus colitur et possidetur a plebe et a plebe optima et modestissima; quod genus hominum optime moratum, optimorum et aratorum et militum, ab hoc plebicola tribuno plebis funditus eicitur; atque illi miseri, nati in illis agris et educati, glebis subigendis exercitati, quo se subito conferant non habebunt; his robustis et valentibus et audacibus xvirum satellitibus agri Campani possessio tota tradetur, et, ut vos nunc de vestris maioribus praedicatis: ‘hunc agrum nobis maiores nostri reliquerunt’, sic vestri posterius de vobis praedicabunt: ‘hunc agrum patres nostri acceptum a patribus suis perdiderunt.’ equidem existimo, <sup>85</sup> si iam campus Martius dividatur et uni cuique vestrum ubi consistat bini pedes adsignentur, tamen promiscue toto quam proprie parva frui parte malitis; qua re etiam si ad vos esset singulos aliquid ex hoc agro perventurum, qui vobis ostenditur, aliis comparatur, tamen honestius eum vos universi quam singuli possideretis; nunc vero cum ad vos pertineat nihil, sed paretur aliis, eripiatur vobis, nonne acerrime, tamquam armato hosti, sic huic legi pro vestris agris resistetis? adiungit Stellatem campum agro Campano et in eo duodena describit in singulos homines iugera, quasi vero paulum differat ager Campanus a Stellati; sed multitudo, Quirites, quaeritur, <sup>88</sup> qua illa omnia oppida compleantur; nam dixi antea lege permitti, ut quae velint municipia, quas velint veteres colonias colonis suis occupent. Calenum municipium complebunt; Teanum oppriment; Atellam, Cunnas, Neapolim, Pompeios, Nuceriam suis praesidiis devincient; Puteolos vero, qui nunc in sua potestate sunt, suo iure libertateque utuntur, totos novo populo atque adventiciis copiis occupabunt. tunc illud vexillum Campanae coloniae, <sup>32</sup> vehementer huic imperio timendum, Capuae a xviris inferetur; tunc contra hanc Romam, communem patriam



87 omnium nostrum, illa altera Roma quaeretur. in id oppidum homines nefarii rem publicam vestram transferre conantur, quo in oppido maiores nostri nullam omnino rem publicam esse voluerunt: qui tris solum urbis in terris omnibus, Karthaginem, Corinthum, Capuam, statuerunt posse imperii gravitatem ac nomen sustinere. deleta Karthago est, quod cum hominum copiis, tum ipsa natura ac loco, succincta portibus, armata muris, excurrere ex Africa, imminere [ita] fructuosissimis insulis populi Romani videbatur. Corinthi vestigium vix relictum est; erat enim posita in angustiis atque in faucibus Graeciae sic, ut terra claustra locorum teneret et duo maria maxime navigationi diversa paene coniungeret, cum per tenui discrimine separentur: haec, quae procul erant a conspectu imperii, non solum adflixerunt, sed etiam, ne quando recreata exsurgere atque erigere se possent, funditus, ut dixi, sustulerunt. de Capua multum est et diu consultum; exstant litterae, Quirites, publicae; sunt senatus consulta complura: statuerunt homines sapientes, si agrum Campanis ademissent, magistratus, senatum, publicum ex illa urbe consilium sustulissent, imaginem rei publicae nullam reliquissent, nihil fore quod Capuam timeremus. itaque hoc perscriptum in monumentis veteribus reperietis, ut esset urbs, quae res eas, quibus ager Campanus coleretur, suppeditare posset, ut esset locus comportandis condendisque fructibus, ut aratores cultu agrorum defessi urbis domiciliis uterentur, ideirco illa  
33 aedificia non esse deleta. videte quantum intervallum  
89 sit interiectum inter maiorum nostrorum consilia et inter istorum hominum dementiam: illi Capuam receptaculum aratorum, nundinas rusticorum, cellam atque horreum Campani agri esse voluerunt; hi, expulsis aratoribus, effusis ac dissipatis fructibus vestris, eandem Capuam sedem novae rei publicae constituunt, molem contra veterem rem publicam comparant. quod si maiores nostri existimassent quemquam in tam inlustri imperio et tam praeclara rei publicae disciplina M. Bruti aut P. Rulli similem futurum — hos enim nos duos adhuc vidimus qui hanc rem publicam totam Capuam transferre vellent  
90 — profecto nomen illius urbis non reliquissent; verum

arbitrabantur Corinthi et Karthagini, etiam si senatum et magistratus sustulissent agrumque civibus ademissent, tamen non defore qui illa restituerent atque [qui] omnia ante commutarent quam nos audire possemus; hic vero in oculis senatus populi que Romani nihil posse existere quod non ante exstingui atque opprimi posset quam plane *esset* exortum ac natum. neque vero ea res fefellit homines divina mente et consilio praeditos: nam post Q. Fulvium Q. Fabium consules, quibus consulibus Capua devicta atque capta est, nihil est in ea urbe contra hanc rem publicam non dico factum, sed nihil omnino excogitatum; multa postea bella cum regibus, Philippo, Antiocho, Perse, Pseudophilippo, Aristonico, Mithridate et ceteris; multa praeterea bella gravia, Karthaginiense, Corinthium, Numantinum; multae in hac re publica seditiones domesticae, quas praetermitto; bella cum sociis, Fregellanum, Marsicum: quibus omnibus domesticis externisque bellis Capua non modo non obfuit, sed opportunissimam se nobis praebeuit et ad bellum instruendum et ad exercitus ornandos et tectis ac sedibus suis recipiendos. homines <sup>91</sup> non inerant in urbe, qui malis contionibus, turbulentis senatus consultis, iniquis imperiis rem publicam miscerent et rerum novarum causam aliquam quaerent; neque enim contionandi potestas erat cuiquam nec consilii capiendi publici; non gloriae cupiditate efferebantur, propterea quod, ubi honos publice non est, ibi gloriae cupiditas esse non potest; non contentione, non ambitione, non discordia; nihil enim supererat de quo certarent, nihil quod contra peterent, nihil ubi dissiderent; itaque illam Campanam adrogantiam atque intolerandam ferociam ratione et consilio maiores nostri ad inertissimum ac desidiosissimum otium perduxerunt: sic et crudelitatis infaniam effugerunt, quod urbem ex Italia pulcherrimam non sustulerunt, et multum in posterum providerunt, quod nervis omnibus urbis exsectis urbem ipsam solutam ac debilitatam reliquerunt. haec consilia maiorum M. Bruto, ut antea dixi, reprehendenda [et P. Rullo] <sup>92</sup> visa sunt; neque te, P. Rulle, omina illa atque auspicia M. Bruti a simili furore deterrent: nam et ipse, qui deduxit, et qui magistratum Capuae, illo creante, ceperunt,

et qui aliquam partem illius deductionis, honoris, muneris attigerunt, omnis acerbissimas impiorum poenas pertulerunt. et quoniam Bruti atque illius temporis feci mentionem, commemorabo id, quod egomet vidi, cum venissem Capuam, coloniam deductam L. Considio et Sex. Saltio, quem ad modum ipsi loquebantur, praetoribus; ut intellegatis quantam locus ipse adferat superbiam, quae paucis diebus, quibus illa colonia deducta fuit, perspicere atque intellegi potuit. nam primum, id quod dixi, cum in ceteris coloniis viri appellentur, hi se praetores appellari volebant. quibus primus annus hanc cupiditatem attulisset, nonne arbitramini paucis annis fuisse consulum nomen appetituros? deinde anteibant lictores, non cum bacillis, sed, ut hic praetoribus urbanis antecunt, cum fascibus bini. erant hostiae maiores in foro constitutae, quae ab his praetoribus de tribunali, sicut a nobis consulibus, de consilii sententia probatae, ad praeconeum et ad tibicinem immolabantur. deinde patres conscripti vocabantur. iam vero voltum Considii videre ferundum vix erat: quem hominem ut grandi macie torridum, Romae contemptum, abiectum videbamus, hunc Capuae cum Campano supercilio ac regio spiritu cum videremus, Blossios mihi videbar illos videre ac Vibellios.

iam vero qui metus erat tunicatorum illorum! et in Albana et Seplasia quae concursatio percunctantium quid praetor edixisset, ubi cenaret, quo denuntiasset? nos autem, hinc [Roma] qui veneramus, iam non hospites, sed peregrini atque advenae nominabamur. haec qui prospexerunt, maiores nostros dico, Quirites, non eos in deorum immortalium numero venerandos a nobis et colendos putatis? quid enim viderunt? hoc, quod nunc vos, quaeso, perspicite atque cognoscite: non ingenerantur hominibus mores tam a stirpe generis ac seminis, quam ex eis rebus, quae ab ipsa natura nobis ac vitae consuetudine suppeditantur, quibus alimur et vivimus: Karthaginienses fraudulentum et mendaces non genere, sed natura loci, quod propter portus suos multis et variis mercatorum et advenarum sermonibus ad studium fallendi studio quaestus vocabantur. Ligures montani duri atque agrestes; docuit ager ipse nihil ferendo nisi multa cultura

et magno labore quaesitum. Campani semper superbi bonitate agrorum et fructuum magnitudine, urbis salubritate, discriptione, pulchritudine. ex hac copia atque omnium rerum adfluentia primum illa apta est adrogantia, qua a maioribus nostris alterum Capua consulem postulavit; deinde ea luxuries, quae ipsum Hannibalem armis etiam tunc invictum voluptate vicit. huc isti xviri cum numerum 100 colonorum ex lege Rulli deduxerint, centum decuriones, decem augures, sex pontifices constituerint, quos illorum animos, quos impetus, quam ferociam fore putatis? Romam in montibus positam et convallibus, cenaculis sublatam atque suspensam, non optimis viis, angustissimis semitis, prae sua Capua planissimo in loco explicata ac prae illis plateis inridebunt atque contemnent; agros vero Vaticanum et Pupiniam cum suis opimis atque uberibus campis conferendos scilicet [non] putabunt; oppidorum autem finitimorum illam copiam cum hac per risum ac iocum contendent: Veios, Fidenas, Collatiam, ipsum hercle Lanuvium, Ariciam, Tusculum cum Calibus, Teano, Neapoli, Puteolis, Cumis, Pompeiis, Nuceria comparabunt. quibus, illi rebus elati et inflati fortasse 96 non continuo, sed certe, si paulum adsumpserint vetustatis ac roboris, non continebuntur: progredientur longius, efferentur. singularis homo privatus, nisi magna sapientia praeditus, vix facile sese regionibus officii magnis in fortunis et copiis continet: nedum isti a Rullo et Rulli similibus conquisiti atque electi coloni Capuae in domicilio superbiae atque in sedibus luxuriosis conlocati non statim conquisituri sint aliquid sceleris et flagitii; immo vero etiam hoc magis, quam illi veteres germanique Campani, quod in vetere fortuna illos natos et educatos nimiae tamen rerum omnium copiae depravabant, hi ex summa egestate in eandem rerum abundantiam traducti non solum copia, verum etiam insolentia commovebuntur.

Haec tu, P. Rulle, M. Bruti sceleris vestigia quam 36  
monumenta maiorum sapientiae sequi maluisti; haec tu 98  
cum istis tuis auctoribus excogitasti, ut vetera vectigalia † ea expleretis nova, ut urbi Capuam ad certamen dignitatis opponeretis; ut sub vestrum ius, [iuris] dicio-



nem, potestatem urbis, nationes, provincias, liberos populos, reges, terrarum denique orbem subiungeretis; ut, cum omnem pecuniam ex aerario exhausissetis, ex vectigalibus redegissetis, ab omnibus regibus, gentibus, ab imperatoribus nostris coëgissetis, [tamen omnes vobis pecunias ad nutum vestrum penderent, ut] eidem partim invidiosos agros a Sullanis possessoribus, partim desertos ac pestilentis a vestris necessariis et a vobismet ipsis emptos quanti velletis populo Romano induceretis; ut omnia municipia coloniasque Italiae novis colonis occuparetis; ut quibuscumque in locis vobis videretur ac quam  
 99 multis videretur colonias conlocaretis. [ut omnem rem publicam vestris militibus, [vestris urbibus,] vestris praesidiis cingeretis atque oppressam teneretis: ut ipsum Cn. Pompeium, quovis praesidio saepissime rem publicam contra acerrimos hostis et contra improbissimos civis tutatum victoria atque horum conspectu privare possetis; ut nihil auro et argento violari, nihil numero et suffragiis declarari, nihil vi et manu perfringi posset, quod non vos oppressum atque ereptum teneretis; ut volitaretis interea per gentis, per regna omnia cum imperio summo, cum iudicio infinito, cum omni pecunia; ut veniretis in castra Cn. Pompeii atque ipsa castra, si commodum vobis esset, venderetis; ut interea magistratus reliquos, legibus omnibus soluti, sine metu iudiciorum, sine periculo petere possetis; ut nemo ad populum Romanum vos adducere, nemo producere, non in senatum cogere, non consul coërcere, non tribunus plebis retinere posset.]

100 Haec ego vos concupisse pro vestra stultitia atque intemperantia non miror; sperasse me consule adsequi posse demiror: nam cum omnium consulum gravis in re publica custodienda cura ac diligentia debet esse tum eorum maxime, qui non in cunabulis, sed in campo sunt consules facti. nulli populo Romano pro me maiores mei spoponderunt, mihi creditum est: a me petere quod debeo, me ipsum appellare debetis. quem ad modum, cum petebam, nulli me vobis auctores generis [mei] commendarunt, sic, si quid deliquero, nullae sunt imagines, quae  
 37 me a vobis deprecentur. qua re modo ut vita suppetat, quam ego summis \* \* ab istorum † periculis scelere insi-

diisque defendere, polliceor hoc vobis, Quirites, bona fide: rem publicam vigilantī hominī, non timido, diligentique commisistis. ego is consul, qui contionem metuam, qui<sup>101</sup> tribunos plebis pertimescam, qui saepe et sine causa tumultuer, qui timeam ne mihi in carcere habitandum sit, si tribunus plebis duci iusserit? ego cum vestris armis armatus sim insignibusque amplissimis ornatus, imperio, auctoritate, non horreo in hunc locum progredi † posse vobisque auctoribus improbitati hominum resistere, nec vereor ne res publica tantis munita praesidiis ab istis vinci aut opprimi possit. si antea timuissem, tamen hac contione, hoc populo certe non vererer. quis enim unquam tam secunda contione legem agrariam suasit quam ego dissuasi? si hoc dissuadere est ac non disturbare atque pervertere. ex quo intellegi, Quirites, potest nihil<sup>102</sup> esse tam populare, quam id, quod ego vobis in hunc annum consul popularis adfero, pacem, tranquillitatem, otium: quae nobis designatis timebatis, ea ne accidere possent, consilio meo ac ratione provisa sunt; non modo vos eritis in otio, qui semper esse volueratis, verum etiam istos, quibus odio est otium, quietissimos atque otiosissimos reddam. etenim illis honores, potestates, divitiae ex tumultu atque ex dissensionibus civium comparari solent: vos, quorum gratia in suffragiis consistit, libertas in legibus, ius in iudiciis et aequitate magistratuum, res familiaris in pace, omni ratione otium retinere debetis. [nam<sup>103</sup> si ei, qui propter desidiam in otio vivunt, tamen in sua turpi inertia capiunt voluptatem, sed ipso otio, quo vos fortunam regitis, si hunc statum, quem habetis, esse non ignoravi, non quaesitum, sed vita partum otium tenueritis. quod ego et concordia, quam mihi constitui cum conlega, invictissimis his hominibus, quos vos in consulatu inimicos esse et corporis actibus providi omnibus prospexi sane et revocavi idem tribunos plebis, quod turbulenti me consule conflarent.]

Summum et firmissimum est illud communibus fortunae praesidium, Quirites, ut, qualis vos hodierno die maxima contione mihi pro salute vestra praeuistis, talis reliquis temporibus rei publicae praebeatis. pro certo polliceor hoc vobis atque confirmo me esse perfecturum, ut iam tandem illi, qui honori inviderunt meo, tamen vos universos in consule deligendo plurimum vidisse fateantur.

M. TULLII CICERONIS  
DE LEGE AGRARIA ORATIO TERTIA  
CONTRA P. SERVILIUM RULLUM TR. PLEB.  
AD POPULUM.

<sup>1</sup> Commodius fecissent tribuni plebis, Quirites, si,  
<sub>1</sub> quae apud vos de me deferunt, ea coram potius me  
praesente dixissent; nam et aequitatem nostrae discepta-  
tionis et consuetudinem superiorum et ius suae potestatis  
retinuissent; sed quoniam adhuc praesens certamen con-  
tentionemque fugerunt, nunc, si videtur eis, in meam  
contionem prodeant et, quo provocati a me venire nolue-  
<sub>2</sub> runt, revocati saltem revertantur. video quosdam, Qui-  
rites, strepitu significare nescio quid et non eosdem vol-  
tus, quos proxima mea contione praebuerunt, in hanc  
contionem mihi rettulisse: qua re a vobis, qui nihil de  
me credidistis, ut eam voluntatem, quam semper ha-  
buistis erga me, retineatis, peto; a vobis autem, quos  
leviter immutatos esse sentio, parvam exigui temporis  
usuram bonae de me opinionis postulo, ut eam, si quae  
dixero vobis probaro, perpetuo retineatis; sin aliter, hoc  
<sub>3</sub> ipso in loco depositam atque abiectam relinquatis. com-  
pleti sunt animi auresque vestrae, Quirites, me gratifi-  
cantem septem tyrannis ceterisque Sullanarum adsigna-  
tionum possessoribus agrariae legi et commodo vestro  
obsistere: hoc si qui crediderunt, illud prius crediderint  
necesse est, hac lege agraria, quae promulgata est, adimi  
Sullanos agros vobisque dividi aut denique minui priva-  
torum possessiones, ut in eas vos deducamini: si ostendo  
non modo non adimi cuiquam glebam de Sullanis agris,  
sed etiam genus id agrorum certo capite legis impuden-  
tissime confirmari atque sanciri; si doceo agris his, qui  
a Sulla sunt dati, sic diligenter Rullum sua lege con-  
sulere, ut facile appareat eam legem non a vestrorum  
commodorum patrono, sed a Valgii genero esse con-

scriptam, num quid est causae, Quirites, quin illa criminatione, qua in me absentem usus est, non solum meam, sed etiam vestram diligentiam prudentiamque despexerit?

Caput est legis quadragesimum, de quo ego con-<sup>2</sup>  
sulto, Quirites, neque apud vos ante feci mentionem,<sup>4</sup>  
ne aut reficere obductam iam rei publicae cicatricem viderer aut aliquid alienissimo tempore novae dissensionis commovere, neque vero nunc ideo disputabo, quod hunc statum rei publicae non magno opere defendendum putem, praesertim, qui otii et concordiae patronum me in hunc annum rei publicae professus sim, sed ut doceam Rullum posthac in eis saltem tacere rebus, in quibus de se et de suis factis taceri velit. omnium legum iniquis-<sup>5</sup>  
simam dissimillimamque legis esse arbitror eam, quam L. Flaccus interrex de Sulla tulit, ut omnia, quaecumque ille fecisset, essent rata. nam cum ceteris in civitatibus tyrannis institutis leges omnes extinguantur atque tollantur, hic rei publicae tyrannum lege constituit. est invidiosa lex, sicuti dixi: verum tamen habet excusationem, non enim videtur hominis lex esse, sed temporis. quid, si est haec multo impudentior? nam Va-<sup>6</sup>  
leria lege Corneliisque legibus eripitur, cum datur; coniungitur impudens gratificatio cum acerba iniuria: sed tamen imbibit illis legibus spem non nullam, cui ademptum est, aliquem scrupulum, cui datum est. Rulli cautio est haec: QUI POST C. MARIUM CN. PAPIRIUM CONSULES. quam procul a suspitione fugit, quod eos consules, qui adversarii Sullae maxime fuerunt, potissimum nominavit? si enim Sullam dictatorem nominasset, perspicuum fore et invidiosum arbitratus est; sed quem nostrum tam tardo ingenio fore putavit, cui post eos consules Sullam dictatorem fuisse in mentem venire non posset? quid<sup>7</sup>  
ergo ait Marianus tribunus plebis, qui nos Sullanos in invidiam rapit? QUI POST MARIUM ET CARBONEM CONSULES AGRI, AEDIFICIA, LACUS, STAGNA, LOCA, POSSESSIONES — caelum et mare praetermisit, cetera complexus est — PUBLICE DATA, ADSIGNATA, VENDITA, CONCESSA SUNT. a quo, Rulle? post Marium et Carbonem consules quis adsignavit, quis dedit, quis concessit praeter Sullam? EA



OMNIA EO IURE SINT. quo iure? labefactat videlicet nescio quid; nimium acer, nimium vehemens tribunus plebis Sullana rescindit. UT QVAE OPTIMO IURE PRIVATA SUNT.

8 etiamne meliore quam paterna et avita? meliore. at hoc Valeria lex non dicit; Corneliae leges non sanciunt; Sullani ipsi non postulant. si isti agri partem aliquam iuris, aliquam similitudinem propriae possessionis, aliquam spem diuturnitatis attingunt, nemo est tam impudens istorum, quin agi secum praeclare arbitretur. tu vero, Rulle, quid quaeris? quod habent ut habeant? quis vetat? ut privatum sit? ita latum est, ut meliore iure tui soceri fundus Hirpinus sit sive ager Hirpinus — totum enim possidet — quam meus paternus avitusque

9 fundus Arpinas; id enim caves. optimo enim iure ea sunt profecto praedia, quae optima condicione sunt; libera meliore iure sunt quam serva: capite hoc omnia, quae serviebant, non servient; soluta meliore in causa sunt quam obligata; eodem capite subsignata omnia, si modo Sullana sunt, liberantur; immunia meliore condicione sunt quam illa, quae pensitant: ego Tusculanis pro aqua Crabra vectigal pendam, quia mancipio fundum accepi; si a Sulla mihi datus esset, Rulli lege non penderem.

3  
10 video vos, Quirites, sicuti res ipsa cogit, commoveri vel legis vel orationis impudentia: legis, quae ius melius Sullanis praediis constituat quam paternis, orationis, quae eius modi in causa insimulare quemquam audeat rationes Sullae nimium vehementer defendere. at si illa solum sanciret, quae a Sulla essent data, tacerem, modo ipse se Sullanum esse confiteretur; sed non modo illis cavet, verum etiam aliud quoddam genus donationis inducit; et is, qui a me Sullanas possessiones defendi criminatur, non eas solum sancit, verum ipse novas adsignationes instituit et repentinus Sulla nobis

11 exoritur: nam attendite quantas concessionem agrorum hic noster obiurgator uno verbo facere conetur: QVAE DATA, DONATA, CONCESSA, VENDITA. patior; audio. quid deinde? POSSESSA. hoc tribunus plebis promulgare ausus est, ut quod quisque post Marium et Carbonem consules possideret, id eo iure teneret, quo quod optimo privatum est? etiamne, si vi deiecit? etiamne, si clam,

si precario venit in possessionem? ergo hac lege ius civile, causae possessionum, praetorum interdicta tollentur. non mediocres res neque parvum sub hoc verbo<sup>12</sup> furtum, Quirites, latet: sunt enim multi agri lege Cornelia publicati nec cuiquam adsignati neque venditi, qui a paucis hominibus impudentissime possidentur: his cavet, hos defendit, hos privatos facit; hos, inquam, agros, quos Sulla nemini dedit, Rullus non vobis adsignare volt, sed eis condonare, qui possident. causam quaero cur ea, quae maiores vobis in Italia, Sicilia, [Africa,] duabus Hispaniis, Macedonia, Asia quaesiverunt, venire patiamini, cum ea, quae vestra sunt, condonari possessoribus eadem lege videatis. iam totam<sup>13</sup> legem intellegitis, cum ad paucorum dominationem scripta sit, tum ad Sullanæ adsignationis rationes esse adcommodatissimam: nam socer huius vir multum bonus est; neque ego nunc de illius bonitate, sed de generi impudentia disputo: ille enim quod habet retinere volt<sup>4</sup> neque se Sullanum esse dissimulat; hic, ut ipse habeat quod non habet, quae dubia sunt per vos sanciri volt; et, cum plus appetat quam ipse Sulla, quia his rebus resisto, Sullanas res defendere † criminor. ‘habet<sup>14</sup> agros non nullos’ inquit ‘socer meus desertos atque longinquos: vendet eos mea lege quanti volet; habet incertos ac nullo iure possessos: confirmabuntur optimo iure; habet publicos: reddam privatos; denique eos fundos, quos in agro Casinati optimos fructuosissimosque continuavit, cum usque eo vicinos proscriberet, quoad oculis conformando ex multis praediis unam fundi regionem formamque perficeret, quos nunc cum aliquo metu tenet, sine ulla cura possidebit.

Et quoniam, qua de causa et quorum causa ille hoc<sup>15</sup> promulgaverit, ostendi, doceat ipse num ego quem *Sullanum* possessorem defendam, cum agrariae legi resisto: silvam Scantiam vendis; res publica possidet: defendo. Campanum agrum dividis; vos estis in possessione: non cedo; deinde Italiae, Siciliae ceterarumque provinciarum possessiones venalis ac proscriptas hac lege video; vestra sunt praedia, vestrae possessiones: resistam at-

que repugnabo neque patiar a quoquam rem publicam de suis possessionibus me consule dimoveri, praesertim  
16 cum vobis nihil quaeratur; hoc enim vos *in* errore versari diutius non oportet. num quis vestrum ad vim, ad facinus, ad caedem adcommodatus est? nemo. atqui ei generi hominum, mihi credite, Campanus ager et praeclara illa Capua servatur; exercitus contra vos, contra libertatem vestram, contra Cn. Pompeium constituitur: contra hanc urbem Capua, contra vos manus hominum audacissimorum, contra Cn. Pompeium decem duces comparantur. veniant coram et quoniam me in vestram contionem vobis flagitantibus evocaverunt, disserant.

---

M. TULLII CICERONIS  
 PRO C. RABIRIO PERDUELLIONIS REO  
 AD QUIRITES ORATIO.

Etsi, Quirites, non est meae consuetudinis initio di-<sup>1</sup>  
 cendi rationem reddere qua de causa quemque defendam,  
 propterea quod cum omnibus civibus in eorum periculis  
 semper satis iustam mihi causam necessitudinis esse  
 duxi, tamen in hac defensione capitis, famae fortunarum-  
 que omnium C. Rabirii proponenda ratio videtur esse  
 officii mei, propterea quod, quae iustissima mihi causa  
 ad hunc defendendum esse visa est, eadem vobis ad ab-  
 solvendum debet videri. nam me cum amicitiae vetustas,<sup>2</sup>  
 cum dignitas hominis, cum ratio humanitatis, cum meae  
 vitae perpetua consuetudo ad C. Rabirium defendendum  
 est adhortata, tum vero, ut id studiosissime facerem,  
 salus rei publicae, consulare officium, consulatus deni-  
 que ipse mihi una a vobis cum salute rei publicae com-  
 mendatus coëgit. non enim C. Rabirium culpa delicti,  
 non invidia vitae, non denique veteres iustae gravesque  
 inimicitiae civium in discrimen capitis vocaverunt, sed  
 ut illud summum auxilium maiestatis atque imperii, quod  
 nobis a maioribus est traditum, de re publica tolleretur,  
 ut nihil posthac auctoritas senatus, nihil consulare im-  
 perium, nihil consensio bonorum contra pestem ac per-  
 niciem civitatis valeret, idcirco [in his rebus evertendis]  
 unius hominis senectus, infirmitas solitudoque temptata  
 est. quam ob rem si est boni consulis, cum cuncta au-<sup>3</sup>  
 xilia rei publicae labefactari convellique videat, ferre  
 opem patriae, succurrere saluti fortunisque communibus,  
 implorare civium fidem, suam salutem posteriorem salute  
 communi ducere, est etiam bonorum et fortium civium,  
 quales vos omnibus rei publicae temporibus exstitistis,  
 intercludere omnis seditionum vias, munire praesidia rei  
 publicae, summum in consulibus imperium, summum in



senatu consilium putare; *eaque* qui secutus sit, laude potius et honore quam poena et supplicio dignum iudicare. <sup>4</sup> quam ob rem labor in hoc defendendo praecipue meus est, studium vero conservandi hominis commune mihi <sup>2</sup> vobiscum esse debet. sic enim existimare debetis, Quirites, post hominum memoriam rem nullam maiorem, magis periculosam, magis ab omnibus vobis providendam neque a tribuno plebis susceptam neque a consule defensam neque ad populum Romanum esse delatam: agitur enim nihil aliud in hac causa, Quirites, nisi ut nullum sit posthac in re publica publicum consilium, nulla bonorum consensus contra improborum furorem et audaciam, nullum extremis rei publicae temporibus per- <sup>5</sup> fugium et praesidium salutis. quae cum ita sint, primum, quod in tanta dimicatione capitis, famae fortunarumque omnium fieri necesse est, ab Iove Optimo Maximo ceterisque dis deabusque immortalibus, quorum ope et auxilio multo magis haec res publica quam ratione hominum et consilio gubernatur, pacem ac veniam peto, precorque ab eis, ut hodiernum diem et ad huius salutem conservandam et ad rem publicam constituendam inluxisse patiantur; deinde vos, Quirites, quorum potestas proxime ad deorum immortalium numen accedit, oro atque obsecro, quoniam uno tempore *et* vita C. Rabirii, hominis miserissimi atque innocentissimi, *et* salus rei publicae vestris manibus suffragiisque permittitur, adhibeatis in hominis fortunis misericordiam, in rei publicae salute sapientiam, quam soletis.

<sup>6</sup> Nunc quoniam, T. Labiene, diligentiae meae temporis angustiis obstitisti meque ex comparato et constituto spatio defensionis in semihorae curriculum coëgisti, parebitur, et, quod iniquissimum est, accusatoris conditioni et, quod miserrimum, inimici potestati; quamquam in hac praescriptione semihorae patroni mihi partis reliquisti, consulis ademisti, propterea quod ad defendendum prope modum satis erit [hoc] mihi temporis, ad conque- <sup>7</sup> rendum parum. nisi forte de locis religiosis ac de lucis, quos ab hoc violatos esse dixisti, pluribus verbis tibi respondendum putas; quo in crimine nihil est umquam abs te dictum, nisi a C. Macro obiectum esse crimen id C.

Rabirio; in quo ego demiror meminisse te quid obiecerit C. Rabirio Macer inimicus, oblitum esse quid acqui et iurati iudices iudicarint. an de peculatu facto aut de tabulario incenso longa oratio est expromenda? quo in crimine propinquus C. Rabirii iudicio clarissimo, C. Curtius, pro virtute sua est honestissime liberatus, ipse vero Rabirius non modo in iudicium horum criminum, sed ne in tenuissimam quidem suspicionem verbo est umquam vocatus. an de sororis filio diligentius respondendum est? quem ab hoc necatum esse dixisti, cum ad iudicii moram familiaris funeris excusatio quaereretur. quid enim? est [tam] veri simile [quam] cariorum huic sororis maritum quam sororis filium fuisse, atque ita cariorum, ut alter vita crudelissime privaretur, [cum] alteri ad prolationem iudicii biduum quaereretur? an de servis alienis contra legem Fabiam retentis aut de civibus Romanis contra legem Porciam verberatis aut necatis plura dicenda sunt, cum tanto studio C. Rabirius totius Apuliae, singulari voluntate Campaniae [vicinitatis] ornetur, cumque ad eius propulsandum periculum non modo homines, sed prope regiones ipsae convenerint, aliquanto etiam latius excitatae quam ipsius vicinitatis nomen ac termini postulabant? nam quid ego ad id longam orationem comparem, quod est in eadem multae inrogatione perscriptum, hunc nec suae nec alienae pudicitiae pepercisse? quin etiam suspicor eo mihi semihoram a Labieno praestitutam esse, ut ne plura de pudicitia dicerem. ergo ad haec crimina, quae patroni diligentiam desiderant, intellegis mihi semihoram istam nimium longam fuisse: illam alteram partem de nece Saturnini nimis exiguum atque angustam esse voluisti: quae non oratoris ingenium, sed consulis auxilium implorat et flagitat. nam de perduellionis iudicio, quod a me sublatum esse criminari soles, meum crimen est, non Rabirii; quod utinam, Quirites, ego [id] aut primus aut solus ex hac re publica sustulissem, ut hoc, quod ille crimen esse volt, proprium testimonium meae laudis esset! quid enim optari potest quod ego malletm quam me in consulatu meo carnificem de foro, crucem de campo sustulisse? sed ista laus primum est maiorum nostrorum, Quirites, qui expulsis regibus nullum

in libero populo vestigium crudelitatis regiae retinuerunt, deinde multorum virorum fortium, qui vestram libertatem non acerbitate suppliciorum infestam, sed lenitate legum  
<sup>4</sup> munitam esse voluerunt. quam ob rem uter nostrum tan-  
<sup>11</sup> dem, Labiene, popularis est? tune, qui civibus Romanis in contione ipsa carnificem, qui vincla adhiberi putas oportere, qui in campo Martio, comitiis centuriatis, auspicato in loco, crucem ad civium supplicium defigi et constitui iubes, an ego, qui funestari contionem contagione carnificis veto, qui expiandum forum populi Romani ab illis nefarii sceleris vestigiis esse dico, qui castam contionem, sanctum campum, inviolatum corpus omnium civium Romanorum, integrum ius libertatis de-  
<sup>12</sup> fendo servari oportere? popularis vero tribunus plebis es, custos defensorque iuris et libertatis! Porcia lex virgas ab omnium civium Romanorum corpore amovit: hic misericors flagella rettulit; Porcia lex libertatem civium licteri eripuit: Labienus, homo popularis, carnifici tradidit; C. Gracchus legem tulit, ne de capite civium Romanorum iniussu vestro iudicaretur: hic popularis a viris, iniussu vestro, non iudicari de cive Romano, sed indicta causa civem Romanum capitis condemnari cōgit.  
<sup>13</sup> tu mihi etiam legis Porciae, tu C. Gracchi, [tu horum libertatis,] tu cuiusquam denique hominis popularis mentionem facis, qui non modo suppliciiis invisitatis, sed etiam verborum crudelitate inaudita violare libertatem huius populi, temptare mansuetudinem, commutare disciplinam conatus es? nam [haec tua,] quae te, hominem clementem popularemque delectant: I, LICTOR, CONLIGA MANUS, [quae] non modo huius libertatis mansuetudinisque non sunt, sed ne Romuli quidem aut Numae Pompilii: Tarquinii, superbissimi atque crudelissimi regis, ista sunt cruciatus carmina; quae tu, homo lenis ac popularis, libentissime commemoras: CAPUT OBNUBITO, ARBORI INFELICI SUSPENDITO . . . . . [quae verba, Quirites,] iam pridem in hac re publica non solum tenebris vetustatis,  
<sup>5</sup> <sup>14</sup> verum etiam luce libertatis oppressa sunt. an vero, si actio ista popularis esset et si ullam partem acquitatis haberet aut iuris, C. Gracchus eam reliquisset? scilicet tibi graviolem dolorem patrui [tui] mors attulit quam

C. Graccho fratris, et tibi acerbior eius patruī mors est, quem numquam vidisti, quam illi eius fratris, quicum concordissime vixerat, et similis viri tu ulcisceris [patruī] mortem atque ille persequeretur [fratris suī], si ista ratione agere voluisset, et par desiderium sui reliquit apud populum Romanum Labienus iste, [patruus vester,] quisquis fuit, ac Ti. Gracchus reliquerat? an pietas tua maior quam C. Gracchi? an animus? an consilium? an opes? an auctoritas? an eloquentia? quae si in illo minima fuissent, tamen prae tuis facultatibus maxima putarentur: cum vero his rebus omnibus C. Gracchus omnis vicerit, <sup>15</sup> quantum intervallum tandem inter te atque illum interiectum esse putas? sed moreretur prius acerbissima morte miliens C. Gracchus quam in eius contione carnifex consisteret: quem non modo foro, sed etiam caelo hoc ac spiritu censoriae leges atque urbis domicilio carere voluerunt. hic se popularem dicere audet, me alienum a commodis vestris, cum iste omnis et suppliciorum et verborum acerbitates non ex memoria vestra ac patrum vestrorum, sed ex annalium monumentis atque ex regum commentariis conquisierit, ego omnibus meis opibus, omnibus consiliis, omnibus dictis atque factis repugnarem et restiterim crudelitati? nisi forte hanc condicionem vobis esse voltis, quam servi, si libertatis spem propositam non haberent, ferre nullo modo possent: misera est igno- <sup>16</sup> minia iudiciorum publicorum, misera multatio bonorum, miserum exsilium; sed tamen in omni calamitate retinetur aliquod vestigium libertatis; mors denique si proponitur, in libertate moriamur: carnifex vero et obductio capitis et nomen ipsum crucis absit non modo a corpore civium Romanorum, sed etiam a cogitatione, oculis, auribus; harum enim omnium rerum non solum eventus atque permissio, sed etiam condicio, exspectatio, mentio ipsa denique indigna cive Romano atque homine libero est. an vero servos nostros horum suppliciorum omnium metu dominorum benignitas vindicta una liberat: nos a verberibus, ab unco, a crucis denique terrore neque res gestae neque acta aetas neque vestri honores vindicabunt? quam ob rem fateor atque etiam, Labiene, pro- <sup>17</sup> fiteor et prae me fero te ex illa crudeli, importuna, non



tribunicia actione, sed regia meo consilio, virtute, auctoritate esse depulsum; qua tu in actione quamquam omnia exempla maiorum, omnis leges, omnem auctoritatem senatus, omnis religiones atque auspicio[rum] publica iura neglexisti, tamen a me haec in hoc tam exiguo meo tempore non audies: liberum tempus nobis dabitur ad istam disceptationem.

<sup>6</sup>  
<sup>18</sup> Nunc de Saturnini [crimine] ac de clarissimi patru  
tui morte dicemus. arguis occisum esse a C. Rabirio L. Saturninum; at id C. Rabirius multorum testimoniis, Q. Hortensio copiosissime defendente, antea falsum esse docuit: ego autem, si mihi esset integrum, susciperem hoc crimen, agnoscerem, confiterer: utinam hanc mihi facultatem causa concederet, ut possem hoc praedicare, C. Rabirii manu L. Saturninum, hostem populi Romani, interfectum! — nihil me clamor iste commovet, sed consolatur, cum indicat esse quosdam civis imperitos, sed non multos. numquam, mihi credite, populus Romanus hic, qui silet, consulem me fecisset, si vestro clamore perturbatum iri arbitraretur. quanto iam levior est adclamatio! quin continetis vocem, indicem stultitiae vestrae,  
<sup>19</sup> testem paucitatis! — libenter, inquam, confiterer, si vere possem aut etiam si mihi esset integrum, C. Rabirii manu L. Saturninum esse occisum, et id facinus pulcherrimum esse arbitrarer, sed, quoniam id facere non possum, confitebor id, quod ad laudem minus valebit, ad crimen non minus: confiteor interficiendi Saturnini causa C. Rabirium arma cepisse. quid est, Labiene? quam a me gravio[re]m confessionem aut quod in hunc maius crimen expectas? nisi vero interesse aliquid putas inter eum, qui hominem occidit, et eum, qui cum telo occidendi hominis causa fuit. si interfici Saturninum nefas fuit, arma sumpta esse contra Saturninum sine scelere non possunt; si arma iure sumpta concedis, *interfectum iure concedas necesse est.*

. . . . .

<sup>7</sup>  
<sup>20</sup> Fit senatus consultum, ut C. Marius L. Valerius consules adliberent tribunos plebis et praetores quos eis videretur operamque darent, ut imperium populi Romani

maiestasque conservaretur: adhibent omnis tribunos plebis praeter Saturninum, *praetores* praeter Glauciam; qui rem publicam salvam esse vellent, arma capere et se sequi iubent. parent omnes. † ex aedificiis armanentariisque publicis arma populo Romano, C. Mario consule distribuent, dantur. hic iam, ut omittam cetera, de te ipso, Labiene, quaero: cum Saturninus Capitolium teneret armatus, esset una C. Glaucia, C. Saufeius, etiam ille ex compedibus atque ergastulo, Gracchus; addam, quoniam ita vis, eodem Q. Labienum, patrum tuum; in foro autem C. Marius et L. Valerius Flaccus consules, post cunctus senatus atque ille senatus, quem iam ne vos ipsi quidem [qui hos patres conscriptos, qui nunc sunt,] in invidiam vocatis, quo facilius de hoc senatu detrahere possitis; cum equester ordo, at quorum equitum [Romanorum], di immortales! [patrum nostrorum atque eius aetatis,] qui tum magnam partem rei publicae atque omnem dignitatem iudiciorum tenebat; cum omnes omnium ordinum homines, qui in salute rei publicae salutem suam repositam esse arbitrabantur, arma cepissent, quid tandem C. Rabirio faciendum fuit? de te ipso, inquam, 21 Labiene, quaero: cum ad arma consules ex senatus consulto evocassent; cum armatus M. Aemilius, princeps senatus, in comitio constitisset, qui cum ingredi vix posset, non ad insequendum sibi tarditatem pedum, sed ad fugiendum impedimento fore putabat; cum denique Q. Scaevola, confectus senectute, perditus morbo, mancus et membris omnibus captus ac debilis, hastili nixus et animi vim et infirmitatem corporis ostenderet; cum L. Metellus, Ser. Galba, C. Serranus, P. Rutilius, C. Fimbria, Q. Catulus omnesque, qui tum erant, consulares pro salute communi arma cepissent; cum omnes praetores, cuncta nobilitas ac iuventus accurreret, Cn. et L. Domitii, L. Crassus, Q. Mucius, C. Claudius, M. Drusus; cum omnes Octavii, Metelli, Iulii, Cassii, Catones, Pompei; cum L. Philippus, L. Scipio; cum M. Lepidus, D. Brutus; cum hic ipse P. Servilius, quo tu imperatore, Labiene, meruisti; cum hic Q. Catulus, admodum tum adulescens, cum hic C. Curio, cum denique omnes clarissimi viri cum consulibus essent, quid tandem C. Ra-

birium facere convenit? utrum inclusum atque abditum latere in occulto atque ignaviam suam tenebrarum ac parietum custodiis tegere an in Capitolium pergere atque ibi se cum tuo patruo et ceteris ad mortem propter vitae turpitudinem confugientibus congregare? an cum Mario, Scauro, Catulo, Metello, Scaevola, cum bonis denique omnibus coire non modo salutis, verum etiam periculi <sup>8</sup> societatem? tu denique, Labiene, quid faceres tali in re <sup>22</sup> ac tempore? cum ignaviae ratio te in fugam atque in latebras impelleret, improbitas et furor L. Saturnini in Capitolium arcesseret, consules ad patriae salutem ac libertatem vocarent, quam tandem auctoritatem, quam vocem, cuius sectam sequi, cuius imperio parere potissimum velles? ‘patruus’ inquit, ‘meus cum Saturnino fuit.’ quid, pater quicum? quid, propinqui vestri, equites Romani? quid, omnis praefectura, regio, vicinitas vestra? quid, ager Picenus universus utrum tribunicium furorem <sup>23</sup> an consularem auctoritatem secutus est? equidem hoc adfirmo, quod tu nunc de tuo patruo praedicas, neminem unquam adhuc de se esse confessum; nemo est, inquam, inventus tam profligatus, tam perditus, tam ab omni non modo honestate, sed etiam simulatione honestatis relictus qui se in Capitolio fuisse cum Saturnino fateretur. at fuit vester patruus. fuerit, et fuerit nulla desperatione rerum suarum, nullis domesticis vulneribus coactus; induxerit cum L. Saturnini familiaritas, ut amicitiam patriae praeponeret: idcircone oportuit C. Rabirium desciscere a re publica? non comparere in illa armata multitudine bonorum? consulum voci atque imperio non oboedire? <sup>24</sup> atqui videmus haec in rerum natura tria fuisse, ut aut cum Saturnino esset aut cum bonis aut lateret: latere mortis erat instar turpissimae, cum Saturnino esse furoris et sceleris, virtus et honestas et pudor cum consulibus esse cogeat: hoc tu igitur in crimen vocas, quod cum eis fuerit C. Rabirius, quos amentissimus fuisset si op- <sup>9</sup> pugnasset, turpissimus si reliquisset? at C. Decianus, de quo tu saepe commemoras, quia, cum hominem omnibus insignem notis turpitudinis, P. Furium, accusaret summo studio bonorum omnium, queri est ausus in contione de morte Saturnini, condemnatus est; [et] Sex. Titius, quod

habuit imaginem L. Saturnini domi suae, condemnatus est: statuerunt equites Romani illo iudicio improbum civem esse et non retinendum in civitate, qui hominis hostilem in modum seditiosi imagine aut mortem eius honestaret aut desideria imperitorum misericordia commoveret aut suam significaret imitandae improbitatis voluntatem. itaque mihi mirum videtur unde hanc tu, Labiene, imaginem, quam tu habes, inveneris; nam Sex. Titio damnato qui istam habere auderet inventus est nemo: quod tu si audisses aut si per aetatem scire potuisses, numquam profecto istam imaginem, quae domi posita pestem atque exilium Sex. Titio attulit, in rostra atque in contionem attulisses nec tuas unquam ratis ad eos scopulos appulisses, ad quos Sex. Titii adflictam navem et in quibus C. Deciani naufragium fortunarum videres. sed in his rebus omnibus imprudentia laboris: causam enim suscepisti antiquiorem memoria tua; quae causa ante mortua est, quam tu natus es; qua in causa tute profecto fuisses, si per aetatem esse potuisses, eam cum in iudicium vocas, [an] non intellegis primum quos homines et qualis viros mortuos summi sceleris arguas? deinde quot ex eis, qui vivunt, eodem crimine in summum periculum capitis arcessas? nam si C. Rabirius fraudem capitalem admisit, quod arma contra L. Saturninum tulit, huic quidem adferet aliquam deprecationem periculi aetas illa, qua tum fuit, Q. vero Catulum, patrem huius, in quo summa sapientia, eximia virtus, singularis humanitas fuit, M. Scaurum, illa gravitate, illo consilio, illa prudentia; duos Mucios L. Crassum, M. Antonium, qui tum extra urbem cum praesidio fuit, quorum in hac civitate longe maximi consilia atque ingenia fuerunt, ceteros pari dignitate praeditos custodes gubernatoresque rei publicae quem ad modum mortuos defendemus? quid de illis honestissimis viris atque optimis civibus, equitibus Romanis, dicemus, qui tum una cum senatu salutem rei publicae defenderunt? quid de tribunis aerariis ceterorumque ordinum omnium hominibus, qui tum arma pro communi libertate ceperunt? sed quid ego de eis omnibus, qui consulari imperio paruerunt, loquor? ipsorum consulum fama quid futurum est? L. Flaccum, hominem



cum semper in re publica tum in magistratibus gerendis, in sacerdotio caerimoniisque, quibus praeerat, diligentissimum, nefarii secleris ac parricidii mortuum condemnabimus? adiungemus ad hanc labem ignominiamque mortis etiam C. Marii nomen? C. Marium, quem vere patrem patriae, parentem, inquam, vestrae libertatis atque huiusce rei publicae possumus dicere, secleris ac parricidii nefarii mortuum condemnabimus? etenim si C. Rabirio, quod iit  
28 ad arma, crucem T. Labienus in campo Martio defigendam putavit, quod tandem excogitabitur in eum supplicium, qui vocavit? ac si fides Saturnino data est, quod abs te saepissime dicitur, non eam C. Rabirius, sed C. Marius dedit, idemque violavit, si in fide non stetit. quae fides, Labiene, qui potuit sine senatus consulto dari? adeone hospes es huiusce urbis, adeone ignarus disciplinae consuetudinisque nostrae, ut haec nescias, ut peregrinari in aliena civitate, non in tua magistratum gerere  
29 videre? ‘quid iam ista C. Mario’ inquit ‘nocere possunt [quoniam sensu et vita caret]?’ itane vero? tantis in laboribus C. Marius periculisque vixisset, si nihil longius, quam vitae termini postulabant, spe atque animo de se et gloria sua cogitasset? at, credo, cum innumerabilis hostium copias in Italia fudisset atque obsidione rem publicam liberasset, omnia sua secum una moritura arbitrabatur. non est ita, Quirites; neque quisquam nostrum in rei publicae periculis cum laude ac virtute versatur quin spe posteritatis fructuque ducatur; itaque cum multis aliis de causis virorum bonorum mentes divinae mihi atque aeternae videntur esse, tum maxime, quod optimi et sapientissimi cuiusque animus ita praesentit in posterum,  
30 ut nihil nisi sempiternum spectare videatur. quapropter equidem et C. Marii et ceterorum virorum sapientissimorum ac fortissimorum civium mentis, quae mihi videntur ex hominum vita ad deorum religionem et sanctimoniam demigrasse, testor me pro illorum fama, gloria, memoria non secus ac pro patriis fanis atque delubris propugnandum putare, ac si pro illorum laude mihi arma capienda essent, non minus strenue caperem, quam illi pro communi salute ceperunt. etenim, Quirites, exiguum nobis vitae curriculum natura circumscripsit, immensum gloriae;

qua [re] si eos, qui iam de vita decesserunt, ornabimus, 11  
iustiores nobis mortis condicionem relinquemus. sed si  
illos, Labiene, quos iam videre non possumus, negligis,  
ne his quidem, quos vides, consuli putas oportere? nemi- 31  
nem esse dico ex his omnibus, qui illo die Romae fuerit,  
quem tu diem in iudicium vocas, pubesque tum fuerit,  
quin arma ceperit, quin consules secutus sit; omnes ei,  
quorum tu ex aetate coniecturam facere potes quid tum  
fecerint, abs te capitis C. Rabirii nomine citantur. 'at  
occidit Saturninum Rabirius.' utinam fecisset! non sup-  
plicium deprecarer, sed praemium postularem. etenim si  
Scaevae, servo Q. Crotonis, qui occidit L. Saturninum,  
libertas data est, quod equiti Romano praenium dari par  
fuisset? et, si C. Marius, quod fistulas, quibus aqua  
suppeditabatur Iovis Optimi Maximi templis ac sedibus,  
praeceidi imperarat, quod in clivo Capitolino improborum  
civium . . . . .

\* \* \* aret. itaque non senatus in ea causa cogno- 12  
scenda me agente diligentior aut inclementior fuit, quam 32  
vos universi, cum orbis terrae distributionem atque illum  
ipsum agrum Campanum animis, manibus, vocibus repu-  
diavistis.

idem ego, quod is, qui auctor huius iudicii est, clamo, 33  
praedico, denuntio: nullus est reliquus rex, nulla gens,  
nulla natio quam pertimescatis; nullum adventicium,  
nullum extraneum malum est quod insinuare in hanc rem  
publicam possit; si immortalem hanc civitatem esse vultis,  
si aeternum hoc imperium, si gloriam sempiternam manere,  
nobis a nostris cupiditatibus, a turbulentis hominibus at-  
que novarum rerum cupidis, ab intestinis malis, a dome-  
sticis consiliis est cavendum.

hiscæ autem malis magnum praesidium vobis maiores 34  
vestri reliquerunt, vocem illam consulis, 'qui rem publi-  
cam salvam esse volunt.' huic voci, favete, Quirites, ne-  
que vestro iudicio abstuleritis mihi . . . . . neque  
eripueritis rei publicae spem libertatis, spem salutis, spem  
dignitatis.

quid facerem, si T. Labienus caedem civium fecisset, 35  
ut L. Saturninus, si carcerem refregisset, si Capitolium

*cum armatis occupavisset? facerem idem, quod C. Marius fecit: ad senatum referrem, vos ad rem publicam defendendam cohortarer, armatus ipse vobiscum armato ob-  
sisterem: nunc, quoniam armorum suspitio nulla est, tela non video, non vis, non caedes, non Capitolii atque arcis obsessio est, sed accusatio perniciosa, iudicium acerbum, res tota a tribuno plebi suscepta contra rem publicam, non vos ad arma vocandos esse, verum ad suffragia cohortandos contra oppugnationem vestrae maiestatis putavi. itaque nunc vos omnis oro atque obtestor hortorque: non ita mos est, consulem cum es . . . . .*

13

36

*. . . . timet: qui hasce ore adverso pro re publica cicatrices ac notas virtutis accepit, is ne quod accipiat famae vulnus, † perhorrescit: quem nunquam incursiones hostium loco movere potuerunt, is nunc impetum  
37 civium, cui necessario cedendum est, perhorrescit. neque a vobis iam bene vivendi, sed honeste moriendi facultatem petit: neque tam ut domo sua fruatur quam ne patrio sepulcro privetur laborat. nihil aliud iam vos orat atque obsecrat, nisi uti ne se legitimo funere et domestica morte privetis, ut eum, qui pro patria nullum umquam mortis periculum fugit, in patria mori patiamini.*

38

*Dixi ad id tempus, quod mihi a tribuno plebis praestitutum est: a vobis peto quaesoque ut hanc meam defensionem pro amici periculo fidelem, pro rei publicae salute consularem putetis.*

M. TULLII CICERONIS  
ORATIO QUA L. CATILINAM EMISIT  
IN SENATU HABITA.

Quo usque tandem abutere, Catilina, patientia nostra? <sup>1</sup>  
quam diu etiam furor iste tuus nos eludet? quem ad finem <sup>1</sup>  
sese effrenata iactabit audacia? nihilne te nocturnum prae-  
sidium Palatii, nihil urbis vigiliae, nihil timor populi,  
nihil concursus bonorum omnium, nihil hic munitissimus  
habendi senatus locus, nihil horum ora voltusque move-  
runt? patere tua consilia non sentis? constrictam iam  
horum omnium scientia teneri coniurationem tuam non  
vides? quid proxima, quid superiore nocte egeris, ubi  
fueris, quos convocaveris, quid consilii ceperis quem no-  
strum ignorare arbitraris? o tempora! o mores! senatus <sup>2</sup>  
haec intellegit, consul videt; hic tamen vivit. vivit? immo  
vero etiam in senatum venit, fit publici consilii particeps,  
notat et designat oculis ad caedem unum quemque no-  
strum: nos autem, fortes viri, satis facere rei publicae  
videmur, si istius furorem ac tela vitemus. ad mortem  
te, Catilina, duci iussu consulis iam pridem oportebat,  
in te conferri pestem quam tu in nos [iam diu] machinaris.  
an vero vir amplissimus, P. Scipio, pontifex maximus, <sup>3</sup>  
Ti. Gracchum mediocriter labefactantem statum rei pu-  
blicae privatus interfecit: Catilinam orbem terrae caede  
atque incendiis vastare cupientem nos consules perfere-  
mus? nam illa nimis antiqua praetereo, quod C. Servilius  
Ahalas Spurium Maelium novis rebus studentem manu sua  
occidit. fuit, fuit ista quondam in hac re publica virtus,  
ut viri fortes acrioribus suppliciis civem perniciosum quam  
acerbissimum hostem coërcerent. habemus senatus con-  
sultum in te, Catilina, vehemens et grave; non deest rei  
publicae consilium neque auctoritas huius ordinis: nos,  
nos, dico aperte, consules desumus. decrevit quondam <sup>2</sup>  
senatus, ut L. Opimius consul videret ne quid res pu- <sup>4</sup>



- blica detrimenti caperet: nox nulla intercessit: interfectus est propter quasdam seditionum suspensiones C. Gracchus, clarissimo patre, avo, maioribus; occisus est cum liberis M. Fulvius consularis. simili senatus consulto C. Mario et L. Valerio consulibus est permissa res publica: num unum diem postea L. Saturninum tribunum plebis et C. Servilium praetorem [mors ac] rei publicae poena remota est? at nos vicesimum iam diem patimur hebescere aciem horum auctoritatis: habemus enim huiusce modi senatus consultum, verum inclusum in tabulis, tamquam in vagina reconditum, quo ex senatus consulto confestim te interfectum esse, Catilina, convenit. vivis, et vivis non ad deponendam, sed ad confirmandam audaciam. cupio, patres conscripti, me esse clementem; cupio in tantis rei publicae periculis me non dissolutum videri,
- 5 sed iam me ipse inertiae nequitiaeque condemno. castra sunt in Italia contra populum Romanum in Etruriae faucibus conlocata; crescit in dies singulos hostium numerus; eorum autem castrorum imperatorem ducemque hostium intra moenia atque adeo in senatu videmus intestinam aliquam cotidie perniciem rei publicae molientem. si te iam, Catilina, comprehendi, si interfici iussero, credo, erit verendum mihi ne non hoc potius omnes boni serius a me quam quisquam crudelius factum esse dicat. verum ego hoc, quod iam pridem factum esse oportuit, certa de causa nondum adducor ut faciam: tum denique interficere, cum iam nemo tam improbus, tam perditus, tam tui similis inveniri poterit qui id non iure factum esse
- 6 fateatur; quam diu quisquam erit, qui te defendere audeat, vives, et vives ita, ut vivis, multis meis et firmis praesidiis oppressus, ne commovere te contra rem publicam possis; multorum te etiam oculi et aures non sentientem, sicut adhuc fecerunt, speculabuntur atque custodient.
- 3 Etenim quid est, Catilina, quod iam amplius exspectes, si neque nox tenebris obscurare coetus nefarios nec privata domus parietibus continere voces coniurationis [tuae] potest? si inlustrantur, si erumpunt omnia? muta iam istam mentem, mihi crede, obliviscere caedis atque incendiorum. teneris undique; luce sunt clariora nobis tua consilia omnia, quae iam mecum licet recognoscas:

meministine me ante diem XII. Kalendas Novembris dicere 7  
in senatu fore in armis certo die, qui dies futurus esset  
ante diem VI. Kal. Novembris, C. Manlium, audaciae sa-  
tellitem atque administrum tuae? num me fefellit, Cati-  
lina, non modo res tanta, tam atrox tamque incredibilis,  
verum, id quod multo magis est admirandum, dies? dixi  
ego idem in senatu caedem te optimatum contulisse in  
ante diem V. Kalendas Novembris, tum cum multi prin-  
cipes civitatis Roma non tam sui conservandi quam tuo-  
rum consiliorum reprimendorum causa profugerunt: num  
infitari potes te illo ipso die meis praesidiis, mea dili-  
gentia circumclusum commovere te contra rem publicam  
non potuisse, cum tu discessu ceterorum nostra tamen,  
qui remansissemus, caede te contentum esse dicebas?  
quid? cum te Praeneste Kalendis ipsis Novembribus oc- 8  
cupaturum nocturno impetu esse confideres, sensistine  
illam coloniam meo iussu [meis] praesidiis, custodiis, vi-  
giliis esse munitam? nihil agis, nihil moliris, nihil cogi-  
tas, quod non ego non modo audiam, sed etiam videam  
planeque sentiam. recognosce tandem mecum noctem 4  
illam superiorem: iam intelleges multo me vigilare acrius  
ad salutem quam te ad perniciem rei publicae. dico te  
priori nocte venisse inter falcarios — non agam obscure  
— in M. Laecae domum; convenisse eodem compluris  
eiusdem amentiae scelerisque socios. num negare audes?  
quid taces? convincam, si negas. video enim esse hic in  
senatu quosdam, qui tecum una fuerunt. o di immor- 9  
tales! ubinam gentium sumus? in qua urbe vivimus?  
quam rem publicam habemus? hic, hic sunt, in nostro  
numero, patres conscripti, in hoc orbis terrae sanctissimo  
gravissimoque consilio, qui de nostro omnium interitu,  
qui de huius urbis atque adeo de orbis terrarum exitio  
cogitent: hos ego video [consul] et de re publica senten-  
tiam rogo, et quos ferro trucidari oportebat, eos nondum  
voce volnero. fuisti igitur apud Laecam illa nocte, Ca-  
tilina; distribuisti partis Italiae; statuisti quo quemque  
proficisci placeret; delegisti quos Romae relinqueres, quos  
tecum educeres; discripsisti urbis partis ad incendia; con-  
firmasti te ipsum iam esse exiturum; dixisti paulum tibi  
esse etiam nunc morae, quod ego viverem: reperti sunt

duo equites Romani qui te ista cura liberarent et sese illa ipsa nocte paulo ante lucem me in meo lectulo interfecturos esse pollicerentur. haec ego omnia, vixdum  
 10 etiam coetu vestro dimisso, comperi; domum meam maioribus praesidiis munivi atque firmavi; exclusi eos, quos tu ad me salutatum miseras, cum illi ipsi venissent, quos ego iam multis ac summis viris ad me id temporis venturos esse praedixeram.

5 Quae cum ita sint, Catilina, perge quo coepisti: egredere aliquando ex urbe; patent portae; proficiscere: nimium diu te imperatorem tua illa Manliana castra desiderant. edue tecum etiam omnis tuos; si minus, quam plurimos; purga urbem. magno me metu liberabis, dum modo inter me atque te murus intersit: nobiscum versari iam diutius non potes; non feram, non patiar, non sinam.  
 11 magna dis immortalibus habenda est atque huic ipsi Iovi Statori, antiquissimo custodi huius urbis, gratia, quod hanc tam taetram, tam horribilem tamque infestam rei publicae pestem totiens iam effugimus: non est saepius in uno homine summa salus periclitanda rei publicae. quam diu mihi consuli designato, Catilina, insidiatus es, non publico me praesidio, sed privata diligentia defendi; cum proximis comitiis consularibus me consulem in campo et competitores tuos interficere voluisti, compressi conatus tuos nefarios amicorum praesidio et copiis, nullo tumultu publice concitato; denique, quotienscumque me petisti, per me tibi obstiti, quamquam videbam perniciem meam cum magna calamitate rei publicae esse coniun-  
 12 etam: nunc iam aperte rem publicam universam petis; templa deorum immortalium, tecta urbis, vitam omnium civium, Italiam [denique] totam ad exitium ac vastitatem vocas. qua re quoniam id, quod est primum et quod huius imperii disciplinaeque maiorum proprium est, facere nondum audeo, faciam id, quod est ad severitatem lenius et ad communem salutem utilius: nam si te interfici iussero, residebit in re publica reliqua coniuratorum manus; sin tu, quod te iam dudum hortor, exieris, exaurietur ex urbe tuorum comitum magna et perniciosa sentina rei  
 13 publicae. quid est, Catilina? num dubitas id me imperante facere, quod iam tua sponte faciebas? exire ex

urbe iubet consul hostem: interrogas me, num in exsilium? non iubeo; sed, si me consulis, suadeo. . quid est 6  
enim, Catilina, quod te iam in hac urbe delectare possit?  
in qua nemo est extra istam coniurationem perditorum  
hominum qui te non metuat, nemo qui non oderit. quae  
nota domesticae turpitudinis non inusta vitae tuae est?  
quod privatarum rerum dedecus non haeret in fama? quae  
libido ab oculis, quod facinus a manibus umquam tuis,  
quod flagitium a toto corpore afuit? cui tu adulescentulo,  
quem corruptelarum inlecebris inretisses, non aut ad au-  
daciam ferrum aut ad libidinem facem praetulisti? quid 14  
vero? nuper cum morte superioris uxoris novis nuptiis  
domum vacuefecisses, nonne etiam alio incredibili scelere  
hoc scelus cumulasti? quod ego praetermitto et facile  
patior sileri, ne in hac civitate tanti facinoris immanitas  
aut exstitisse aut non vindicata esse videatur. praetermitto  
ruinas fortunarum tuarum, quas omnis impendere tibi  
proximis Idibus senties: ad illa venio, quae non ad pri-  
vatam ignominiam vitiorum tuorum, non ad domesticam  
tuam difficultatem ac turpitudinem, sed ad summam rem  
publicam atque ad omnium nostrum vitam salutemque  
pertinent. potestne tibi haec lux, Catilina, aut huius 15  
caeli spiritus esse iucundus, cum scias horum esse nemi-  
nem qui nesciat te pridie Kalendas Ianuarias Lepido et  
Tullo consulibus stetisse in comitio cum telo? manum con-  
sulum et principum civitatis interficiendorum causa para-  
visse? sceleri ac furori tuo non mentem aliquam aut  
timorem [tuum], sed fortunam populi Romani obstitisse?  
ac iam illa omitto — neque enim sunt aut obscura aut  
non multa commissa — quotiens tu me designatum, quo-  
tiens consulem interficere conatus es! quot ego tuas pe-  
titiones ita coniectas, ut vitari posse non viderentur,  
parva quadam declinatione et, ut aiunt, corpore effugi!  
[nihil agis,] nihil adsequeris, [nihil moliris,] neque tamen  
conari ac velle desistis. quotiens tibi iam extorta est 16  
ista sica de manibus! quotiens vero excidit casu aliquo  
et elapsa est! [tamen ea carere diutius non potes] quae  
quidem quibus abs te initiata sacris ac devota sit nescio,  
quod eam necesse putas esse in consulis corpore defigere.  
nunc vero quae tua est ista vita? sic enim iam tecum 7



loquar, non ut odio permotus esse videar, quo debeo, sed ut misericordia, quae tibi nulla debetur. venisti paulo ante in senatum: quis te ex hac tanta frequentia, tot ex tuis amicis ac necessariis salutavit? si hoc post hominum memoriam contigit nemini, vocis exspectas contumeliam, cum sis gravissimo iudicio taciturnitatis oppressus? quid, quod adventu tuo ista subsellia vacuefacta sunt, quod omnes consulares, qui tibi persaepe ad caedem constituti fuerunt, simul atque adsedisti, partem istam subselliorum nudam atque inanem reliquerunt, quo tandem animo tibi  
 17 ferendum putas? servi mehercule mei si me isto pacto metuerent, ut te metuunt omnes cives tui, domum meam relinquendam putarem: tu tibi urbem non arbitraris? et, si me meis civibus iniuria suspectum tam graviter atque offensum viderem, carere me aspectu civium, quam infestis omnium oculis conspici mallet: tu, cum conscientia scelerum tuorum agnoscas odium omnium iustum et iam diu tibi debitum, dubitas, quorum mentis sensusque volneras, eorum aspectum praesentiamque vitare? si te parentes timerent atque odissent tui neque eos ulla ratione placare posses, tu, opinor, ab eorum oculis aliquo concederes: nunc te patria, quae communis est parens omnium nostrum, odit ac metuit et iam diu te nihil iudicat nisi de paricidio suo cogitare: huius tu neque auctoritatem verebere nec iudicium sequere nec vim per-  
 18 timesces? quae tecum, Catilina, sic agit et quodam modo tacita loquitur: 'nullum iam aliquot annis facinus exstitit nisi per te, nullum flagitium sine te; tibi uni multorum civium neces, tibi vexatio direptioque sociorum impunita fuit ac libera; tu non solum ad negligendas leges et quaestiones, verum etiam ad evertendas perfringendasque valuisti: superiora illa, quamquam ferenda non fuerunt, tamen, ut potui, tuli; nunc vero me totam esse in metu propter unum te, quicquid increperit, Catilinam timeri, nullum videri contra me consilium iniri posse quod a tuo scelere abhorreat, non est ferendum: quam ob rem discede atque hunc mihi timorem eripe: si est  
 8 verus, ne opprimar; sin falsus, ut tandem aliquando  
 19 timere desinam.' haec si tecum, ut dixi, patria loquatur, nonne impetrare debeat, etiam si vim adhibere non possit?

quid, quod tu te ipse in custodiam dedisti? quod vitandae suspicionis causa ad M. Lepidum te habitare velle dixisti? a quo non receptus etiam ad me venire ausus es, atque ut domi meae te adservarem rogasti: cum a me quoque id responsum tulisses, me nullo modo posse isdem parietibus tuto esse tecum, qui magno in periculo essem, quod isdem moenibus contineremur, ad Q. Metellum praectorem venisti; a quo repudiatus ad sodalem tuum, virum optimum, M. Marcellum demigrasti; quem tu videlicet et ad custodiendum [te] diligentissimum et ad suspicandum sagacissimum et ad vindicandum fortissimum fore putasti. sed quam longe videtur a carcere atque a vinculis abesse debere, qui se ipse iam dignum custodia iudicari? quae cum ita sint, Catilina, dubitas, <sup>20</sup> si emori aequo animo non potes, abire in aliquas terras et vitam istam, multis suppliciis iustis debitisque creptam, fugae solitudinique mandare?

‘Refer’ inquis ‘ad senatum’; id enim postulas et, si hic ordo placere decreverit te ire in exsilium, obtemperaturum te esse dicis. non referam, id quod abhorret a meis moribus, et tamen faciam ut intellegas quid hi de te sentiant. egredere ex urbe, Catilina, libera rem publicam metu, in exsilium, si hanc vocem exspectas, proficiscere. quid est, Catilina? eequid attendis, eequid animadvertis horum silentium? patiuntur, tacent. quid exspectas auctoritatem loquentium, quorum voluntatem tacitorum perspicis? at si hoc idem huic adulescenti <sup>21</sup> optimo P. Sestio, si fortissimo viro M. Marcello dixissem, iam mihi consuli hoc ipso in templo senatus iure optimo vim et manus intulisset. de te autem, Catilina, cum quiescunt, probant; cum patiuntur, decernunt; cum tacent, clamant; neque hi solum, quorum tibi auctoritas est videlicet cara, vita vilissima, sed etiam illi equites Romani, honestissimi atque optimi viri, ceterique fortissimi cives, qui circumstant senatum, quorum tu et frequentiam videre et studia perspicere et voces paulo ante exaudire potuisti: quorum ego vix abs te iam diu manus ac tela contineo, eosdem facile adducam, ut te haec, quae vastare iam pridem studes, relinquentem usque ad portas prosequantur.

9 Quamquam quid loquor? te ut ulla res frangat? tu  
 22 ut umquam te corrigas? tu ut ullam fugam meditere?  
 tu ut exsilium cogites? utinam tibi istam mentem di  
 immortales duint! tametsi video, si mea voce perterri-  
 tus ire in exsilium animum induxeris, quanta tem-  
 pestas invidiae nobis, si minus in praesens tempus,  
 recenti memoria scelerum tuorum, at in posteritatem im-  
 pendeat: sed est tanti, dum modo ista sit privata cala-  
 mitas et a rei publicae periculis seiungatur. sed tu  
 ut vitiis tuis commovere, ut legum poenas pertimescas,  
 ut temporibus rei publicae cedas, non est postulandum;  
 neque enim is es, Catilina, ut te aut pudor umquam a  
 turpitudine aut metus a periculo aut ratio a furore revo-  
 23 carit. quam ob rem, ut saepe iam dixi, proficiscere ac,  
 si mihi inimico, ut praedicas, tuo conflare vis invidiam,  
 recta perge in exsilium: vix feram sermones hominum,  
 si id feceris; vix molem istius invidiae, si in exsilium  
 iussu consulis ieris, sustinebo. sin autem servire meae  
 laudi et gloriae mavis, egredere cum importuna scelera-  
 torum manu, confer te ad Manlium, concita perditos ci-  
 ves, secerne te a bonis, infer patriae bellum, exsulta  
 impio latrocinio, ut a me non eiectus ad alienos, sed in-  
 24 vitatus ad tuos isse videaris. quamquam quid ego te in-  
 vitem, a quo iam sciam esse praemissos qui tibi ad forum  
 Aurelium praestolarentur armati? cui sciam pactam et  
 constitutam cum Manlio diem? a quo etiam aquilam illam  
 argenteam quam tibi ac tuis omnibus confido perniciosam  
 ac funestam futuram, cui domi tuae sacrarium scelerum  
 tuorum constitutum fuit, sciam esse praemissam? tu ut  
 illa carere diutius possis, quam venerari ad caedem pro-  
 ficiscens solebas, a cuius altaribus saepe istam impiam  
 10 dexteram ad necem civium transtulisti? ibis tandem ali-  
 25 quando, quo te iam pridem ista tua cupiditas effrenata  
 ac furiosa rapiebat; neque enim tibi haec res adfert do-  
 lorem, sed quandam incredibilem voluptatem. ad hanc  
 te amentiam natura peperit, voluntas exercuit, fortuna  
 servavit; numquam tu non modo otium, sed ne bellum  
 quidem nisi nefarium concupisti. nactus es ex perditis  
 atque ab omni non modo fortuna, verum etiam spe de-  
 26 relictis conflata improborum manum. hic tu qua laetitia

perfruere! quibus gaudiis exsultabis! quanta in voluptate bacchabere, cum in tanto numero tuorum neque audies virum bonum quemquam neque videbis! ad huius vitae studium meditati illi sunt qui feruntur labores tui, iacere humi non solum ad obsidendum stuprum, verum etiam ad facinus obeundum, vigilare non solum insidiantem somno maritorum, verum etiam bonis otiosorum. habes ubi ostentes tuam illam praeclaram patientiam famis, frigoris, inopiae rerum omnium, quibus te brevi tempore confectum esse senties. tantum profeci tum, cum te a<sup>27</sup> consulatu reppuli, ut exsul potius temptare quam consul vexare rem publicam posses, atque ut id, quod est a te scelerate susceptum, latrocinium potius quam bellum nominaretur.

Nunc, ut a me, patres conscripti, quandam prope<sup>11</sup> iustam patriae querimoniam detester ac deprecet, precipite, quaeso, diligenter quae dicam et ea penitus animis vestris mentibusque mandate. etenim si mecum patria, quae mihi vita mea multo est carior, si cuncta Italia, si omnis res publica loquatur: ‘M. Tulli, quid agis? tune cum, quem esse hostem comperisti, quem ducem belli futurum vides, quem exspectari imperatorem in castris hostium sentis, auctorem sceleris, principem coniurationis, evocatorem servorum et civium perditorum, exire patiere, ut abs te non emissus ex urbe, sed immissus in urbem esse videatur? non hunc in vincula duci, non ad mortem rapi, non summo supplicio mactari imperabis? quid tandem te impedit? mosne maiorum? at persaepe<sup>23</sup> etiam privati in hac re publica perniciosos civis morte multaverunt. an leges, quae de civium Romanorum supplicio rogatae sunt? at numquam in hac urbe qui a re publica defecerunt civium iura tenuerunt. an invidiam posteritatis times? praeclaram vero populo Romano refert gratiam, qui te hominem per te cognitum, nulla commendatione maiorum, tam mature ad summum imperium per omnis honorum gradus extulit, si propter invidiae aut alicuius periculi metum salutem civium tuorum neglegis. sed si quis est invidiae metus,<sup>29</sup> num est vehementius severitatis ac fortitudinis invidia quam inertiae ac nequitiae pertimescenda? an cum bello



vastabitur Italia, vexabuntur urbes, tecta ardebunt, tum  
12 te non existimas invidiae incendio conflagraturum?' his  
ego sanctissimis rei publicae vocibus et eorum hominum,  
qui hoc idem sentiunt, mentibus pauca respondebo: ego,  
si hoc optimum factu iudicarem, patres conscripti, Cati-  
linam morte multari, unius usuram horae gladiatori isti  
ad vivendum non dedissem; etenim si summi et clarissimi  
viri Saturnini et Gracchorum et Flacci et superiorum  
complurium sanguine non modo se non contaminarunt,  
sed etiam honestarunt, certe verendum mihi non erat ne  
quid hoc parricida civium interfecto invidiae mihi in po-  
steritatem redundaret; quod si ea mihi maxime impen-  
deret, tamen hoc animo semper fui, ut invidiam virtute  
30 partam gloriam, non invidiam putarem; quamquam non  
nulli sunt in hoc ordine, qui aut ea quae imminent non  
videant aut ea quae vident dissimulent; qui spem Cati-  
linae mollibus sententiis aluerunt coniurationemque na-  
scentem non credendo corroboraverunt; quorum auctori-  
tatem secuti multi non solum improbi, verum etiam im-  
periti, si in hunc animadvertissem, crudeliter et regie  
factum esse dicerent. nunc intellego, si iste, quo intendit,  
in Manliana castra pervenerit, neminem tam stultum fore  
qui non videat coniurationem esse factam, neminem tam  
improbum qui non fateatur. hoc autem uno interfecto  
intellego hanc rei publicae pestem paulisper reprimi, non  
in perpetuum comprimi posse. quod si se eiecerit secum-  
que suos eduxerit et eodem ceteros undique conlectos  
naufragos adgregarit, exstinguetur atque delebitur non  
modo haec tam adulta rei publicae pestis, verum etiam  
13 stirps ac semen malorum omnium; etenim iam diu, patres  
31 conscripti, in his periculis coniurationis insidiisque ver-  
samur, sed nescio quo pacto omnium scelerum ac veteris  
furoris et audaciae maturitas in nostri consulatus tempus  
erupit: quod si ex tanto latrocinio iste unus tolletur, vide-  
bimur fortasse ad breve quoddam tempus cura et metu  
esse relevati, periculum autem residebit et erit inclusum  
penitus in venis atque in visceribus rei publicae. ut saepe  
hominis aegri morbo gravi, cum aestu febrique iactan-  
tur, si aquam gelidam biberint, primo relevari videntur,  
deinde multo gravius vehementiusque afficiantur, sic

hic morbus, qui est in re publica, relevatus istius poena, vehementius reliquis vivis ingravescet. qua re secedant <sup>32</sup> improbi, secernant se a bonis, unum in locum congregentur, muro denique, [id] quod saepe iam dixi, discernantur a nobis; desinant insidiari domi suae consuli, circumstare tribunal praetoris urbani, obsidere cum gladiis curiam, malleolos et faces ad inflammandam urbem comparare; sit denique inscriptum in fronte unius cuiusque quid de re publica sentiat. polliceor hoc vobis, patres conscripti, tantam in nobis consulibus fore diligentiam, tantam in vobis auctoritatem, tantam in equitibus Romanis virtutem, tantam in omnibus bonis consensionem, ut Catilinae profectione omnia patefacta, inlustrata, oppressa, vindicata esse videatis.

Hisce ominibus, Catilina, cum summa rei publicae <sup>33</sup> salute, cum tua peste ac pernicie cumque eorum exitio, qui se tecum omni scelere parricidioque iunxerunt, proficiscere ad impium bellum ac nefarium. tu, Iuppiter, qui isdem quibus haec urbs auspiciis [a Romulo] es constitutus, quem Statorem huius urbis atque imperii vere nominamus, hunc et huius socios a tuis ceterisque templis, a tectis urbis ac moenibus, a vita fortunisque civium [omnium] arcebis, et homines bonorum inimicos, hostis patriae, latrones Italiae, scelerum foedere inter se ac nefaria societate coniunctos, aeternis suppliciis vivos mortuosque mactabis.

M. TULLII CICERONIS  
IN L. CATILINAM ORATIO SECUNDA  
HABITA AD POPULUM.

<sup>1</sup> Tandem aliquando, Quirites, L. Catilinam, furem  
<sup>1</sup> audacia, scelus anhelantem, pestem patriae nefarie mo-  
lientem, vobis atque huic urbi ferro flammaque minitan-  
tem ex urbe vel eiecimus vel emisimus vel ipsum egre-  
dientem verbis prosecuti sumus. abiit, excessit, evasit,  
erupit. nulla iam perniciēs a monstro illo atque prodigio  
moenibus ipsis intra moenia comparabitur. atque hunc  
quidem unum huius belli domestici ducem sine contro-  
versia vicimus; non enim iam inter latera nostra sica illa  
versabitur; non in campo, non in foro, non in curia, non  
denique intra domesticos parietes pertimescemus: loco  
ille motus est, cum est ex urbe depulsus. palam iam cum  
hoste nullo impediēte bellum [iustum] geremus. sine  
dubio perdidimus hominem magnificeque vicimus, cum  
illum ex occultis insidiis in apertum latrocinium conie-  
<sup>2</sup> cimus. quod vero non cruentum mucronem, ut voluit,  
extulit, quod vivis nobis egressus est, quod ei ferrum e  
manibus extorsimus, quod incolumis civis, quod stantem  
urbem reliquit, quanto tandem illum maerore esse ad-  
flictum et profligatum putatis? iacet ille nunc prostratus-  
que est et se perculsum atque abiectum esse sentit et re-  
torquet oculos profecto saepe ad hanc urbem, quam e  
suis faucibus ereptam esse luget: quae quidem mihi lae-  
tari videtur, quod tantam pestem evomuerit forasque  
proiecerit.

<sup>2</sup> Ac si quis est talis, qualis esse omnis oportebat, qui  
<sup>3</sup> in hoc ipso, in quo exsultat et triumphat oratio mea, me  
vehementer accuset, quod tam capitalem hostem non  
comprehenderim potius quam emisim, non est ista mea  
culpa, sed temporum. interfectum esse L. Catilinam et

gravissimo supplicio adfectum iam pridem oportebat, id-  
 que a me et nos maiorum et huius imperii severitas et  
 res publica postulabat: sed quam multos fuisse putatis  
 qui quae ego deferrem non crederent? [quam multos qui  
 propter stultitiam non putarent?] quam multos qui etiam  
 defenderent? [quam multos qui propter improbitatem fa-  
 verent?] ac si illo sublato depelli a vobis omne periculum  
 iudicarem, iam pridem ego L. Catilinam non modo in-  
 vidiae meae, verum etiam vitae periculo sustulissem.  
 sed cum viderem ne vobis quidem omnibus re etiam tum <sup>4</sup>  
 probata, si illum, ut erat meritus, morte multassem, fore  
 ut eius socios invidia oppressus persequi non possem,  
 rem huc deduxi, ut tum palam pugnare possetis, cum  
 hostem aperte videretis. quem quidem ego hostem quam  
 vehementer foris esse timendum putem, licet hinc intelle-  
 gatis, quod etiam moleste fero, quod ex urbe parum co-  
 mitatus exierit. utinam ille omnis secum suas copias  
 eduxisset! Tongilium mihi eduxit, quem amare in prae-  
 texta coeperat, Publicium et Minucium, quorum aes  
 alienum contractum in popina nullum rei publicae motum  
 adferre poterat: reliquit quos viros! quanto aere alieno!  
 quam valentis! quam nobilis! itaque ego illum exerci- <sup>3</sup>  
 tum prae Gallicanis legionibus et hoc dilectu, quem in <sup>5</sup>  
 agro Piceno et Gallico Q. Metellus habuit, et his copiis,  
 quae a nobis cotidie comparantur, magno opere con-  
 temno, conlectum ex senibus desperatis, ex agresti luxu-  
 ria, ex rusticis decoctoribus, ex eis, qui vadimonia de-  
 serere quam illum exercitum maluerunt; quibus ego non  
 modo si aciem exercitus nostri, verum etiam si edictum  
 praetoris ostendero, concident: hos, quos video volitare  
 in foro, quos stare ad curiam, quos etiam in senatum  
 venire, qui nitent unguentis, qui fulgent purpura, mallet  
 secum milites eduxisset: qui si hic permanent, memen-  
 tote non tam exercitum illum esse nobis quam hos, qui  
 exercitum deseruerunt, pertimescendos; atque hoc etiam  
 sunt timendi magis, quod quicquid cogitant me scire  
 sentiunt, neque tamen permoventur: video cui sit Apulia <sup>6</sup>  
 attributa, quis habeat Etruriam, quis agrum Picenum,  
 quis Gallicum, quis sibi has urbanas insidias caedis at-  
 que incendiolorum depoposcerit; omnia superioris noctis



consilia ad me perlata esse sentiunt; patefeci in senatu hesterno die; Catilina ipse pertimuit, profugit: hi quid exspectant? ne illi vehementer errant, si illam meam pristinam lenitatem perpetuam sperant futuram.

- 4 Quod exspectavi, iam sum adsecutus, ut vos omnes factam esse aperte coniurationem contra rem publicam videretis; nisi vero si quis est qui Catilinae similis cum Catilina sentire non putet. non est iam lenitati locus; severitatem res ipsa flagitat. unum etiam nunc concedam: excant, proficiscantur, ne patiantur desiderio sui Catilinam miserum tabescere. demonstrabo iter: Aurelia via profectus est; si adcelerare volent, ad vesperam con-
- 7 sequentur. o fortunatam rem publicam, si quidem hanc sentinam urbis eiecerit! uno mehercule Catilina exhausto, levata mihi et recreata res publica videtur. quid enim mali aut sceleris fingi aut cogitari potest quod non ille conceperit? quis tota Italia veneficus, quis gladiator, quis latro, quis sicarius, quis parricida, quis testamentorum subiecto, quis circumscriptor, quis ganeo, quis nepos, quis adulter, quae mulier infamis, quis corruptor iuventutis, quis corruptus, quis perditus inveniri potest qui se cum Catilina non familiarissime vixisse fateatur? quae caedes per hosce annos sine illo facta est? quod nefarium
- s stuprum non per illum? iam vero quae tanta umquam in ullo homine iuventutis inlecebra fuit quanta in illo? qui alios ipse amabat turpissime, aliorum amoris flagitiosissime serviebat; aliis fructum libidinum, aliis mortem parentum non modo impellendo, verum etiam adiuvando pollicebatur. nunc vero quam subito non solum ex urbe, verum etiam ex agris ingentem numerum perditorum hominum conlegerat! nemo non modo Romae, sed ne ullo quidem in angulo totius Italiae oppressus aere alieno fuit quem non ad hoc incredibile sceleris foedus asciverit.
- 5  
9 atque ut eius diversa studia in dissimili ratione perspicere possitis, nemo est in ludo gladiatorio paulo ad facinus audacior qui se non intimum Catilinae esse fateatur, nemo in scena levior et nequior qui se non eiusdem prope sodalem fuisse commemoret. atque idem tamen, stuprum et scelus exercitatione adsuefactus, frigore et fame et siti et vigiliis perferendis fortis ab istis praedicabatur,

cum industriae subsidia atque instrumenta virtutis in libidine audaciaque consumeret. hunc vero si secuti erunt <sup>10</sup> sui comites, si ex urbe exierint desperatorum hominum flagitiosi greges, o nos beatos, o rem publicam fortunatam, o praeclaram laudem consulatus mei! non enim iam sunt mediocres hominum libidines, non humanae ac tolerandae audaciae; nihil cogitant nisi caedem, nisi incendia, nisi rapinas. patrimonia sua profuderunt, fortunas suas obligaverunt; res eos iam pridem, fides nuper deficere coepit: eadem tamen illa, quae erat in abundantia, libido permanet. quod si in vino et alea comissiones solum et scorta quaererent, essent illi quidem desperandi, sed tamen essent ferendi: hoc vero quis ferre possit, inertis homines fortissimis viris insidiari, stultissimos prudentissimis, ebriosos sobriis, dormientis vigilantibus? qui mihi accubantes in conviviis, complexi mulieres impudicas, vino languidi, conferti cibo, sertis redimiti, unguentis obliti, debilitati stupris, eructant sermonibus suis caedem bonorum atque urbis incendia; quibus <sup>11</sup> ego confido impendere fatum aliquod et poenam iam diu improbitati, nequitiae, sceleri, libidini debitam aut instare iam plane aut certe appropinquare; quos si meus consulatus, quoniam sanare non potest, sustulerit, non breve nescio quod tempus, sed multa saecula propagarit rei publicae: nulla est enim natio quam pertimescamus, nullus rex qui bellum populo Romano facere possit; omnia sunt externa unius virtute terra marique pacata: domesticum bellum manet, intus insidiae sunt, intus inclusum periculum est, intus est hostis; cum luxuria nobis, cum amentia, cum scelere certandum est. huic ego me bello ducem profiteor, Quirites; suscipio inimicitias hominum perditorum; quae sanari poterunt, quacumque ratione sanabo; quae resecanda erunt, non patiar ad perniciem civitatis manere. proinde aut exeant aut quiescant aut, si et in urbe et in eadem mente permanent, ea quae merentur expectent.

At etiam sunt qui dicant, Quirites, a me in exsilium <sup>6</sup>  
eiectum esse Catilinam: quod ego si verbo adsequi possem, istos ipsos eicerem, qui haec loquuntur. homo enim <sup>12</sup>  
videlicet timidus aut etiam permodestus vocem consulis

ferre non potuit; simul atque ire in exsilium iussus est, paruit: quid? ut hesterno die, Quirites, cum domi meae paene interfectus essem, senatum in aedem Iovis Statoris convocavi, rem omnem ad patres conscriptos detuli: quo cum Catilina venisset, quis eum senator appellavit? quis salutavit? quis denique ita aspexit ut perditum civem ac non potius ut importunissimum hostem? quin etiam principes eius ordinis partem illam subselliorum, ad quam  
 13 ille accesserat, nudam atque inanem reliquerunt. hic ego vehemens ille consul, qui verbo civis in exsilium eicio, quaesivi a Catilina in nocturno conventu ad M. Laecam fuisset necne. cum ille, homo audacissimus, conscientia convictus, primo reticuisset, patefecit cetera: quid ea nocte egisset, quid in proximam constituisset, quem ad modum esset ei ratio totius belli descripta, edocui. cum haesitaret, cum teneretur, quaesivi quid dubitaret proficisci eo, quo iam pridem pararet, cum arma, cum securis, cum fascis, cum tubas, cum signa militaria, cum aquilam illam argenteam, cui ille etiam sacrarium [scelerum] domi suae  
 14 fecerat, scirem esse praemissam. in exsilium eiciebam, quem iam ingressum esse in bellum videbam? etenim, credo, Manlius iste centurio, qui in agro Faesulano castra posuit, bellum populo Romano suo nomine indixit, et illa castra nunc non Catilinam ducem exspectant et ille eiectus in exsilium se Massiliam, ut aiunt, non in haec  
 7 castra conferet. o condicionem miseram non modo administrandae, verum etiam conservandae rei publicae! nunc si L. Catilina consiliis, laboribus, periculis meis circumclusus ac debilitatus subito pertimuerit, sententiam mutaverit, deseruerit suos, consilium belli faciendi abiecerit, ex hoc cursu sceleris ac belli iter ad fugam atque in exsilium converterit, non ille a me spoliatus armis audaciae, non obstupefactus ac perterritus mea diligentia, non de spe conatuque depulsus, sed indemnatus, innocens in exsilium eiectus a consule vi et minis esse  
 15 dicetur: et erunt, qui illum, si hoc fecerit, non improbum, sed miserum, me non diligentissimum consulem, sed crudelissimum tyrannum existimari velint! est mihi tanti, Quirites, huius invidiae falsae atque iniquae tempestatem subire, dum modo a vobis huius horribilis belli

ac nefarii periculum depellatur: dicatur sane eiectus esse a me, dum modo eat in exsilium. sed mihi credite, non est iturus: numquam ego a dis immortalibus optabo, Quirites, invidiae meae levandae causa, ut L. Catilinam ducere exercitum hostium atque in armis volitare audiat; sed triduo tamen audietis, multoque magis illud timeo, ne mihi sit invidiosum aliquando, quod illum emiserim potius quam quod eiecerim. sed cum sint homines qui illum, cum profectus sit, eiectum esse dicant, eidem, si interfectus esset, quid dicerent? quamquam isti, qui Ca-<sup>16</sup>tilinam Massiliam ire dictitant, non tam hoc queruntur quam verentur: nemo est istorum tam misericors qui illum non ad Manlium quam ad Massiliensis ire malit; ille autem, si me hercule hoc, quod agit, numquam antea cogitasset, tamen latrocinantem se interfici mallet quam exsulem vivere; nunc vero, cum ei nihil adhuc praeter ipsius voluntatem cogitationemque acciderit, nisi quod vivis nobis Roma profectus est, optemus potius ut eat in exsilium quam queramur.

Sed cur tam diu de uno hoste loquimur et de hoste,<sup>8</sup>  
qui iam fatetur se esse hostem, et quem, quia, quod<sup>17</sup>  
semper volui, murus interest, non timeo: de eis, qui dissimulant, qui Romae remanent, qui nobiscum sunt, nihil dicimus? quos quidem ego, si ullo modo fieri possit, non tam ulcisci studeo quam sanare sibi ipsos, placare rei publicae, neque, id qua re fieri non possit, si me audire volent, intellego. exponam enim vobis, Quirites, ex quibus generibus hominum istae copiae comparentur; deinde singulis medicinam consilii atque orationis meae, si quam potero, adferam: unum genus est eorum, qui magno in<sup>18</sup> acre alieno maiores etiam possessiones habent, quarum amore adducti dissolvi nullo modo possunt. horum hominum species est honestissima; sunt enim locupletes; voluntas vero et causa impudentissima: tu agris, tu aedificiis, tu argento, tu familia, tu rebus omnibus ornatus et copiosus sis et dubites de possessione detrahere, adquirere ad fidem? quid enim exspectas? bellum? quid ergo? in vastatione omnium tuas possessiones sacrosanctas futuras putas? an tabulas novas? errant qui istas a Catilina exspectant: meo beneficio tabulae novae proferen-



tur, verum auctionariae; neque enim isti, qui possessiones habent, alia ratione ulla salvi esse possunt; quod si maturius facere voluissent neque, id quod stultissimum est, certare cum usuris fructibus praediorum, et locupletioribus his et melioribus civibus uteremur. sed hosce homines minime puto pertimescendos, quod aut deduci de sententia possunt aut, si permanebunt, magis mihi videntur vota  
9  
19 facturi contra rem publicam quam arma laturi. alterum genus est eorum, qui, quamquam premuntur aere alieno, dominationem tamen expectant, rerum potiri volunt, honores, quos quieta re publica desperant, perturbata se consequi posse arbitrantur. quibus hoc praecipendum videtur, unum scilicet et idem quod reliquis omnibus, ut desperent id, quod conantur, se consequi posse: primum omnium me ipsum vigilare, adesse, providere rei publicae; deinde magnos animos esse in bonis viris, magnam concordiam in maxima multitudine, magnas praeterea copias militum; deos denique immortalis huic invicto populo, clarissimo imperio, pulcherrimae urbi contra tantam vim sceleris praesentis auxilium esse laturus. quod si iam sint id, quod cum summo furore cupiunt, adepti, num illi in cinere urbis et in sanguine civium, quae mente conscelerata ac nefaria concupiverunt, se consules ac dictatores aut etiam reges sperant futuros? non vident id se cupere, quod si adepti sint, fugitivo alicui aut gladiatori concedi sit necesse?  
20 tertium genus est aetate iam adfectum, sed tamen exercitatione robustum, quo ex genere iste est Manlius, cui nunc Catilina succedit: sunt homines ex eis coloniis, quas Sulla constituit; quas ego universas civium esse optimorum et fortissimorum virorum sentio, sed tamen ei sunt coloni, qui se in insperatis ac repentinis pecuniis sumptuosius insolentiusque iactarunt. hi dum aedificant tamquam beati, dum praediis lectis, familiis magnis, conviviiis apparatis delectantur, in tantum aes alienum inciderunt, ut, si salvi esse velint, Sulla sit [eis] ab inferis excitandus: qui etiam non nullos agrestis, homines tenuis atque egentis, in eandem illam spem rapinarum veterum impulerunt, quos ego utrosque in eodem genere praedatorum direptorumque pono; sed eos hoc moneo: desinant furere ac proscriptiones et dicta-

turas cogitare: tantus enim illorum temporum dolor inustus est civitati, ut iam ista non modo homines, sed ne pecudes quidem mihi passurac esse videantur. quartum genus<sup>10</sup>  
est sane varium et mixtum et turbulentum, qui iam pridem<sup>21</sup>  
premuntur, qui numquam emergunt, qui partim inertia, partim male gerendo negotio, partim etiam sumptibus in vetere aere alieno vacillant; qui vadimoniis, iudiciis, proscriptiōe bonorum defatigati, permulti et ex urbe et ex agris se in illa castra conferre dicuntur. hosce ego non tam milites acris quam infitiores lentos esse arbitror; qui homines primum, si stare non possunt, conruant, sed ita, ut non modo civitas, sed ne vicini quidem proximi sentiant. nam illud non intellego, quam ob rem, si vivere honeste non possunt, perire turpiter velint, aut cur minore dolore perituros se cum multis, quam si soli pereant, arbitrentur. quintum genus est parricidarum, sicariorum,<sup>22</sup>  
denique omnium facinorosorum; quos ego a Catilina non revoco; nam neque ab eo divelli possunt et pereant sane in latrocinio, quoniam sunt ita multi, ut eos carcer capere non possit. postremum autem genus est non solum numero, verum etiam genere ipso atque vita, quod proprium Catilinae est, de eius dilectu, immo vero de complexu eius ac sinu, quos pexo capillo, nitidos, aut imberbis aut bene barbatos videtis, manicatis et talaribus tunicis, velis amictos, non togis, quorum omnis industria vitae et vigilandi labor in antelucanis cenis expromitur. in his gregibus omnes aleatores, omnes adulteri, omnes<sup>23</sup>  
impuri impudicique versantur; hi pueri tam lepidi ac delicati non solum amare et amari, neque saltare et cantare, sed etiam sicas vibrare et spargere venena didicerunt; qui nisi exeunt, nisi pereunt, etiam si Catilina perierit, scitote hoc in re publica seminarium Catilinarum futurum. verum tamen quid sibi isti miseri volunt? num suas secum mulierculas sunt in castra ducturi? quem ad modum autem illis carere poterunt, his praesertim iam noctibus? quo autem pacto illi Apenninum atque illas pruinas ac nivis perferent? nisi idcirco se facilius hiemem toleraturos putant, quod nudi in conviviis saltare didicerunt. o bellum magno opere pertimescendum, cum hanc<sup>11</sup>  
sit habiturus Catilina scortorum cohortem praetoriam!<sup>24</sup>

instruite nunc, Quirites, contra has tam praeclaras Catilinae copias vestra praesidia vestrosque exercitus; et primum gladiatori illi confecto et saucio consules imperatoresque vestros opponite; deinde contra illam naufragorum eiectam ac debilitatam manum florem totius Italiae ac robur educite; iam vero urbes coloniarum ac municipiorum respondebunt Catilinae tumulis silvestribus; neque ego ceteras copias, ornamenta, praesidia vestra cum  
 25 illius latronis inopia atque egestate conferre debeo. sed si, omissis his rebus, quibus nos suppeditamur, eget ille, senatu, equitibus Romanis, urbe, aerario, vectigalibus, cuncta Italia, provinciis omnibus, exteris nationibus, si his rebus omissis causas ipsas, quae inter se confligunt, contendere velimus, ex eo ipso, quam valde illi iaceant, intellegere possumus: ex hac enim parte pudor pugnat, illinc petulantia; hinc pudicitia, illinc stuprum; hinc fides, illinc fraudatio; hinc pietas, illinc scelus; hinc constantia, illinc furor; hinc honestas, illinc turpitudine; hinc continentia, illinc libido; denique aequitas, temperantia, fortitudo, prudentia, [virtutes omnes] certant cum iniquitate, luxuria, ignavia, temeritate; [cum vitiis omnibus,] postremo copia cum egestate, bona ratio cum perdita, mens sana cum amentia, bona denique spes cum omnium rerum desperatione confligit. in eius modi certamine ac proelio nonne, etiam si hominum studia deficiant, di ipsi  
 12  
 26 et tanta vitia superari? quae cum ita sint, Quirites, vos, quem ad modum iam antea, vestra tecta custodiis vigiliisque defendite; mihi, ut urbi sine vestro motu ac sine ullo tumultu satis esset praesidii, consultum atque provisum est. coloni omnes municipesque vestri, certiores a me facti de hac nocturna excursionem Catilinae, facile urbis suas finisque defendent; gladiatores, quam sibi ille manum certissimam fore putavit, quamquam animo meliore sunt quam pars patriciorum, potestate tamen nostra continebuntur; Q. Metellus, quem ego hoc prospiciens in agrum Gallicum Picenumque praemisi, aut opprimet hominem aut omnis eius motus conatusque prohibebit; reliquis autem de rebus constituendis, maturandis, agendis iam ad senatum referemus, quem vocari videtis.

Nunc illos, qui in urbe remanserunt atque adeo qui <sup>27</sup> contra urbis salutem omniumque vestrum in urbe a Catilina relictī sunt, quamquam sunt hostes, tamen, quia sunt cives, monitos etiam atque etiam volo: mea lenitas si cui adhuc solutior visa est, hoc exspectavit, ut id, quod latebat, erumperet; quod reliquum est, iam non possum oblivisci meam hanc esse patriam, me horum esse consulem, mihi aut cum his vivendum aut pro his esse moriendum. nullus est portis custos, nullus insidiator viae: si qui exire volunt, convivere possum; qui vero se in urbe commoverit, cuius ego non modo factum, sed inceptum ullum conatumve contra patriam deprehendero, sentiet in hac urbe esse consules vigilantis, esse egregios magistratus, esse fortem senatum, esse arma, esse carcerem, quem vindicem nefariorum ac manifestorum scelerum maiores nostri esse voluerunt.

Atque haec omnia sic agentur, Quirites, ut maximae <sup>13</sup> res minimo motu, pericula summa nullo tumultu, bellum <sup>28</sup> intestinum ac domesticum post hominum memoriam crudelissimum et maximum me uno togato duce et imperatore sedetur. quod ego sic administrabo, Quirites, ut, si ullo modo fieri poterit, ne improbus quidem quisquam in hac urbe poenam sui sceleris sufferat; sed si vis manifestae audaciae, si impendens patriae periculum me necessario de hac animi lenitate deduxerit, illud profecto perficiam, quod in tanto et tam insidioso bello vix optandum videtur, ut neque bonus quisquam intereat paucorumque poena vos omnes salvi esse possitis. quae quidem <sup>29</sup> ego neque mea prudentia neque humanis consiliis fretus polliceor vobis, Quirites, sed multis et non dubiis deorum immortalium significationibus, quibus ego ducibus in hanc spem sententiamque sum ingressus; qui iam non procul, ut quondam solebant, ab externo hoste atque longinquo, sed hic praesentes suo numine atque auxilio sua templa atque urbis tecta defendunt: quos vos, Quirites, precari, venerari, implorare debetis, ut, quam urbem pulcherrimam florentissimamque esse voluerunt, hanc omnibus hostium copiis terra marique superatis a perditissimorum civium nefario scelere defendant.



M. TULLII CICERONIS  
IN L. CATILINAM ORATIO TERTIA  
HABITA AD POPULUM.

<sup>1</sup> Rem publicam, Quirites, vitamque omnium vestrum,  
<sup>1</sup> bona, fortunas, coniuges liberosque vestros atque hoc  
domicilium clarissimi imperii, fortunatissimam pulcherri-  
mamque urbem hodierno die deorum immortalium summo  
erga vos amore, laboribus, consiliis, periculis meis e  
flamma atque ferro ac paene ex faucibus fati ereptam et  
<sup>2</sup> vobis conservatam ac restitutam videtis; et si non minus  
nobis iucundi atque inlustres sunt ei dies, quibus con-  
servamur, quam illi, quibus nascimur, quod salutis certa  
laetitia est, nascendi incerta condicio et quod sine sensu  
nascimur, cum voluptate servamur, profecto, quoniam  
illum, qui hanc urbem condidit, ad deos immortalis bene-  
volentia famaue sustulimus, esse apud vos posterosque  
vestros in honore debebit is, qui eandem hanc urbem  
conditam amplificatamque servavit. nam toti urbi, templis  
delubris, tectis ac moenibus subiectos prope iam ignis  
circumdatosque restinximus, idemque gladios in rem pu-  
blicam destructos rettudimus mucronesque eorum a iu-  
<sup>3</sup> gulis vestris deiecimus: quae quoniam in senatu inlustrata,  
patefacta, comperta sunt per me, vobis iam exponam  
breviter, Quirites, ut et quanta et qua ratione investigata  
et comprehensa sint, vos, qui ignoratis et exspectatis,  
scire possitis.

Principio, ut Catilina paucis ante diebus erupit ex  
urbe, cum sceleris sui socios, huiusce nefarii belli acer-  
rimos duces, Romae reliquisset, semper vigilavi et pro-  
vidi, Quirites, quem ad modum in tantis et tam abscon-  
<sup>2</sup> ditis insidiis salvi esse possemus; nam tum, cum ex urbe  
Catilinam eiciebam — non enim iam vereor huius verbi  
invidiam, cum illa magis sit timenda, quod vivus exierit —,

sed tum, cum illum exterminari volebam, aut reliquam  
coniuratorum manum simul exituram aut eos, qui resti-  
tissent, infirmos sine illo ac debilis fore putabam. atque  
ego, ut vidi, quos maximo furore et scelere esse inflam-  
matus sciebam, eos nobiscum esse et Romae remansisse,  
in eo omnis dies noctisque consumpsi, ut quid agerent,  
quid molirentur, sentirem ac viderem, ut, quoniam auri-  
bus vestris propter incredibilem magnitudinem sceleris  
minorem fidem faceret oratio mea, rem ita comprehende-  
rem, ut tum demum animis saluti vestrae provideretis,  
cum oculis maleficium ipsum videretis. itaque ut com-  
peri legatos Allobrogum belli Transalpini et tumultus  
Gallici excitandi causa a P. Lentulo esse sollicitatos, eos-  
que in Galliam ad suos civis eodemque itinere cum litteris  
mandatisque ad Catilinam esse missos, comitemque eis  
adiunctum esse T. Volturcium, atque huic ad Catilinam  
esse datas litteras, facultatem mihi oblatam putavi, ut,  
quod erat difficillimum quodque ego semper optabam ab  
dis immortalibus, tota res non solum a me, sed etiam a  
senatu et a vobis manifesto deprehenderetur. itaque  
hesterno die L. Flaccum et C. Pomptinum praetores, for-  
tissimos atque amantissimos rei publicae viros, ad me  
vocavi, rem exposui, quid fieri placeret ostendi; illi au-  
tem, qui omnia de re publica praeclara atque egregia  
sentirent, sine recusatione ac sine ulla mora negotium  
susceperunt et, cum advesperasceret, occulte ad pontem  
Mulvium pervenerunt atque ibi in proximis villis ita bi-  
partito fuerunt, ut Tiberis inter eos et pons interesset.  
eodem autem et ipsi sine cuiusquam suspitione multos  
fortis viros eduxerant, et ego ex praefectura Reatina  
compluris delectos adulescentis, quorum opera utor ad-  
sidue in re publica, praesidio cum gladiis miseram. in-  
terim tertia fere vigilia exacta, cum iam pontem Mulvium  
magno comitatu legati Allobrogum ingredi inciperent una-  
que Volturcius, fit in eos impetus; educuntur et ab illis  
gladii et a nostris. res praetoribus erat nota solis, igno-  
rabatur a ceteris. tum interventu Pomptini atque Flacci  
pugna [quae erat commissa,] sedatur; litterae, quae-  
cumque erant in eo comitatu, integris signis praetoribus  
traduntur; ipsi comprehensi ad me, cum iam dilucesceret,

deducuntur. atque horum omnium scelerum improbissimum machinatorem Cimbrum Gabinium statim ad me, nihil dum suspicantem, vocavi; deinde item arcessitus est L. Statilius et post eum C. Cethegus; tardissime autem Lentulus venit, credo quod in litteris dandis praeter consuetudinem proxima nocte vigilarat. cum summis ac clarissimis huius civitatis viris, qui audita re frequentes ad me mane convenerant, litteras a me prius aperiri quam ad senatum deferrem, placeret, ne, si nihil esset inventum, temere a me tantus tumultus iniectus civitati videretur, negavi me esse facturum ut de periculo publico non ad consilium publicum rem integram deferrem: etenim, Quirites, si ea, quae erant ad me delata, reperta non essent, tamen ego non arbitrabar in tantis rei publicae periculis esse mihi nimiam diligentiam pertimescendam.

7  
8 senatum frequentem celeriter, ut vidistis, coëgi. atque interea statim admonitu Allobrogum C. Sulpicium praetorem, fortem virum, misi, qui ex aedibus Cethegi, si quid telorum esset, efferret; ex quibus ille maximum si-

4 carum numerum et gladiatorum extulit. introduxi Volturcium sine Gallis; fidem publicam iussu senatus dedi; hortatus sum, ut ea, quae sciret, sine timore indicaret. tum ille dixit, cum vix se ex magno timore recreasset, ab Lentulo se habere ad Catilinam mandata et litteras, ut servorum praesidio utcretur, ut ad urbem quam primum cum exercitu accederet; id autem eo consilio, ut, cum urbem ex omnibus partibus, quem ad modum discriptum distributumque erat, incendissent caedemque infinitam civium fecissent, praesto esset ille qui et fugientis ex-

9 ciperet et se cum his urbanis ducibus coniungeret. introducti autem Galli ius iurandum sibi et litteras ab Lentulo, Cethego, Statilio ad suam gentem data esse dixerunt, atque ita sibi ab his et a L. Cassio esse praescriptum, ut equitatum in Italiam quam primum mitterent; pedestris sibi copias non defuturas; Lentulum autem sibi confirmasse ex fati Sibyllinis haruspicumque responsis se esse tertium illum Cornelium, ad quem regnum huius urbis atque imperium pervenire esset necesse: Cinnam ante se et Sullam fuisse; eundemque dixisse fatalem hunc annum esse ad interitum huius urbis atque imperii, qui esset

annus decimus post virginum absolutionem, post Capitoli autem incensionem vicesimus. hanc autem Cethego 10 cum ceteris controversiam fuisse dixerunt, quod Lentulo et aliis Saturnalibus caedem fieri atque urbem incendi placeret, Cethego nimium id longum videretur. ac ne 5 longum sit, Quirites, tabellas proferri iussimus, quae a quoque dicebantur datae. primum ostendimus Cethego signum; cognovit: nos linum incidimus; legimus: erat scriptum ipsius manu Allobrogum senatui et populo, sese quae eorum legatis confirmasset facturum esse; orare ut item illi facerent quae sibi eorum legati recepissent. tum Cethegus, qui paulo ante aliquid tamen de gladiis ac sicis, quae apud ipsum erant deprehensa, respondisset dixissetque se semper bonorum ferramentorum studiosum fuisse, recitatis litteris debilitatus atque abiectus conscientia repente conticuit. introductus est Statilius; cognovit et signum et manum suam: recitatae sunt tabellae in eandem fere sententiam; confessus est. tum ostendi tabellas Lentulo et quaesivi cognosceretne signum. adnuit. 'est vero' inquam 'notum quidem signum, imago avi tui, clarissimi viri, qui amavit unice patriam et civis suos; quae quidem te a tanto scelere etiam muta revocare debuit.' leguntur eadem ratione ad senatum Allo- 11 brogum populumque litterae; si quid de his rebus dicere vellet, feci potestatem: atque ille primo quidem negavit; post autem aliquanto, toto iam indicio exposito atque edito, surrexit, quaesivit a Gallis quid sibi esset cum eis, quam ob rem domum suam venissent, itemque a Volturcio: qui cum illi breviter constanterque respondissent, per quem ad eum quotiensque venissent, quaesissentque ab eo, nihilne secum esset de fatis Sibyllinis locutus, tum ille subito scelere demens quanta conscientiae vis esset ostendit; nam cum id posset infitiri, repente praeter opinionem omnium confessus est. ita cum non modo ingenium illud et dicendi exercitatio, qua semper valuit, sed etiam propter vim sceleris manifesti atque deprehensi impudentia, qua superabat omnis, improbitasque defecit. Volturcius vero subito litteras proferri atque aperiri iubet 12 quas sibi a Lentulo ad Catilinam datas esse dicebat: atque ibi vehementissime perturbatus Lentulus tamen et



signum et manum suam cognovit; erant autem [scriptae] sine nomine, sed ita: 'quis sim scies ex eo, quem ad te misi. cura ut vir sis, et cogita quem in locum sis progressus; vide cequid tibi iam sit necesse, et cura ut omnium tibi auxilia adiungas, etiam infimorum.' Gabinus deinde introductus, cum primo impudenter respondere coepisset, ad extremum nihil ex eis, quae Galli insimu-  
 13 labant, negavit. ac mihi quidem, Quirites, cum illa certissima visa sunt argumenta atque indicia sceleris, tabellae, signa, manus, denique unius cuiusque confessio, tum multo certiora illa, color, oculi, voltus, taciturnitas. sic enim obstupuerant, sic terram intuebantur, sic furtim non numquam inter sese aspiciebant, ut non iam ab aliis  
 14 indicari, sed indicare se ipsi viderentur. indicia expositis atque editis senatum consului de summa re publica quid fieri placeret: dictae sunt a principibus acerrimae ac fortissimae sententiae, quas senatus sine ulla varietate est secutus: et quoniam nondum est perscriptum senatus consultum, ex memoria vobis, Quirites, quid senatus cen-  
 14 suerit exponam. primum mihi gratiae verbis amplissimis aguntur, quod virtute, consilio, providentia mea res publica maximis periculis sit liberata; deinde L. Flaccus et C. Pomptinus praetores, quod eorum opera forti fidelique usus essem, merito ac iure laudantur, atque etiam viro forti, conlegae meo, laus impertitur, quod eos, qui huius coniurationis participes fuissent, a suis et a rei publicae consiliis removisset; atque ita censuerunt, ut P. Lentulus, cum se praetura abdicasset, in custodiam traderetur; itemque uti C. Cethegus, L. Statilius, P. Gabinus, qui omnes praesentes erant, in custodiam traderentur; atque idem hoc decretum est in L. Cassium, qui sibi procurationem incendendae urbis depoposcerat, in M. Ceparium, cui ad sollicitandos pastores Apuliam attributam esse erat indicatum, in P. Furium, qui est ex eis colonis, quos Faesulas L. Sulla deduxit, in Q. Annium Chilonem, qui una cum hoc Furio semper erat in hac Allobrogum sollicitatione versatus, in P. Umbrenum, libertinum hominem, a quo primum Gallos ad Gabinium perductos esse constabat. atque ea lenitate senatus est usus, Quirites, ut ex tanta coniuratione tantaque hac mul-

titudine domesticorum hostium novem hominum perditissimorum poena re publica conservata reliquorum mentis sanari posse arbitraretur. atque etiam supplicatio dis immortalibus pro singulari eorum merito meo nomine decreta est, quod mihi primum post hanc urbem conditam togato contigit, et his verbis decreta est: quod urbem incendiis, caede civis, Italiam bello liberassem. quae supplicatio si cum ceteris conferatur, hoc interest, quod ceterae bene gesta, haec una conservata re publica constituta est. atque illud, quod faciendum primum fuit, factum atque transactum est: nam P. Lentulus, quamquam patefactis indiciis, confessionibus suis, iudicio senatus non modo praetoris ius, verum etiam civis amiserat, tamen magistratu se abdicavit, ut, quae religio C. Mario, clarissimo viro, non fuerat, quo minus C. Glauciam, de quo nihil nominatim erat decretum, praetorem occideret, ea nos religione in privato P. Lentulo puniendo liberaremur.

Nunc quoniam, Quirites, consceleratissimi periculosissimique belli nefarios duces captos iam et comprehensos tenetis, existimare debetis omnis Catilinae copias, omnis spes atque opes his depulsis urbis periculis concidisse; quem quidem ego cum ex urbe pellebam, hoc providebam animo, Quirites, remoto Catilina non mihi esse P. Lentuli somnum nec L. Cassii adipem nec C. Cethegi furiosam temeritatem pertimescendam: ille erat unus timendus ex istis omnibus, sed tam diu, dum urbis moenibus continebatur. omnia norat, omnium aditus tenebat; appellare, temptare, sollicitare poterat, audebat; erat ei consilium ad facinus aptum, consilio autem neque manus neque lingua deerat. iam ad certas res conficiendas certos homines delectos ac descriptos habebat; neque vero, cum aliquid mandarat, confectum putabat: nihil erat quod non ipse obiret occurreret, vigilaret laboraret; frigus, sitim, famem ferre poterat. hunc ego hominem tam acrem, tam audacem, tam paratum, tam callidum, tam in scelere vigilantem, tam in perditis rebus diligentem nisi ex domesticis insidiis in castrense latrocinium compulsem, dicam id, quod sentio, Quirites, non facile hanc tantam molem mali a cervicibus vestris depulissem. non ille nobis Saturnalia constituisset, neque tanto ante exsili ac fati diem

rei publicae denuntiavisset neque commisisset, ut signum, ut litterae suae testes manifesti sceleris deprehenderentur: quae nunc illo absente sic gesta sunt, ut nullum in privata domo furtum umquam sit tam palam inventum, quam haec tanta in re publica coniuratio manifesto inventa atque deprehensa est. quod si Catilina in urbe ad hanc diem remansisset, quamquam, quoad fuit, omnibus eius consiliis occurri atque obstiti, tamen, ut levissime dicam, dimicandum nobis cum illo fuisset neque nos umquam, cum ille in urbe hostis esset, tantis periculis rem publicam tanta pace, tanto otio, tanto silentio liberassemus.

<sup>8</sup>  
<sup>13</sup> Quamquam haec omnia, Quirites, ita sunt a me administrata, ut deorum immortalium nutu atque consilio et gesta et provisa esse videantur; idque cum coniectura consequi possumus, quod vix videtur humani consilii tantarum rerum gubernatio esse potuisse, tum vero ita praesentes his temporibus opem et auxilium nobis tulerunt, ut eos paene oculis videre possemus: nam ut illa omit-  
tam, visas nocturno tempore ab occidente faces ardoremque caeli, ut fulminum iactus, ut terrae motus relinquam, ut omit-  
tam cetera, quae tam multa nobis consulibus facta sunt, ut haec, quae nunc fiunt, canere di immortales viderentur, hoc certe, quod sum dicturus, neque praeter-  
<sup>19</sup> mittendum neque relinquendum est: nam profecto memoria tenetis Cotta et Torquato consulibus compluris in Capitolio res de caelo esse percussas, cum et simulacra deorum depulsa sunt et statuae veterum hominum de-  
iectae et legum aera liquefacta; tactus est etiam ille, qui hanc urbem condidit, Romulus, quem inauratum in Capitolio, parvum atque lactentem, uberibus lupinis inhi-  
antem, fuisse meministis; quo quidem tempore cum haruspices ex tota Etruria convenissent, caedes atque incendia et legum interitum et bellum civile ac domesticum et totius urbis atque imperii occasum appropinquare dixerunt, nisi di immortales omni ratione placati suo numine prope  
<sup>20</sup> fata ipsa flexissent. itaque illorum responsis tum et ludi per decem dies facti sunt neque res ulla quae ad placandos deos pertineret praetermissa est, idemque iusserunt simulacrum Iovis facere maius et in excelso conlocare et contra atque antea fuerat ad orientem convertere; ac se

sperare dixerunt, si illud signum, quod videtis, solis ortum et forum curiamque conspiceret, fore ut ea consilia, quae clam essent inita contra salutem urbis atque imperii, inlustrarentur, ut a senatu populoque Romano perspicere possent. atque [illud signum] conlocandum consules illi locaverunt, sed tanta fuit operis tarditas, ut neque superioribus consulibus neque nobis ante hodiernum diem conlocaretur. hic quis potest esse tam aversus a vero, tam <sup>9</sup>praeceps, tam mente captus, qui neget haec omnia, quae <sup>21</sup>videmus, praecipueque hanc urbem deorum immortalium nutu ac potestate administrari? etenim cum esset ita responsum, caedes, incendia, interitum rei publicae comparari, et ea per civis, quae tum propter magnitudinem scelerum non nullis incredibilia videbantur, ea non modo cogitata a nefariis civibus, verum etiam suscepta esse sensitis. illud vero nonne ita praesens est, ut nutu Iovis Optimi Maximi factum esse videatur, ut, cum hodierno die mane per forum meo iussu et coniurati et eorum indices in aedem Concordiae ducerentur, eo ipso tempore signum statueretur? quo conlocato atque ad vos senatumque converso omnia [et senatus et vos], quae erant cogitata contra salutem omnium, inlustrata et patefacta vidistis; quo etiam maiore sunt isti odio supplicioque digni, <sup>22</sup>qui non solum vestris domiciliis atque tectis, sed etiam deorum templis atque delubris sunt funestos ac nefarios ignis inferre conati; quibus ego si me restitisse dicam, nimium mihi sumam et non sim ferendus: ille, ille Iuppiter restitit; ille Capitolium, ille haec templa, ille cunctam urbem, ille vos omnis salvos esse voluit. dis ego immortalibus ducibus hanc mentem, Quirites, voluntatemque suscepi, atque ad haec tanta indicia perveni. iam vero [illa Allobrogum sollicitatio] ab Lentulo ceterisque domesticis hostibus tam dementer tantae res creditae et ignotis et barbaris [commissae litterae] numquam essent profecto, nisi ab dis immortalibus huic tantae audaciae consilium esset ereptum. quid vero? ut homines Galli ex civitate male pacata, quae gens una restat quae bellum populo Romano facere posse et non nolle videatur, spei imperii ac rerum maximarum ultro sibi a patriciis hominibus oblatam neglegerent vestramque salutem suis opibus anteponerent, id non divinitus esse factum putatis? praesertim qui nos non pugnando, sed tacendo superare potuerint.

Quam ob rem, Quirites, quoniam ad omnia pulvinaria <sup>10</sup>supplicatio decreta est, celebratote illos dies cum coniur- <sup>23</sup>



gibus ac liberis vestris. nam multi saepe honores dis immortalibus iusti habiti sunt ac debiti, sed profecto iustiores numquam: erepti enim estis ex crudelissimo ac miserrimo interitu, erepti sine caede, sine sanguine, sine exercitu, sine dimicatione; togati me uno togato duce et imperatore

24 vicistis. etenim recordamini, Quirites, omnis civilis dissensiones, non solum eas, quas audistis, sed eas, quas vosmet ipsi meministis atque vidistis. L. Sulla P. Sulpicium oppressit: [eiecit ex urbe,] C. Marium, custodem huius urbis, multosque fortis viros partim eiecit ex civitate, partim interemit. Cn. Octavius consul armis expulit ex urbe conlegam: omnis hic locus acervis corporum et civium sanguine redundavit. superavit postea Cinna cum Mario: tum vero, clarissimis viris interfectis lumina civitatis exstincta sunt. ultus est huius victoriae crudelitatem postea Sulla: ne dici quidem opus est quanta deminutione civium et quanta calamitate rei publicae. dissensit M. Lepidus a clarissimo ac fortissimo viro Q. Catulo: attulit non tam ipsius interitus rei publicae luctum quam ceterorum.

25 atque illae tamen omnes dissensiones erant eius modi, quae non ad delendam, sed ad commutandam rem publicam pertinerent; non illi nullam esse rem publicam, sed in ea, quae esset, se esse principes, neque hanc urbem confragrare, sed se in hac urbe florere voluerunt. [atque illae tamen omnes dissensiones, quarum nulla exitium rei publicae quaesivit, eius modi fuerunt, ut non reconciliatione concordiae, sed internicione civium diiudicatae sint.] in hoc autem uno post hominum memoriam maximo crudelissimoque bello, quale bellum nulla umquam barbaria cum sua gente gessit, quo in bello lex haec fuit a Lentulo, Catilina, Cethego, Cassio constituta, ut omnes, qui salva urbe salvi esse possent, in hostium numero ducerentur, ita me gessi, Quirites, ut salvi omnes conservaremini, et, cum hostes vestri tantum civium superfuturum putassent, quantum infinitae caedi restitisset, tantum autem urbis, quantum flamma obire non potuisset, et urbem

11 et civis integros incolumisque servavi. quibus pro tantis  
26 rebus, Quirites, nullum ego a vobis praemium virtutis, nullum insigne honoris, nullum monumentum laudis postulo praeterquam huius diei memoriam sempiternam: in animis ego vestris omnis triumphos meos, omnia ornamenta honoris, monumenta gloriae, laudis insignia condi et conlocari volo. nihil me mutum potest delectare, nihil tacitum, nihil denique eius modi, quod etiam minus digni

adsequi possint: memoria vestra, Quirites, res nostrae alentur, sermonibus crescent, litterarum monumentis inveterascent et conrobaborabuntur; eandemque diem intellego, quam spero aeternam fore, propagatam esse et ad salutem urbis et ad memoriam consulatus mei, unoque tempore in hac re publica duos civis exstitisse, quorum alter finis vestri imperii non terrae, sed caeli regionibus terminaret, alter eiusdem imperii domicilium sedisque servaret. sed quoniam earum rerum, quas ego gessi, non eadem est fortuna atque condicio quae illorum, qui externa bella gesserunt, quod mihi cum eis vivendum est, quos vici ac subegi, isti hostis aut interfectos aut oppressos reliquerunt, vestrum est, Quirites, si ceteris facta sua recte prosunt, mihi mea ne quando obsint providere. mentes enim hominum audacissimorum sceleratae ac nefariae ne vobis nocere possent ego providi; ne mihi noceant vestrum est providere. quamquam, Quirites, mihi quidem ipsi nihil ab istis iam noceri potest: magnum enim est in bonis praesidium, quod mihi in perpetuum comparatum est, magna in re publica dignitas, quae me semper tacita defendet, magna vis conscientiae, quam qui neglegunt, cum me violare volent, se [ipsi] indicabunt. est etiam nobis is animus, Quirites, ut non modo nullius audaciae cedamus, sed etiam omnis improbos ultro semper laceamus. quod si omnis impetus domesticorum hostium, depulsus a vobis, se in me unum convertit, vobis erit videndum, Quirites, qua condicione posthac eos esse velitis, qui se pro salute vestra obtulerint invidiae periculisque omnibus: mihi quidem ipsi quid est quod iam ad vitae fructum possit adquiri, cum praesertim neque in honore vestro neque in gloria virtutis quicquam videam altius, quo mihi libeat ascendere? illud profecto perficiam, Quirites, ut ea, quae gessi in consulatu, privatus tuear atque ornem, ut, si qua est invidia conservanda re publica suscepta, laedat invidos, mihi valeat ad gloriam. denique ita me in re publica tractabo, ut meminerim semper quae gesserim curemque ut ea virtute, non casu gesta esse videantur. vos, Quirites, quoniam iam nox est, venerati Iovem, illum custodem huius urbis ac vestrum, in vestra tecta discedite et ea, quamquam iam est periculum depulsum, tamen aequae ac priore nocte custodiis vigiliisque defendite: id ne vobis diutius faciendum sit atque ut in perpetua pace esse possitis providebo.

12  
27

28

29

M. TULLII CICERONIS  
IN L. CATILINAM ORATIO QUARTA  
HABITA IN SENATU.

<sup>1</sup> Video, patres conscripti, in me omnium vestrum ora  
<sup>1</sup> atque oculos esse conversos; video vos non solum de  
vestro ac rei publicae, verum etiam, si id depulsum sit,  
de meo periculo esse sollicitos. est mihi iucunda in malis  
et grata in dolore vestra erga me voluntas, sed eam, per  
deos immortalis, deponite atque obliti salutis meae de  
vobis ac de vestris liberis cogitate: mihi si haec condicio  
consulatus data est, ut omnis acerbitates, omnis dolores  
cruciatibusque perferrem, feram non solum fortiter, verum  
etiam libenter, dum modo meis laboribus vobis populo-  
<sup>2</sup> que Romano dignitas salusque pariat. ego sum ille  
consul, patres conscripti, cui non forum, in quo omnis  
aequitas continetur, non campus consularibus auspiciis  
consecratus, non curia, summum auxilium omnium gen-  
tium, non domus, commune perfugium, non lectus ad  
quietem datus, non denique haec sedes honoris [sella cu-  
rulis] umquam vacua mortis periculo atque insidiis fuit.  
ego multa tacui, multa pertuli, multa concessi, multa  
meo quodam dolore in vestro timore sanavi: nunc si hunc  
exitum consulatus mei di immortales esse voluerunt, ut  
vos populumque Romanum ex caede miserrima, coniuges  
liberosque vestros virginesque Vestalis ex acerbissima  
vexatione, templa atque delubra, hanc pulcherrimam pa-  
triam omnium nostrum ex foedissima flamma, totam Ita-  
liam ex bello et vastitate eriperem, quaecumque mihi uni  
proponetur fortuna, subeatur. etenim si P. Lentulus  
suum nomen inductus a vatibus fatale ad perniciem rei  
publicae fore putavit, cur ego non laeter meum consula-  
<sup>2</sup> tum ad salutem populi Romani prope fatalem exstitisse?  
<sup>3</sup> qua re, patres conscripti, consulite vobis, prospicite

patriae, conservate vos, coniuges, liberos fortunasque vestras, populi Romani nomen salutemque defendite; mihi parcere ac de me cogitare desinite. nam primum debeo sperare omnis deos, qui huic urbi praesident, pro eo mihi ac mereor relatueros esse gratiam; deinde, si quid obtigerit, aequo animo paratoque moriar: nam neque turpis mors forti viro potest accidere neque immatura consulari nec misera sapienti. nec tamen ego sum ille ferreus, qui fratris carissimi atque amantissimi praesentis macrore non movear horumque omnium lacrimis, a quibus me circumsessum videtis; neque meam mentem non domum saepe revocat exanimata uxor et abiecta metu filia et parvulus filius, quem mihi videtur amplecti res publica tamquam obsidem consulatus mei, neque ille, qui exspectans huius exitum diei adstat in conspectu meo gener. moveor his rebus omnibus, sed in eam partem, uti salvi sint vobiscum omnes, etiam si me vis aliqua oppresserit, potius, quam et illi et nos una rei publicae peste pereamus. qua re, patres conscripti, incumbite ad salutem rei publicae, circumspicite omnis procellas, quae impendent, nisi providetis. non Ti. Gracchus, quod iterum tribunus plebis fieri voluit, non C. Gracchus, quod agrarios concitare conatus est, non L. Saturninus, quod C. Memmium occidit, in discrimen aliquod atque in vestrae severitatis iudicium adducitur: tenentur ei, qui ad urbis incendium, ad vestram omnium caedem, ad Catilinam accipiendum Romae restiterunt; tenentur litterae, signa, manus, denique unius cuiusque confessio: sollicitantur Allobroges, servitia excitantur, Catilina arcessitur, id est initum consilium, ut interfectis omnibus nemo ne ad deplorandum quidem populi Romani nomen atque ad lamentandam tanti imperii calamitatem relinquatur. haec omnia indices detulérunt, rei confessi sunt, vos multis iam iudiciis iudicavistis, primum quod mihi gratias egistis singularibus verbis et mea virtute atque diligentia perditorum hominum coniurationem patefactam esse decrevistis, deinde quod P. Lentulum se abdicare praetura coëgistis; tum quod eum et ceteros, de quibus iudicastis, in custodiam dandos censuistis, maximeque quod meo nomine supplicationem decrevistis, qui honos togato habi-



tus ante me est nemini; postremo hesterno die praemia legatis Allobrogum Titoque Volturcio dedistis amplissima; quae sunt omnia eius modi, ut ei, qui in custodiam nominatum dati sunt, sine ulla dubitatione a vobis damnati esse videantur.

6 Sed ego institui referre ad vos, patres conscripti, tamquam integrum, et de facto quid iudicetis et de poena quid censeatis. illa praedicam, quae sunt consulis: ego magnum in re publica versari furorem et nova quaedam misceri et concitari mala iam pridem videbam; sed hanc tantam, tam exitiosam haberi coniurationem a civibus numquam putavi. nunc quicquid est, quocumque vestrae mentes inclinant atque sententiae, statuendum vobis ante noctem est. quantum facinus ad vos delatum sit videtis: huic si paucos putatis adfinis esse, vehementer erratis: latius opinione disseminatum est hoc malum; manavit non solum per Italiam, verum etiam transcendit Alpibus et obscure serpens multas iam provincias occupavit. id opprimi sustentando ac prolatando nullo pacto potest; quacumque ratione placet, celeriter vobis vindicandum est.

4  
7 video adhuc duas esse sententias, unam D. Silani, qui censet eos, qui haec delere conati sunt, morte esse multandos, alteram C. Caesaris, qui mortis poenam removet, ceterorum suppliciorum omnis acerbitates amplectitur. uterque et pro sua dignitate et pro rerum magnitudine in summa severitate versatur. alter eos, qui nos omnis [qui populum Romanum] vita privare conati sunt, qui delere imperium, qui populi Romani nomen extinguere, punctum temporis frui vita et hoc communi spiritu non putat oportere, atque hoc genus poenae saepe in improbos civis in hac re publica esse usurpatum recordatur. alter intellegit mortem ab dis immortalibus non esse supplicii causa constitutam, sed aut necessitatem naturae aut laborum ac miseriarum quietem; itaque eam sapientes numquam inviti, fortes saepe etiam libenter oppetiverunt: vincula vero et ea sempiterna certe ad singularem poenam nefarii sceleris inventa sunt: municipiis dispertiri iubet. habere videtur ista res iniquitatem, si imperare velis, difficultatem, si rogare; decernatur tamen, si placet. ego enim suscipiam et, ut spero, reperiam qui id, quod salutis

omnium causa statueritis, non putent esse suae dignitatis recusare. adiungit gravem poenam municipibus, si quis eorum vincula ruperit; horribilis custodias circumdat et dignas scelere hominum perditorum; sancit ne quis eorum poenam, quos condemnat, aut per senatum aut per populum levare possit; eripit etiam spem, quae sola hominem in miseriis consolari solet; bona praeterea publicari iubet; vitam solam relinquit nefariis hominibus: quam si eripuisset, multos uno dolores animi atque corporis et omnis scelerum poenas ademisset. itaque ut aliqua in vita formido improbis esset posita, apud inferos eius modi quaedam illi antiqui supplicia impiis constituta esse voluerunt, quod videlicet intellegebant eis remotis non esse mortem ipsam pertimescendam.

Nunc, patres conscripti, ego mea video quid intersit: <sup>5</sup>  
 si eritis secuti sententiam C. Caesaris, quoniam hanc is <sup>9</sup>  
 in re publica viam, quae popularis habetur, secutus est, fortasse minus erunt hoc auctore et cognitore huiusce sententiae mihi populares impetus pertimescendi; sin illam alteram, nescio an amplius mihi negotii contrahatur; sed tamen meorum periculorum rationes utilitas rei publicae vincat. habemus enim a Caesare, sicut ipsius dignitas et maiorum eius amplitudo postulabat, sententiam tamquam obsidem perpetuae in rem publicam voluntatis; intellectum est quid interesset inter levitatem contionatorum et animum vere popularem, saluti populi consulentem. video de istis, qui se popularis haberi <sup>10</sup>  
 volunt, abesse non neminem, ne de capite videlicet civium Romanorum sententiam ferat; at is et nudius tertius in custodiam civis Romanos dedit et supplicationem mihi decrevit et indices hesterno die maximis praemiis adfecit. iam hoc nemini dubium est, qui reo custodiam, quaesitori gratulationem, indici praemium decrevit, quid de tota re et causa iudicarit. at vero C. Caesar intellegit legem Semproniam esse de civibus Romanis constitutam; qui autem rei publicae sit hostis, eum civem nullo modo esse posse: denique ipsum latorem Semproniae legis iussu populi poenas rei publicae dependisse: idem ipsum Lentulum, largitorem et prodigum, non putat, cum de pernicie populi Romani, exitio huius urbis

tam acerbe, tam crudeliter cogitarit, etiam appellari posse popularem: itaque homo mitissimus atque lenissimus non dubitat P. Lentulum aeternis tenebris vinculisque mandare et sancit in posterum, ne quis huius supplicio levando se iactare et in perniciem populi Romani posthac popularis esse possit: adiungit etiam publicationem bonorum, ut omnis animi cruciatus et corporis etiam egestas ac mendicitas consequatur.

<sup>6</sup>  
<sup>11</sup> Quam ob rem, sive hoc statueritis, dederitis mihi comitem ad contionem populo carum atque iucundum, sive Silani sententiam sequi malueritis, facile me [atque vos] crudelitatis vituperatione exsolveritis, atque obtinebo eam multo leniorem fuisse. quamquam, patres conscripti, quae potest esse in tanti sceleris immanitate punienda crudelitas? ego enim de meo sensu iudico: nam ita mihi salva re publica vobiscum perfrui liceat, ut ego, quod in hac causa vehementior sum, non atrocitate animi moveor; quis est enim me mitior? sed singulari quadam humanitate et misericordia: videor enim mihi videre hanc urbem, lucem orbis terrarum atque arcem omnium gentium, subito uno incendio concidentem; cerno animo sepulta in patria miseros atque insepultos acervos civium; versatur mihi ante oculos aspectus Cethegi et furor in  
<sup>12</sup> vestra caede bacchantis; cum vero mihi proposui regnantem Lentulum, sicut ipse ex fatiis se sperasse confessus est, purpuratum esse huic Gabinium, cum exercitu venisse Catilinam, tum lamentationem matrum familias, tum fugam virginum atque puerorum ac vexationem virginum Vestalium perhorresco, et, quia mihi vehementer haec videntur misera atque miseranda, idcirco in eos, qui ea perficere voluerunt, me severum vehementemque praebeo. etenim quaero, si quis pater familias, liberis suis a servo interfectis, uxore occisa, incensa domo, supplicium de servo non quam acerbissimum sumpserit, utrum is clemens ac misericors an inhumanissimus et crudelissimus esse videatur? mihi vero importunus ac ferreus, qui non dolore et cruciatu nocentis suum dolorem cruciatumque lenierit. sic nos in his hominibus, qui nos, qui coniuges, qui liberos nostros trucidare voluerunt, qui singulas unius cuiusque nostrum domos et hoc uni-

versum rei publicae domicilium delere conati sunt, qui id egerunt, ut gentem Allobrogum in vestigiis huius urbis atque in cinere deflagrati imperii conlocarent, si vehementissimi fuerimus, misericordes habebimur; sin remissiores esse voluerimus, summae nobis crudelitatis in patriae civiumque pernicie fama subeunda est. nisi <sup>13</sup> vero cuipiam L. Caesar, vir fortissimus et amantissimus rei publicae, crudelior nudius tertius visus est, cum sororis suae, feminae lectissimae, virum praesentem et audientem vita privandum esse dixit, cum avum suum iussu consulis interfectum filiumque eius impuberem, legatum a patre missum, in carcere necatum esse dixit. quorum quod simile factum? quod initum delendae rei publicae consilium? largitionis voluntas tum in re publica versata est et partium quaedam contentio. atque eo tempore huius avus Lentuli, vir clarissimus, armatus Gracchum est persecutus; ille etiam grave tum vulnus accepit, ne quid de summa re publica deminueretur; hic ad evertenda rei publicae fundamenta Gallos arcessit, servitia concitat, Catilinam vocat, attribuit nos trucidandos Cethego et ceteros civis interficiendos Gabinio, urbem inflammandam Cassio, totam Italiam vastandam diripiendamque Catilinae. vereamini, censeo, ne in hoc scelere tam immani ac nefando nimis aliquid severe statuisset videamini: multo magis est verendum ne remissione poenae crudeles in patriam quam ne severitate animadversionis nimis vehementes in acerbissimos hostis fuisse videamur.

Sed ea, quae exaudio, patres conscripti, dissimulare <sup>7</sup> non possum. <sup>14</sup> iaciuntur enim voces, quae perveniunt ad aures meas, eorum, qui vereri videntur ut habeam satis praesidii ad ea, quae vos statueritis hodierno die, transigunda: omnia et provisa et parata et constituta sunt, patres conscripti, cum mea summa cura atque diligentia tum multo etiam maiore populi Romani ad summum imperium retinendum et ad communis fortunas conservandas voluntate. omnes adsunt omnium ordinum homines, omnium denique aetatum; plenum est forum, plena templa circum forum, pleni omnes aditus huius templi ac loci. causa est enim post urbem conditam haec inventa



sola in qua omnes sentirent unum atque idem praeter eos, qui cum sibi viderent esse pereundum, cum omnibus potius quam soli perire voluerunt. hosce ego homines excipio et secerno libenter, neque in improborum civium, sed in acerbissimorum hostium numero habendos puto. ceteri vero, di immortales! qua frequentia, quo studio, qua virtute ad communem salutem dignitatemque consentiunt! quid ego hic equites Romanos commemorem? qui vobis ita summam ordinis consilii que concedunt, ut vobiscum de amore rei publicae certent; quos ex multorum annorum dissensione huius ordinis ad societatem concordiamque revocatos hodiernus dies vobiscum atque haec causa coniungit; quam si coniunctionem, in consulatu confirmatam meo, perpetuam in re publica tenuerimus, confirmo vobis nullum posthac malum civile ac domesticum ad ullam rei publicae partem esse venturum. pari studio defendundae rei publicae convenisse video tribunos aerarios, fortissimos viros; scribas item universos, quos cum casu hic dies ad aerarium frequentasset, video ab expectatione sortis ad salutem communem esse conversos. omnis ingenuorum adest multitudo, etiam tenuissimorum; quis est enim cui non haec templa, aspectus urbis, possessio libertatis, lux denique haec ipsa et [hoc] commune patriae solum cum sit earum tum vero dulce atque iucundum? operae pretium est, patres conscripti, libertinorum hominum studia cognoscere, qui, sua virtute fortunam huius civitatis consecuti, hanc suam patriam iudicant, quam quidam hic nati et summo loco nati non patriam suam, sed urbem hostium esse iudicarunt. sed quid ego hosce homines ordinesque commemoro, quos privatae fortunae, quos communis res publica, quos denique libertas, ea quae dulcissima est, ad salutem patriae defendendam excitavit? servus est nemo qui modo tolerabili condicione sit servitutis, qui non audaciam civium perhorrescat, qui non haec stare cupiat, qui non quantum audet et quantum potest conferat ad salutem voluntatis. qua re si quem vestrum forte commovet hoc, quod auditum est, lenonem quendam Lentuli concursare circum tabernas, pretio sperare sollicitari posse animos egentium atque imperitorum, est id quidem coeptum at-

que temptatum, sed nulli sunt inventi tam aut fortuna miseri aut voluntate perditī qui non illum ipsum sellae atque operis et quaestus cotidiani locum, qui non cubile ac lectulum suum, qui denique non cursum hunc otiosum vitae suae salvum esse velint. multo vero maxima pars eorum, qui in tabernis sunt, immo vero — id enim potius est dicendum — genus hoc universum amantissimum est otii. etenim omne instrumentum, omnis opera atque quaestus frequentia civium sustentatur, alitur otio; quorum si quaestus oclusis tabernis minui solet, quid tandem incensis futurum fuit? quae cum ita sint, patres conscripti, <sup>18</sup> vobis populi Romani praesidia non desunt: vos ne populo Romano deesse videamini provide. habetis consulem ex <sup>9</sup> plurimis periculis et insidiis atque ex media morte non ad vitam suam, sed ad salutem vestram reservatum; omnes ordines ad conservandam rem publicam mente, voluntate, voce consentiunt; obsessa facibus et telis impiae coniurationis vobis supplex manus tendit patria communis, vobis se, vobis vitam omnium civium, vobis arcem et Capitolium, vobis aras Penatum, vobis illum ignem Vestae sempiternum, vobis omnium deorum templa atque delubra, vobis muros atque urbis tecta commendat. praeterea de vestra vita, de coniugum vestrarum atque liberorum anima, de fortunis omnium, de sedibus, de focus vestris hodierno die vobis iudicandum est. habetis <sup>19</sup> ducem memorem vestri, oblitum sui, quae non semper facultas datur; habetis omnes ordines, omnes homines, universum populum Romanum, id quod in civili causa hodierno die primum videmus, unum atque idem sentientem. cogitate quantis laboribus fundatum imperium, quanta virtute stabilitam libertatem, quanta deorum benignitate auctas exaggratasque fortunas una nox paene deleverit. id ne umquam posthac non modo non confici, sed ne cogitari quidem possit a civibus, hodierno die providendum est: atque haec non ut vos, qui mihi studio paene praecurritis, excitarem, locutus sum, sed ut mea vox, quae debet esse in re publica princeps, officio functa consulari videretur.

Nunc ante quam ad sententiam redeo, de me pauca <sup>10</sup> dicam. ego, quanta manus est coniuratorum, quam vi- <sup>20</sup>

detis esse permagnam, tantam me inimicorum multitudinem suscepisse video; sed eam iudico esse turpem et infirmam et abiectam. quod si aliquando alicuius furore et scelere concitata manus ista plus valuerit quam vestra ac rei publicae dignitas, me tamen meorum factorum atque consiliorum nunquam, patres conscripti, paenitebit. etenim mors, quam illi fortasse minitantur, omnibus est parata: vitae tantam laudem, quanta vos me vestris decretis honestastis, nemo est adsecutus; ceteris enim semper bene gesta, mihi uni conservata re publica gratulationem decrevistis. sit Scipio ille clarus, cuius consilio  
 21 atque virtute Hannibal in Africam redire atque Italia decedere coactus est; ornetur alter eximia laude Africanus, qui duas urbis huic imperio infestissimas, Karthaginem Numantiamque, delevit, habeatur vir egregius Paulus ille, cuius cursum rex potentissimus quondam et nobilissimus Perses honestavit; sit aeterna gloria Marius, qui bis Italiam obsidione et metu servitutis liberavit; anteponatur omnibus Pompeius, cuius res gestae atque virtutes isdem quibus solis cursus regionibus ac terminis continentur: erit profecto inter horum laudes aliquid loci nostrae gloriae, nisi forte maius est patefacere nobis provincias quo exire possimus, quam curare ut etiam illi,  
 22 qui absunt, habeant quo victores revertantur. quamquam est uno loco condicio melior externae victoriae quam domesticae, quod hostes alienigenae aut oppressi serviunt aut recepti in amicitiam beneficio se obligatos putant, qui autem ex numero civium, dementia aliqua depravati, hostes patriae semel esse coeperunt, eos cum a perniciē rei publicae reppuleris, nec vi coērcere nec beneficio placare possis. qua re mihi cum perditis civibus aeternum bellum susceptum esse video: id ego vestro bonorumque omnium auxilio memoriaque tantorum periculorum, quae non modo in hoc populo, qui servatus est, sed in omnium gentium sermonibus ac mentibus semper haerebit, a me atque a meis facile propulsari posse confido, neque ulla profecto tanta vis reperietur quae coniunctionem vestram equitumque Romanorum et tantam conspirationem bonorum omnium confringere et labefactare possit.

Quae cum ita sint, pro imperio, pro exercitu, pro provincia, quam neglexi, pro triumpho ceterisque laudis insignibus, quae sunt a me propter urbis vestraeque salutis custodiam repudiata, pro clientelis hospitibusque provincialibus, quae tamen urbanis opibus non minore labore tueor quam comparo, pro his igitur omnibus rebus, pro meis in vos singularibus studiis proque hac, quam perspicitis, ad conservandam rem publicam diligentia nihil a vobis nisi huius temporis totiusque mei consulatus memoriam postulo: quae dum erit vestris fixa mentibus, tutissimo me muro saeptum esse arbitrabor. quod si meam spem vis improborum fefellerit atque superaverit, commendo vobis parvum meum filium, cui profecto satis erit praesidii non solum ad salutem, verum etiam ad dignitatem, si eius, qui haec omnia suo solius periculo conservavit, illum filium esse memineritis. quapropter <sup>21</sup> de summa salute vestra populiue Romani, de vestris coniugibus ac liberis, de aris ac focis, de fanis atque templis, de totius urbis tectis ac sedibus, de imperio ac libertate, de salute Italiae, de universa re publica discernite diligenter, ut instituistis, ac fortiter. habetis eum consulem qui et parere vestris decretis non dubitet et ea, quae statueritis, quoad vivet, defendere et per se ipsum praestare possit.

---



M. TULLII CICERONIS  
PRO L. MURENA ORATIO.

<sup>1</sup> Quae precatus a dis immortalibus sum, iudices, more  
<sup>1</sup> institutoque maiorum illo die, quo auspiciato comitiis cen-  
turiatis L. Murenam consulem renuntiavi, ut ea res mihi  
magistratuique meo, populo plebique Romanae bene at-  
que feliciter eveniret, eadem precor ab eisdem dis im-  
mortalibus ob eiusdem hominis consulatum una cum sa-  
lute obtinendum et ut vestrae mentes atque sententiae  
cum populi Romani voluntatibus suffragiisque consentiant  
eaeque res vobis populoque Romano pacem, tranquillita-  
tem, otium concordiamque adferat. quod si illa sollemnis  
comitiorum precatio consularibus auspiciis consecrata tan-  
tam habet in se vim et religionem, quantam rei publicae  
dignitas postulat, idem ego sum precatus, ut eis quoque  
hominibus, quibus hic consulatus me rogante datus esset,  
<sup>2</sup> ea res fauste, feliciter prospereque eveniret. quae cum  
ita sint, iudices, et cum omnis deorum immortalium po-  
testas aut translata sit ad vos aut certe communicata vo-  
biscum, idem consul ea vestrae fidei commendat, qui  
antea dis immortalibus commendavit, ut eiusdem hominis  
voce et declaratus consul et defensus beneficium populi  
Romani cum vestra atque omnium civium salute tueatur.  
et quoniam in hoc officio studium meae defensionis ab  
accusatoribus atque etiam ipsa susceptio causae repre-  
hensa est, ante quam pro L. Murena dicere instituo, pro  
me ipso pauca dicam, non quo mihi potior hoc quidem  
in tempore sit officii mei quam huiusce salutis defensio,  
sed ut meo facto vobis probato maiore auctoritate ab  
huius honore, fama fortunisque omnibus inimicorum im-  
petus propulsare possim.

<sup>2</sup>  
<sup>3</sup> Et primum M. Catoni vitam ad certam rationis nor-  
mam derigenti et diligentissime perpendenti momenta

officiorum omnium de officio meo respondebo. negat fuisse rectum Cato me et consulem et legis ambitus latorem et tam severe gesto consulatu causam L. Murenac attingere: cuius reprehensio me vehementer movet, non solum ut vobis, iudices, quibus maxime debeo, verum etiam ut ipsi Catoni, gravissimo atque integerrimo viro, rationem facti mei probem. a quo tandem, M. Cato, est aequius consulem defendi quam a consule? quis mihi in re publica potest aut debet esse coniunctior, quam is, cui res publica a me † una traditur sustinenda, magnis meis laboribus et periculis sustentata? quod si in eis rebus repetendis, quae mancipi sunt, is periculum iudicii praestare debet, qui se nexu obligavit, profecto etiam rectius in iudicio consulis designati is potissimum [consul], qui consulem declaravit, auctor beneficii populi Romani defensorque periculi esse debebit; ac si, ut non nullis in 4 civitatibus fieri solet, patronus huic causae publice constitueretur, is potissimum summo honore adfecto defensor daretur, qui eodem honore praeditus non minus adferret ad dicendum auctoritatis quam facultatis. quod si portu solventibus ei, qui iam in portum ex alto invehuntur, praedicere summo studio solent et tempestatum rationem et praedonum et locorum, quod natura fert ut eis fa-veamus, qui eadem pericula, quibus nos perfuncti sumus, ingrediuntur, quo tandem me animo esse oportet prope iam ex magna iactatione terram videntem in hunc, cui video maximas rei publicae tempestates esse subeundas? qua re si est boni consulis non solum videre quid agatur, verum etiam providere quid futurum sit, ostendam alio loco quantum salutis communis intersit duos consules in re publica Kalendis Ianuariis esse. quod si ita est, non 5 tam me officium debuit ad hominis amici fortunas quam res publica consulem ad communem salutem defendendam vocare. nam quod legem de ambitu tuli, certe ita 3 tuli, ut eam, quam mihi met ipsi iam pridem tulerim de civium periculis defendendis, non abrogarim. etenim si largitionem factam esse confiterer idque recte factum esse defenderem, facerem improbe, etiam si alius legem tulisset: cum vero nihil commissum contra legem esse defendam, quid est quod meam defensionem latio legis

6 impediatur? negas esse eiusdem severitatis Catilinam exitium rei publicae intra moenia molientem verbis et paene imperio urbe expulisse et nunc pro L. Murena dicere; ego autem has partis lenitatis et misericordiae, quas me natura ipsa docuit, semper egi libenter, illam vero gravitatis severitatisque personam non appetivi, sed a re publica mihi impositam sustinui, sicut huius imperii dignitas in summo periculo civium postulabat. quod si tum, cum res publica vim et severitatem desiderabat, vici naturam et tam vehemens fui quam cogebar, non quam volebam, nunc, cum omnes me causae ad misericordiam atque ad humanitatem vocent, quanto tandem studio debeo naturae meae consuetudinique servire? ac de officio defensionis meae ac de ratione accusationis tuae fortasse etiam alia in parte orationis dicendum nobis erit.

7 Sed me, iudices, non minus hominis sapientissimi atque ornatissimi Ser. Sulpicii conquestio quam Catonis accusatio commovebat, qui gravissime et acerbissime ferre se dixit me familiaritatis necessitudinisque oblitum causam L. Murenæ contra se defendere. huic ego, iudices, satis facere cupio vosque adhibere arbitros; nam cum grave est vere accusari in amicitia, tum, etiam si falso accuseris, non est neglegendum. ego, Ser. Sulpici, me in petitione tua tibi omnia studia atque officia pro nostra necessitudine et debuisse confiteor et praestitisse arbitror: nihil tibi consulatum petenti a me defuit quod esset aut ab amico aut a gratioso aut a consule postulandum. abiit illud tempus; mutata ratio est: sic existimo, sic mihi persuadeo, me tibi contra honorem L. Murenæ, quantum tu a me postulare ausus sis, tantum debuisse, 8 contra salutem nihil debere. neque enim, si tibi tum, cum peteres consulatum, adfui, nunc, cum Murenam ipsum petis, adiutor eodem pacto esse debeo. atque hoc non modo non laudari, sed ne concedi quidem potest, ut amicis nostris accusantibus non etiam alienissimos defendamus. 4 mihi autem cum Murena, iudices, et magna et vetus amicitia est, quae in capitis dimicatione a Ser. Sulpicio non idcirco obruetur, quod ab eodem in honoris contentione superata est; quae si causa non esset, tamen vel dignitas hominis vel honoris eius, quem adeptus est,

amplitudo summam mihi superbiae crudelitatisque infaniam inussisset, si hominis et suis et populi Romani ornamentis amplissimi causam tanti periculi repudiassem. neque enim iam mihi licet neque est integrum, ut meum laborem hominum periculis sublevandis non impertiam: nam cum praemia mihi tanta pro hac industria sint data, quanta antea nemini, † sic et si ceperis eos cum adeptus sis, deponere, esset hominis et astuti et ingrati. quod 9 si licet desinere, si te auctore possum, si nulla inertiae, nulla superbiae [turpitudine], nulla inhumanitatis culpa suscipitur, ego vero libenter desino; sin autem fuga laboris desidiam, repudiatio supplicum superbiam, amicorum neglectio improbitatem coarguit, nimirum haec causa est eius modi, quam nec industrius *homo* nec misericors nec officiosus deserere possit. atque huiusce rei coniecturam de tuo ipsius studio, Servi, facillime ceperis: nam si tibi necesse putas etiam adversariis amicorum tuorum de iure consulentibus respondere, et si turpe existimas te advocato illum ipsum, quem contra veneris *antea*, causa cadere, noli tam esse iniustus, ut, cum tui fontes vel inimicis tuis pateant, nostros etiam amicis putes clausos esse oportere. etenim si me tua familiaritas ab hac causa re- 10 movisset et si hoc idem Q. Hortensio M. Crasso, clarissimis viris, si item ceteris, a quibus intellego tuam gratiam magni aestimari, accidisset, in ea civitate consul designatus defensorem non haberet, in qua nemini umquam infimo maiores nostri patronum deesse voluerunt. ego vero, iudices, ipse me existimarem nefarium, si amico, crudelem, si misero, superbum, si consuli defuissem. qua re quod dandum est amicitiae, large dabitur a me, ut tecum agam, Servi, non secus ac si meus esset frater, qui mihi est carissimus, isto in loco: quodtribuendum est officio, fidei, religioni, id ita moderabor, ut meminerim me contra amici studium pro amici periculo dicere.

Intellego, iudices, tris totius accusationis partis fuisse 5  
et earum unam in reprehensione vitae, alteram in con- 11  
tentione dignitatis, tertiam in criminibus ambitus esse versatam. atque harum trium partium prima illa, quae gravissima debebat esse, ita fuit infirma et levis, ut illos lex magis quaedam accusatoria quam vera male dicendi facul-



tas de vita L. Murenæ dicere aliquid cœgerit: obiecta est enim Asia: quæ ab hoc non ad voluptatem et luxuriam expetita est, sed in militari labore peragrata; qui si adulescens patre suo imperatore non meruisset, aut hostem aut patris imperium timuisse aut a parente repudiatus videretur: an cum sedere in equis triumphantium prætextati potissimum filii soleant, huic donis militibus patris triumphum decorare fugiendum fuit, ut rebus communiter gestis paene simul cum patre triumpharet? hic vero, iudices, et fuit in Asia et viro fortissimo, parenti suo, magno adiumento in periculis, solacio in laboribus, gratulationi in victoria fuit. et si habet Asia suspicionem luxuriæ quandam, non Asiam numquam vidisse, sed in Asia continenter vixisse laudandum est. quam ob rem non Asiæ nomen obiciendum Murenæ fuit, ex qua laus familiæ, memoria generi, honos et gloria nomini constituta est, sed aliquod aut in Asia susceptum aut ex Asia deportatum flagitium ac dedecus: meruisse vero stipendia in eo bello, quod tum populus Romanus non modo maximum, sed etiam solum gerebat, virtutis, patre imperatore libentissime meruisse pietatis, finem stipendiorum patris victoriam ac triumphum fuisse felicitatis fuit; maledicto quidem idcirco nihil in hisce rebus loci est, quod omnia laus occupavit. saltatorem appellat L. Murenæ Cato. maledictum est, si vere obicitur, vehementis accusatoris; sin falso, maledici convitiatoris. quare cum ista sis auctoritate, non debes, Marce, adripere maledictum ex trivio aut ex scurrarum aliquo convitio, neque temere consulem populi Romani saltatorem vocare, sed circumspicere quibus præterea vitiis adfectum esse necesse sit cum, cui vere istud obici possit. nemo enim fere saltat sobrius, nisi forte insanit, neque in solitudine neque in convivio moderato atque honesto: tempestivi convivii, amoeni loci, multarum deliciarum comes est extrema saltatio. tu mihi adripis id, quod necesse est omnium vitiorum esse postremum; relinquis illa, quibus remotis hoc vitium omnino esse non potest: nullum turpe convivium, non amor, non comissatio, non libido, non sumptus ostenditur: [et] cum ea non reperiantur, quæ voluptatis nomen habent quamquam vitiosa sunt, in quo

ipsam luxuriam reperire non potes, in eo te umbram luxuriae reperturum putas? nihil igitur in vitam L. Murenae dici potest, nihil, inquam, omnino, iudices: sic a me consul designatus defenditur, ut eius nulla fraus, nulla avaritia, nulla perfidia, nulla crudelitas, nullum petulans dictum [in vita] proferatur. bene habet: iacta sunt fundamenta defensionis; nondum enim nostris laudibus, quibus utar postea, sed prope inimicorum confessione virum bonum atque integrum hominem defendimus; quo constituto facilius est mihi aditus ad contentionem dignitatis, quae pars altera fuit accusationis.

Summam video esse in te, Ser. Sulpici, dignitatem generis, integritatis, industriae ceterorumque ornamentorum omnium, quibus fretum ad consulatus petitionem adgredi par est; paria cognosco esse ista in L. Murena atque ita paria, ut neque ipse dignitate vinci potuerit neque te dignitate superarit. contempsisti L. Murenæ genus; extulisti tuum: quo loco si tibi hoc sumis, nisi qui patricius sit, neminem bono esse genere natum, facis ut rursus plebes in Aventinum sevocanda esse videatur; sin autem sunt amplae et honestae familiae plebeiae, et proavus L. Murenæ et avus praetor fuit et pater cum amplissime atque honestissime ex praetura triumphasset, hoc faciliorem huic gradum consulatus adipiscendi reliquit, quod is iam patri debitus a filio petebatur. tua vero nobilitas, Ser. Sulpici, tametsi summa est, tamen hominibus litteratis [et historicis] est notior, populo vero et suffragatoribus obscurior: pater enim fuit equestri loco; avus nulla inlustri laude celebratus; itaque non ex sermone hominum recenti, sed ex annalium vetustate eruenda memoria est nobilitatis tuae. qua re ego te semper in nostrum numerum adgregare soleo, quod virtute industriaque perfecisti, ut, cum equitis Romani esses filius, summa tamen amplitudine dignus putarere, nec mihi umquam minus in Q. Pompeio, novo homine et fortissimo viro, virtutis esse visum est quam in homine nobilissimo M. Aemilio: etenim eiusdem animi atque ingenii est posteris suis, quod Pompeius fecit, amplitudinem nominis, quam non acceperit, tradere, et, ut Scaurus, memoriam prope intermortuam generis sui virtute reno-

- <sup>8</sup> vare. quamquam ego iam putabam, iudices, multis viris  
<sup>17</sup> fortibus ne ignobilitas generis obiceretur, meo labore  
 esse perfectum, qui non modo Curiis, Catonibus, Pompeiis, antiquis illis, fortissimis viris, [novis hominibus,]  
 sed his recentibus, Mariis et Didiis et Caeliis, commemorandis iacebant. cum vero ego tanto intervallo claustra  
 ista nobilitatis refregissem, ut aditus ad consulatum post-  
 hac, sicut apud maiores nostros fuit, non magis nobilitati  
 quam virtuti pateret, non arbitrabar, cum ex familia ve-  
 tere et illustri consul designatus ab equitis Romani filio,  
 consule, defenderetur, de generis novitate accusatores  
 esse dicturos: etenim mihi ipsi accidit, ut cum duobus  
 patriciis, altero improbissimo atque audacissimo, altero  
 modestissimo atque optimo viro, peterem; superavi tamen  
 dignitate Catilinam, gratia Galbam. quod si id crimen  
 homini novo esse deberet, profecto mihi neque inimici  
<sup>18</sup> neque invidi defuissent. omittamus igitur de genere  
 dicere, cuius est magna in utroque dignitas: videamus  
 cetera. 'quaesturam una petiit et sum ego factus  
 prior.' non est respondendum ad omnia; neque enim  
 quemquam vestrum fugit, cum multi pari dignitate fiant,  
 unus autem primum solus possit obtinere, non eundem  
 esse ordinem dignitatis et renuntiationis, propterea quod  
 renuntiatio gradus habet, dignitas autem est persaepe  
 eadem omnium. sed quaestura utriusque prope modum  
 pari momento sortis fuit: habuit hic lege Titia provinciam  
 tacitam et quietam; tu illam, cui, cum quaestores sor-  
 tiuntur, etiam adclamari solet, Ostiensem, non tam gra-  
 tiosam et illustrem quam negotiosam et molestam. con-  
 sedit utriusque nomen in quaestura; nullum enim vobis  
 sors campum dedit in quo excurrere virtus cognoscique  
<sup>19</sup> posset. reliqui temporis spatium in contentionem  
 vocatur: ab utroque dissimillima ratione tractatum est:  
<sup>9</sup> Servius hic nobiscum hanc urbanam militiam respon-  
 dendi, scribendi, cavendi, plenam sollicitudinis ac sto-  
 machi, secutus est; ius civile didicit; multum vigilavit,  
 laboravit; praesto multis fuit; multorum stultitiam per-  
 pessus est, adrogantiam pertulit, difficultatem exsorbuit;  
 vixit ad aliorum arbitrium, non ad suum. magna laus et  
 grata hominibus unum hominem elaborare in ea scientia,

quae sit multis profutura. quid Murena interea? for- 20  
 tissimo et sapientissimo viro, summo imperatori legatus  
 [L. Lucullo] fuit: qua in legatione duxit exercitum, signa  
 contulit, manum conseruit, magnas copias hostium fudit,  
 urbis partim vi, partim obsidione cepit, Asiam istam re-  
 fertam et eandem delicatam sic obiit, ut in ea neque  
 avaritiae neque luxuriae vestigium reliquerit; maximo in  
 bello sic est versatus, ut hic multas res et magnas sine  
 imperatore gesserit, nullam sine hoc imperator. atque  
 haec quamquam praesente L. Lucullo loquor, tamen ne  
 ab ipso propter periculum nostrum concessam videamur  
 habere licentiam fingendi, publicis litteris testata sunt  
 omnia, quibus L. Lucullus tantum *huic* laudis imperit,  
 quantum neque ambitiosus imperator neque invidus tri-  
 buere alteri in communicanda gloria debuit. summa in 21  
 utroque est honestas, summa dignitas; quam ego, si mihi  
 per Servium liceat, pari atque eadem in laude ponam.  
 sed non licet: agitatur rem militarem; insectatur totam  
 hanc legationem; adsiduitatis et operarum harum coti-  
 dianarum putat esse consulatum: ‘apud exercitum mihi  
 fueris’ inquit ‘tot annos; forum non attigeris; afueris  
 tam diu, ut, cum longo intervallo veneris, cum his, qui  
 in foro habitaverint, de dignitate contendas?’ primum ista  
 nostra adsiduitas, Servi, nescis quantum interdum ad-  
 ferat hominibus fastidii, quantum satietatis. mihi quidem  
 vehementer expedit positam in oculis esse gratiam; sed  
 tamen ego mei satietatem magno meo labore superavi et  
 tu item fortasse; verum tamen utrique nostrum deside-  
 rium nihil obfuisse. sed ut hoc omisso ad studiorum 22  
 atque artium contentionem revertamur, qui potest dubi-  
 tari quin ad consulatum adipiscendum multo plus adferat  
 dignitatis rei militaris quam iuris civilis gloria? vigilas  
 tu de nocte ut tuis consultoribus respondeas, ille ut eo,  
 quo intendit, mature cum exercitu perveniat; te gallorum,  
 illum buccinarum cantus exsuscitat; tu actionem [instituis],  
 ille aciem instruit. tu caves ne tui consultores, ille ne  
 urbes aut castra capiantur; ille tenet [et scit] ut hostium  
 copiae, tu ut aquae pluviae arceantur; ille exercitatus est  
 in propagandis finibus, tu in regendis, ac nimirum, di-  
 cendum est enim quod sentio, rei militaris virtus praec-



10 stat ceteris omnibus. haec nomen populo Romano, haec huic urbi aeternam gloriam peperit; haec orbem terrarum parere huic imperio coëgit; omnes urbanae res, omnia haec nostra praeclara studia et haec forensis laus et industria latent in tutela ac praesidio bellicae virtutis: simul atque increpuit suspitio tumultus, artes ilico nostrae conticescunt.

23 Et quoniam mihi videris istam scientiam iuris tamquam filiulam osculari tuam, non patiar te in tanto errore versari, ut istud nescio quid, quod tanto opere diligis, praeclarum aliquid esse arbitrare: aliis ego te virtutibus, continentiae, gravitatis, iustitiae, fidei, ceteris omnibus consulatu et omni honore semper dignissimum iudicavi: quod quidem ius civile didicisti, non dicam, operam perdidisti, sed illud dicam, nullam esse in ista disciplina munitam ad consulatum viam; omnes enim artes, quae nobis populi Romani studia concilient, et admirabilem dignitatem et pergratam utilitatem debent habere. summa dignitas est in eis, qui militari laude antecellunt; omnia enim, quae sunt in imperio et in statu civitatis, ab eis defendi et firmari putantur; summa etiam utilitas, si quidem eorum consilio et periculo cum re publica tum etiam nostris rebus perfrui possumus. gravis etiam illa est et plena dignitatis [dicendi] facultas, quae saepe valuit in consule deligendo, posse consilio atque oratione et senatus et populi et eorum, qui res iudicant, mentis permoveere: quaeritur consul, qui dicendo non numquam comprimat tribunicios furores, qui concitatum populum flectat, qui largitioni resistat: non mirum, si ob hanc facultatem homines saepe etiam non nobiles consulatum consecuti sunt, praesertim cum haec eadem res plurimas gratias, firmissimas amicitias, maxima studia pariat, quorum in isto vestro artificio, Sulpici, nihil est: primum dignitas in tam tenui scientia non potest esse, res enim sunt parvae, prope in singulis litteris atque interpunctionibus verborum occupatae; deinde, etiam si quid apud maiores nostros fuit in isto studio admirationis, id enuntiatis vestris mysteriis totum est contemptum et abiectum. posset agi lege necne pauci quondam sciebant; fastos enim volgo non habebant; erant in magna potentia, qui

consulebantur; a quibus etiam dies, tamquam a Chaldaeis, petebantur: inventus est scriba quidam [Cn. Flavius], qui cornicum oculos confixerit et singulis diebus ediscendis fastos populo proposuerit [et ab ipsis cautis iureconsultis eorum sapientiam compilarit]. itaque irati illi, quod sunt veriti ne dierum ratione pervolgata et cognita sine sua opera agi lege posset, verba quaedam composuerunt, ut omnibus in rebus ipsi interessent. cum hoc fieri bellissime posset: 'fundus Sabinus meus est': 'immo meus': deinde iudicium: noluerunt. 'FUNDUS', inquit 'QUI EST IN AGRO, QUI SABINUS VOCATUR.' satis verbose: cedo quid postea? 'EUM EGO EX IURE QUIRITIUM MEUM ESSE AIO.' quid tum? 'INDE IBI EGO TE EX IURE MANU CONSERTUM VOCO.' quod huic tam loquaciter litigioso responderet ille, unde petebatur, non habebat. transit idem iure consultus, tibicinis Latini modo: 'UNDE TU ME' inquit 'EX IURE MANU CONSERTUM VOCASTI, INDE IBI EGO TE REVOCO.' praetor interea ne pulchrum se ac beatum putaret atque aliquid ipse sua sponte loqueretur, ei quoque carmen compositum est, cum ceteris rebus absurdum tum vero in illo: 'SUIS UTRISQUE SUPERSTITIBUS PRAESENTIBUS ISTAM VIAM DICO: ITE VIAM.' praesto aderat sapiens ille, qui inire viam doceret: 'REDITE VIAM.' eodem duce redibant. haec iam tum apud illos barbatos ridicula, credo, videbantur: homines, cum recte atque in loco constitissent, iuberi abire, ut, unde abissent, eodem statim redirent. isdem ineptiis fucata sunt illa omnia: QUANDO TE IN IURE CONSPICIO, et haec † sed: ANNE TU DICIS QUA EX CAUSA VINDICAVERIS? quae dum erant occulta, necessario ab eis, qui ea tenebant, petebantur; postea vero pervolgata atque in manibus iactata et excussa inanissima prudentiae reperta sunt, fraudis autem et stultitiae plenissima. nam cum permulta prae-  
27  
clare legibus essent constituta, ea iure consultorum ingeniis pleraque corrupta ac depravata sunt. mulieres omnis propter infirmitatem consilii maiores in tutorum potestate esse voluerunt: hi invenerunt genera tutorum, quae potestate mulierum continerentur. sacra interire illi noluerunt: horum ingenio senes ad coëmptiones faciendas interimendorum sacrorum causa reperti sunt. in omni denique iure civili aequitatem reliquerunt, verba ipsa

tenuerunt; ut, quia in alicuius libris exempli causa id  
 nomen invenerant, putarent omnis mulieres, quae coïn-  
 ptionem facerent, Gaias vocari. iam illud mihi quidem  
 mirum videri solet, tot homines, tam ingeniosos, per tot  
 annos etiam nunc statuere non potuisse utrum diem ter-  
 tium an perendinum, iudicem an arbitrum, rem  
 an litem dici oporteret. itaque, ut dixi, dignitas in ista  
 scientia consularis numquam fuit, quae tota ex rebus  
 fictis commenticiisque constaret, gratiae vero multo etiam  
 inanior est: quod enim omnibus patet et aequè promptum  
 est mihi et adversario meo, id esse gratum nullo pacto  
 potest. itaque non modo beneficii conlocandi spem, sed  
 etiam illud, quod aliquando fuit 'licet consulere', iam  
 perdidistis. sapiens existimari nemo potest in ea pru-  
 dentia, quae neque extra Romam usquam neque Romae  
 rebus prolatis quicquam valet; peritus ideo haberi nemo  
 potest, quod in eo, quod sciunt omnes, nullo modo pos-  
 sunt inter se discrepare; difficilis autem res ideo non  
 putatur, quod et perpaucis et minime obscuris litteris  
 continetur. itaque si mihi homini vehementer occupato  
 stomachum moveritis, triduo me iuris consultum [esse]  
 profitebor. etenim quae de scripto aguntur, scripta sunt  
 omnia, neque tamen quicquam tam anguste scriptum est,  
 quo ego non possim *QUA DE RE AGITUR* addere; quae con-  
 sultuntur autem, minimo periculo respondentur: si id,  
 quod oportet, responderis, idem videre respondisse,  
 quod Servius; sin aliter, etiam controversum ius nosse et  
 tractare videre. quapropter non solum illa gloria mili-  
 taris vestris formulis atque actionibus anteponenda est,  
 verum etiam dicendi consuetudo longe et multum isti  
 vestrae exercitationi ad honorem antecellit. itaque mihi  
 videntur plerique initio multo hoc maluisse, post, cum  
 id adsequi non potuissent, istuc potissimum sunt delapsi,  
 et ut aiunt in Graecis artificibus eos auloedos esse, qui  
 citharoedi fieri non potuerint, sic non nullos videmus, qui  
 oratores evadere non potuerunt, [eos] ad iuris studium  
 devenire. magnus dicendi labor, magna res, magna  
 dignitas, summa autem gratia: etenim a vobis salubritas  
 quaedam, ab eis, qui dicunt, salus ipsa petitur. deinde  
 vestra responsa atque decreta et evertuntur saepe dicendo

et sine defensione oratoris firma esse non possunt; in qua si satis profecissem, parcius de eius laude dicerem; nunc nihil de me dico, sed de eis, qui in dicendo magni sunt aut fuerunt. duae sunt artes, quae possunt locare <sup>14</sup><sub>30</sub> homines in amplissimo gradu dignitatis: una imperatoris, altera oratoris boni; ab hoc enim pacis ornamenta retinentur, ab illo belli pericula repelluntur. ceterae tamen virtutes ipsae per se multum valent, iustitia, fides, pudor, temperantia; quibus te, Servi, excellere omnes intellegunt: sed nunc de studiis ad honorem [depositis], non de insita cuiusque virtute disputo. omnia ista nobis studia de manibus excutuntur, simul atque aliqui motus novus bellicum canere coepit. etenim, ut ait ingeniosus poeta et auctor valde bonus, procliis 'promulgatis pellitur e medio' non solum ista vestra verbosa simulatio prudentiae, sed etiam ipsa illa domina rerum, 'sapientia: vi geritur res, spernitur orator', non solum odiosus in dicendo ac loquax, verum etiam 'bonus; horridus miles amatur'; vestrum vero studium totum iacet. 'non ex iure manu consertum, sed ferro' inquit 'rem repetunt.' quod si ita est, cedat, opinor, [Sulpici] forum castris, otium militiae, stilus gladio, umbra soli; sit denique in civitate ea prima res, propter quam ipsa est civitas omnium princeps.

Verum haec Cato nimium nos nostris verbis magna <sup>31</sup> facere demonstrat et oblitos esse bellum illud omne Mithridaticum cum muliereculis esse gestum: quod ego longe secus existimo, iudices; deque eo pauca disseram; neque enim causa in hoc continetur. nam si omnia bella, quae cum Graecis gessimus, contemnenda sunt, derideatur de rege Pyrrho triumphus M. Curii, de Philippo T. Flaminini, de Aetolis M. Fulvii, de rege Perse L. Pauli, de Pseudophilippo Q. Metelli, de Corinthiis L. Mummi: sin haec bella gravissima victoriaeque eorum bellorum gratissimae fuerunt, cur Asiaticae nationes atque ille a te hostis contemnitur? atqui ex veterum rerum monumentis vel maximum bellum populum Romanum cum Antiocho gessisse video; cuius belli victor L. Scipio aequa parta cum P. fratre gloria, quam laudem ille Africa oppressa cognomine ipso prae se ferebat, eandem



- 32 hic sibi ex Asiae nomine adsumpsit. quo quidem in bello virtus enituit egregia M. Catonis, proavi tui: quo ille, cum esset, ut ego mihi statuam, talis, qualem te esse video, numquam [cum Scipione] esset profectus, si cum mulierculis bellandum arbitraretur; neque vero cum P. Africano senatus egisset, ut legatus fratri proficisceretur, cum ipse paulo ante Hannibale ex Italia expulso, ex Africa eiecto, Karthagine oppressa maximis periculis rem publicam liberasset, nisi illud grave bellum et vehementer
- 15 mens putaretur. atqui si diligenter quid Mithridates potuerit et quid effecerit et qui vir fuerit consideraris, omnibus regibus, quibuscum populus Romanus bellum gessit, hunc regem nimirum antepones: quem L. Sulla, maximo et fortissimo exercitu, pugna et acer et non rudis imperator, ut aliud nihil dicam, cum bellum invexisset totam in Asiam, cum pace dimisit; quem L. Murena, pater huiusce, vehementissime vigilantissimeque vexatum, repressum magna ex parte, non oppressum reliquit: qui rex, sibi aliquot annis sumptis ad confirmandas rationes et copias belli, tantum spe conatuque valuit, ut se Oceanum cum Ponto [Sertorii copias cum suis] con-
- 33 iuncturum putaret: ad quod bellum duobus consulibus ita missis, ut alter Mithridatem persequeretur, alter Bithyniam tueretur, alterius res et terra et mari calamitosae vehementer et opes regis et nomen auxerunt; L. Luculli vero res tantae exstiterunt, ut neque maius bellum commemorari possit neque maiore consilio et virtute gestum: nam cum totius impetus belli ad Cyzicenorum moenia exstitisset camque urbem sibi Mithridates Asiae ianuam fore putavisset, qua effracta et revolsa tota pateret provincia, perfecta a Lucullo haec sunt omnia, ut et urbs fidelissimorum sociorum defenderetur et omnes copiae regis diuturnitate obsessionis consumerentur. quid? illam pugnam navalem ad Tenedum, cum contento cursu, acerrimis ducibus, hostium classis Italiam spe atque animis inflata peteret, mediocri certamine et parva dimicatione commissam arbitraris? mitto proelia; praetereo oppugnationes oppidorum: expulsus regno tandem aliquando *Mithridates* tantum tamen consilio atque auctoritate valuit, ut se rege Armeniorum adiuncto novis opibus co-

piisque renovarit. ac si mihi nunc de rebus gestis esset 16  
 nostri exercitus imperatorisque dicendum, plurima et  
 maxima proelia commemorare possem; sed non id agi-  
 mus; hoc dico: si bellum hoc, si hic hostis, si ille rex 34  
 contemnendus fuisset, neque tanta cura senatus et popu-  
 lus Romanus suscipiendum putasset neque tot annos  
 gessisset [neque] tanta gloria L. Lucullus; neque vero  
 eius belli conficiendum exitum tanto studio populus Ro-  
 manus ad Cn. Pompeium detulisset; cuius ex omnibus  
 pugnis, quae sunt innumerabiles, vel acerrima mihi vi-  
 detur illa, quae cum rege commissa est et summa con-  
 tentione pugnata; qua ex pugna cum se ille eripuisset et  
 Bosporum confugisset, quo exercitus adire non posset,  
 etiam in extrema fortuna et fuga nomen tamen retinuit  
 regium. itaque ipse Pompeius regno possesso, ex omni-  
 bus oris ac notis sedibus hoste pulso, [tamen] tantum in  
 unius anima posuit, ut, cum omnia, quae ille tenuerat,  
 adierat, sperarat, victoria possideret, tamen non ante  
 quam illum vita expulit bellum confectum iudicaret. hunc  
 tu hostem, Cato, contemnis, quocum per tot annos tot  
 proeliis tot imperatores bella gesserunt? cuius expulsi et  
 eiecti vita tanti existimata est a *Pompeio*, ut morte eius  
 nuntiata tum denique bellum confectum arbitraretur?  
 hoc igitur in bello L. Murenam legatum fortissimi animi,  
 summi consilii, maximi laboris cognitum esse defendimus,  
 et hanc eius operam non minus ad consulatum adipiscen-  
 dum quam hanc nostram forensem industriam dignitatis  
 habuisse.

At enim in praeturae petitione prior renunciatus est 17  
 Servius. pergitisne vos tamquam ex syngrapha agere 35  
 cum populo, ut quem locum semel honoris cuiquam dede-  
 rit, eundem reliquis honoribus debeat? quod enim fre-  
 tum, quem Euripum tot motus, tantas, tam varias habere  
 putatis agitationes fluctuum, quantas perturbationes et  
 quantos aestus habet ratio comitiorum? dies intermissus  
 aut nox interposita saepe perturbat omnia et totam opinio-  
 nem parva non numquam commutat aura rumoris; saepe  
 etiam sine ulla aperta causa fit aliud atque existimaris,  
 ut non numquam ita factum esse etiam populus admire-  
 tur, quasi vero non ipse fecerit. nihil est incertius volgo, 36

nihil obscurius voluntate hominum, nihil fallacius ratione tota comitiorum. quis L. Philippum summo ingenio, opibus, gratia, nobilitate, a M. Herennio superari posse arbitratus est? quis Q. Catulum, humanitate, sapientia, integritate antecellentem, a Cn. Manlio? quis M. Scaurum, hominem gravissimum, civem egregium, fortissimum senatorem, a Q. Maximo? non modo horum nihil ita fore putatum est, sed ne cum esset factum quidem, quare ita factum esset intellegi potuit; nam ut tempestates saepe certo aliquo caeli signo commoventur, saepe improviso nulla ex certa ratione, obscura aliqua ex causa concitantur, sic in hac comitiorum tempestate populari saepe intellegas quo signo commota sit, saepe ita obscura est, ut casu excitata esse videatur. sed tamen, si est reddenda ratio, duae res vehementer in praetura desideratae sunt, quae ambae in consulatu Murenæ profuerunt: una, expectatio muneris, quae et rumore non nullo et studiis sermonibusque competitorum creverat, altera, quod ei, quos in provincia ac legatione omnis et liberalitatis et virtutis suae testis habuerat, nondum decesserant. horum utrumque ei fortuna ad consulatus petitionem reservavit; nam et L. Luculli exercitus, qui ad triumphum convenerat, idem comes L. Murenæ praesto fuit, et munus amplissimum, quod petitio praeturae desiderabat, praetura restituit. num tibi haec parva videntur adiumenta et subsidia consulatus? voluntas militum? quae cum per se valet multitudine, cum apud suos gratia, tum vero in consule declarando multum etiam apud universum populum Romanum auctoritatis habet suffragatio militaris; imperatores enim comitiis consularibus, non verborum interpretes deliguntur. qua re gravis est illa oratio: ‘me saucium recreavit; me praeda donavit; hoc duce castra cepimus, signa contulimus; numquam iste plus militi laboris imposuit quam sibi sumpsit, ipse cum fortis tum etiam felix.’ hoc quanti putas esse ad famam hominum ac voluntatem? etenim si tanta illis comitiis religio est, ut adhuc semper omen valuerit praerogativae, quid mirum est in hoc felicitatis famam sermonemque valuisse? sed si haec leviora ducis, quae sunt gravissima, et hanc urbanam suffragationem militari anteponis, noli ludorum

huius elegantiam et scenae magnificentiam valde contemnere; quae huic admodum profuerunt. nam quid ego dicam populum ac volgus imperitorum ludis magno opere delectari? minus est mirandum; quamquam huic causae id satis est; sunt enim populi ac multitudinis comitia. qua re, si populo ludorum magnificentia voluptati est, non est mirandum eam L. Murenæ apud populum profuisse: [sed] si nosmet ipsi, qui et [ab delectatione omni] 39 negotiis impedimur et in ipsa occupatione delectationes alias multas habere possumus, ludis tamen oblectamur et ducimur, quid tu admirare de multitudine indocta? L. Otho, vir fortis, meus necessarius, equestri ordini re- 40 stituit non solum dignitatem, sed etiam voluptatem; itaque lex hæc, quæ ad ludos pertinet, est omnium gratissima, quod honestissimo ordini cum splendore fructus quoque iucunditatis est restitutus. qua re delectant homines, mihi crede, ludi; etiam illos, qui dissimulant, non solum eos, qui fatentur: quod ego in mea petitione sensi; nam nos quoque habuimus scenam competitricem. quod si ego, qui trinos ludos ædilis feceram, tamen Antonii ludis commovebar, tibi, qui casu nullos feceras, nihil huius istam ipsam, quam inrides, argenteam scenam adversatam putas? sed hæc sane sint paria omnia: sit par 41 forensis opera *militari*, militaris suffragatio urbanae, sit idem magnificentissimos et nullos umquam fecisse ludos: quid, in ipsa praetura nihilne existimas inter tuam et istius sortem interfuisse? huius sors ea fuit, quam omnes 20 tui necessarii tibi optabamus, iuris dicundi: in qua gloriam conciliat magnitudo negotii, gratiam æquitatis largitio: qua in sorte sapiens praetor, qualis hic fuit, offensione vitata æquabilitate decernendi benevolentiam adiungit lenitate audiendi: egregia et ad consulatum apta provincia, in qua laus æquitatis, integritatis, facilitatis ad extremum ludorum voluptate concluditur. quid tua 42 sors? tristis, atrox: quaestio peculatus, ex altera parte lacrimarum et squaloris, ex altera plena † catenarum atque indicum; cogendi iudices inviti, retinendi contra voluntatem; scriba damnatus: ordo totus alienus; Sullana gratificatio reprehensa: multi viri fortes et prope pars civitatis offensa est; lites severe aestimatae: cui



placet obliviscitur, cui dolet meminuit. postremo tu in provinciam ire noluisti: non possum id in te reprehendere, quod in me ipso et praetore et consule probavi; sed tamen L. Murenæ provincia multas bonas gratias cum optima existimatione attulit. habuit proficiscens dilectum in Umbria: dedit ei facultatem res publica liberalitatis, qua usus multas sibi tribus, quae municipiis Umbriae conficiuntur, adiunxit; ipse autem in Gallia ut nostri homines desperatas iam pecunias exigerent acqutate diligentiaque perfecit. tu interea Romae scilicet amicis praesto fuisti; fateor: sed tamen illud cogita, non nullorum amicorum studia minui solere in eos, a quibus provincias contemni intellegunt.

21

43

Et quoniam ostendi, iudices, parem dignitatem ad consulatus petitionem, disparem fortunam provincialium negotiorum in Murena atque in Sulpicio fuisse, dicam iam apertius in quo meus necessarius fuerit inferior [Servius], et ea dicam vobis audientibus, amisso iam tempore, quae ipsi soli re integra saepe dixi: petere [consulatum] nescire te, Servi, persaepe tibi dixi; et in eis rebus ipsis, quas te magno et forti animo [et] agere [et dicere] videbam, tibi solitus sum dicere magis te fortem senatorem mihi videri quam sapientem candidatum. primum accusandi terrores et minae, quibus tu cotidie uti solebas, sunt fortis viri, sed et populi opinionem a spe adipiscendi avertunt et amicorum studia debilitant. nescio quo pacto semper hoc fit, neque in uno aut altero animadversum est, sed iam in pluribus: simul atque candidatus accusationem meditari visus est, ut honorem desperasse  
41 videatur. quid ergo? acceptam iniuriam persequi non placet? immo vehementer placet, sed aliud tempus est petendi, aliud persequendi. petitem ego, praesertim consulatus, magna spe, magno animo, magnis copiis et in forum et in campum deduci volo; non placet mihi inquisitio candidati, praenuntia repulsae, non testium potius quam suffragatorum comparatio, non minae magis quam blanditiae, non declamatio potius quam persalutatio, praesertim cum iam hoc novo more omnes fere domos omnium concursent et ex vultu candidatorum coniecturam faciant quantum quisque animi et facultatis habere videatur.

‘videsne tu illum tristem, demissum? iacet, diffidit, abiecit hastas.’ serpit hic rumor: ‘scis tu illum accusationem cogitare, inquirere in competitores, testis quaerere? alium faciam, quoniam sibi hic ipse desperat.’ eius modi *de candidato rumore* amici intimi debilitantur, studia deponunt; aut molestiam omnem abiciunt aut suam operam et gratiam iudicio et accusationi reservant. accedit eodem, ut etiam ipse candidatus totum animum atque omnem curam, operam diligentiamque suam in petitione non possit ponere; adiungitur enim accusationis cogitatio, non parva res, sed nimirum omnium maxima; magnum est enim te comparare ea, quibus possis hominem e civitate, praesertim non inopem neque infirmum, exturbare, qui et per se et per suos et vero etiam per alienos defendatur; omnes enim ad pericula propulsanda concurrimus et qui non aperte inimici sumus, etiam alienissimis in capitis periculis amicissimorum officia et studia praestamus. qua re ego expertus et petendi et defendendi et accusandi molestiam sic intellexi: in petendo studium esse acerrimum, in defendendo officium, in accusando laborem. itaque sic statuo, fieri nullo modo posse ut idem accusationem et petitionem [consulatus] diligenter adornet atque instruat; unum sustinere pauci possunt, utrumque nemo. tu, cum [te] de curriculo petitionis deflexisses animumque ad accusandum transtulisses, existimasti te utrique negotio satis facere posse? vehementer errasti: quis enim dies fuit, postea quam in istam accusandi denuntiationem ingressus es, quem tu non totum in ista ratione consumpseris? legem ambitus flagitasti, quae tibi non deerat; erat enim severissime scripta Calpurnia: gestus est mos et voluntati et dignitati tuae. sed tota illa lex accusationem tuam, si haberes nocentem reum, fortasse armasset; petitioni vero refragata est. poena gravior in plebem tua voce efflagitata est: commoti animi tenuiorum; exsilium in nostrum ordinem: concessit senatus postulationi tuae, sed non libenter duriorum fortunae communi condicionem te auctore constituit; morbi excusationi poena addita est: voluntas offensa multorum, quibus aut contra valetudinis commodum laborandum est aut incommodo morbi etiam ceteri vitae fructus relin-

quendi. quid ergo? haec quis tulit? is, qui auctoritati senatus, voluntati tuae paruit, denique is tulit, cui minime proderant. illa, quae mea summa voluntate senatus frequens repudiavit, mediocriter adversata tibi esse existimas? confusionem suffragiorum flagitasti, perrogationem legis Maniliae, aequationem gratiae, dignitatis, suffragiorum: graviter homines honesti atque in suis civitatibus et municipiis gratiosi tulerunt, a tali viro esse pugnatum, ut omnes et dignitatis et gratiae gradus tollerentur. idem editicios iudices esse voluisti, ut odia [occulta] civium, quae tacitis nunc discordiis continentur, in fortunas  
 48 optimi cuiusque erumperent. haec omnia tibi accusandi viam muniebant, adipiscendi obsaepebant.

Atque ex omnibus illa plaga est iniecta petitioni tuae, non tacente me, maxima; de qua ab homine ingeniosissimo et copiosissimo, Hortensio, multa gravissime dicta sunt; — quo etiam mihi durior locus est dicendi datus, ut, cum ante me et ille dixisset et vir summa dignitate et diligentia et facultate dicendi, M. Crassus, ego in extremo non partem aliquam agerem causae, sed de tota re dicerem, quod mihi videretur; itaque in eisdem rebus fere versor, et, quoad possum, iudices, occurro vestrae  
 24 satietati. — sed tamen, Servi, quam te securim putas iniectisse petitioni tuae, cum populum Romanum in eum metum adduxisti, ut pertimesceret ne consul Catilina fieret, dum tu accusationem comparas deposita atque ab-  
 49 iecta petitione? etenim te inquirere videbant, tristem ipsum, maestos amicos, observationes, testificationes, seductiones testium, secessionem subscriptorum animadvertiebant, quibus rebus certe ipsi † candidatorum obscuriores videri solent, Catilinam interea alacrem atque laetum, stipatum choro iuventutis, vallatum indicibus atque sicariis, inflatum cum spe militum tum conlegae mei, quem ad modum dicebat ipse, promissis, circumfluentem colonorum Arretinorum et Faesulanorum exercitu, quam turbam dissimillimo ex genere distinguebant homines percussi Sullani temporis calamitate; voltus erat ipsius plenus furoris, oculi sceleris, sermo adrogantiae, sic ut ei iam exploratus et domi conditus consulatus videretur. Murenam contemnebat; Sulpicium accusatorem suum numera-

bat, non competitorem; ei vim denuntiabat, rei publicae minabatur. quibus rebus qui timor bonis omnibus in-<sup>25</sup>  
 iectus sit quantaque desperatio rei publicae, si ille factus<sup>50</sup>  
 esset, nolite a me commoneri velle: vosmet ipsi vobiscum recordamini. meministis enim, cum illius nefarii gladiatoris voces percrebruissent, quas habuisse in contione domestica dicebatur, cum miserorum fidelem defensorem negasset inveniri posse, nisi eum, qui ipse miser esset; integrorum et fortunatorum promissis saucios et miseros credere non oportere: qua re qui consumpta replere, erepta recuperare vellent, spectarent quid ipse deberet, quid possideret, quid auderet: minime timidum et valde calamitosum esse oportere eum, qui esset futurus dux et signifer calamitosorum — tum igitur, his rebus auditis, <sup>51</sup>  
 meministis fieri senatus consultum referente me, ne postero die comitia haberentur, ut de his rebus in senatu agere possemus. itaque postridie frequenti senatu Catilinam excitavi atque eum de his rebus iussi si quid vellet, quae ad me adlatae essent, dicere. atque ille, ut semper fuit apertissimus, non se purgavit, sed indicavit atque induit: tum enim dixit duo corpora esse rei publicae, unum debile, infirmo capite; alterum firmum, sine capite: huic, si ita de se meritum esset, caput se vivo non defuturum. congemuit senatus frequens neque tamen satis severe pro rei indignitate decrevit; nam partim ideo fortes in decernendo non erant, quia nihil timebant, partim, quia timebant: [tum] erupit e senatu triumphans gaudio, quem omnino vivum illinc exire non oportuerat; praesertim cum idem ille in eodem ordine paucis diebus ante Catoni, fortissimo viro, iudicium minitanti ac denuntianti respondisset, si quod esset in suas fortunas incendium excitatum, id se non aqua, sed ruina exstincturum. his tum rebus commotus, et quod homines iam <sup>26</sup>  
 tum coniuratos cum gladiis in campum deduci a Catilina<sup>52</sup>  
 sciebam, descendi [in campum] cum firmissimo praesidio fortissimorum virorum et cum illa lata insignique lorica, non quae me tegeret, — etenim sciebam Catilinam non latus aut ventrem, sed caput et collum solere petere —, verum ut omnes boni animadverterent, et, cum in metu et periculo consulem viderent, id quod est factum, ad



opem praesidiumque concurrerent. itaque cum te, Servi, remissiore in petendo putarent, Catilinam et spe et cupiditate inflammatum viderent, omnes, qui illam a re publica pestem depellere cupiebant, ad Murenam se statim contulerunt. magna est autem comitiis consularibus repentina voluntatum inclinatio, praesertim cum incubuit ad virum bonum et multis aliis adiumentis petitionis ornatum; qui cum honestissimo patre atque maioribus, modestissima adulescentia, clarissima legatione, praetura probata in iure, grata in munere, ornata in provincia, petisset diligenter et ita petisset, ut neque minanti cederet neque cuiquam minaretur, huic mirandum est magno adiumento Catilinae subitam spem consulatus adipiscendi fuisse?

- 51 Nunc mihi tertius ille locus est reliquus orationis de ambitus criminibus, perpurgatus ab eis, qui ante me dixerunt, a me, quoniam ita Murena voluit, retractandus: quo in loco C. Postumo, familiari meo, ornatissimo viro, de divisorum indicibus et de deprehensis pecuniis, adulescenti ingenioso et bono, Ser. Sulpicio, de equitum centuriis, M. Catoni, homini in omni virtute excellenti, de ipsius accusatione, de senatus consulto, de re publica respon-
- 27 debo. sed pauca, quae meum animum repente moverunt,  
55 prius de L. Murenæ fortuna conquerar. nam cum saepe antea, iudices, et ex aliorum miseriis et ex meis curis laboribusque cotidianis fortunatos eos homines iudicarem, qui remoti a studiis ambitionis otium ac tranquillitatem vitae secuti sunt, tum vero in his L. Murenæ tantis tamque improvisis periculis ita sum animo adfectus, ut non queam satis neque communem omnium nostrum condicionem neque huius eventum fortunamque miserari: qui primum, dum ex honoribus continuis familiae maiorumque suorum unum ascendere gradum dignitatis conatus est, venit in periculum, ne et ea, quae ei relictæ, et hæc, quae ab ipso paratæ sunt, amittat, deinde, propter studium novae laudis, etiam in veteris fortunæ discrimen
- 56 adducitur. quae cum sint gravia, iudices, tum illud acerbissimum est, quod habet eos accusatores, non qui odio inimicitiarum ad accusandum, sed qui studio accusandi ad inimicitias descenderint. nam ut omittam Servium

Sulpicium, quem intellego non iniuria L. Murenæ, sed honoris contentione permotum, accusat paternus amicus, C. Postumus, vetus, ut ait ipse, vicinus ac necessarius, qui necessitudinis causas compluris protulit, similitatis nullam commemorare potuit; accusat Ser. Sulpicius, sodalis filius, cuius ingenio paterni omnes necessarii munitiores esse debebant; accusat M. Cato, qui cum a Murena nulla re umquam alienus fuit, tum ea condicione [nobis] erat in hac civitate natus, ut eius opes atque ingenium praesidio multis etiam alienis, exitio vix cuiquam inimico esse deberet. respondebo igitur Postumo primum, qui nescio quo pacto mihi videtur praetorius candidatus in consularem quasi desultorius in quadrigarum curriculum incurrere; cuius competitores si nihil deliquerunt, dignitati eorum concessit, cum petere destitit; sin autem eorum aliquis largitus est, expetendus amicus est qui alienam potius iniuriam quam suam persequatur.

DE POSTUMI CRIMINIBUS. DE SERVII ADULESCENTIS.

Venio nunc ad M. Catonem, quod est firmamentum ac robur totius accusationis; qui tamen ita gravis est accusator et vehemens, ut multo magis eius auctoritatem quam criminationem pertimescam; in quo ego accusatore, iudices, primum illud deprecor, ne quid L. Murenæ dignitas illius, ne quid exspectatio tribunatus, ne quid totius vitæ splendor et gravitas noceat, denique ne ea soli huic obsint bona M. Catonis, quæ ille adeptus est, ut multis prodesse possit. bis consul fuerat P. Africanus et duos terrores huius imperii, Karthaginem Numantiamque deleverat, cum accusavit L. Cottam. erat in eo summa eloquentia, summa fides, summa integritas, auctoritas tanta quanta in imperio populi Romani, quod illius opera tenebatur: sæpe hoc maiores natu dicere audiui, hanc accusatoris exiniam vim plurimum L. Cottæ profuisse. noluerunt sapientissimi homines, qui tum rem illam iudicabant, ita quemquam cadere in iudicio, ut nimis adversarii viribus abiectus videretur. quid, Ser. Galbam — nam traditum memoriae est — nonne proavo tuo, fortissimo atque florentissimo viro, M. Catoni incumbenti ad eius perniciem populus Romanus eripuit? semper in hac civitate nimis magnis accusatorum opibus

et populus universus et sapientes ac multum in posterum  
prospicientes iudices restiterunt. nolo accusator in iudi-  
cium potentiam adferat, non vim maiorem aliquam, non  
auctoritatem excellentem, non nimiam gratiam: valeant  
haec omnia ad salutem innocentium, ad opem impoten-  
tium, ad auxilium calamitosorum; in periculo vero et in  
60 perniciē civium repudientur. nam si quis hoc forte dicet,  
Catonem descensurum ad accusandum non fuisse, nisi  
prius de causa iudicasset, iniquam legem, iudices, et  
miseram condicionem instituet periculis hominum, si ex-  
istimabit iudicium accusatoris in reum pro aliquo prae-  
29 iudicio valere oportere. ego tuum consilium, Cato, propter  
singulare animi mei de tua virtute iudicium, vituperare  
non possum: non nulla forsitan in re conformare et levi-  
ter emendare possim. ‘non multa peccas’, inquit ille  
fortissimo viro senior magister, ‘sed peccas: te regere  
possum.’ at ego non te: verissime dixerim peccare te  
nihil neque ulla in re te esse huius modi, ut corrigendus  
potius quam leviter inflectendus esse videare; finxit enim  
te ipsa natura ad honestatem, gravitatem, temperantiam,  
magnitudinem animi, iustitiam, ad omnis denique virtutes  
magnum hominem et excelsum. accessit istuc doctrina  
non moderata nec mitis, sed, ut mihi videtur, paulo  
asperior et durior quam aut veritas aut natura patitur.  
61 et quoniam non est nobis haec oratio habenda aut apud  
imperitam multitudinem aut in aliquo conventu agrestium,  
audacius paulo de studiis humanitatis, quae et mihi et  
vobis nota et iucunda sunt, disputabo. in M. Catone,  
iudices, haec bona quae videmus divina et egregia, ipsius  
scitote esse propria: quae non numquam requirimus, ea  
sunt omnia non a natura, verum a magistro. fuit enim  
quidam summo ingenio vir, Zeno, cuius inventorum  
aemuli Stoici nominantur: huius sententiae sunt et prae-  
cepta huius modi: sapientem gratia numquam moveri,  
numquam cuiusquam delicto ignoscere; neminem miseri-  
cordem esse nisi stultum et levem; viri non esse neque  
exorari neque placari; solos sapientis esse, si distortis-  
simi sint, formosos; si mendicissimi, divites; si servitu-  
tem serviant, reges; nos autem, qui sapientes non sumus,  
fugitivos, exsules, hostis, insanos denique [esse dicunt];

omnia peccata esse paria; omne delictum scelus esse nefarium nec minus delinquere eum, qui gallum gallinaeceum, cum opus non fuerit, quam eum, qui patrem suffocaverit; sapientem nihil opinari, nullius rei paenitere, nulla in re falli, sententiam mutare numquam. haec homo ingeniosissimus, M. Cato, auctoribus eruditissimis inductus adripuit, neque disputandi causa, ut magna pars, sed ita vivendi. petunt aliquid publicani: cave quicquam habeat momenti gratia. supplices aliqui veniunt miseri et calamitosi: sceleratus et nefarius fueris, si quicquam misericordia adductus feceris. fatetur aliquis se peccasse et eius delicti veniam petit: nefarium est facinus ignoscere. at leve delictum est: omnia peccata sunt paria. dixisti quippiam: fixum et statutum est. non re ductus es, sed opinione: sapiens nihil opinatur. errasti aliqua in re: maledici putat. hac ex disciplina nobis illa sunt: 'dixi in senatu me nomen consularis candidati delaturum.' 'iratus dixisti.' 'numquam' inquit 'sapiens irascitur.' 'at temporis causa.' 'improbi' inquit 'hominis est mendacio fallere; mutare sententiam turpe est; exorari scelus, misereri flagitium.' nostri autem illi, — fateor enim, Cato, me quoque in adolescentia diffisum ingenio meo quaesisse adiumenta doctrinae — nostri, inquam, illi a Platone et Aristotele, moderati homines et temperati, aiunt apud sapientem valere aliquando gratiam; viri boni esse misereri; distincta genera esse delictorum et disparis poenas; esse apud hominem constantem ignoscendi locum; ipsum sapientem saepe aliquid opinari quod nesciat; irasci non numquam; exorari eundem et placari; quod dixerit, interdum, si ita rectius sit, mutare; de sententia decedere aliquando; omnis virtutes mediocritate quadam esse moderatas. hos ad magistros si qua te fortuna, Cato, cum ista natura detulisset, non tu quidem vir melior esses nec fortior nec temperantior nec iustior — neque enim esse potes, — sed paulo ad lenitatem propensior: non accusares nullis adductus inimiciis, nulla lacessitus iniuria, pudentissimum hominem, summa dignitate atque honestate praeditum; putares, cum in eiusdem anni custodia te atque L. Murenam fortuna posuisset, aliquo te cum hoc rei publicae vinculo

30  
62

63

31  
64



esse coniunctum; quod atrociter in senatu dixisti, [aut non dixisses] aut seposuisses aut mitiorem in partem interpretarere. ac te ipsum, quantum ego opinione auguror, nunc et animi quodam impetu concitatum et vi naturae atque ingenii elatum et recentibus praeceptorum studiis flagrantem iam usus flectet, dies leniet, aetas mitigabit. etenim isti ipsi mihi videntur vestri praeceptores et virtutis magistri finis officiorum paulo longius quam natura vellet protulisse, ut, cum ad ultimum animo contendissemus, ibi tamen, ubi oporteret, consisteremus. ‘nihil ignoveris.’ immo aliquid, non omnia. ‘nihil omnino gratiae concesseris.’ immo insistito, cum officium et fides postulabit. ‘misericordia commotus ne sis.’ etiam, dissolvenda severitate, sed tamen est laus aliqua humanitatis. ‘in sententia permaneto.’ vero, nisi sententiam  
 65 sententia alia vicerit melior. huiusce modi Scipio ille fuit, quem non paenitebat facere idem, quod tu: habere eruditissimum hominem Panaetium domi; cuius oratione et praeceptis, quamquam erant eadem ista, quae te delectant, tamen asperior non est factus, sed, ut accepi a senibus, lenissimus. quis vero C. Laelio comior? quis iucundior eodem ex studio isto, quis illo gravior, sapientior? possum de L. Philo, de C. Gallo dicere haec eadem, sed te domum iam deducam tuam: quemquamne existimas Catone proavo tuo commodiorem, communior-  
 66 rem, moderatiorem fuisse ad omnem rationem humanitatis? de cuius praestanti virtute cum vere graviterque diceres, domesticum te habere dixisti exemplum ad imitandum: est illud quidem exemplum tibi propositum domi, sed tamen naturae similitudo illius ad te magis, qui ab illo ortus es, quam ad unum quemque nostrum pervenire potuit, ad imitandum vero tam mihi propositum exemplar illud est quam tibi. sed si illius comitatem et facilitatem  
 32  
 67 tuae gravitati severitatique asperseris, non ista quidem erunt meliora, quae nunc sunt optima, sed certe condita iucundius. qua re ut ad id, quod institui, revertar, tolle mihi e causa nomen Catonis; remove [praetermitte] auctoritatem, quae in iudiciis aut nihil valere aut ad salutem debet valere; congregare mecum criminibus ipsis. quid accusas, Cato? quid adfers ad iudicium? quid ar-

guis? ambitum accusas: non defendo. me reprehendis, quod idem defendam, quod lege punierim: punivi ambitum, non innocentiam; ambitum vero ipsum vel tecum accusabo, si voles. dixisti senatus consultum me referente esse factum: si mercede [conducti] obviam candidatis issent, si conducti sectarentur, si gladiatoribus [volgo] locus tributim et item prandia si volgo essent data, contra legem Calpurniam factum videri. ergo ita senatus si iudicat, contra legem facta haec videri, si facta sint, decernit quod nihil opus est, dum candidatis morem gerit; nam factum sit neene vehementer quaeritur; si factum est, quin contra legem sit, dubitare nemo potest. est igitur ridiculum, quod est dubium, id re-<sup>68</sup>linquere incertum; quod nemini dubium potest esse, id iudicare. atque id decernitur omnibus postulantibus candidatis; ut ex senatus consulto neque cuius intersit neque contra quem sit intellegi possit. qua re doce a L. Murena illa esse commissa: tum egomet tibi contra legem commissa esse concedam. ‘multi obviam prodierunt de 33 provincia decedenti’ [consulatum petenti]. [solet fieri:] eccui autem non proditur [revertenti]? ‘quae fuit ista multitudo?’ primum, si tibi istam rationem non possim reddere, quid habet admirationis tali viro advenienti, candidato consulari, obviam prodisse multos? quod nisi esset factum, magis mirandum videretur. quid, si etiam<sup>69</sup> illud addam, quod a consuetudine non abhorret, rogatos esse multos, num aut criminosum est aut mirandum, qua in civitate rogati infimorum hominum filios prope de nocte ex ultima saepe urbe deductum venire soleamus, in ea non esse gravatos homines prodire hora tertia in campum Martium, praesertim talis viri nomine rogatos? quid, si omnes societates venerunt, quarum ex numero multi sedent iudices? quid, si multi homines nostri ordinis honestissimi? quid, si illa officiosissima, quae neminem patitur non honeste in urbem introire, tota natio candidatorum? si denique ipse accusator noster Postumus obviam cum bene magna caterva sua venit, quid habet ista multitudo admirationis? omitto clientis, vicinos, tribulis, exercitum totum Luculli, qui ad triumphum per eos dies venerat: hoc dico, frequentiam in isto officio

gratuitam non modo dignitati ullius umquam, sed ne  
70 voluntati quidem defuisse. 'at sectabantur multi.' doce  
mercede: concedam esse crimen: hoc quidem remoto,  
34 quid reprehendis? 'quid opus est' inquit 'sectatoribus?'  
a me tu id quaeris, quid opus sit eo, quo semper usu  
sumus? homines tenues unum habent in nostrum ordi-  
nem aut promerendi aut referendi beneficii locum hanc  
in nostris petitionibus operam atque adsestationem; ne-  
que enim fieri potest neque postulandum est a nobis aut  
ab equitibus Romanis, ut suos necessarios [candidatos]  
adsectentur totos dies: a quibus si domus nostra celebra-  
tur, si interdum ad forum deducimur, si uno basilicae  
spatio honestamur, diligenter observari videmur et coli:  
tenuiorum et non occupatorum amicorum est ista ad-  
siduitas, quorum copia bonis viris et beneficiis deesse  
71 non solet. noli igitur eripere hunc inferiori generi homi-  
num fructum officii, Cato; sine eos, qui omnia a nobis  
sperant, habere ipsos quoque aliquid quod nobis tribuere  
possint. si nihil erit praeter ipsorum suffragium, tenue  
est; [si] ut suffragentur, nihil valent gratia ipsi; deni-  
que, ut solent loqui, non dicere pro nobis, non spondere,  
non vocare domum suam possunt: atque haec a nobis  
petunt omnia, neque ulla re alia, quae a nobis conse-  
quuntur, nisi *haec* opera sua compensari putant posse; ita-  
que et legi Fabiae, [quae est de numero sectatorum,] et  
senatus consulto, quod est L. Caesare \* consule factum,  
restiterunt; nulla est enim poena quae possit observan-  
tiam tenuiorum ab hoc vetere instituto officiorum exclu-  
72 dere. 'at spectacula sunt tributim data et ad prandium  
volgo vocati.' etsi hoc factum a Murena omnino, iudices,  
non est, ab eius amicis autem more et modo factum est,  
tamen admonitus re ipsa recordor quantum hae conque-  
stiones in senatu habitae punctorum nobis, Servi, de-  
traxerint. quod enim tempus fuit aut nostra aut patrum  
nostrorum memoria quo haec, sive ambitio est sive libe-  
ralitas, non fuerit, ut locus et in circo et in foro daretur  
amicis et tribulibus? [haec homines tenuiores a suis tri-  
35 73 bulibus vetere instituto adsequebantur] \* \* \* praefectum  
fabrum semel locum tribulibus suis dedisse: quid statuent  
in viros primarios, qui in circo totas tabernas tribulium

causa compararunt? haec omnia sectatorum, spectaculorum, prandiorum [item] crimina a multitudine in tuam nimiam diligentiam, Servi, coniecta sunt; in quibus tamen Murena [a] senatus auctoritate defenditur. quid enim? senatus num obviam prodire crimen putat? ‘non, sed mercede;’ convince. num sectari multos? ‘non, sed conductos;’ doce. num locum ad spectandum dare aut ad prandium invitare? ‘minime, sed volgo.’ quid est ‘volgo?’ ‘universos.’ non igitur, si L. Natta, summo loco adulescens, qui et quo animo iam sit et qualis vir futurus sit videmus, in equitum centuriis voluit esse et ad hoc officium necessitudinis et ad reliquum tempus graciosus, id erit eius vitrico fraudi aut crimini, nec, si virgo Vestalis, huius propinqua et necessaria, locum suum gladiatorium concessit huic, non et illa pie fecit et hic a culpa est remotus. omnia haec sunt officia necessariorum, commoda tenuiorum, munia candidatorum.

At enim agit mecum austere et Stoice Cato: negat <sup>74</sup> verum esse adlici benevolentiam cibo; negat iudicium hominum in magistratibus mandandis corrumpi voluptatibus oportere. ergo ad cenam petitionis causa si quis vocat, condemnnetur. ‘quippe’ inquit ‘tu mihi summum imperium, summam auctoritatem, tu gubernacula rei publicae petas fovendis hominum sensibus et deleniendis animis et adhibendis voluptatibus? utrum lenocinium’ inquit ‘a grege delicatae iuventutis an orbis terrarum imperium a populo Romano petebas?’ horribilis oratio: sed eam usus, vita, mores, civitas ipsa respuit. neque tamen Lacedaemonii, auctores istius vitae atque orationis, qui cotidianis epulis in robore accumbunt, neque vero Cretes, quorum nemo gustavit umquam cubans, melius quam Romani homines, qui tempora voluptatis laborisque dissipant, res publicas suas retinuerunt; quorum alteri uno adventu nostri exercitus deleti sunt, alteri nostri imperii praesidio disciplinam suam legesque conservant. qua re <sup>36</sup> noli, Cato, maiorum instituta, quae res ipsa, quae diuturnitas imperii comprobant, nimium severa oratione reprehendere. fuit eodem ex studio vir eruditus apud patres nostros et honestus homo et nobilis, Q. Tubero. is, <sup>75</sup> cum epulum Q. Maximus P. Africani patrum sui nomine



populo Romano daret, rogatus est a Maximo, ut triclinium sterneret, cum esset Tubero eiusdem Africani sororis filius. atque ille, homo eruditissimus ac Stoicus, stravit pelliculis haedinis lectulos Punicanos et exposuit vasa Samia, quasi vero esset Diogenes Cynicus mortuus et non divini hominis Africani mors honestaretur; quem cum supremo eius die Maximus laudaret, gratias egit dis immortalibus, quod ille vir in hac re publica potissimum natus esset; necesse enim fuisse ibi esse terrarum imperium, ubi ille esset. huius in morte celebranda graviter tulit populus Romanus hanc perversam sapientiam

76 Tuberonis; itaque homo integerrimus, civis optimus, cum esset L. Pauli nepos, P. Africani, ut dixi, sororis filius, his haedinis pelliculis praectura deiectus est. odit populus Romanus privatam luxuriam, publicam magnificentiam diligit; non amat profusas epulas, sordis et inhumanitatem multo minus; distinguit rationem officiorum ac temporum, vicissitudinem laboris ac voluptatis. nam quod ais nulla re adlici hominum mentis oportere ad magistratum mandandum nisi dignitate, hoc tu ipse, in quo summa est dignitas, non servas: cur enim quemquam, ut studeat tibi, ut te adiuvet, rogas? rogas tu me, ut mihi praesis, ut committam ego me tibi? quid tandem ais? num me rogari oportet abs te an te potius a me, ut pro mea salute laborem periculumque

77 suscipias? quid? quod habes nomenclatorem? in eo quidem fallis et decipis: nam si nomine appellari abs te civis tuos honestum est, turpe est eos notiores esse servo tuo quam tibi; sin, etiam si noris, tamen per monitorem appellandi sunt, cur nomen petis quasi incertum sit? quid? quod cum admoneris, tamen, quasi tute noris, ita salutas? quod, postea quam es designatus, multo salutas negligentius? haec omnia ad rationem civitatis si dirigas, recta sunt; sin perpendere ad disciplinae praecepta velis, reperiantur pravissima. qua re nec plebi Romanae eripiendi fructus isti sunt ludorum, gladiatorum, conviviorum, quae omnia maiores nostri comprobaverunt, nec candidatis ista benignitas adimenda est, quae liberalitatem magis significat quam largitionem.

37  
78 At enim te ad accusandum res publica adduxit. credo,

Cato, te isto animo atque ea opinione venisse; sed tu imprudentia laberis. ego quod facio, iudices, cum amicitiae dignitatisque L. Murenæ gratia facio, tum me pacis, otii, concordiae, libertatis, salutis, vitae denique omnium nostrum causa facere clamo atque testor. audite, audite consulem, iudices, nihil dicam adrogantius, tantum dicam, totos dies atque noctis de re publica cogitantem! non usque eo L. Catilina rem publicam despexit atque contempsit, ut ea copia, quam secum eduxit, se hanc civitatem oppressurum arbitraretur: latius patet illius sceleris contagio, quam quisquam putat; ad pluris pertinet: intus, intus, inquam, est equus Troianus; a quo nunquam me consule dormientes opprimemini. quaeris <sup>79</sup> a me, quid ego Catilinam metuam: nihil, et curavi ne quis metueret, sed copias illius, quas hic video, dico esse metuendas; nec tam timendus est nunc exercitus L. Catilinae quam isti, qui illum exercitum deseruisse dicuntur; non enim deseruerunt, sed ab illo in speculis atque insidiis relictis in capite atque in cervicibus nostris restiterunt: hi et integrum consulem et bonum imperatorem et natura et fortuna cum rei publicae salute coniunctum deici de urbis praesidio et de custodia civitatis vestris sententiis deturbari volunt. quorum ego ferrum et audaciam reieci in campo, debilitavi in foro, compressi etiam domi meae saepe, iudices, his vos si alterum consulem tradideritis, plus multo erunt vestris sententiis quam suis gladiis consecuti. magni interest, iudices, id quod ego multis repugnantibus egi atque perfeci, esse Kalendis Ianuariis in re publica duos consules. nolite arbitrari, <sup>80</sup> mediocribus consiliis aut usitatis viis aut \* \*. non lex improba, non perniciose largitio, non auditum aliquando aliquod malum rei publicae quaeritur: inita sunt in hac civitate consilia, iudices, urbis delendae, civium trucidandorum, nominis Romani extinguendi; atque haec cives, cives, inquam, si eos hoc nomine appellari fas est, de patria sua et cogitant et cogitaverunt; horum ego cotidie consiliis occurro, audaciam debilito, sceleri resisto: sed moneo, iudices: in exitu iam est meus consulatus; nolite mihi subtrahere vicarium meae diligentiae; nolite adimere eum, cui rem publicam cupio tradere inco-

<sup>38</sup> lumem, ab his tantis periculis defendendam. atque ad  
<sup>81</sup> haec mala, iudices, quod accedat aliud non videtis? te,  
 te appello, Cato: nonne prospicis tempestatem anni tui?  
 iam enim hesternae contione intonuit vox perniciose de-  
 signati tribuni, conlegae tui; contra quem multum tua  
 mens, multum omnes boni providerunt, qui te ad tribu-  
 natus petitionem vocaverunt. omnia, quae per hoc trien-  
 nium agitata sunt, iam ab eo tempore, quo a L. Catilina  
 et Cn. Pisone initum consilium senatus interficiendi scitis  
 esse, in hos dies, in hos mensis, in hoc tempus crum-  
<sup>82</sup> punt. qui locus est, iudices, quod tempus, qui dies, quae  
 nox, cum ego non ex istorum insidiis ac mucronibus non  
 solum meo, sed multo etiam magis divino consilio eripiar  
 atque evolem? neque isti me meo nomine interfici, sed  
 vigilantem consulem de rei publicae praesidio demovere  
 volunt; nec minus vellent, Cato, te quoque aliqua ra-  
 tione, si possent, tollere, id quod, mihi crede, et agunt  
 et moliantur. vident quantum in te sit animi, quantum  
 ingenii, quantum auctoritatis, quantum rei publicae prae-  
 sidii: sed cum consulari auctoritate et auxilio spoliata  
 vim tribuniciam viderint, tum se facilius inermem et de-  
 bilitatum te oppressuros arbitrantur. nam ne sufficiatur  
 consul non timent; vident in tuorum potestate conlega-  
 rum fore; sperant sibi Silanum, clarum virum, sine con-  
 lega, te sine consule, rem publicam sine praesidio obici  
<sup>83</sup> posse. his tantis in rebus tantisque in periculis est tuum,  
 M. Cato, qui mihi non tibi, sed patriae natus esse *videris*,  
 videre quid agatur, retinere adiutorem, defensorem, so-  
 cium in re publica, consulem non cupidum, consulem,  
 quod maxime tempus hoc postulat, fortuna constitutum  
 ad amplexandum otium, scientia ad bellum gerendum,  
 animo et usu ad quod velis negotium.

<sup>39</sup> Quamquam huiusce rei potestas omnis in vobis sita  
 est, iudices; totam rem publicam vos in hac causa tene-  
 tis, vos gubernatis. si L. Catilina cum suo consilio ne-  
 fariorum hominum, quos secum eduxit, hac de re posset  
 iudicare, condemnaret L. Murenam; si interficere posset,  
 occideret; petunt enim rationes illius, ut orbetur auxilio  
 res publica, ut minuatur contra suum furorem imperato-  
 rum copia, ut maior facultas tribunis plebis detur depulso

adversario seditionis ac discordiae concitandae. idemne igitur delecti amplissimis ex ordinibus honestissimi atque sapientissimi viri iudicabunt, quod ille importunissimus gladiator, hostis rei publicae iudicaret? mihi credite, iu-<sup>84</sup> dices, in hac causa non solum de L. Murenæ, verum etiam de vestra salute sententiam feretis: in discrimen extremum venimus; nihil est iam unde nos reficiamus aut ubi lapsi resistamus. non solum minuenda non sunt auxilia, quae habemus, sed etiam nova, si fieri possit, comparanda. hostis est enim non apud Anienem, quod bello Punico gravissimum visum est, sed in urbe, in foro — di immortales! sine gemitu hoc dici non potest —; non nemo etiam in illo sacrario rei publicae, in ipsa, inquam, curia non nemo hostis est. di faxint ut meus collega, vir fortissimus, hoc Catilinæ nefarium latrocinium armatus opprimat, ego togatus, vobis bonisque omnibus adiutoribus, hoc, quod conceptum res publica periculum parturit, consilio discutiam et comprimam! sed quid tan-<sup>85</sup> dem fiet, si haec elapsa de manibus nostris in eum annum, qui consequitur, redundarint? unus erit consul et is non in administrando bello, sed in sufficiendo collega occupatus; hunc iam qui impedituri sint, \* \* illa pestis immanis, importuna [Catilinæ] prorumpet, qua poterit, et iam minatur; in agros suburbanos repente advolabit; versabitur in rostris furor, in curia timor, in foro coniuratio, in campo exercitus, in agris vastitas; omni autem in sede ac loco ferrum flammamque metuemus, quae iam diu comparantur: eadem ista omnia, si ornata suis praesidiis erit res publica, facile et magistratum consiliis et privatorum diligentia comprimentur. quae cum ita sint, iudices, primum rei publicae causa,<sup>40</sup> qua nulla res cuiquam potior debet esse, vos pro mea<sup>86</sup> summa et vobis cognita in re publica diligentia, moneo, pro auctoritate consulari hortor, pro magnitudine periculi obtestor, ut otio, ut paci, ut saluti, ut vitae vestrae et ceterorum civium consulatis; deinde ego idem vos defensoris et amici officio adductus oro atque obsecro, iudices, ut ne hominis miseri et cum corporis morbo tum animi dolore confecti, L. Murenæ, recentem gratulationem nova lamentatione obruatis. modo maximo beneficio po-



puli Romani ornatus fortunatus videbatur, quod primus in familiam veterem, primus in municipium antiquissimum consulatum attulisset: nunc idem squalore et sordibus confectus, lacrimis ac macerore perditus, vester est supplex, iudices, vestram fidem obtestatur, *vestram* misericordiam implorat, vestram potestatem ac vestras opes  
87 intuetur. nolite, per deos immortalis! iudices, hoc eum cum honore, quo se honestiorem fore putavit, etiam ceteris ante partis honestatibus atque omni dignitate fortunaque privare. atque ita vos L. Murena, iudices, orat atque obsecrat, si iniuste neminem laesit, si nullius auris voluntatemve violavit, si nemini, ut levissime dicam, odio nec domi nec militiae fuit, sit apud vos modestiae locus, sit demisso animo perflugium, sit auxilium pudori. misericordiam spoliatio consulatus magnam habere debet, iudices; una enim eripiuntur cum consulatu omnia: invidiam vero his temporibus habere consulatus ipse nullam potest; obicitur enim contionibus seditiosorum, insidiis coniuratorum, telis Catilinae; ad omne denique periculum atque ad omnem invidiam solus oppo-  
88 nitur. qua re quid invidendum Murenæ aut cuiquam nostrum sit in hoc præclaro consulatu non video, iudices. quæ vero miseranda sunt, ea et mihi ante oculos ver-  
41 santur et vos videre et perspicere potestis. si, quod Iuppiter omen avertat! hunc vestris sententiis afflixeritis, quo se miser vertet? domumne? ut eam imaginem clarissimi viri, parentis sui, quam paucis ante diebus laureatam in sua gratulatione conspexit, eandem deformatam ignominia lugentemque videat? an ad matrem, quæ misera modo consulem osculata filium suum, nunc cruciatur et sollicita est ne eundem paulo post spoliatum  
89 omni dignitate conspiciat? sed quid eius matrem aut domum appello, quem nova poena legis et domo et parente et omnium suorum consuetudine conspectuque privatus? ibit igitur in exsilium miser? quo? ad orientisne partis, in quibus annos multos legatus fuit, exercitus duxit, res maximas gessit? at habet magnum dolorem, unde cum honore decesseris, eodem cum ignominia reverti. an se in contrariam partem terrarum abdet, ut Gallia Transalpina, quem nuper summo cum imperio

libentissime viderit, eundem lugentem, maerentem, exsulem videat? in ea porro provincia quo animo C. Murenam fratrem suum aspiciet? qui huius dolor! qui illius maeror erit! quae utriusque lamentatio! quanta autem perturbatio fortunae atque sermonis, quom, quibus in locis paucis ante diebus factum esse consulem Murenam nuntii litteraeque celebrarant, et unde hospites et amici gratulatum Romam concurrerant, repente existet ipse nuntius suae calamitatis! quae si acerba, si misera, si <sup>90</sup> luctuosa sunt, si alienissima a mansuetudine et misericordia vestra, iudices, conservate populi Romani beneficium; reddite rei publicae consulem; date hoc ipsius pudori, date patri mortuo, date generi et familiae, date etiam Lanuvio, municipio honestissimo, quod in hac tota causa frequens maestumque vidistis; nolite a sacris patriis Iunonis Sospitae, cui omnis consules facere necesse est, domesticum et suum consulem potissimum avellere. quem ego vobis, si quid habet aut momenti commendatio aut auctoritatis confirmatio mea, consul consulem, iudices, ita commendo, ut cupidissimum otii, studiosissimum bonorum, acerrimum contra seditionem, fortissimum in bello, inimicissimum huic coniurationi, quae nunc rem publicam labefactat, futurum esse promittam et spondeam.

---

M. TULLII CICERONIS  
PRO L. FLACCO ORATIO.

- <sup>1</sup> Cum in maximis periculis huius urbis atque imperii,  
<sup>1</sup> gravissimo atque acerbissimo rei publicae casu, socio atque adiutore consiliorum periculorumque meorum, L. Flacco, caedem a vobis, coniugibus, liberis vestris, vastitatem a templis, delubris, urbe, Italia depellebam, sperabam, iudices, honoris potius L. Flacci me adiutorem futurum quam miseriarum deprecatorem; quod enim esset praemium dignitatis, quod populus Romanus cum huius maioribus semper detulisset, huic denegaret, cum L. Flaccus veterem Valeriae gentis in liberanda patria laudem prope quingentesimo anno rei publicae rettulisset?
- <sup>2</sup> sed si forte aliquando aut beneficii huius obtrectator aut virtutis hostis aut laudis invidus exstisset, existimabam L. Flacco multitudinis potius imperitae nullo tamen cum periculo quam sapientissimorum et lectissimorum virorum iudicium esse subeundum. etenim quibus auctoribus et defensoribus omnium tum salus esset non civium solum, verum etiam gentium defensa ac retenta, neminem umquam putavi per eos ipsos periculum huius fortunae atque insidias creaturum: quod si esset aliquando futurum, ut aliquis de L. Flacci perniciē cogitaret, numquam tamen existimavi, iudices, D. Laelium, optimi viri filium, optima ipsum spe praeditum summae dignitatis, iam suscepturum accusationem, quae sceleratorum civium potius odio et furori quam ipsius virtuti atque \* institutae adolescentiae conveniret. etenim cum a clarissimis viris *veteres et* iustissimas inimicitias saepe cum bene meritis civibus depositas esse vidissem, non sum arbitratus quemquam amicum rei publicae, postea quam L. Flacci amor in patriam perspectus esset, novas huic inimicitias nulla
- <sup>3</sup> accepta iniuria denuntiaturum. sed quoniam, iudices, multa nos et in nostris rebus et in re publica fefellerunt,

ferimus ea, quae sunt ferenda: tantum a vobis petimus, ut omnia rei publicae subsidia, totum statum civitatis, omnem memoriam temporum praeteritorum, salutem praesentium, spem reliquorum in vestra potestate, in vestris sententiis, in hoc uno iudicio positam esse et defixam putetis. si umquam res publica consilium, gravitatem, sapientiam [providentiam] iudicum imploravit, hoc, hoc, inquam, tempore implorat. non estis de Ly-<sup>2</sup> dorum aut Mysorum aut Phrygum, qui huc compulsi concitatique venerunt, sed de vestra re publica iudicaturi, de civitatis statu, de communi salute, de spe bonorum omnium, si qua reliqua est etiam nunc quae fortium civium mentis cogitationesque sustentet: omnia alia per-  
fugia bonorum, praesidia innocentium, subsidia rei publicae, consilia, auxilia, iura ceciderunt. quem enim appel-<sup>4</sup> lem? quem obtester? quem implorem? senatumne? at is ipse auxilium petit a vobis et confirmationem auctoritatis suae vestrae potestati permissam esse sentit. an equites Romanos? iudicabitis principes eius ordinis quinquaginta quid cum omnibus senseritis. an populum Romanum? at is quidem omnem suam de nobis potestatem tradidit vobis. quam ob rem nisi hoc loco, nisi apud vos, nisi per vos, iudices, non auctoritatem, quae amissa est, sed salutem nostram, quae spe exigua extremaque pendet, tenuerimus, nihil est praeterea quo confugere possimus; nisi forte quae res hoc iudicio temptetur, quid agatur, cui causae fundamenta iaciantur, iudices, non videtis: condemnatus est is, qui Catilinam signa patriae inferen-<sup>5</sup> tem interemit: quid est causae cur non is, qui Catilinam ex urbe pepulit, pertimescat? repetitur ad poenam qui indicia communis exitii cepit: cur sibi confidat is, qui ea proferenda et patefacienda curavit? socii consiliorum, ministri comitesque vexantur: quid auctores, quid duces, quid principes sibi exspectent? atque utinam inimici nostri ac bonorum omnium mecum potius contendant! utrum tum omnes boni, duces nostri an comites fuerint ad communem conservandam salutem \* \*

strangulatos maluit dicere.

quid sibi meus necessarius Caelia voluit?

quid vero Decianus?



utinam esset proprie mea! senatus igitur magna ex parte . . . .

di, inquam, immortales! Lentulum . . . .

. . . . . externum cum domestica  
vita naturaue constaret. itaque non patiar, D. Laeli, te  
tibi hoc sumere atque hanc ceteris in posterum, nobis in  
praesens tempus legem condicionemque . . . . .

. . . . .  
Cum adolescentiam notaris, cum reliquum tempus  
aetatis turpitudinis maculis consperseris, cum privatarum  
rerum ruinas, cum domesticas laves, cum urbanam in-  
famiam, cum Hispaniae, Galliae, Ciliciae, Cretae, qui-  
bus in provinciis non obscure versatus est, vitia et flagi-  
tia protuleris, tum denique, quid Tmolitae et Lorymeni  
de L. Flacco existiment audiemus. quem vero tot tam  
gravesque provinciae salvum esse cupiant, quem plurimi  
cives tota ex Italia devincti necessitudine ac vetustate  
defendant, quem haec communis nostrum omnium patria  
propter recentem summi beneficii memoriam complexa  
teneat, hunc etiam si tota Asia deposcit ad supplicium,  
defendam, resistam. quid? si neque tota neque optima  
neque incorrupta neque sua sponte nec iure nec more  
nec vere nec religiose nec integre; si impulsus, si solli-  
citatus, si concitatus, si coactus, si impie, si temere, si  
cupide, si inconstanter nomen suum misit in hoc iudi-  
cium per egentissimos testis, ipsa autem nihil queri vere  
de iniuriis potest, tamenne, iudices, haec ad breve tem-  
pus audita longinqui temporis cognitarum rerum fidem  
derogabunt? tenebo igitur hunc ordinem defensor, quem  
fugit inimicus, et accusatorem urgebo atque insequar et  
ultro crimen ab adversario flagitabo. quid est, Laeli?  
num quid ea d . . . d . . . ea . . . f . . . no? qui equidem  
non in umbra neque in illius aetatis disciplinis artibus-  
que versatus est; etenim puer cum patre consule ad  
bellum est profectus. nimirum etiam hoc ipso nomine  
aliquid, quia suspitiose dici poterat, criminabare . . .

. . . . .  
sed si neque Asiae luxuries infirmisimum tempus  
aetatis *potuit voluptate corrumpere*.

\* ex hoc aetatis gradu se ad exercitum C. Flacci patrui contulit. \*

tribunus militaris cum P. Servilio gravissimo et sanctissimo cive profectus.

quorum amplissimis iudiciis ornatus quaestor factus est.

M. Pisone, qui cognomen frugalitatis, nisi accepisset, ipse peperisset.

idem novum bellum suscepit atque confecit.

non Asiae testibus, sed accusatoribus contubernalibus traditus.

Hunc igitur virum, Laeli, quibus tandem rebus op-<sup>3</sup>  
pugnas? fuit P. Servilio imperatore in Cilicia tribunus<sup>6</sup>  
militum: ea res siletur. fuit M. Pisoni quaestor in Hispania: vox de quaestura missa nulla est. bellum Cre-  
tense ex magna parte gessit atque una cum summo imperatore sustinuit: muta est huius temporis accusatio.  
praeturae iuris dictio, res varia et multiplex ad suspitiones et simultates, non attingitur: at vero in summo et  
periculosissimo rei publicae tempore etiam ab inimicis eadem praetura laudabatur. 'at a testibus laeditur.' ante  
quam dico a quibus, qua spe, qua vi, qua re concitatis, qua levitate, qua egestate, qua perfidia, qua audacia  
praeditis, dicam de genere universo et de condicione omnium nostrum. per deos immortalis! iudices, vos quo  
modo is, qui anno ante Romae ius dixerat, anno post in Asia ius dixerit, a testibus quaeretis ignotis, ipsi con-  
iectura nihil iudicabitis? in tam varia iuris dictione tam multa decreta, tot hominum gratiosorum laesae volun-  
tates: quae est umquam iacta non suspitio, quae tamen solet esse falsa, sed iracundiae vox aut doloris? et is est<sup>7</sup>  
reus avaritiae, qui in uberrima re [turpe compendium], in maledicentissima civitate, in suspitosissimo negotio  
maledictum omne, non modo crimen effugit? praetereo illa, quae praetereunda non sunt: nullum huius in pri-  
vatis rebus factum avarum, nullam in re pecuniaria contentionem, nullam in re familiari sordem posse proferri.  
quibus igitur testibus ego hosce possum refutare nisi vobis? Tmolites ille vicanus, homo non modo nobis, sed<sup>8</sup>  
ne inter suos quidem notus, vos docebit qualis sit L. Flaccus, quem vos modestissimum adolescentem, pro-

vinctiae maximae sanctissimum virum, vestri exercitus fortissimum militem, diligentissimum ducem, temperantissimum legatum quaestoremque cognoverunt; quem vos praesentes constantissimum senatorem, iustissimum praetorem, amantissimum rei publicae civem iudicavistis? de quibus vos alii testes esse debetis, de eis ipsi alios testis audietis? at quos testis? primum dicam, id quod est commune, Graecos: non quo nationi huic ego unus maxime fidem derogem; nam si quis unquam de nostris hominibus a genere isto studio ac voluntate non abhorrens fuit, me et esse arbitror et magis etiam tum, cum plus erat otii, fuisse: sed sunt in illo numero multi boni, docti, prudentes, qui ad hoc iudicium deducti non sunt; multi impudentes, inlitterati, leves, quos variis de causis video concitatos. verum tamen hoc dico de toto genere Graecorum: tribuo illis litteras, do multarum artium disciplinam, non adimo sermonis leporem, ingeniorum acumen, dicendi copiam, denique etiam, si quae sibi alia sumunt, non repugno: testimoniorum religionem et fidem numquam ista natio coluit, totiusque huiusce rei quae sit<sup>4</sup> vis, quae auctoritas, quod pondus ignorant. unde illud<sup>9</sup> est: 'da mihi testimonium mutuum'? num Gallorum, num Hispanorum putatur? totum istud Graecorum est, ut etiam, qui Graece nesciunt, hoc quibus verbis a Graecis dici soleat sciant. itaque videte quo vultu, qua confidentia dicant: tum intellegetis qua religione dicant. numquam nobis ad rogatum respondent, semper accusatori plus quam ad rogatum; numquam laborant quem ad modum probent quod dicunt, sed quem ad modum se explicent dicendo. iratus Flacco dixit M. Lurco, quod, ut ipse aiebat, libertus erat eius turpi iudicio condemnatus: nihil dixit quod laederet cum cuperet; impediēbat enim religio; tamen id, quod dixit, quanto cum pudore, quo<sup>10</sup> tremore et pallore dixit! quam promptus homo P. Septimius! quam iratus de iudicio et de vilico! tamen haesitabat, tamen eius iracundiae religio non numquam repugnabat. inimicus M. Caelius, quod cum in re manifesta putasset nefas esse publicanum iudicare contra publicanum, sublatus erat e numero recuperatorum, tamen tenuit se neque attulit in iudicium quicquam ad laeden-

dum nisi voluntatem. hi si Gracci fuissent ac nisi nostri 5  
mores ac disciplina plus valeret quam dolor ac simultas,  
omnes se spoliatos, vexatos, fortunis eversos esse dixis-  
sent: Graccus testis cum ea voluntate processit ut laedat,  
non iuris iurandi, sed laedendi verba meditatur; vinci,  
refelli, coargui putat esse turpissimum; ad id se parat;  
nihil curat aliud; itaque non optimus quisque nec gra-  
vissimus, sed impudentissimus loquacissimusque deligitur.  
vos [autem] in privatis minimarum rerum iudiciis testem 12  
diligenter expenditis; etiam si formam hominis, si nomen,  
si tribum nostis, mores tamen exquirendos putatis; qui  
autem dicit testimonium ex nostris hominibus, ut se ipse  
sustentat, ut omnia verba moderatur, ut timet ne quid  
cupide, ne quid iracunde, ne quid plus minusve quam  
sit necesse dicat! num illos item putatis? quibus ius iu-  
randum iocus est, testimonium ludus, existimatio verba et  
ineptiae: laus, merces, gratia, gratulatio proposita est  
omnis impudenti mendacio. sed non dilatabo orationem  
meam: etenim potest esse infinita, si mihi libeat totius  
gentis in testimoniis dicendis explicare levitatem; sed  
propius accedam: de his nostris testibus dicam. vehe- 13  
mentem accusatorem nacti sumus, iudices, et inimicum  
in omni genere odiosum ac molestum: quem spero his  
nervis fore magno usui et amicis et rei publicae; sed  
certe inflammatus incredibili cupiditate hanc causam ac-  
cusationemque suscepit. qui comitatus in inquirendo!  
comitatum dico? immo vero quantus exercitus! quae  
iactura! qui sumptus! quanta largitio! quae quamquam  
utilia sunt causae, timide tamen dico, quod vereor ne  
Laelius ex his rebus, quas sibi suscepit gloriae causa,  
putet aliquid oratione mea sermonis in sese aut invidiae  
esse quaesitum. itaque hanc partem totam relinquam: 6  
tantum a vobis petam, iudices, ut, si quid ipsi audistis  
communi fama atque sermone de vi, de manu, de armis,  
de copiis, memineritis; quarum rerum invidia lege hac  
recenti ac nova certus est inquisitioni comitum numerus  
constitutus. sed ut hanc vim omittam, quanta illa sunt, quae 14  
quoniam accusatorio iure et more sunt facta, reprehendere  
non possumus, queri tamen cogimur! primum quod  
distributis partibus sermo est tota Asia dissipatus, Cn.



Pompeium, quod L. Flacco esset [vehementer] inimicus, contendisse a D. Laelio, paterno amico ac pernecessario, ut hunc hoc iudicio arcesseret, omnemque ei suam auctoritatem, gratiam, copias, opes ad hoc negotium conficiendum detulisse. id hoc veri similis Graecis hominibus videbatur, quod paulo ante in eadem provincia familiarem Laelium Flacco viderant; Pompeii autem auctoritas cum apud omnis tanta est quanta esse debet, tum excellit in ista provincia, quam nuper et praedonum et regum bello liberavit. adiunxit illa, ut eos, qui domo exire nolebant, testimonii denuntiatione terreret, qui domi stare  
15 non poterant, largo et liberali viatico commoveret. sic adulescens ingenii plenus locupletis metu, tenuis praemio, stultos errore permovit; sic sunt expressa ista praecleara, quae recitantur, psephismata, non sententiis neque auctoritatibus declarata, non iure iurando constricta, sed porrigenda manu profundendoque clamore multitudinis  
7 concitatae. o morem praeclearum disciplinamque, quam a maioribus accepimus, si quidem teneremus! sed nescio quo pacto iam de manibus elabitur. nullam enim illi nostri, sapientissimi et sanctissimi viri, vim contionis esse voluerunt: quae scisceret plebes aut quae populus iuberet, submotam contione, distributis partibus, tributim et centuriatim discriptis ordinibus, classibus, aetatibus, auditis auctoribus, re multos dies promulgata et cognita, iuberi  
16 vetarique voluerunt. Graecorum autem totae res publicae sedentis contionis temeritate administrantur: itaque, ut hanc Graeciam, quae iam diu suis consiliis perculsa et adflata est, omittam, illa vetus, quae quondam opibus, imperio, gloria floruit, hoc uno malo concidit, libertate immoderata ac licentia contionum. cum in theatro imperiti homines, rerum omnium rudes ignarique, consederant, tum bella inutilia suscipiebant, tum seditiosos homines rei publicae praeficiebant, tum optime meritos  
17 civis e civitate cieiebant. quod si haec Athenis tum, cum illae non solum in Graecia, sed prope cunctis gentibus enitebant, accidere sunt solita, quam moderationem putatis in Phrygia aut in Mysia contionum fuisse? nostras contiones illarum nationum homines plerumque perturbant: quid, cum soli sunt ipsi, tandem fieri putatis?

caesus est virgis Cymaeus ille Athenagoras, qui in fame frumentum exportare erat ausus: data contio Laelio est; processit ille, et Graecus apud Graecos non de culpa sua dixit, sed de poena questus est: porrexerunt manus; psephisma natum est. hoc testimonium est? nuper epulati [paulo] atque omni largitione saturati Pergameni, quod Mithridates, qui multitudinem illam non auctoritate sua, sed sagina tenebat, se velle dixit, id sutores et zonarii conclamarunt. hoc testimonium est civitatis? ego testis a Sicilia publice deduxi; verum erant ea testimonia non concitatae contionis, sed iurati senatus. qua re iam non est mihi contentio cum teste; vobis videndum est sintne haec testimonia putanda. adulescens bonus, honesto loco natus, disertus, cum maximo ornatissimoque comitatu venit in oppidum Graecorum; postulat contionem; locupletis homines et gravis, ne sibi adversentur, testimonii denuntiatione deterret; egentis et levis spe legationis et viatico publico, privata etiam benignitate prolectat. opifices et tabernarios atque illam omnem faecem civitatum quid est negotii concitare, in eum praesertim, qui nuper summo cum imperio fuerit, summo autem in amore esse propter nomen ipsum imperii non potuerit? mirandum vero est homines eos, quibus odio sunt nostrae secures, nomen acerbitati, scriptura, decumae, portorium morti, libenter adripere facultatem laedendi quaecumque detur! mementote igitur, cum audietis psephismata, non audire vos testimonia; audire temeritatem volgi, audire vocem levissimi cuiusque, audire strepitum imperitorum, audire contionem concitatam levissimae nationis. itaque perscrutamini penitus naturam rationemque criminum: iam nihil praeter speciem, nihil praeter terrorem ac minas reperietis. in aerario nihil habent civitates, nihil in vectigalibus; duae rationes conficiendae pecuniae, aut versura aut tributo: nec tabulae creditoris proferuntur nec tributi confectio ulla recitatur. quam vero facile falsas rationes inferre et in tabulas, quodcumque commodum est, referre solcant ex Cn. Pompeii litteris ad Hypsaeum et Hypsaci ad Pompeium missis, quaeso, cognoscite. LITTERAE POMPEII ET HYPSAEI. satisne vobis coarguere his auctoribus dissolutam Graecorum consuetudinem

licentiamque impudentem videmur? nisi forte, qui Cn. Pompeium, qui praesentem, qui nullo impellente fallabant, eos urgente Laelio in absentem et in L. Flaccum  
 21 aut timidos fuisse aut religiosos putamus. sed fuerint incorruptae litterae domi; nunc vero quam habere auctoritatem aut quam fidem possunt? triduo lex ad praetorem deferri, iudicium signis obsignari iubet: tricesimo die vix deferuntur. ne corrumpi tabulae facile possint, idcirco lex obsignatas in publico poni voluit: at obsignantur corruptae. quid refert igitur tanto post ad iudices deferantur an omnino non deferantur?

- 10 Quid? si testium studium cum accusatore sociatum est, tamenne isti testes habebuntur? ubi est igitur illa expectatio, quae versari in iudiciis solet? nam antea, cum dixerat accusator acriter et vehementer cumque defensor suppliciter demisseque responderat, tertius ille erat expectatus locus testium, qui aut sine ullo studio dicebant aut cum dissimulatione aliqua cupiditatis. hoc vero  
 22 quid est? una sedent, ex accusatorum subselliis surgunt, non dissimulant, non verentur. de subselliis queror? una ex domo prodeunt; si verbo titubaverint, quo revertantur non habebunt. an quisquam esse testis potest, quem accusator sine cura interroget nec metuat ne sibi aliquid, quod ipse nolit, respondeat? ubi est igitur illa laus oratoris, quae vel in accusatore antea vel in patrono spectari solebat? bene testem interrogavit; callide accessit, \* reprehendit, quo voluit adduxit; convicit et elinguem reddidit.  
 23 quid tu istum roges, Laeli, qui, prius quam hoc, TE ROGO, dixeris, plura etiam effundet quam tu ei domi ante praescripseris? quid ego autem defensor rogem? nam aut oratio testium refelli solet aut vita laedi: qua disputatione orationem refellam eius, qui dicit 'dedimus', nihil amplius? in hominem dicendum est igitur, cum oratio argumentationem non habet: quid dicam in ignotum? querendum est ergo et deplorandum, id quod iam dudum facio, de omni accusationis iniquitate: primum de communi genere [testium]; dicet enim natio minime in testimoniis dicendis religiosa. propius accedo: nego esse ista testimonia, quae tu [ipse] psephismata appellas, sed fremitum egentium et motum quendam temerarium Graec-

culae contionis. intrabo etiam magis: qui gessit, non adest; qui numerasse dicitur, non est deductus; privatae litterae nullae proferuntur; publicae retentae sunt in accusatorum potestate. summa est in testibus: hi vivunt cum inimicis, adsunt cum adversariis, habitant cum accusatoribus. utrum hic tandem disceptationem et cognitionem veritatis an innocentiae labem aliquam aut ruinam fore putatis? multa enim sunt eius modi, iudices, ut, etiam si in homine ipso, de quo agitur, neglegenda sint, tamen in condicione atque in exemplo pertimescenda videantur. si quem infimo loco natum, nullo splendore vitae, nulla commendatione famae defenderem, tamen civis a civibus communis humanitatis iure ac misericordia deprecarer, ne ignotis testibus, ne incitatis, ne accusatoris consessoribus, convivis, contubernalibus, ne hominibus levitate Graecis, crudelitate barbaris civem ac supplicem vestrum dederetis, ne periculosam imitationem exempli [reliquis] in posterum proderetis. sed cum L. Flacci res agatur, cuius familia [qui primus consul factus est, primus in hac civitate consul fuit, cuius virtute regibus exterminatis libertas in re publica constituta est, quae] usque ad hoc tempus honoribus, imperiis, rerum gestarum gloria continuata permansit, cumque ab hac perenni contestataque virtute maiorum non modo non degeneraverit L. Flaccus, sed qua maxime florere generis sui gloriam viderat, laudem patriae in libertatem vindicandae praetor adamarit, in hoc ego reo ne quod perniciosum exemplum prodatur pertimescam, in quo, etiam si quid errasset, omnes boni convivendum esse arbitrarentur? quod quidem ego non modo non postulo, sed contra, iudices, vos oro et obtestor, ut totam causam quam maxime intentis oculis, ut aiunt, [acerrime] contemplemini. nihil religione testatum, nihil veritate fundatum, nihil dolore expressum contraque omnia corrupta libidine, iracundia, studio, pretio, periurio reperientur.

Etenim iam universa istorum cognita cupiditate, accedam ad singulas querellas criminationesque Graecorum. classis nomine pecuniam civitatibus imperatam queruntur; quod nos factum, iudices, confitemur: sed si hoc crimen est, aut in eo est, quod non licuerit imperare, aut



in eo, quod non opus fuerit navibus, aut in eo, quod nulla hoc praetore classis navigarit. licuisse ut intellegas, cognosce quid me consule senatus decreverit, cum quidem nihil a superioribus continuorum annorum decretis decesserit. SENATUS CONSULTUM. proximum est ergo ut opus fuerit classe necne quaeramus. utrum igitur hoc Gracci statuent aut ullae exterae nationes an nostri praetores, nostri duces, nostri imperatores? equidem existimo in eius modi regione atque provincia, quae mari cineta, portubus distincta, insulis circumdata esset, non solum praesidii, sed etiam ornandi imperii causa navigandum

28 fuisse. haec enim ratio ac magnitudo animorum in maioribus nostris fuit, ut, cum in privatis rebus suisque sumptibus, minimo contenti, tenuissimo cultu viverent, in imperio atque in publica dignitate omnia ad gloriam splendoremque revocarent. quaeritur enim in re domestica continentiae laus, in publica dignitatis. quod si etiam praesidii causa classem habuit, quis erit tam iniquus qui reprehendat? 'nulli erant praedones.' quid? nullos fore quis praestare poterat? 'minuis' inquit 'gloriam Pompeii.' immo tu auges molestiam: ille enim

classis praedonum, urbis, portus, receptacula sustulit, pacem maritimam summa virtute atque incredibili celeritate confecit: illud vero neque suscepit neque suscipere debuit, ut, si qua uspiam navicula praedonum apparuisset, accusandus videretur. itaque ipse in Asia, cum omnia iam bella terra marique confecisset, classem tamen isdem istis civitatibus imperavit; quod si tum statuit opus esse, cum ipsius praesentis nomine tuta omnia et pacata esse poterant, quid, cum ille decessisset, Flacco existimatis

13  
30 statuendum et faciendum fuisse? quid? nos hic nonne ipso Pompeio auctore Silano et Murena consulibus decrevimus, ut classis in Italia navigaret? nonne eo ipso tempore, cum L. Flaccus in Asia remiges imperabat, nos hic in mare superum et inferum sestertium ter et quadragiens erogabamus? quid postero anno? nonne M. Curtio et P. Sextilio quaestoribus pecunia in classem est erogata? quid? hoc omni tempore equites in ora maritima non fuerunt? illa est enim gloria divina Pompeii: primum praedones eos, qui tum, cum illi bellum maritimum geren-

dam datum est, toto mari dispersi vagabantur, redactos esse omnis in potestatem, deinde Syriam esse nostram, Ciliciam teneri, Cyprum per Ptolemaeum regem nihil audere, praeterea Cretam Metelli virtute esse nostram, nihil esse unde proficiscantur, nihil quo revertantur, omnis sinus, promunturia, litora, insulas, urbis maritimas claustris imperii nostri contineri. quod si Flacco praetore <sup>31</sup> nemo in mari praedo fuisset, tamen huius diligentia reprehendenda non esset; idcirco enim, quod hic classem habuisset, existimarem non fuisse. quid, si L. Eppii, L. Agrii, C. Cestii, equitum Romanorum, huius etiam clarissimi viri, Cn. Domitii, qui in Asia tum legatus fuit, testimonio doceo eo ipso tempore, quo tu negas classem habendam fuisse, compluris a praedonibus esse captos, tamen Flacci consilium in remigibus imperandis reprehendatur? quid? si etiam occisus est a piratis Adramytenus homo nobilis, cuius est fere nobis omnibus nomen auditum, Atyanas pugil Olympionices? hoc est apud Graecos, quoniam de eorum gravitate dicimus, prope maius et gloriosius quam Romae triumphasse. 'at neminem cepisti.' quam multi orae maritimae clarissimi viri praefuerunt, qui, cum praedonem nullum cepissent, mare tamen tutum praestiterunt? casus est enim in capiando, locus, eventus, occasio; defendendi facilis est cautio, non solum latibulis occultorum locorum, sed etiam tempestatum conversione et moderatione. reliquum est ut quac- <sup>14</sup>  
ratur utrum ista classis cursu et remis an sumptu tantum <sup>32</sup>  
et litteris navigarit. num igitur negari potest, cuius rei cuncta testis est Asia, bipartito classem distributam fuisse, ut una pars supra Ephesum, altera infra Ephesum navigaret? hac classe M. Crassus, vir amplissimus, ab Aeno in Asiam, his navibus Flaccus ex Asia in Macedoniam navigavit. in quo igitur praetoris est diligentia requirenda? in numero navium et in discriptione aequabili sumptus. dimidium eius, quo Pompeius erat usus, imperavit. num potuit parcius? discripsit autem pecuniam ad Pompeii rationem, quae fuit adcommodata L. Sullae discriptioni, qui cum omnis Asiae civitates pro portione [in provincias] discripsisset, illam rationem in imperando sumptu et Pompeius et Flaccus secutus est; neque est

33 adhuc tamen ea summa completa. 'non refert'. vero. quid lucretur? cum enim genus imperatae pecuniae suscipit, id, quod tu crimen esse vis, confitetur. qui igitur probari potest in ea pecunia non referenda crimen sibi ipsum facere, in qua crimen esset nullum, si referret? at enim negas fratrem meum, qui L. Flacco successerit, pecuniam ullam in remiges imperasse. equidem Q. fratris mei *hac* laude delector, sed aliis magis, gravioribus atque maioribus. aliud quiddam statuit, aliud vidit: existimavit, quocumque tempore auditum quid esset de praedonibus, quam vellet subito classem se comparaturum. denique hoc primus frater meus in Asia fecit ut hoc sumptu remigum civitates levaret: crimen autem tum videri solet, cum aliquis sumptus instituit eos, qui antea non erant instituti, non cum successor aliquid immutat de institutis superiorum. Flaccus quid alii postea facturi essent scire non poterat; quid fecissent videbat.

15 Sed quoniam de communi totius Asiae crimine est  
34 dictum, adgrediar iam ad singulas civitates: ex quibus sit sane nobis prima civitas Aemonensis. citat praeco voce maxima legatos Aemonensis: procedit unus Asclepiades. prodeant. etiamne praeconem mentiri coëgisti? est enim, credo, is vir iste, ut civitatis nomen sua auctoritate sustineat: damnatus turpissimis iudiciis domi, notatus litteris publicis; cuius de probris, adulteriis ac stupris exstant Aemonensium litterae, quas ego non solum propter longitudinem, sed etiam propter turpissimam obscenitatem verborum praetereundas puto. dixit publice datum drachmarum  $\overline{\text{ccv}}$ . dixit tantum: nihil ostendit, nihil protulit, sed adiunxit, id quod certe, quoniam erat domesticum, docere debuit, se privatim drachmarum  $\text{ccvi}$  milia dedisse. quantum sibi ablatum homo impudentissimus  
35 dicit, tantum numquam est ausus ut haberet optare. ab A. Sextilio dicit se dedisse et a suis fratribus: potuit dare Sextilius; nam fratres quidem consortes sunt mendicitatis. audiamus igitur Sextilium; fratres denique ipsi prodeant; quam volent impudenter mentiantur, et, quod numquam habuerunt, dedisse se dicant: tamen aliquid fortasse coram producti dicent in quo reprehendantur. 'non deduxi' inquit 'Sextilium.' cedo tabulas. 'non depor-

tavi.' fratres saltem exhibe. 'non denuntiavi.' quod ergo unus Asclepiades fortuna egens, vita turpis, existimatione damnatus, impudentia atque audacia fretus, sine tabulis, sine auctore iecerit, id nos quasi crimen aut testimonium pertimescemus? idem laudationem, quam nos ab Aemonen-<sup>36</sup> sibus Flacco datam proferebamus, falsam esse dicebat: cuius quidem laudationis iactura exoptanda nobis fuit; nam ut signum publicum inspexit praeclarus iste auctor suae civitatis, solere suos cives ceterosque Graecos ex tempore quod opus sit obsignare dixit. tu vero tibi habeto istam laudationem; nec enim Aemonensium testimonio Flacci vita et dignitas nititur. das enim mihi, quod haec causa maxime postulat, nullam gravitatem, nullam constantiam, nullum firmum in Graecis hominibus consilium, nullam denique esse testimonii fidem: nisi vero hactenus ista formula testimonii atque orationis tuae describi ac distinguere potest, ut Flacco absenti aliquid civitates tribuisse dicantur; Laelio praesenti, per se agenti, vi legis, iure accusationis, opibus praeterea suis terrenti ac minanti nihil temporis causa scripsisse aut obsignasse videantur. equidem in minimis rebus saepe res magnas<sup>16</sup> vidi, iudices, deprehendi ac teneri, ut in hoc Asclepiade.<sup>37</sup> haec, quae est a nobis prolata laudatio, obsignata erat creta illa Asiatica, quae fere est omnibus nota nobis: qua utuntur omnes non modo in publicis, sed etiam in privatis litteris, quas cotidie videmus mitti a publicanis, saepe uni cuique nostrum; neque [enim] testis ipse signo inspecto falsum nos proferre dixit, sed levitatem totius Asiae protulit, de qua nos et libenter et facile concedimus. nostra igitur laudatio, quam ille temporis causa nobis datam dicit, datam quidem confitetur, obsignata creta est; in illo autem testimonio, quod accusatori dicitur datum, ceram esse vidimus. hic ego, iudices, si vos Aemonen-<sup>38</sup> sium decretis, si ceterorum Phrygum litteris permoveri putarem, vociferarer, et, quam maxime possem, contenderem, testarer publicanos, excitarem negotiatores, vestram etiam scientiam implorarem: cera deprehensa confiderem totius testimonii fictam audaciam manifestó comprehensam atque oppressam teneri: nunc vero non insultabo vehementius nec volitabo in hoc insolentius ne-



que in istum nugatorem, tamquam in aliquem testem, invohar neque in toto Aemonensium testimonio, sive hic confictum est, ut apparet, sive missum domo est, ut dicitur, commovebor; etenim, quibus ego laudationem istam remittam, quoniam sunt, ut Asclepiades dicit, leves, horum testimonium non pertimescam.

17  
39

Venio nunc ad Dorylensium testimonium: qui producti tabulas se publicas ad speluncas perdidisse dixerunt. o pastores nescio quos cupidos litterarum! si quidem nihil istis praeter litteras abstulerunt. sed aliud esse causae suspicamur, ne forte isti parum versuti esse videantur. poena est, ut opinor, Dorylai gravior quam apud alios falsarum et corruptarum litterarum: si veras protulissent, criminis nihil erat; si falsas, erat poena: bellissimum  
40 putaverunt dicere amissas. quiescant igitur et me hoc in lucro ponere atque aliud agere patiantur. non sinunt: supplet enim iste nescio qui et privatim dicit se dedisse. hoc vero ferri nullo modo potest. qui de tabulis publicis recitat eis, quae in accusatoris potestate fuerunt, non debet habere auctoritatem; sed tamen iudicium fieri videtur, cum tabulae illae ipsae, cuiuscumque sunt, proferuntur; cum vero is, quem nemo vestrum vidit umquam, nemo qui mortalis esset audivit, tantum dicit: 'dedi', dubitabitis, iudices, quin ab hoc ignotissimo Phryge nobilissimum civem vindicetis? atque huic eidem nuper tres equites Romani honesti et graves, cum in causa liberali eum, qui adserebatur, cognatum suum esse diceret, non crediderunt: qui hoc evenit ut, qui locuples testis doloris et sanguinis sui non fuerit, idem sit gravis auctor iniuriae  
41 publicae? atque hic Dorylensis nuper cum efferretur magna frequentia † consensuque vestro, mortis illius invidiam in L. Flaccum Laelius conferebat. facis iniuste, Laeli, si putas nostro periculo vivere tuos contubernales, praesertim cum tua negligentia factum arbitremur: homini enim Phrygi, qui arborem numquam vidisset, fiscinam ficorum obiecisti; cuius mors te aliqua re levavit: edacem enim hospitem amisisti; Flacco vero quid profuit? qui valuit tam diu, dum huc prodiret, mortuus est aculeo iam emisso [ac dicto testimonio]. at istud columnen actionis tuae, Mithridates, postea quam, biduum retentus

testis a nobis, effudit quae voluit omnia, reprehensus, [con]victus fractusque discessit: ambulat cum lorica, metuit homo doctus et sapiens ne L. Flaccus nunc se scelere adliget, cum iam testem illum effugere non possit: ut, qui ante dictum testimonium sibi temperarit, cum tamen aliquid adsequi posset, is nunc id agat ut ad falsum avaritiae [testimonium] verum maleficii crimen adiungat. sed quoniam de hoc teste totoque Mithridatico crimine disseruit subtiliter et copiose Q. Hortensius, nos, ut instituimus, ad reliqua pergamus.

Caput est omnium Graecorum concitandorum, qui<sup>18</sup>  
cum accusatoribus sedet, Heraclides ille Temnites, homo<sup>42</sup>  
ineptus et loquax, sed, ut sibi videtur, ita doctus, ut etiam magistrum illorum se esse dicat. at, qui ita sit ambitiosus, ut omnis vos nosque cotidie persalutet, Temni usque ad illam aetatem in senatum venire non potuit, et qui se artem dicendi traditurum etiam ceteris profiteatur, ipse omnibus turpissimis iudiciis victus est. pari felicitate le-<sup>43</sup>  
gatus una venit Nicomedes, qui nec in senatum ulla con-  
dicione pervenire potuit et furti et pro socio damnatus est: nam princeps legationis Lysanias adeptus est ordinem senatorium, sed cum rem publicam nimium amplecteretur, peculatus damnatus est: bona et senatorium nomen amisit. hi tres etiam aerarii nostri tabulas falsas esse voluerunt; nam servos novem se professi sunt habere, cum omnino sine comite venissent. decreto scribendo primum video adfuisse Lysaniam: cuius fratris bona, quod populo non solvebat, praetore Flacco publice venierunt; praeterea Philippus est, Lysaniae gener, et Hermobius, cuius frater Pollis item pecuniae publicae est condemnatus. dicunt se Flacco et eis, qui simul essent, drachma-<sup>19</sup>  
rum xv milia dedisse. cum civitate mihi res est acerrima<sup>44</sup>  
et conficientissima litterarum, in qua nummus commoveri nullus potest sine quinque praetoribus, quaestoribus tribus, quattuor mensariis, qui apud illos a populo creantur: ex hoc tanto numero deductus est nemo, et cum illam pecuniam nominatim Flacco datam referant, maiorem aliam cum huic eidem darent, in aedem sacram reficiendam se perscripisse dicunt: quod minime convenit. nam aut omnia occulte referenda fuerunt aut aperte omnia.

cum perscribunt Flacco nominatim, nihil timent, nihil verentur; cum operi publico referunt, eidem homines subito eundem, quem contempserant, pertimescunt. si praetor dedit, ut est scriptum, a quaestore numeravit, quaestor a mensa publica, mensa aut ex vectigali aut ex tributo: numquam erit istuc simile criminis nisi  
 15 hanc mihi totam rationem omni et personarum genere et litterarum explicaris. vel quod est in eodem decreto scriptum, homines clarissimos civitatis, amplissimos usos honoribus, hoc praetore circumventos, cur hi neque in iudicio adsunt neque in decreto nominantur? non enim credo significari isto loco illum, qui se erigit, Heraclidem: utrum enim est in clarissimis civibus is, quem iudicatum hic duxit Hermippus? qui hanc ipsam legationem, quam habet, non accepit a suis civibus, sed usque Tmolo petivit? cui nullus honos in sua civitate habitus est unquam, res autem ea, quae tenuissimis committebatur, haec una in vita commissa sola est: custos T. Aufidio praetore in frumento publico est positus, pro quo cum a P. Varinio praetore pecuniam accepisset, celavit suos civis ultroque eis sumptum intulit: quod postea quam Temni, litteris a Varinio missis, cognitum atque patefactum est, cumque eadem de re Cn. Lentulus, qui censor fuit, Temnitarum patronus, litteras misisset, [Heraclidem]  
 46 istum Temni postea nemo vidit. atque, ut eius impudentiam perspicere possitis, causam ipsam, quae levissimi hominis animum in Flaccum incitavit, quaeso.  
 20 cognoscite. fundum Cymaeum Romae mercatus est de pupillo Meculonio: cum verbis se locupletem faceret, haberet nihil praeter illam impudentiam, quam videtis, pecuniam sumpsit mutuam a Sex. Stloga, iudice hoc nostro, primario viro, qui et rem agnoscit neque hominem ignorat; qui tamen credidit P. Fulvii Nerati, lectissimi hominis, fide. ei cum solveret, sumpsit a C. M. Fufiis, equitibus Romanis, primariis viris. hic hercule cornici oculum, ut dicitur: nam hunc Hermippum, hominem eruditum, civem suum, cui debebat esse notissimus, percussit; eius enim fide sumpsit a Fufiis. securus Hermippus Temnum proficiscitur, cum iste se pecuniam, quam huius fide sum-  
 47 pererat, a discipulis suis diceret Fufiis persoluturum; ha-

bebat enim rhetor iste *discipulos* adulescentis quosdam locupletis, quos dimidio redderet stultiores, quam acceperat; neminem tamen adeo infatuare potuit, ut ei nummum ullum crederet. itaque cum Roma clam esset profectus multosque minutis mutationibus fraudavisset, in Asiam venit Hermippoque percontanti de nomine Fufiano respondit se omnem pecuniam Fufiis persolvisse. interim neque ita longo intervallo libertus a Fufiis cum litteris ad Hermippum venit; pecunia petitur ab Hermippo. Hermippus ab Heraclide petit; ipse tamen Fufiis satis facit absentibus et fidem suam liberat; hunc aestuantem et tergiversantem iudicio illic persequitur: a recuperatoribus causa cognoscitur. nolite existimare, iudices, non unam <sup>48</sup> et eandem omnibus in locis esse fraudatorum et infitiatorum impudentiam: fecit eadem omnia, quae nostri debitores solent: negavit sese omnino versuram ullam fecisse Romae; Fufiorum se adfirmavit numquam omnino nomen audisse; Hermippum vero ipsum, pudentissimum atque optimum virum, veterem amicum atque hospitem meum, splendidissimum atque ornatissimum civitatis suae, probris omnibus maledictisque vexat: sed cum se homo volubilis quadam praecepiti celeritate dicendi in illa oratione iactaret, repente testimoniis Fufiorum nominibusque recitatis homo audacissimus pertimuit, loquacissimus obmutuit: itaque recuperatores contra istum rem minime dubiam prima actione iudicaverunt: cum iudicatum non faceret, addictus Hermippo et ab hoc ductus est. habetis et honestatem hominis et auctoritatem testimonii et causam omnem simultatis. atque is ab Hermippo missus, cum ei pauca mancipia vendidisset, Romam se contulit; deinde in Asiam rediit, cum iam frater meus Flacco successisset, ad quem adiit causamque ita detulit: recuperatores vi Flacci coactos et metu falsum invitos iudicavisse. frater meus pro sua aequitate prudentiaque decrevit, ut, si iudicatum negaret, in duplum iret; si metu coactos diceret, haberet eosdem recuperatores. recusavit, et, quasi nihil esset actum, nihil iudicatum, ab Hermippo ibidem mancipia, quae ipse ei vendiderat, petere coepit. M. Gracilius legatus, ad quem est aditum, actionem se daturum negavit; re iudicata stari ostendit placere. iterum iste, <sup>21</sup>  
<sup>49</sup> <sup>50</sup>



cui nullus esset usquam consistendi locus, Romam se rettulit; persequitur Hermippus, qui numquam istius impudentiae cessit. petit Heraclides a C. Plotio senatore, viro primario, qui legatus in Asia fuerat, mancipia quaedam, quae se, cum iudicatus esset, per vim vendidisse dicebat. Q. Naso, vir ornatissimus, qui praetor fuerat, iudex sumitur: qui cum sententiam secundum Plotium se dicturum ostenderet, et ab eo iudice abiit et, quod iudicium lege non erat, causam totam reliquit. satisne vobis, iudices, videor ad singulos testis accedere neque, ut primo constitueram, tantum modo cum universo genere configere?

51 Venio ad Lysaniam eiusdem civitatis, peculiarem tuam, Deciane, testem; quem tu, cum ephebum Temni cognosces, quia tunc te nudus delectaverat, semper nudum esse voluisti: abduxisti Temno Apollonidem; pecuniam adulescentulo grandi faenore, fiducia tamen accepta, occupavisti. hanc fiduciam commissam tibi dicis; tenes hodie ac possides. cum [tu testem] spe recuperandi fundi paterni venire ad testimonium dicendum cōgisti; qui quoniam testimonium *nondum* dixit, quidnam sit dicturus exspecto. novi genus hominum, novi consuetudinem, novi libidinem: itaque etsi teneo quid sit dicere paratus, nihil tamen contra disputabo prius quam dixerit; totum enim convertet atque alia finget. quam ob rem et ille servet quod paravit et ego me ad id, quod attulerit, integrum conservabo.

22  
52 Venio nunc ad eam civitatem, in quam ego multa et magna [studia et] officia contuli, et quam meus frater in primis colit atque diligit; quae si civitas per viros bonos gravisque homines querellas ad vos detulisset, paulo commoverer magis: nunc vero quid putem? Trallianos Macandrio causam publicam commisisse, homini egenti, sordido, sine honore, sine existimatione, sine censu? ubi erant illi Pythodori, Aetidemi, Epigoni, ceteri homines apud nos noti, inter suos nobiles? ubi illa magnifica et gloriosa ostentatio civitatis? nonne esset puditum, si hanc causam agerent severe, non modo legatum, sed Trallianum omnino dici Macandrium? huic illi legato, huic publico testi patronum suum iam inde a patre atque maioribus, L. Flaccum

mactandum civitatis testimonio tradidissent? non est ita, <sup>53</sup>  
 iudices, non est profecto. vidi ego in quodam iudicio  
 nuper Philodorum testem Trallianum, vidi Parrhasium,  
 vidi Archidemum, cum quidem idem hic [mihi] Maeandrius  
 quasi ministrator aderat, subiciens quid in suos civis  
 civitatemque, si vellem, dicerem; nihil enim illo homine  
 levius, nihil egentius, nihil inquinatius. qua re si hunc  
 habent auctorem Tralliani doloris sui, si hunc custodem  
 litterarum, si hunc testem iniuriae, si hunc auctorem  
 querellarum, remittant spiritus, comprimant animos suos,  
 sedent adrogantiam, fateantur in Maeandrii persona esse  
 expressam speciem civitatis; sin istum semper illi ipsi  
 domi proterendum et conculcandum putaverunt, desinant  
 putare auctoritatem esse in eo testimonio, cuius auctor  
 inventus est nemo. sed exponam quid in re sit, ut quam <sup>23</sup>  
 ob rem ista civitas neque vere Flaccum oppugnarit neque  
 benigne defenderit scire possitis: erat Castriciano nomine <sup>54</sup>  
 irata, de quo toto respondit Hortensius: invita solverat  
 Castricio pecuniam iam diu debitam. hinc totum odium,  
 hinc omnis offensio. [quo] cum venisset Laelius ad iratos  
 et illud Castricianum vulnus dicendo refricuisset, si-  
 luerunt principes neque in illa contione adfuerunt, neque  
 istius decreti ac testimonii auctores esse voluerunt. usque  
 adeo orba fuit ab optimatibus illa contio, ut princeps  
 principum esset Maeandrius, cuius lingua quasi flabello  
 seditionis illa tum est egentium contio ventilata. itaque <sup>55</sup>  
 civitatis pudentis, ut ego semper existimavi, et gravis,  
 ut ipsi existimari volunt, istum dolorem querellasque co-  
 gnoscite: quae pecunia fuerit apud se Flacci patris no-  
 mine a civitatibus, hanc a se esse ablatam queruntur.  
 alio loco quaeram quid licuerit Flacco; nunc tantum a  
 Trallianis requiro, quam pecuniam a se ablatam queran-  
 tur, suanne dicant, sibi a civitatibus conlatam in usum  
 suum? cupio audire. ‘non’ inquit ‘dicimus.’ quid igitur?  
 ‘delatam ad nos, creditam nobis L. Flacci nomine, ad  
 eius dies festos atque ludos.’ quid tum? ‘hanc te’ in-  
 quit ‘capere non licuit.’ iam id videro, sed primum illud <sup>56</sup>  
 tenebo. queritur gravis, locuples, ornata civitas, quod  
 non retinet alienum; spoliata se dicit, quod id non ha-  
 bet, quod eius non fuit. quid hoc impudentius dici aut

fingi potest? delectum est oppidum, quo in oppido uno pecunia a tota Asia ad honores L. Flacci poneretur: haec pecunia tota ab honoribus translata est in quaestum et  
 24  
 57 faenerationem; recuperata est multis post annis: quae civitati facta est iniuria? 'at moleste fert civitas.' credo; avolsum est enim praeter spem, quod erat spe devoratum lucrum. 'at queritur.' impudenter facit; non enim omnia, quae dolemus, eadem queri iure possumus. 'at accusat verbis gravissimis.' non civitas, sed imperiti homines a Maecandrio concitati. quo loco etiam atque etiam facite ut recordemini quae sit temeritas multitudinis, quae levitas propria Graecorum, quid in contione seditiosa valeat oratio. hic, in hac gravissima et moderatissima civitate, cum est forum plenum iudiciorum, plenum magistratum, plenum optimorum virorum et civium, cum speculatur atque obsidet rostra vindex temeritatis et moderatrix officii curia, tamen quantos fluctus excitari in contione videtis! quid vos fieri censetis Trallibus? an id, quod Pergami? nisi forte hae civitates existimari volunt facilius una se epistula Mithridatis moveri impellique potuisse, ut amicitiam populi Romani, fidem suam, iura omnia officii humanitatisque violarent, quam ut filium testimonio laederent, cuius patrem armis pellendum a  
 58 suis moenibus censuissent. qua re nolite mihi ista nomina civitatum nobilium opponere; quos enim hostis haec familia contempsit, numquam eosdem testis pertimescet; vobis autem est confitendum, si consiliis principum vestrae civitates reguntur, non multitudinis temeritate, sed optimatum consilio bellum ab istis civitatibus cum populo Romano esse susceptum; sin ille tum motus est temeritate imperitorum excitatus, patimini me delicta volgi a  
 25  
 59 publica causa separare. at enim istam pecuniam huic capere non licuit. utrum voltis patri Flacco licuisse necne? si licuit, sicuti certe licuit, ad eius honores conlatam, ex quibus nihil ipse capiebat, patris pecuniam recte abstulit filius; si non licuit, tamen illo mortuo non modo filius, sed quisvis heres rectissime potuit auferre. ac tum quidem Tralliani, cum ipsi gravi faenore istam pecuniam multos annos occupavissent, a Flacco tamen omnia, quae voluerunt, impetraverunt; neque tam fuerunt impudentes,

ut id, quod Laelius dixit, dicere auderent, hanc ab se pecuniam abstulisse Mithridatem. quis enim erat qui non sciret in ornandis studiosiorem Mithridatem quam in spoliandis Trallianis fuisse? quae quidem a me si, ut dicenda 60 sunt, dicerentur, gravius agerem, iudices, quam adhuc egi, quantum Asiaticis testibus fidem habere vos conveniret; revocarem animos vestros ad Mithridatici belli memoriam, ad illam universorum civium Romanorum per tot urbis uno puncto temporis miseram crudelemque caedem; praetores nostros deditos, legatos in vincula coniectos, nominis prope Romani memoriam cum vestigio imperii non modo ex sedibus Graecorum, verum etiam ex litteris esse deletam; Mithridatem deum, illum patrem, illum conservatorem Asiae, illum Euhium, Nysium, Bacchum, Liberum nominabant: unum atque idem erat tem- 61 pus, cum L. Flacco consuli portas tota Asia claudebat, Cappadocem autem illum non modo recipiebat suis urbibus, verum etiam ultro vocabat. liceat haec nobis, si oblivisci non possumus, at tacere; liceat mihi potius de levitate Graecorum queri quam de crudelitate: auctoritatem isti habeant apud eos, quos esse omnino noluerunt? nam quoscumque potuerunt togatos interemerunt; nomen civium Romanorum quantum in ipsis fuit sustulerunt. in 26 hac igitur urbe se iactant, quam oderunt? apud eos, quos inviti vident? in ea re publica, ad quam opprimendam non animus eis, sed vires defuerunt? aspiciant hunc florem legatorum laudatorumque Flacci ex vera atque integra Graecia: tum se ipsi expendant, tum cum his [se] comparent, tum, si audebunt, dignitati horum anteponant suam: adsunt Athenienses, unde humanitas, doctrina, 62 religio, fruges, iura, leges ortae atque in omnis terras distributae putantur; de quorum urbis possessione propter pulchritudinem etiam inter deos certamen fuisse proditum est; quae vetustate ea est, ut ipsa ex sese suos civis genuisse dicatur, [et eorum eadem terra parens, altrix, patria dicatur,] auctoritate autem tanta est, ut iam fractum prope ac debilitatum Graeciae nomen huius urbis laude nitatur; adsunt Lacedaemonii, cuius civitatis spectata ac 63 nobilitata virtus, non solum natura conrobodata, verum etiam disciplina putatur; qui soli toto orbe terrarum septin-



gentos iam annos amplius unis moribus et numquam mutatis legibus vivunt; adsunt ex Achaia cuncta multi legati, Boeotia, Thessalia; quibus locis nuper legatus Flaccus imperatore Metello praefuit. neque vero te, Massilia, praeterco, quae L. Flaccum *tribunum* militum quaestoremque cognosti; cuius ego civitatis disciplinam atque gravitatem non solum Graeciae, sed haud scio an cunctis gentibus anteponendam dicam; quae tam procul a Graecorum omnium regionibus, disciplinis linguaque divisa, cum in ultimis terris cincta Gallorum gentibus barbariae fluctibus adluatur, sic optinatum consilio gubernatur, ut omnes eius instituta laudare facilius possint quam aemulari. hisce utitur laudatoribus Flaccus, his innocentiae testibus, ut Graecorum cupiditati Graecorum auxilio resistamus.

27 Quamquam quis ignorat, qui modo umquam mediocriter res istas scire curavit, quin tria Graecorum genera sint vere? quorum uni sunt Athenienses, quae gens Ionum habetur; Aeoles alteri, Dores tertii nominabantur. atque haec cuncta Graecia, quae fama, quae gloria, quae doctrina, quae plurimis artibus, quae etiam imperio et bellica laude floruit, parvum quendam locum, ut scitis, Europae tenet semperque tenuit: Asiae maximam oram bello superatam cinxit urbibus, non ut munitam coloniis  
 65 [illam gentem], sed ut obsessam teneret. quam ob rem quaeso a vobis, Asiatici testes, ut, cum vere recordari voletis, quantum auctoritatis in iudicium adferatis, vosmet ipsi describatis Asiam, nec quid alienigenae de vobis loqui soleant, sed quid vosmet ipsi de genere vestro statuatis memineritis. namque, ut opinor, Asia vestra constat ex Phrygia, Mysia, Caria, Lydia. utrum igitur nostrum est an vestrum hoc vetus proverbium, Phrygem plagis fieri solere meliorem? quid de tota Caria? nonne hoc vestra voce volgatum est, si quid cum periculo experiri velis, in Care id potissimum esse faciendum? quid porro in Graeco sermone tam tritum atque celebratum est quam si quis despicatui ducitur, ut Mysorum ultimus esse dicatur? nam quid ego dicam de Lydia? quis umquam Graecus comœdiam scripsit in qua servus primarum partium non Lydus esset? quam ob rem quae vobis fit in-

iuria, si statuimus vestro nobis iudicio standum esse de vobis? equidem mihi iam satis superque dixisse videor <sup>66</sup> de Asiatico genere testium; sed tamen vestrum est, iudices, omnia, quae dici possunt in hominum levitatem, inconstantiam, cupiditatem, etiam si a me minus dicuntur, vestris animis et cogitatione comprehendere.

Sequitur auri illa invidia Iudaici. hoc nimirum illud <sup>28</sup> est, quod non longe a gradibus Aureliis haec causa dicitur; ob hoc crimen hic locus abs te, Laeli, atque illa turba quaesita est: scis quanta sit manus, quanta concordia, quantum valeat in contionibus: submissa voce agam, tantum ut iudices audiant; neque enim desunt qui istos in me atque in optimum quemque incitent; quos ego, quo id facilius faciant, non adiuvabo. cum aurum <sup>67</sup> Iudaeorum nomine quot annis ex Italia et ex omnibus provinciis Hierosolyma exportari soleret, Flaccus sanxit edicto, ne ex Asia exportari liceret. quis est, iudices, qui hoc non vere laudare possit? exportari aurum non oportere cum saepe antea senatus tum me consule gravissime iudicavit; huic autem barbarae superstitioni resistere severitatis, multitudinem Iudaeorum flagrantem non numquam in contionibus prae re publica contemnere gravitatis summae fuit. ‘at Cn. Pompeius captis Hierosolymis victor ex illo fano nihil attigit.’ in primis hoc, <sup>68</sup> ut multa alia, sapienter: in tam suspitiosa ac maledica civitate locum sermoni obtreptatorum non reliquit. non enim credo religionem et Iudaeorum et hostium impedimento praestantissimo imperatori, sed pudorem fuisse. ubi igitur crimen est, quandoquidem furtum nusquam reprehendis, edictum probas, iudicatum fateris, quaesitum et prolatum palam non negas, actum esse per viros primarios res ipsa declarat? Apameae manifesto comprehensum, ante pedes praetoris in foro expensum est auri pondo centum paulo minus per Sex. Caesium, equitem Romanum, castissimum hominem atque integerrimum: Laodiceae viginti pondo paulo amplius per hunc L. Peducaeam, iudicem nostrum, Adramytii \* per Cn. Domitium: Pergami † non multum. auri ratio constat; aurum <sup>69</sup> in aerario est; furtum non reprehenditur, invidia quaeritur; a iudicibus oratio avertitur, vox in coronam tur-

bamque effunditur. sua cuique civitati religio, Laeli, est, nostra nobis. stantibus Hierosolymis pacatisque Iudaeis tamen istorum religio sacrorum a splendore huius imperii, gravitate nominis nostri, maiorum institutis abhorrebat: nunc vero hoc magis, quod illa gens quid de nostro imperio sentiret ostendit armis; quam cara dis immortalibus esset docuit, quod est victa. [quam deo cara, quod servata.]

- 29 Quam ob rem quoniam, quod crimen esse voluisti, id  
70 totum vides in laudem esse conversum, veniamus iam ad civium Romanorum querellas, ex quibus sit sane prima Deciani: quid tibi tandem, Deciane, iniuriae factum est? negotiaris in libera civitate. primum patere me esse curiosum: quo usque negotiaberere, cum praesertim sis illo loco natus? annos iam triginta in foro versaris, sed tamen [in] Pergameno. longo intervallo, si quando tibi peregrinari commodum est, Romam venis: adfers faciem novam, nomen vetus, purpuram Tyriam *eandem*; in qua tibi invideo, quod unis vestimentis tam diu lautus es.
- 71 verum esto: negotiari libet: cur non Pergami? Smyrnae? Trallibus? ubi et multi cives Romani sunt et ius a nostro magistratu dicitur? otium te delectat; lites, turbac, praetor odio est; Graccorum libertate gaudes. cur ergo unus tu Apollonidensis, amantissimos populi Romani fidelissimosque socios, miseriore habes quam aut Mithridates aut etiam pater tuus habuit umquam? cur his per te frui libertate sua, cur denique esse liberos non licet? homines sunt tota Asia frugalissimi, sanctissimi, a Graccorum luxuria et levitate remotissimi, patres familias suo contenti, aratores, rusticani; agros habent et natura perbonos et diligentia culturaque meliores: in hisce agris tu praedia habere voluisti. omnino mallet et magis erat tuum, si iam te crassi agri delectabant, hic alicubi in Crustumino
- 72 aut in Capenati paravisses. verum esto: Catonis est dictum 'pedibus compensari pecuniam.' longe *est* omnino a Tiberi ad Caicum: quo in loco etiam Agamemnon cum exercitu errasset, nisi ducem Telephum invenisset; sed concedo id quoque: placuit oppidum; regio delectavit;
- 30 emissas. Amyntas est genere, honore, existimatione, pecunia princeps illius civitatis: huius socrum, mulierem

imbecilli consilii, satis locupletem, pellexit Decianus ad sese, et, cum illa quid ageretur nesciret, in possessione praediorum eius familiam suam conlocavit; uxorem abduxit ab Amynta praegnantem, quae peperit apud Decianum filiam, hodieque apud Decianum est et uxor Amyntae et filia. num quid harum rerum a me fingitur, Deciane? sciunt haec omnes nobiles, sciunt boni viri, sciunt denique nostri homines, sciunt mediocres negotiatores. exsurge, Amynta; repete a Deciano, non pecuniam, non praedia, socrum denique sibi habeat: restituat uxorem, reddat misero patri filiam. membra, quae debilitavit lapidibus, fustibus, ferro, manus, quas contudit, digitos, quos confregit, nervos, quos concidit, restituere non potest: filiam, filiam, inquam, aerumnoso patri, Deciane, redde. haec Flacco non probasse te miraris? cui, quaeso, tandem probasti? emptiones falsas, praediorum proscriptiones cum mulierum aperta circumscriptione fecisti. tutor his [rebus] Graecorum legibus ascribendus fuit: Polemocratem scripsisti, mercennarium et administrum consiliorum tuorum. adductus est in iudicium Polemocrates de dolo malo et de fraude a Dione huius ipsius tutelae nomine. qui concursus ex oppidis finitimis undique? qui dolor animorum? quae querella? condemnatus est Polemocrates sententiis omnibus; inritae venditiones, inritae proscriptiones. num restituisti? defers ad Pergamenos, ut illi reciperent in suas litteras publicas praeclaras proscriptiones et emptiones tuas: repudiant, reiciunt. at qui homines? Pergameni, laudatores tui. ita enim mihi gloriari visus es laudatione Pergamenorum, quasi honorem maiorum tuorum consecutus esses et hoc te superiorem esse putabas quam Laelium, quod te civitas Pergamena laudaret. num honestior est civitas Pergamena quam Smyrnaea? ne ipsi quidem dicunt. vellem tantum haberem otii, ut possem recitare pseplisma Smyrnaeorum, quod fecerunt in Castricium mortuum: primum ut in oppidum introferretur, quod aliis non conceditur; deinde ut ferrent ephebi; postremo ut imponeretur aurea corona mortuo. haec P. Scipioni clarissimo viro, cum esset Pergami mortuus, facta non sunt. at Castricium quibus verbis, di immortales! decus patriae, ornamentum populi Romani, florem



- iuventutis appellant. qua re, Deciane, si cupidus es  
 76 gloriae, alia ornamenta, censeo, quaeras: Pergameni te  
 deriserunt. quid? tu ludi te non intellegebas, cum tibi  
 haec recitabant: 'clarissimum virum, praestantissima sa-  
 pientia, singulari ingenio?' mihi crede, ludebant; cum  
 vero coronam auream litteris imponebant, re vera non  
 plus aurum tibi quam monedulae committebant. ne tum  
 quidem hominum venustatem et facetias perspicere po-  
 tuisti? isti igitur [Pergameni] proscriptiones quas tu  
 adferebas repudiaverunt. P. Orbius, homo et prudens et  
 innocens, contra te omnia decrevit. apud P. Globulum,  
 meum necessarium, fuisti gratiosior. utinam neque ipsum  
 32 neque me paeniteret! Flaccum iniuria decrevisse in tua  
 77 re dicis: adiungis causas inimicitiarum, quod patri L.  
 Flacci aedili curuli pater tuus tribunus plebis diem dixerit.  
 at istud ne ipsi quidem patri Flacci valde molestum esse  
 debuit, praesertim cum ille, cui dies dicta est, praetor  
 postea factus sit et consul, ille, qui diem dixit, non po-  
 tuerit privatus in civitate consistere. sed si iustas inimi-  
 citias putabas, cur, cum tribunus militum Flaccus esset, in  
 eius legione miles fuisti, cum per leges militaris effugere  
 liceret iniquitatem tribuni? cur autem praetor te inimi-  
 cum paternum in consilium vocavit? quae quidem quam  
 sancte solita sint observari scitis omnes: nunc accusamur  
 78 ab eis, qui in consilio nobis fuerunt. 'decrevit Flaccus.'  
 num aliud atque oportuit? 'in liberos.' num aliter cen-  
 suit senatus? 'in absentem.' decrevit, cum ibidem esses,  
 cum prodire nolles: non est hoc in absentem [sed in la-  
 tentem] reum. SENATUS CONSULTUM ET DECRETUM FLACCI.  
 quid? si non decrevisset, sed edixisset, quis posset vere  
 reprehendere? num etiam fratris mei litteras plenissimas  
 humanitatis et aequitatis reprehensurus es? quas easdem  
 mulieri a me datas apud Pataranos requisivit. recita.  
 79 LITTERAE Q. CICERONIS. quid? haec Apollonidienses occa-  
 sione facta ad Flaccum detulerunt? apud Orbium acta  
 non sunt? ad Globulum delata non sunt? ad senatum  
 nostrum me consule nonne legati Apollonidienses omnia  
 postulata de iniuriis unius Deciani detulerunt? at haec  
 praedia etiam in censum dedicavisti. mitto quod aliena;  
 mitto quod possessa per vim; mitto quod convicta ab

Apollonidiensibus; mitto quod a Pergamenis repudiata; mitto etiam quod a nostris magistratibus in integrum restituta; mitto quod nullo iure neque in re neque in possessione tua: illud quaero, sintne ista praedia censui censendo, habeant ius civile, sint necne sint mancipi, subsignari apud aerarium aut apud censorem possint? in qua tribu denique ista praedia censuisti? commisisti, si tempus aliquod gravius accidisset, ut ex isdem praediis et Apollonide et Romae imperatum esset tributum. verum esto: gloriosus fuisti, voluisti magnum agri modum censeri et eius agri, qui dividi plebi Romanae non potest. census es praeterea numeratae pecuniae cxxx. eam opinor tibi numeratam non esse abs te; sed haec omitto. census es mancipia Amyntae, neque huic ullam in eo fecisti iniuriam; possidet enim ea mancipia Amyntas; ac primo quidem pertulit, cum te audisset servos suos esse censum: rettulit ad iuris consultos. constabat inter omnis, si aliena censendo Decianus sua facere posset, eum maxima habiturum esse \*\*\*. habetis causam inimicitiarum, qua causa inflammatus Decianus ad Laelium detulerit hanc opimam accusationem: nam ita questus est Laelius, cum de perfidia Deciani diceret: 'qui mihi auctor fuit, qui causam ad me detulit, quem ego sum secutus, is a Flacco corruptus est, is me deseruit ac prodidit.' sicine tu auctor tandem eum, cui tu in consilio fuisses, apud quem omnis gradus dignitatis tuae retinuisses, pudentissimum hominem, nobilissima familia natum, optime de re publica meritum, in discrimen omnium fortunarum vocavisti? scilicet defendam Decianum, qui tibi in suspicionem nullo suo delicto venit: non est, mihi crede, corruptus: quid enim fuit quod ab eo redimeretur? ut duceret iudicium? cui sex horas omnino lex dedit, quantum tandem ex his horis detraheret, si tibi morem gerere voluisset? nimirum illud est, quod ipse suspicatur: invidisti ingenio subscriptoris tui, quod ornabat facete locum, quem prehenderat, et acute testis interrogabat, aut fortasse fecisti ut te ex populi sermone exciperes; idcirco Decianum usque ad coronam applicuisti. sed, ut hoc veri simile est, [haud veri simile] Decianum a Flacco esse corruptum, ita scitote, iudices, esse cetera vel quod ait Luceius

80

33  
81

82

83

L. Flaccum sibi dare cupisse, ut a fide se abduceret, sestertium viciens. et cum tu accusas avaritiae, quem dicis sestertium viciens voluisse perdere? nam quid emebat, cum te emebat? ut ad se transires? quam partem causae tibi daremus? an ut enuntiare consilia Laelii? qui testes ab eo prodirent? quid? nos non videbamus? habitare una? quis hoc nescit? tabulas in Laelii potestate fuisse? num dubium est? an ne vehementer, ne copiose accusares? nunc facis suspicionem: ita enim dixisti, ut nescio quid a te impetratum esse videatur.

34  
84

At enim Androni Sextilio gravis iniuria facta est et non ferenda, quod cum esset eius uxor Valeria intestato mortua, sic egit eam rem Flaccus quasi ad ipsum hereditas pertineret; in quo quid reprehendas scire cupio: quod falsum intenderit? qui doces? 'ingenua' inquit 'fuit.' o peritum iuris hominem! quid? ab ingenuis mulieribus hereditates lege non veniunt? 'in manum' inquit 'convenerat.' nunc audio. sed quaero usu an coëmptione? usu non potuit; nihil enim potest de tutela legitima nisi omnium tutorum auctoritate deminui. coëmptione? omnibus ergo auctoribus; in quibus certe Flaccum fuisse non  
85 dices. relinquitur [illud], quod vociferari non destitit, non debuisse, cum praetor esset, suum negotium agere aut mentionem facere hereditatis. maximas audio tibi, L. Luculle, qui de Flacco sententiam laturus es, pro tua eximia liberalitate maximisque beneficiis in tuos venisse hereditates, cum Asiam provinciam consulari imperio obtineres: si quis eas suas esse dixisset, concessisses? tu, T. Vecti, si quae tibi in Africa venerit hereditas, usu amittes, an tuum nulla avaritia salva dignitate retinebis? at istius hereditatis iam Globulo praetore Flacci nomine petita possessio est. non igitur impressio, non occisio, non vis, non tempus, non imperium, non secures ad iniuriam faciendam Flacci animum impulerunt. itaque eodem etiam M. Lurco, vir optimus, meus familiaris, convertit aculeum testimonii sui: negavit a privato pecuniam in provincia praetorem petere oportere. cur tandem, M. Lurco, non oportet? [extorquere] accipere contra leges non oportet; petere non oportere numquam ostendes, nisi docueris non licere. an legationes sumere liberas exigendi

86

causa, sicut et tu ipse nuper et multi viri boni saepe fecerunt, rectum est, quod ego non reprehendo, socios video queri: praetorem, si hereditatem in provincia non reliquerit, non solum reprehendendum, verum etiam condemnandum putas? ‘doti’ inquit ‘Valeria pecuniam omnem 35 suam dixerat.’ nihil istorum explicari potest, nisi ostenderis illam in tutela Flacci non fuisse: si fuit, quaecumque sine hoc auctore est dicta dos, nulla est. sed tamen 87 Lurconem, quamquam pro sua dignitate moderatus est in testimonio dicendo orationi suae, tamen iratum Flacco esse vidistis. neque enim occultavit causam iracundiae suae neque reticendam putavit: questus est libertum suum Flacco praetore esse damnatum. o condiciones miseras administrandarum provinciarum! in quibus diligentia plena simulatatum est, negligentia vituperationum; ubi severitas periculosa est, liberalitas ingrata; sermo insidiosus, adsentatio pernicioosa; frons omnium familiaris, multorum animus iratus; iracundiae occultae, blanditiae apertae; venientis praetores exspectant, praesentibus inserviunt, abeuntis deserunt! sed omittamus querellas, ne nostrum consilium in praetermittendis provinciis laudare videamur. litteras misit de vilico P. Septimii, hominis ornati, qui 88 vilicus caedem fecerat: Septimium ardentem iracundia videre potuistis. in Lurconis libertum iudicium ex edicto dedit: hostis est Lurco. quid igitur? hominum gratiosorum splendidorumque libertis fuit Asia tradenda? an simultates nescio quas cum libertis vestris Flaccus exercet? an in vestris vestrorumque causis severitas odio est, eandem laudatis, cum de nobis iudicatur? at iste Andro, 36 spoliatus bonis, ut dicitis, ad dicendum testimonium non venit. quid, si veniat? decisionis arbiter C. Caccilius 89 fuit: quo splendore vir, qua fide, qua religione! obsignator C. Sextilius, Lurconis sororis filius, homo et pudens et constans et gravis. si vis erat, si fraus, si metus, si circumscriptio, quis pactionem fieri, quis adesse istos coëgit? quid, si ista omnis pecunia huic adulescentulo L. Flacco reddita est, si petita, si redacta per hunc Antiochum paternum huius adulescentis libertum seni illi Flacco probatissimum, videmurne non solum avaritiae crimen effugere, sed etiam liberalitatis laudem adsequi



singularem? communem enim hereditatem, quae aequaliter ad utrumque lege venisset, concessit adulescenti propinquo suo; nihil ipse attigit de Valerianis bonis. quod statuerat facere, adductus huius pudore et non amplissimis patrimonii copiis, id non solum fecit, sed etiam prolixè adaccumulateque fecit; ex quo intellegi debet eum contra leges pecunias non cepisse, qui tam fuerit in hereditate concedenda liberalis.

- 90 At Falcidianum crimen est ingens: talenta quinquaginta se Flacco dicit dedisse. audiamus hominem: non adest. quo modo igitur dicit? epistulam mater eius profert et alteram soror: scriptum ad se dicunt esse ab illo tantam pecuniam Flacco datam. ergo is, qui si aram tenens iuraret, crederet nemo, per epistulam quod volet iniuratus probabit? at qui vir! quam non amicus suis civibus! qui patrimonium satis lautum, quod hic nobiscum conficere potuit, Graecorum conviviiis maluit dissipare.
- 91 quid attinuit relinquere hanc urbem, libertate tam praeclara carere, adire periculum navigandi? quasi bona comesse Romae non liceret. nunc denique materculae suae festivus filius, aniculae minime suspiciosae, purgat se per epistulam, ut eam pecuniam, quacum traiecerat,
- 37 non consumpsisse, sed Flacco dedisse videatur. at fructus isti Trallianorum Globulo praetore venierant: Falcidius emerat HS nongentis milibus. si dat tantam pecuniam Flacco, nempe idcirco dat, ut rata sit emptio; emit igitur aliquid, quod certe multo pluris esset; dat de lucro; nihil
- 92 detrahit de vivo. [minus igitur lucri facit.] cur Albanum venire iubet? cur matri praeterea blanditur? cur epistulis et sororis et matris imbecillitatem aucupatur? postremo cur non audimus ipsum? retinetur, credo, in provincia: mater negat. 'venisset', inquit 'si esset denuntiatum.' tu certe coëgisses, si ullum firmamentum in illo teste posuisses. sed hominem ab negotio abducere noluisti. magnum erat ei certamen propositum, magna cum Graecis contentio; qui tamen, ut opinor, iacent victi: nam iste unus totam Asiam magnitudine poculorum bibendoque superavit. sed tamen quis tibi, Laeli, de epistulis istis indicavit? mulieres negant se scire, qui sis; ipse igitur ille tibi se ad matrem et sororem scripsisse narravit? an

etiam scripsit oratu tuo? at vero M. Aebutium, constan-<sup>93</sup>  
tissimum et pudentissimum hominem, Falcidii adfinem,  
nihil interrogas? nihil eius generum, pari fide praeditum,  
C. Manilium? qui profecto de tanta pecunia, si esset data,  
nihil audisse non possent. his tu igitur epistulis, Deciane,  
recitatis, his mulierculis productis, illo absente auctore  
laudato, tantum te crimen probaturum putasti, praesertim  
cum ipse non deducendo Falcidium iudicium feceris, plus  
falsam epistulam habituram ponderis quam ipsis prae-  
sentis fictam vocem et simulatum dolorem?

Sed quid ego de epistulis Falcidii aut de Androne<sup>94</sup>  
Sextilio aut de Deciani censu tam diu disputo [postulo],  
de salute omnium nostrum, de fortunis civitatis, de summa  
re publica taceo? quam vos universam in hoc iudicio  
vestris, vestris, inquam, umeris, iudices, sustinetis. vide-  
tis quo in motu temporum, quanta in conversione rerum  
ac perturbatione versemur. cum alia multa certi homines,<sup>95</sup>  
tum hoc vel maxime moliuntur, ut vestrae quoque mentes,  
vestra iudicia, vestrae sententiae optimo cuique infestis-  
simae atque inimicissimae reperiantur. gravia iudicia pro  
rei publicae dignitate multa de coniuratorum scelere fe-  
cistis: non putant satis conversam esse rem publicam,  
nisi in eandem impiorum poenam optime meritos civis  
detruserint. oppressus est C. Antonius. esto: habuit<sup>96</sup>  
quandam ille infamiam suam; neque tamen ille ipse, pro  
meo iure dico, vobis iudicibus damnatus esset, cuius  
damnatione sepulcrum L. Catilinae, floribus ornatum ho-  
minum audacissimorum ac domesticorum hostium con-  
ventu epulisque celebratum est; iusta Catilinae facta sunt.  
nunc a Flacco Lentuli poenae per vos expetuntur. quam  
potestis P. Lentulo, qui vos in complexu liberorum con-  
iugumque vestrarum trucidatos incendio patriae sepelire  
conatus est, mactare victimam gratiorem, quam si L.  
Flacci sanguine illius nefarium in omnis odium satura-  
veritis? litemus igitur Lentulo, parentemus Cethego, re-  
vocemus eiectos: nimiae pietatis et summi amoris in pa-  
triam vicissim nos poenas, si ita placet, sufferamus. nos  
iam ab indicibus nominamur; in nos crimina finguntur;  
nobis pericula comparantur. quae si per alios agerent,  
si denique per populi nomen civium imperitorum multi-  
tudinem concitassent, aequiore animo ferre possemus;  
illud vero ferri non potest, quod per senatores et per equites  
Romanos, qui haec omnia pro salute omnium communi  
consilio, una mente atque virtute gesserunt, harum rerum

auctores, duces, principes spoliari omnibus fortunis atque civitate expelli posse arbitrantur. etenim populi Romani perspiciunt eandem mentem et voluntatem; omnibus rebus quibus potest populus Romanus significat quid sentiat; nulla varietas est inter homines opinionis, nulla voluntatis, nulla sermonis. qua re si quis illuc me vocat, venio; populum Romanum disceptatorem non modo non recuso, sed etiam depono. vis absit, ferrum ac lapides removeantur, operae facessant, servitia sileant: nemo erit tam iniustus qui me audierit, sit modo liber et civis, quin potius de praemiis meis quam de poena cogitandum putet.

39 o di immortales! quid hoc miserius? nos, qui P. Lentulo ferrum et flammam de manibus extorsimus, imperitae multitudinis iudicio confidimus, lectissimorum civium et

98 amplissimorum sententias pertimescimus. M'. Aquilium patres nostri multis avaritiae criminibus testimoniisque convictum, quia cum fugitivis fortiter bellum gesserat, iudicio liberaverunt. consul ego nuper defendi C. Pisonem, qui quia consul fortis constansque fuerat, incolumis est rei publicae conservatus. defendi item consul L. Murenam, consulem designatum: nemo illorum iudicum clarissimis viris accusantibus audiendum sibi de ambitu putavit, cum bellum iam gerente Catilina omnes me auctore duos consules Kalendis Ianuariis scirent esse oportere. innocens et bonus vir et omnibus rebus ornatus bis hoc anno me defendente absolutus est A. Thermus: quanta rei publicae causa laetitia populi Romani, quanta gratulatio consecuta est! semper graves et sapientes iudices in rebus iudicandis quid utilitas civitatis, quid communis salus, quid

99 rei publicae tempora poscerent cogitaverunt. cum tabella vobis dabitur, iudices, non de Flacco dabitur solum: dabitur de ducibus auctoribusque conservandae civitatis; dabitur de omnibus bonis civibus; dabitur de vobismet ipsis; dabitur de liberis vestris, de vita, de patria, de salute communi. non iudicatis in hac causa de exteris nationibus, non de sociis: de vobis et de vestra re pu-

40  
100 blica iudicatis. quod si provinciarum vos ratio magis movet quam vestra, ego vero non modo non recuso, sed etiam postulo ut provinciarum auctoritate moveamini: etenim opponemus Asiae provinciae primum magnam partem eiusdem provinciae, quae pro huius periculis legatos laudatoresque misit; deinde provinciam Galliam, provinciam Ciliciam, provinciam Hispaniam, provinciam Cretam: Graecis autem Lydis et Phrygibus et Mysis ob-

sistent Massilienses, Rhodii, Lacedaemonii, Athenienses, cuncta Achaia, Thessalia, Bocotia. Septimio et Caelio testibus P. Servilius et Q. Metellus huius pudoris integritatisque testes repugnabunt. Asiaticae iuris dictioni urbana iuris dictio respondebit; annui temporis criminatorem omnis aetas L. Flacci et perpetua vita defendet; et si prodesse L. Flacco, iudices, debet, quod se tribunum militum, quod quaestorem, quod legatum imperatoribus clarissimis, exercitibus ornatissimis, provinciis gravissimis dignum suis maioribus praestitit, prosit, quod hic vobis videntibus in periculis communibus omnium vestrum sua pericula cum meis coniunxit; prosint honestissimorum municipiorum coloniarumque laudationes; prosit etiam senatus populiue Romani praeclara et vera laudatio. o nox illa, quae paene aeternas huic urbi tenebras attulisti, cum Galli ad bellum, Catilina ad urbem, coniurati ad ferrum et flammam vocabantur; cum ego te, Flacce, caelum noctemque contestans, flens flentem obtestabar; cum tuae fidei optimae et spectatissimae salutem urbis et civium commendabam! tu tum, Flacce, praetor communis exitii nuntios cepisti; tu inclusam in litteris rei publicae pestem deprehendisti; tu periculorum indicia, tu salutis auxilia ad me et ad senatum attulisti. quae tibi tum gratiae sunt a me actae! quae a senatu! quae a bonis omnibus! quis tibi, quis C. Pomptino, fortissimo viro, quemquam bonum putaret umquam non salutem, verum honorem ullum denegaturum? o nonae illae Decembres, quae me consule fuistis! quem ego diem vere natalem huius urbis aut certe salutarem appellare possum. o nox illa, quam iste est dies consecutus, fausta huic urbi, miserum me, metuo ne funesta nobis! qui tum animus L. Flacci — nihil dicam enim de me —, qui amor in patriam, quae virtus, quae gravitas exstitit! sed quid ea commemoro, quae tum, cum agebantur, uno consensu omnium, una voce populi Romani, uno orbis terrae testimonio in caelum laudibus efferebantur? nunc vereor ne non modo non prosint, verum etiam aliquid obsint; etenim multo acriorem improborum interdum memoriam esse sentio quam bonorum. ego te, si quid gravius acciderit, ego te, inquam, Flacce, prodidero; mea dextera illa, mea fides, mea promissa, cum te, si rem publicam conservaremus, omnium bonorum praesidio quoad viveres non modo munitum, sed etiam ornatum fore pollicebar. putavi, speravi, etiam si honos noster vobis vilior fuisset, salutem certe caram



- 104 futuram. ac L. Flaccum quidem, iudices, si, quod di  
 immortales omen avertant, gravis iniuria adflixerit, num-  
 quam tamen prospexisse vestrae saluti, consuluisse vobis,  
 liberis, coniugibus, fortunis vestris paenitebit; semper ita  
 sentiet, talem se animum et generis dignitati et pietati  
 suae et patriae debuisse: vos ne paeniteat tali civi non  
 pepercisse, per deos immortalis! iudices, providete. quo-  
 tus enim quisque est qui hanc in re publica sectam se-  
 quatur? qui vobis, qui vestri similibus placere cupiat?  
 qui optimi atque amplissimi cuiusque hominis atque or-  
 dinis auctoritatem magni putet, illam viam si sibi vident  
 expeditiorem ad honores et ad omnia, quae concupive-  
 runt? 42 sed cetera sint eorum: sibi habeant potentiam, sibi  
 honores, sibi ceterorum commodorum summas facultates:  
 liceat his, qui haec salva esse voluerunt, ipsis esse salvis.  
 105 nolite, iudices, existimare eos, quibus integrum est, qui  
 nondum ad honores accesserunt, non exspectare huius  
 exitum iudicii: si L. Flacco tantus amor in bonos omnis,  
 tantum in rem publicam studium calamitati fuerit, quem  
 posthac tam amentem fore putatis qui non illam viam  
 vitae, quam ante praecipitem et lubricam esse ducebat,  
 huic planae et stabili praeponendam esse arbitretur? quod  
 si talium civium vos, iudices, taedet, ostendite: mutabunt  
 sententiam qui poterunt; constituent quid agant, quibus  
 integrum est: nos, qui iam progressi sumus, hunc exitum  
 nostrae temeritatis feremus: sin hoc animo quam plurimos  
 106 esse vultis, declarabitis hoc iudicio quid sentiat. huic  
 misero puero, vestro ac liberorum vestrorum supplici, iu-  
 dices, hoc iudicio vivendi praecepta dabit: cui si patrem  
 conservatis, qualis ipse debeat esse civis praescribetis;  
 sin eripitis, ostendetis bonae rationi et constanti et gravi  
 nullum a vobis fructum esse propositum. qui vos, quoniam  
 est id actatis ut sensum iam percipere possit ex maerore  
 patrio, auxilium nondum patri ferre possit, orat ne suum  
 luctum patris lacrimis, patris maerorem suo fletu augeatis,  
 qui etiam me intuetur, me voltu appellat, meam quodam  
 modo flens fidem implorat ac repetit eam, quam ego patri  
 suo quondam pro salute patriae sponderim, dignitatem.  
 miseremini familiae, iudices, miseremini patris, misere-  
 mini filii; nomen clarissimum et fortissimum vel generis  
 vel vetustatis vel hominis causa rei publicae reservate.
-

M. TULLII CICERONIS  
PRO P. SULLA ORATIO.

Maxime vellem, iudices, ut P. Sulla et antea dignitatis <sup>1</sup>  
suae splendorem obtinere et post calamitatem acceptam  
modestiae fructum aliquem percipere potuisset: sed quoniam  
ita tulit casus infestus, ut et amplissimo honore cum  
communi ambitionis invidia tum singulari Autronii odio  
everteretur, et in his pristinae fortunae reliquiis miseris et  
adfectis tamen haberet quosdam, quorum animos ne supplicio  
quidem suo satiare posset, quamquam ex huius incommodis  
magnam animo molestiam capio, tamen in ceteris malis facile  
patior oblatum mihi tempus esse, in quo boni viri lenitatem  
meam misericordiamque, notam quondam omnibus, nunc quasi  
intermissam, agnoscerent, improbi ac perditii cives, perdomiti  
atque victi, praecipitante re publica vehementem me fuisse  
atque fortem, conservata mitem ac misericordem faterentur.  
et quoniam L. Torquatus, meus familiaris ac necessarius,  
iudices, existimavit, si nostram in accusatione sua necessitudinem  
familiaritatemque violasset, aliquid se de auctoritate meae  
defensionis posse detrahare, cum huius periculi propulsatione  
coniungam defensionem officii mei. quo quidem genere non  
uterer orationis, iudices, hoc tempore, si mea solum interesset;  
multis enim locis mihi et data facultas est et saepe dabitur  
de mea laude dicendi: sed ut ille vidit, quantum de mea  
auctoritate deripuisset, tantum se de huius praesidiis  
deminuturum, sic hoc ego sentio, si mei facti rationem  
vobis constantiamque huius officii ac defensionis probaro,  
causam quoque me P. Sullae probaturum. ac primum abs te  
illud, L. Torquate, quaero, cur <sup>3</sup> me a ceteris clarissimis  
viris ac principibus civitatis in hoc officio atque in  
defensionis iure secernas. quid enim est quam ob rem abs te  
Q. Hortensii factum, clarissimi

viri atque ornatissimi, non reprehendatur, reprehendatur  
 meum? nam si est initum a P. Sulla consilium inflam-  
 mandae huius urbis, exstinguendi imperii, delendae civi-  
 tatis, mihi ne maiorem haec res dolorem quam Q. Horten-  
 sio, mihi ne maius odium adferre debent? meum denique  
 gravius esse iudicium, qui adiuvandus in his causis, qui  
 oppugnandus, qui defendendus, qui deserendus esse videat-  
 2  
 4  
 5  
 6  
 tur? 'ita,' inquit: 'tu enim investigasti, tu patefecisti con-  
 iurationem.' quod cum dicit, non attendit eum, qui pate-  
 fecerit, hoc curasse, ut id omnes viderent, quod antea  
 fuisset occultum. qua re ista coniuratio, si patefacta per  
 me est, tam patet Hortensio quam mihi; quem cum videas  
 hoc honore, auctoritate, virtute, consilio praeditum non  
 dubitasse quin innocentem P. Sullam defenderet, quaero  
 cur qui aditus ad causam Hortensio patuerit, mihi inter-  
 clusus esse debuerit; quaero illud etiam, si me, qui de-  
 fendo, reprehendendum putas esse, quid tandem de his  
 existimes summis viris et clarissimis civibus, quorum stu-  
 dio et dignitate celebrari hoc iudicium, ornari causam,  
 defendi huius innocentiam vides? non enim una ratio est  
 defensionis ea, quae posita est in oratione; omnes, qui  
 adsunt, qui laborant, qui salvum volunt, pro sua parte  
 atque auctoritate defendunt. an vero, in quibus subsel-  
 liis haec ornamenta ac lumina rei publicae viderem, in  
 his me apparere nollem, quorum ego illum in locum at-  
 que in hanc excelsissimam sedem dignitatis atque honoris  
 multis meis et magnis laboribus et periculis ascendissem?  
 atque ut intellegas, Torquate, quem accuses, si te forte  
 id offendit, quod ego, qui in hoc genere quaestionis de-  
 fenderim neminem, non desim P. Sullae, recordare de  
 ceteris, quos adesse huic vides: intelleges et de hoc et  
 de aliis iudicium meum et horum par atque unum fuisse.  
 quis nostrum adfuit Vargunteio? nemo, ne hic quidem Q.  
 Hortensius, praesertim qui illum solus antea de ambitu  
 defendisset. non enim iam se ullo officio cum illo con-  
 iunctum arbitrabatur, cum ille tanto scelere commisso  
 omnium officiorum societatem diremisset. quis nostrum  
 Servium Sullam, quis Publium, quis M. Laecam, quis C.  
 Cornelium defendendum putavit? quis eis nostrum adfuit?  
 nemo. quid ita? quia in ceteris causis etiam nocentis viri

boni, si necessarii sunt, deserendos esse non putant: in hoc crimine non solum levitatis culpa est, verum etiam quaedam contagio sceleris, si defendas eum, quem obstrictum esse patriae parricidio suspicere. quid? Autronio 7 nonne sodales, non conlegae sui, non veteres amici, quorum ille copia quondam abundarat, non hi omnes, qui sunt in re publica principes, defuerunt? immo, etiam testimonio plerique laeserunt. statuerant illud tantum esse maleficiū quod non modo non occultari per se, sed etiam aperiiri inlustrarique deberet. quam ob rem quid 3 est quod mirere, si cum isdem me in hac causa vides adesse, cum quibus in ceteris intellegis afuisse? nisi vero me unum vis ferum praeter ceteros, me asperum, me inhumanum existimari, me singulari immanitate et crudelitate praeditum. hanc mihi tu si propter meas res gestas 8 imponis in omni mea vita, Torquate, personam, vehementer erras. me natura misericordem, patria severum: crudelem nec patria nec natura esse voluit. denique istam ipsam personam vehementem et acrem, quam mihi tum tempus et res publica imposuit, iam voluntas et natura ipsa detraxit. illa enim ad breve tempus severitatem postulavit; haec in omni vita misericordiam lenitatemque desiderat. qua re nihil est quod ex tanto comitatu virorum am- 9 plissimorum me unum abstrahas: simplex officium atque una bonorum est omnium causa; nihil erit quod admirere posthac, si in ea parte, in qua hos animum adverteris, me videbis: nulla est enim in re publica mea causa propria; tempus agendi fuit mihi magis proprium quam ceteris, doloris vero et timoris et periculi fuit illa causa communis: neque enim ego tunc princeps ad salutem esse potuissem, si esse alii comites noluissent. qua re necesse est, quod mihi consuli praecipuum fuit praeter alios, id iam privato cum ceteris esse commune. neque ego hoc partiendae invidiae, sed communicandae laudis causa loquor: oneris mei partem nemini impertio, gloriae bonis omnibus. 'in Autronium testimonium dixisti:' inquit 'Sul- 10 lam defendis.' hoc totum eius modi est, iudices, ut, si ego sum inconstans ac levis, nec testimonio fidem tribui convenerit nec defensioni auctoritatem; sin est in me ratio rei publicae, religio privati officii, studium retinendae



voluntatis bonorum, nihil minus accusator debet dicere quam a me defendi Sullam, testimonio laesum esse Autronium. videor enim iam non solum studium ad defendendas causas, verum etiam opinionis aliquid et auctoritatis adferre; qua ego et moderate utar, iudices, et omnino non uterer, si ille me non coëgisset.

- <sup>4</sup>  
<sup>11</sup> Duae coniurationes abs te, Torquate, constituuntur: una, quae Lepido et Volcatio consulibus, patre tuo consule designato, facta esse dicitur; altera, quae me consule: harum in utraque Sullam dicis fuisse. patris tui, fortissimi viri atque optimi consulis, scis me consiliis non interfuisse; scis me, cum mihi summus tecum usus esset, tamen illorum expertem temporum et sermonum fuisse: credo, quod nondum penitus in re publica versabar, quod nondum ad propositum mihi finem honoris perveneram, quod me ambitio et forensis labor ab omni illa cogitatione  
<sup>12</sup> abstraherat. quis ergo intererat vestris consiliis? omnes hi, quos vides huic adesse, et in primis Q. Hortensius; qui cum propter honorem ac dignitatem atque animum eximium in rem publicam tum propter summam familiaritatem summumque amorem in patrem tuum cum communibus tum praecipuis patris tui periculis commovebatur. ergo istius coniurationis crimen defensum ab eo est, qui interfuit, qui cognovit, qui particeps et consilii vestri fuit et timoris; cuius in hoc crimine propulsando cum esset copiosissima atque ornatissima oratio, tamen non minus inerat auctoritatis in ea quam facultatis. illius igitur coniurationis, quae facta contra vos, delata ad vos, a vobis prolata esse dicitur, ego testis esse non potui: non modo animo nihil comperi, sed vix ad auris meas istius  
<sup>13</sup> suspicionis fama pervenit. qui vobis in consilio fuerunt, qui vobiscum illa cognorunt, quibus ipsis periculum tum conflari putabatur, qui Autronio non adfuerunt, qui in illum testimonia gravia dixerunt, hunc defendunt, huic adsunt, in huius periculo declarant se non crimine coniurationis, ne adessent ceteris, sed hominum maleficio deterritos esse. mei consulatus autem tempus et crimen maximae coniurationis a me defendetur. atque haec inter nos partitio defensionis non est fortuito, iudices, nec temere facta, sed cum videremus eorum criminum nos

patronos adhiberi, quorum testes esse possemus, uterque nostrum id sibi suscipiendum putavit, de quo aliquid scire ipse atque existimare potuisset. et quoniam de criminibus superioris coniurationis Hortensium diligenter audistis, de hac coniuratione, quae me consule facta est, hoc primum attendite.

Multa, cum essem consul, de summis rei publicae periculis audiui, multa quaesivi, multa cognovi: nullus umquam de Sulla nuntius ad me, nullum indicium, nullae litterae pervenerunt, nulla suspitio. multum haec vox fortasse valere deberet eius hominis, qui consul insidias rei publicae consilio investigasset, veritate aperuisset, magnitudine animi vindicasset, cum is se nihil audisse de P. Sulla, nihil suspicatum esse diceret. sed ego nondum utor hac voce ad hunc defendendum: ad purgandum me potius utar, ut mirari Torquatus desinat, me, qui Autronio non adfuerim, Sullam defendere. quae enim Autronii fuit causa? quae Sullae est? ille ambitus iudicium tollere ac disturbare primum conflato voluit gladiatorum ac fugitivorum tumultu, deinde, id quod vidimus omnes, lapidatione atque concursu; Sulla, si sibi suus pudor ac dignitas non prodesset, nullum auxilium requisivit; ille damnatus ita se gerebat non solum consiliis et sermonibus, verum etiam aspectu atque voltu, ut inimicus esse amplissimis ordinibus, infestus bonis omnibus, hostis patriae videretur; hic se ita fractum illa calamitate atque adflictum putavit, ut nihil sibi ex pristina dignitate superesse arbitraretur, nisi quod modestia retinisset. hac vero in coniuratione quid tam coniunctum quam ille cum Catilina, cum Lentulo? quae tanta societas ullis inter se rerum optimarum, quanta ei cum illis sceleris, libidinis, audaciae? quod flagitium Lentulus non cum Autronio concepit? quod sine eodem illo Catilina facinus admisit? cum interim Sulla cum eisdem illis non modo noctem solitudinemque non quaereret, sed ne mediocri quidem sermone et congressu coniungeretur. illum Allobroges, maximarum rerum verissimi indices, illum multorum litterae ac nuntii coarguerunt; Sullam interea nemo insimulavit, nemo nominavit. postremo, eiecto sive emisso iam ex urbe Catilina, ille arma misit, cornua, tubas, fascis,

signa [legiones]: ille relictus intus, exspectatus foris, Lentuli poena compressus convertit se aliquando ad timorem, numquam ad sanitatem; hic contra ita quievit, ut eo tempore omni Neapoli fuerit, ubi neque homines fuisse putantur huius adfines suspicionis et locus est ipse non tam ad inflammandos calamitosorum animos quam ad  
6 consolandos adcommodatus. propter hanc igitur tantam dissimilitudinem hominum atque causarum dissimilem me  
18 in utroque prae bui. veniebat enim ad me et saepe veniebat Autronius, multis cum lacrimis, supplex, ut se defenderem, et se meum condiscipulum in pueritia, familiarem in adulescentia, conlegam in quaestura commemorabat fuisse; multa mea in se, non nulla etiam sua in me proferebat officia. quibus ego rebus, iudices, ita flectebar animo atque frangebar, ut iam ex memoria quas mihi ipsi fecerat insidias deponerem, ut iam immissum esse ab eo C. Cornelium, qui me in meis aedibus, in conspectu uxoris ac liberorum meorum trucidaret, obliviscerer. quae si de uno me cogitasset, qua mollitia sum animi ac lenitate, numquam mehercule illius lacrimis ac precibus  
19 restituissem; sed cum mihi patriae, cum vestrorum periculorum, cum huius urbis, cum illorum delubrorum atque templorum, cum puerorum infantium, cum matronarum ac virginum veniebat in mentem, et cum illae infestae ac funestae faeces universumque totius urbis incendium, cum tela, cum caedes, cum civium cruor, cum cinis patriae versari ante oculos atque animum memoria refricare coeperat, tum denique ei resistebam, neque solum illi hosti ac parricidae, sed his etiam propinquis illius, Marcellis, patri et filio, quorum alter apud me parentis gravitatem, alter filii suavitatem obtinebat; neque me arbitrabar sine summo scelere posse, quod maleficium in aliis vindicassem, idem in illorum socio, cum scirem,  
20 defendere. atque idem ego neque P. Sullam supplicem ferre neque eosdem Marcellos pro huius periculis lacrimantis aspicere neque huius M. Messallae, hominis necessarii, preces sustinere potui; neque enim causa adversata naturae est, [nec homo] nec reus misericordiae meae repugnabit. nusquam nomen, nusquam vestigium fuerat; nullum crimen, nullum indicium, nulla suspitio. suscepi

causam, Torquate, suscepi, et feci libenter ut me, quem boni constantem, ut spero, semper existimassent, eundem ne improbi quidem crudelem dicerent.

Hic ait se ille, iudices, regnum meum ferre non posse.<sup>7</sup>  
 quod tandem, Torquate, regnum? consulatus, credo, mei;<sup>21</sup>  
 in quo ego imperavi nihil et contra patribus conscriptis  
 et bonis omnibus parui; quo in magistratu non institutum  
 est videlicet a me regnum, sed repressum. an tum in  
 tanto imperio tantaque potestate non dicis me fuisse re-  
 gem, nunc privatum regnare dicis? quo tandem nomine?  
 ‘quod in quos testimonia dixisti,’ inquit ‘damnati sunt;  
 quem defendis, sperat se absolutum iri.’ hic tibi ego de  
 testimoniis meis hoc respondeo: si falsum dixerim, te in  
 eosdem dixisse; sin verum, non esse hoc regnare, cum  
 verum iuratus dicas, probare. de huius spe tantum dico,  
 nullas a me opes P. Sullam, nullam potentiam, nihil de-  
 nique praeter fidem defensionis exspectare. ‘nisi tu’ in-<sup>22</sup>  
 quit ‘causam recepisses, numquam mihi restitisset, sed  
 indicta causa profugisset.’ si iam hoc tibi concedam, Q.  
 Hortensium, tanta gravitate hominem, si, hos talis viros  
 non suo stare iudicio, sed meo; si hoc tibi dem, quod  
 credi non potest, nisi ego huic adessem, hos adfuturos  
 non fuisse, uter tandem rex est, isne, cui innocentes ho-  
 mines non resistunt, an is, qui calamitosos non deserit?  
 at hic etiam, id quod tibi necesse minime fuit, facetus  
 esse voluisti, cum Tarquinium et Numam et me tertium  
 peregrinum regem esse dixisti. mitto iam de rege quae-  
 rere; illud quaero, peregrinum cur me esse dixeris: nam  
 si ita sum, non tam est admirandum regem esse me,  
 quoniam, ut tu ais, etiam peregrini reges Romae fuerunt,  
 quam consulem Romae fuisse peregrinum. ‘hoc dico,’<sup>23</sup>  
 inquit ‘te esse ex municipio.’ fateor, et addo etiam ex  
 eo municipio, unde iterum iam salus huic urbi imperio-  
 que missa est. sed scire ex te pervelim quam ob rem  
 qui ex municipiis veniant peregrini tibi esse videantur:  
 nemo istuc Marco illi Catoni seni, cum plurimos haberet  
 inimicos, nemo Tiberio Coruncanio, nemo Manio Curio,  
 nemo huic ipsi nostro C. Mario, cum ei multi inviderent,  
 obiecit umquam. equidem vehementer laetor cum esse  
 me, in quem tu, cum cuperes, nullam contumeliam iacere



potueris, quae non ad maximam partem civium conveniret.  
 8 sed tamen te a me pro magnis causis nostrae necessitudinis monendum esse etiam atque etiam puto: non possunt omnes esse patricii; si verum quaeris, ne curant quidem; nec se aequales tui propter istam causam abs te  
 24 anteiri putant. ac si tibi nos peregrini videmur, quorum iam et nomen et honos inveteravit et urbi huic et hominum famae ac sermonibus, quam tibi illos competitores tuos peregrinos videri necesse erit, qui iam ex tota Italia delecti tecum de honore ac de omni dignitate contendunt; quorum tu cave quemquam peregrinum appelles, ne peregrinorum suffragiis obruare; qui si attulerint nervos et industriam, mihi crede, excutient tibi istam verborum iactationem et te ex somno saepe excitabunt nec patientur se abs te, nisi virtute vincentur, honore superari. ac  
 25 si, iudices, ceteris patriciis me et vos peregrinos videri oporteret, a Torquato tamen hoc vitium sileretur; est enim ipse a materno genere municipalis, honestissimi ac nobilissimi generis, sed tamen Aesculani. aut igitur doceat Picentis solos non esse peregrinos aut gaudeat suo generi me meum non antepondere. qua re neque tu me peregrinum posthac dixeris, ne gravius refutere, neque regem, ne deridere. nisi forte regium tibi videtur ita vivere, ut non modo homini nemini, sed ne cupiditati quidem ulli servias; contemnere omnis libidines, non auri, non argenti, non ceterarum rerum indigere, in senatu sentire libere, populi magis utilitati consulere quam voluntati; nemini cedere, multis obsistere. si hoc putas esse regium, regem me esse confiteor; sin te potentia mea, si dominatio, si denique aliquod dictum adrogans aut superbum movet, quin tu id potius profers quam verbi invidi-  
 9  
 26 diam contumeliamque maledicti? ego, tantis a me beneficiis in re publica positus, si nullum aliud mihi praemium ab senatu populoque Romano nisi honestum otium postularem, quis non concederet? sibi haberent honores, sibi imperia, sibi provincias, sibi triumphos, sibi alia praeclarae laudis insignia; mihi liceret eius urbis, quam conservassem, conspectu tranquillo animo et quieto frui. quid? si hoc non postulo; si ille labor meus pristinus, si sollicitudo, si officia, si operae, si vigiliae deserviunt

amicis, praesto sunt omnibus; si neque amici in foro requirunt studium meum neque res publica in curia; si me non modo non rerum gestarum vacatio, sed neque honoris neque aetatis excusatio vindicat labore; si voluntas mea, si industria, si domus, si animus, si aures patent omnibus; si mihi ne ad ea quidem, quae pro salute omnium gessi, recordanda et cogitanda quicquam relinquitur temporis, tamen hoc regnum appellabitur, cuius vicarius qui velit esse inveniri nemo potest? longe abest a me regni suspitio; sin quaeris qui sint Romae regnum occupare<sup>27</sup> conati, ut ne replices annalium memoriam, ex domesticis imaginibus invenies. res enim gestae, credo, meae me nimis extulerunt ac mihi nescio quos spiritus attulerunt. quibus de rebus tam claris, tam immortalibus, iudices, hoc possum dicere, me, qui ex summis periculis eripuerim urbem hanc et vitam omnium civium, satis adeptum fore, si ex hoc tanto in omnis mortalis beneficio nullum in me periculum redundarit. etenim in qua civitate res<sup>28</sup> tantas gesserim memini; in qua urbe verser intellego: plenum forum est eorum hominum, quos ego a vestris cervicibus depuli, iudices, a meis non removi; nisi vero paucos fuisse arbitramini, qui conari aut sperare possent se tantum imperium posse delere: horum ego faces eripere de manibus et gladios extorquere potui, sicuti feci, voluntates vero consceleratas ac nefarias nec sanare potui nec tollere. qua re non sum nescius quanto periculo vivam in tanta multitudine improborum, cum mihi uni cum omnibus improbis aeternum videam esse bellum susceptum. quod si illis meis praesidiis forte invides et si ea<sup>10</sup> tibi regia videntur, quod omnes boni omnium generum<sup>29</sup> atque ordinum suam salutem cum mea coniungunt, consolare te, quod omnium mentes improborum mihi uni maxime sunt infensae et adversae: qui me non [modo] solum ideo oderunt, quod eorum conatus impios et furem consceleratum repressi, sed eo etiam magis, quod nihil iam se simile me vivo conari posse arbitrantur. at<sup>30</sup> vero quid ego mirer, si quid ab improbis de me improbe dicitur, cum L. Torquatus, primum eis fundamentis ipse adulescentiae iactis, ea spe proposita amplissimae dignitatis, deinde L. Torquati, fortissimi consulis, constantis-

simi senatoris, semper optimi civis, filius, interdum effertur immoderatione verborum? qui cum suppressa voce de scelere P. Lentuli, de audacia coniuratorum omnium dixisset, tantum modo ut vos, qui ea probatis, exaudire possetis, de supplicio [de Lentulo], de carcere magna et  
31 queribunda voce dicebat. in quo primum erat illud absurdum, quod, cum ea, quae leviter dixerat, vobis probare volebat, eos [autem], qui circum iudicium stabant, audire nolebat, non intellegebat ea, quae clare diceret, ita illos audituros, quibus se venditabat, ut vos quoque audiretis, qui [id] non probabatis; deinde alterum iam oratoris vitium non videre quid quacque causa postulet. nihil est enim tam alienum ab eo, qui alterum coniurationis accuset, quam videri coniuratorum poenam mortemque lugere. quod cum is tribunus plebis facit, qui unus videtur ex illis ad lugendos coniuratos relictus, nemini mirum est; difficile est enim tacere, cum doleas: te, si quid eius modi facis, non modo talem adulescentem, sed in ea causa, in qua te vindicem coniurationis velis esse,  
32 vehementer admiror. sed reprehendo tamen illud maxime, quod isto ingenio et prudentia praeditus causam rei publicae non tenes, qui arbitrare plebi Romanae res eas non probari, quas me consule omnes boni pro salute  
11 communi gesserunt. eque tu horum, qui adsunt, quibus te contra ipsorum voluntatem venditabas, aut tam sceleratum statuis fuisse, ut haec omnia perire voluerit, aut tam miserum, ut et se perire euperet et nihil haberet quod salvum esse vellet? an vero clarissimum virum generis vestri ac nominis nemo reprehendit, qui filium suum vita privavit, ut in ceteros firmaret imperium; tu rem publicam reprehendis, quae domesticos hostis, ne  
33 ab eis ipsa necaretur, necavit? itaque attende, Torquate, quam ego defugiam auctoritatem consulatus mei: maxima voce, ut omnes exaudire possint, dico semperque dicam: adeste omnes animis, qui adestis, quorum ego frequentia magno opere laetor; erigite mentis aurisque vestras et me de invidiosis rebus, ut ille putat, dicentem attendite! ego consul, cum exercitus perditorum civium clandestino scelere conflatus crudelissimum et luctuosissimum exitium patriae comparasset, cum ad occasum interitumque rei

publicae Catilina in castris, in his autem templis ac tectis dux Lentulus esset constitutus, meis consiliis, meis laboribus, mei capitis periculis, sine tumultu, sine dilectu, sine armis, sine exercitu, quinque hominibus comprehensis atque confectis incensione urbem, internicione civis, vastitate Italiam, interitu rem publicam liberavi; ego vitam omnium civium, statum orbis terrae, urbem hanc denique, sedem omnium nostrum, arcem regum ac nationum exterarum, lumen gentium, domicilium imperii quinque hominum amentium ac perditorum poena redemi. an me existimasti haec iniuratum in iudicio non esse <sup>34</sup> dicturum, quae iuratus in maxima contione dixissem? atque etiam illud addam, ne qui forte incipiat improbus <sup>12</sup> subito te amare, Torquate, et aliquid sperare de te, atque, ut idem omnes exaudiant, clarissima voce dicam: harum omnium rerum, quas ego in consulatu pro salute rei publicae suscepi atque gessi, L. ille Torquatus, cum esset meus contubernalis in consulatu, atque etiam in praetura fuisset, auctor, adiutor, particeps exstitit, cum princeps, cum auctor, cum signifer esset iuventutis; parens eius, homo amantissimus patriae, maximi animi, summi consilii, singularis constantiae, cum esset aeger, tamen omnibus rebus illis interfuit; nusquam est a me digressus; studio, consilio, auctoritate unus adiuvit plurimum, cum infirmitatem corporis virtute animi superaret. videsne ut eripiam te ex improborum subita gratia et re- <sup>35</sup> conciliem bonis omnibus? qui te et diligunt et retinent retinebuntque semper, nec, si forte a me desciveris, idcirco te a se et a re publica et a tua dignitate deficere patientur. sed iam redeo ad causam, atque hoc vos, iudices, testor: mihi de memet ipso tam multa dicendi necessitas quaedam imposita est ab illo; nam si Torquatus Sullam solum accusasset, ego quoque hoc tempore nihil aliud agerem nisi eum, qui accusatus esset, defenderem; sed cum ille tota illa oratione in me esset invectus et cum, ut initio dixi, defensionem meam spoliare auctoritate voluisset, etiam si dolor *me* meus respondere non cohereret, tamen ipsa causa hanc a me orationem flagitavisset.

Ab Allobrogibus nominatum Sullam esse dicis. quis <sup>13</sup> negat? sed lege indicium et vide quem ad modum no- <sup>36</sup>



minatus sit. L. Cassium dixerunt commemorasse cum ceteris Autronium secum facere. quaero num Sullam dixerit Cassius? nusquam: sese aiunt quaesisse de Cassio quid Sulla sentiret. videte diligentiam Gallorum; qui vitam hominum naturamque non nossent ac tantum audivissent eos pari calamitate esse, quaesiverunt essentne eadem voluntate. quid tum Cassius? si respondisset idem sentire et secum facere Sullam, tamen mihi non videretur in hunc id criminosum esse debere. quid ita? quia qui barbaros homines ad bellum impelleret, non debebat minuere illorum suspicionem et purgare eos, de quibus  
37 illi aliquid suspicari viderentur. non respondit tamen una facere Sullam; etenim esset absurdum, cum ceteros sua sponte nominasset, mentionem facere Sullae nullam nisi admonitum et interrogatum; nisi forte veri simile est P. Sullae nomen in memoria Cassio non fuisse. si nobilitas hominis, si adflcta fortuna, si reliquiae pristinae dignitatis non tam inlustres fuissent, tamen Autronii commemoratio memoriam Sullae rettulisset; etiam, ut arbitror, cum auctoritates principum coniurationis ad incitandos animos Allobrogum conligeret Cassius, et cum sciret exterarum nationes maxime nobilitate moveri, non prius Au-  
38 tronium quam Sullam nominavisset. iam vero illud probari minime potest, Gallos Autronio nominato putasse propter calamitatis similitudinem sibi aliquid de Sulla esse quaerendum, Cassio, si hic esset in eodem scelere, ne cum appellasset quidem Autronium, huius in mentem venire potuisse. sed tamen quid respondit de Sulla Cassius? se nescire certum. 'non purgat' inquit. dixi antea: ne si argueret quidem tum denique, cum esset interrogatus, id mihi criminosum videretur.  
39 sed ego in quaestionibus et indiciis non hoc quaerendum arbitror, num purgetur aliquis, sed num arguatur. etenim cum se negat scire Cassius, utrum sublevat Sullam an satis probat se nescire? — sublevat apud Gallos. — quid ita? ne indicent? quid? si periculum esse putasset, ne illi umquam indicarent, de se ipse confessus esset? nesciit videlicet. credo celatum esse Cassium de Sulla uno; nam de ceteris certe sciebat: etenim domi eius pleraque conflata esse constabat. qui negare noluit esse in eo numero

Sullam, quo plus spei Gallis daret, dicere autem falsum non ausus est, nescire dixit. atque hoc perspicuum est, cum is, qui de omnibus scierit, de Sulla se scire negarit, eandem esse vim negationis huius, quam si extra coniurationem hunc esse se scire dixisset; nam cuius scientiam de omnibus constat fuisse, eius ignoratio de aliquo purgatio debet videri. sed iam non quaero purgetne Cassius Sullam: illud mihi tantum satis est, contra Sullam nihil esse in indicio.

Exclusus hac criminatione Torquatus rursus in me <sup>14</sup>  
inruit, me accusat: ait me aliter ac dictum sit in tabulas <sup>40</sup>  
publicas rettulisse. o di immortales! — vobis enim tribuo, quae vestra sunt; nec vero possum tantum meo ingenio dare, ut tot res, tantas, tam varias, tam repentinas in illa turbulentissima tempestate rei publicae mea sponte dispexerim; vos profecto animum meum tum conservandae patriae cupiditate incendistis; vos me ab omnibus ceteris cogitationibus ad unam salutem rei publicae convertistis; vos denique in tantis tenebris erroris et inscientiae clarissimum lumen menti meae praetulistis. vidi ego hoc, <sup>41</sup>  
vidi, nisi recenti memoria senatus auctoritatem huius indicii monumentis publicis testatus essem, fore ut aliquando non Torquatus neque Torquati quispiam similis — nam id me multum fefellit —, sed ut aliquis patrimonii naufragus, inimicus otii, bonorum hostis aliter indicata haec esse diceret, quo facilius vento aliquo in optimum quemque excitato posset in malis rei publicae portum aliquem suorum malorum invenire. itaque introductis in senatum indicibus institui senatores, qui omnia indicum dicta, interrogata, responsa perscriberent. at <sup>42</sup>  
quos viros! non solum summa virtute et fide, cuius generis erat in senatu facultas maxima, sed etiam quos sciebam memoria, scientia, celeritate scribendi facillime quae dicerentur persequi posse: C. Cosconium, qui tum erat praetor, M. Messallam, qui tum praeturam petebat, P. Nigidium, Appium Claudium. credo esse neminem qui his hominibus ad vere referendum aut fidem putet aut ingenium defuisse. quid? deinde quid feci? cum scirem <sup>15</sup>  
ita esse indicium relatum in tabulas publicas, ut illae tabulae privata tamen custodia more maiorum continerentur,

non occultavi, non continui domi, sed etiam describi ab omnibus librariis, dividi passim et pervolgari atque edi populo Romano imperavi; divisi totae Italiae, emisi in omnis provincias, eius indicii, ex quo oblata salus esset  
43 omnibus, expertem esse neminem volui. itaque dico locum in orbe terrarum esse nullum, quo in loco populi Romani nomen sit, quin eodem perscriptum hoc indicium pervenerit. in quo ego tam subito et exiguo et turbido tempore multa divinitus, ita ut dixi, non mea sponte providi: primum, ne qui posset tantum aut de rei publicae aut de alicuius periculo meminisse quantum vellet; deinde ne cui liceret umquam reprehendere illud indicium aut temere creditum criminari; postremo ne quid iam a me, ne quid ex meis commentariis quaereretur, ne aut oblivio mea aut memoria nimia videretur, ne denique aut  
44 neglegentia turpis aut diligentia crudelis putaretur. sed tamen abs te, Torquate, quaero, cum indicatus tuus esset inimicus, et esset eius rei frequens senatus et recens memoria testis, tibi, meo familiari et contubernali, prius etiam edituri indicium fuerint scribae mei, si voluisses, quam in codicem rettulissent, cum videres aliter referri, cur tacuisti, passus es? non mecum aut cum familiari meo questus es? aut quoniam tam facile inveheris in amicos, iracundius aut vehementius expostulasti? tu, cum tua vox numquam sit audita, cum indicio lecto, descripto, divulgato quieveris, tacueris, repente tantam rem ementiare et in eum locum te deducas, ut ante, quam me commutati indicii coargueris, te summae neglegentiae  
16 45 tuo iudicio convictum esse fateare? mihi cuiusquam salus tanti fuisset, ut meam neglegerem? per me ego veritatem patefactam contaminarem aliquo mendacio? quemquam denique ego iuvarem, a quo etiam crudelis insidias rei publicae factas, et me potissimum consule, putarem? quod si iam essem oblitus severitatis et constantiae meae, tamne amens eram, ut, cum litterae posteritatis causa repertae sint, quae subsidio oblivioni esse possent, ego recentem putarem memoriam cuncti senatus commentario  
46 meo posse superari? fero ego te, Torquate, iam dudum, fero, et non numquam animum incitatum ad ulciscendam orationem tuam revoco ipse et reflecto; permitto aliquid

iracundiae tuae, do adulescentiae, cedo amicitiae, tribuo  
 parenti: sed nisi tibi aliquem modum tute constitueris,  
 coges me oblitum nostrae amicitiae habere rationem meae  
 dignitatis: nemo umquam me tenuissima suspitione per-  
 strinxit, quem non perverterim ac perfregerim. sed mihi  
 hoc credas velim: non eis libentissime soleo respondere,  
 quos mihi videor facillime posse superare. tu, quoniam <sup>47</sup>  
 minime ignoras consuetudinem dicendi meam, noli hac  
 lenitate nova abuti mea, noli aculeos orationis meae, quia  
 reconditi sunt, excussos arbitrari, noli id omnino a me  
 putare esse amissum, si quid est tibi remissum atque  
 concessum. cum illae valent apud me excusationes ini-  
 iuriae tuae, iratus animus tuus, aetas, amicitia nostra,  
 tum nondum statuo te virium satis habere, ut ego tecum  
 luctari et congredi debeam: quod si esses usu atque ae-  
 tate robustior, essem idem qui soleo, cum sum laccessi-  
 tus: nunc tecum sic agam, tulisse ut potius iniuriam quam  
 rettulisse [gratiam] videar. neque vero quid mihi irascere <sup>17</sup>  
 intellegere possum. si, quod eum defendo, quem tu accu- <sup>48</sup>  
 sas, cur tibi ego non suscenseo, quod accusas eum, quem  
 ego defendo? ‘inimicum ego’ inquis ‘accuso meum.’ et  
 amicum ego defendo meum. ‘non debes tu quemquam in  
 coniurationis quaestione defendere.’ immo nemo magis  
 eum, de quo nihil umquam est suspicatus, quam is, qui  
 de aliis multa cognovit. ‘cur dixisti testimonium in alios?’  
 quia coactus sum. ‘cur damnati sunt?’ quia creditum est.  
 ‘regnum est dicere in quem velis et defendere quem velis.’  
 immo servitus est non dicere in quem velis et non defen-  
 dere quem velis; ac si considerare coeperis, utrum magis  
 mihi hoc necesse fuerit facere an istud tibi, intelleges ho-  
 nestius te inimiciarum modum statuere potuisse quam me  
 humanitatis. an vero cum honos agebatur familiae vestrae <sup>49</sup>  
 amplissimus, hoc est consulatus parentis tui, sapientis-  
 simus vir familiarissimis suis susceperat [pater tuus], cum  
 Sullam et defenderent et laudarent? intellegebat hanc  
 nobis a maioribus esse traditam disciplinam, ut nullius  
 amicitia ad pericula propulsanda impediremur. at erat  
 huic iudicio longe dissimilis illa contentio: tum adfecto  
 P. Sulla consulatus vobis pariebatur, sicuti partus est;  
 honoris erat certamen; ereptum repetere vos clamitabatis,



ut victi in campo in foro vinceretis: tum qui contra vos pro huius salute pugnabant, amicissimi vestri, quibus non irasebamini, consulatum vobis eripiebant, honori vestro repugnabant, et tamen id inviolata vestra amicitia, integro officio, vetere exemplo atque instituto optimi  
 18  
 50 cuiusque faciebant. ego vero quibus ornamentis adversor tuis? aut cui dignitati vestrae repugno? quid est quod iam ab hoc expetas? honos ad patrem, insignia honoris ad te delata sunt: tu ornatus exuviis huius venis ad eum lacerandum, quem interemisti: ego iacentem et spoliatum defendo et protego. atque hic tu et reprehendis me, quia defendam, et irasceris; ego autem non modo tibi non irascor, sed ne reprehendo quidem factum tuum: te enim existimo tibi statuisse quid faciendum putares et satis idoneum officii tui iudicem esse potuisse.

51 At accusat C. Cornelii filius et id aeque valere debet ac si pater indicaret. o patrem [Cornelium] sapientem! qui, quod praemii solet esse in indicio, reliquerit, quod turpitudinis in confessione, id per accusationem filii suscepit. sed quid est tandem, quod indicat per istum puerum Cornelius? si vetera mihi ignota, cum Hortensio communicata, respondit Hortensius; sin, ut ais, illum conatum Autronii et Catilinae, cum in campo consularibus comitiis, quae a me habita sunt, eadem facere voluerunt: Autronium tum in campo vidimus, sed quid dixi vidisse nos? ego vidi: vos enim tum, iudices, nihil laborabatis neque suspicabamini, ego tectus praesidio firmo amicorum Catilinae tum et Autronii copias et conatum  
 52 repressi. num quis est igitur qui tum dicat in campum aspirasse Sullam? atqui si tum se cum Catilina societate sceleris coniunxerat, cur ab eo discedebat? cur cum Autronio non erat? cur in pari causa non paria signa criminis reperiuntur? sed quoniam Cornelius ipse etiam nunc de indicando dubitat, ut dicitis, informat ad hoc adumbratum indicium filium, quid tandem de illa nocte dicit, cum inter falcarios ad M. Laecam nocte ea, quae consecuta est posterum diem nonarum Novembrium me consule, Catilinae denuntiatione convenit? quae nox omnium temporum coniurationis acerrima fuit atque acerbissima: tum Catilinae dies exeundi, tum ceteris manendi

condicio, tum discriptio totam per urbem caedis atque incendiorum constituta est; tum tuus pater, Corneli, id quod tandem aliquando confitetur, illam sibi officiosam provinciam depoposcit, ut cum prima luce consulem salutatum veniret, intromissus et meo more et iure amicitiae me in meo lectulo trucidaret. hoc tempore, cum arderet acerrime coniuratio, cum Catilina egrederetur ad exercitum, Lentulus in urbe relinqueretur, Cassius incendiis, Cethegus caedi praeponeretur, Autronio ut occuparet Etruriam praescriberetur, cum omnia ordinarentur, instruerentur, pararentur, ubi fuit Sulla, Corneli? num Romae? immo longe afuit: num in eis regionibus, quae se Catilina inferebat? multo etiam longius: num in agro Camerti, Piceno, Gallico, quas in oras maxime quasi morbus quidam illius furoris pervaserat? nihil vero minus. fuit enim, ut iam ante dixi, Neapoli; fuit in ea parte Italiae, quae maxime ista suspitione caruit. quid ergo indicat aut quid adfert aut ipse Cornelius aut vos, qui haec ab illo mandata defertis? gladiatores emptos esse Fausti simulatione ad caedem ac tumultum. ita prorsus: interpositi sunt gladiatores, quos testamento patris videmus deberi. ‘adrepta est familia, quae si esset praetermissa, posset alia familia Fausti munus praebere.’ utinam quidem haec ipsa non modo iniquorum invidiae, sed aequorum expectationi satis facere posset! ‘properatum vehementer est, cum longe tempus muneris abesset.’ quasi vero tempus dandi muneris non valde appropinquaret. ‘nec opinante Fausto, cum is neque sciret neque vellet, familia est comparata.’ at litterae sunt Fausti, per quas ille precibus a P. Sulla petit ut emat gladiatores et ut hos ipsos emat, neque solum ad Sullam missae, sed ad L. Caesarem, Q. Pompeium, C. Memmiam, quorum de sententia tota res gesta est. ‘at praefuit familiae.’ iam si in paranda familia nulla suspitio est, quis praefuerit nihil ad rem pertinet; sed tamen in munere servili obtulit se ad ferramenta prospicienda; praefuit vero numquam, eaque res omni tempore per Bellum, Fausti libertum, administrata est.

‘At enim Sittius est ab hoc in ulteriorem Hispaniam missus, ut eam provinciam perturbaret.’ primum Sittius,

iudices, L. Iulio C. Figulo consulibus profectus est aliquanto ante furorem Catilinae et suspicionem huius coniurationis; deinde est profectus non tum primum, sed cum in eisdem locis aliquanto ante eadem de causa aliquot annos fuisset; ac profectus est non modo ob causam, sed etiam ob necessariam causam, magna ratione cum Mauritaniae rege contracta. tum autem, illo profecto, Sulla procurante eius rem et gerente, plurimis et pulcherrimis P. Sittii praediis venditis aes alienum eiusdem est dissolutum, ut, quae causa ceteros ad facinus impulit, cupiditas retinendae possessionis, ea Sittio non  
57 fuerit, praediis deminutis. iam vero illud quam incredibile, quam absurdum, qui Romae caedem facere, qui hanc urbem inflammare vellet, cum familiarissimum suum dimittere ab se et amandare in ultimas terras! utrum quo facilius Romae ea, quae conabatur, efficeret, si in Hispania turbatum esset? at haec ipsa per se sine ulla conjunctione agebantur. an in tantis rebus, tam novis consiliis, tam periculosis, tam turbulentis hominem amantissimum sui, familiarissimum, coniunctissimum officiis, consuetudine, usu, dimittendum esse arbitrabatur? veri simile non est, ut, quem in secundis rebus, quem in otio semper secum habuisset, hunc in adversis et in eo  
58 multu, quem ipse comparabat, ab se dimitteret. ipse autem Sittius — non enim mihi deserenda est causa amici veteris atque hospitis — is homo est aut ea familia ac disciplina, ut hoc credi possit, cum bellum populo Romano facere voluisse? ut, cuius pater, cum ceteri deficerent finitimi ac vicini, singulari exstiterit in rem publicam nostram officio et fide, is sibi nefarium bellum contra patriam suscipiendum putarit? cuius aes alienum videmus, iudices, non libidine, sed negotii gerendi studio esse contractum; qui ita Romae debuit, ut in provinciis et in regnis ei maximae pecuniae deberentur, quas cum peteret, non commisit ut sui procuratores quicquam oneris absente se sustinerent: venire omnis suas possessiones et patrimonio se ornatissimo spoliari maluit quam ullam  
59 moram cuiquam fieri creditorum suorum. a quo quidem genere, iudices, ego numquam timui, cum in illa rei publicae tempestate versarer: illud erat hominum genus

horribile et pertimescendum, qui tanto amore suas possessiones amplexi tenebant, ut ab eis membra citius divelli ac distrahi posse diceres. Sittius numquam sibi cognationem cum praediis esse existimavit suis; itaque se non modo ex suspitione tanti sceleris, verum etiam ex omni hominum sermone non armis, sed patrimonio suo vindicavit.

Iam vero quod obiecit, Pompeianos esse a Sulla impulsos, ut ad istam coniurationem atque ad hoc nefarium facinus accederent, id cuius modi sit intellegere non possum. an tibi Pompeiani coniurasse videntur? quis hoc dixit unquam aut quae fuit istius rei vel minima suspitio? ‘diunxit’ inquit ‘eos a colonis, ut hoc discidio ac dissensione facta oppidum in sua potestate posset per Pompeianos habere. primum omnis Pompeianorum colonorumque dissensio delata ad patronos est, cum iam inveterasset ac multos annos esset agitata; deinde ita a patronis res cognita est, ut nulla in re a ceterorum sententiis Sulla dissenserit; postremo coloni ipsi sic intellegunt, non Pompeianos a Sulla magis quam sese esse defensos. atque hoc, iudices, ex hac frequentia colonorum, honestissimorum hominum, intellegere potestis, qui adsunt, laborant; hunc patronum, defensorem, custodem illius coloniae si in omni fortuna atque omni honore incolumem habere non potuerunt, in hoc tamen casu, in quo afflictus iacet, per vos iuvari conservarique cupiunt. adsunt pari studio Pompeiani, qui ab istis etiam in crimen vocantur; qui ita de ambulatione ac de suffragiis suis cum colonis dissenserunt, ut idem de communi salute sentirent. ac ne haec quidem P. Sullae mihi videtur silentio praetereunda esse virtus, quod, cum ab hoc illa colonia deducta sit, et cum commoda colonorum a fortunis Pompeianorum rei publicae fortuna diunxerit, ita carus utrisque est atque iucundus, ut non alteros demovisse, sed utrosque constituuisse videatur.

‘At enim et gladiatores et omnis ista vis rogationis Caeciliae causa comparabatur.’ atque hoc loco in L. Caecilium, pudentissimum atque ornatissimum virum, vehementer invectus est: cuius ego de virtute et constantia, iudices, tantum dico, talem hunc in ista rogatione, quam



promulgarat non de tollenda, sed de levanda calamitate fratris sui, fuisse, ut consulere voluerit fratri, cum re publica pugnare noluerit; promulgarit impulsus amore fraterno, destiterit fratris auctoritate deductus. atque in ea re per L. Caecilium Sulla accusatur, in qua re est uterque laudandus; primum Caecilius, qui si id promulgavit, in quo res iudicatas videatur voluisse rescindere, ut restitueretur Sulla, recte reprehendis; status enim reipublicae maxime iudicatis rebus continetur; neque ego tantum fraterno amoris dandum arbitror, ut quisquam, dum saluti suorum consulat, communem relinquat: *at* nihil de iudicio ferebat, sed poenam ambitus eam referebat, quae fuerat nuper, superioribus legibus constituta; itaque hac rogatione non iudicium sententia, sed legis vitium corripiebatur. nemo iudicium reprehendit, cum de poena queritur, sed legem; damnatio est enim iudicium, quae manebat; poena legis, quae levabatur. noli igitur animos eorum ordinum, qui praesunt iudiciis summa cum gravitate et dignitate, alienare a causa: nemo labefactare iudicium est conatus, nihil est eius modi promulgatum: semper Caecilius in calamitate fratris sui iudicium potestatem perpetuandam, legis acerbitatem mitigandam putavit. sed quid ego de hoc plura disputem? dicerem fortasse et facile et libenter dicerem, si paulo etiam longius, quam finis cotidiani officii postulat, L. Caecilium pietas et fraternus amor propulisset; implorarem sensus vestros; unius cuiusque indulgentiam in suos testarer; peterem veniam errato L. Caecilii ex intimis vestris cogitationibus atque ex humanitate communi. lex dies fuit proposita paucos: ferri coepta numquam, deposita est in senatu. Kalendis Ianuariis cum in Capitolium nos senatum convocassemus, nihil est actum prius, et id mandatu Sullae Q. Metellus praetor se loqui dixit, Sullam illam rogationem de se nolle ferri. ex illo tempore L. Caecilius egit de re publica multa: agrariae legi, quae tota a me reprehensa et abiecta est, se intercessorem fore professus est, improbis largitionibus restitit, senatus auctoritatem numquam impedivit, ita se gessit in tribunatu, ut onere deposito domestici officii nihil postea nisi de rei publicae commodis cogitarit. atque in ipsa rogatione ne per vim quid ageretur, quis tum nostrum

Sullam aut Caecilium verebatur? nonne omnis ille terror, omnis seditionis timor atque opinio ex Autronii improbitate pendebat? eius voces, eius minae ferebantur; eius aspectus, concursatio, stipatio, greges hominum perditorum tumultum nobis seditionesque adferebant. itaque P. Sulla hoc importunissimo cum honoris tum etiam calamitatis socio atque comite et secundas fortunas amittere coactus est et in adversis sine ullo remedio atque adlevamento permanere.

Hic tu epistolam meam saepe recitas, quam ego ad <sup>24</sup>  
Cn. Pompeium de meis rebus gestis et de summa re publica misi, et ex ea crimen aliquod in P. Sullam quaeris; et, si furorem incredibilem biennio ante conceptum erupisse in meo consulatu scripsi, me hoc demonstrasse dicis, Sullam in illa fuisse superiore coniuratione. scilicet ego is sum qui existimem Cn. Pisonem et Catilinam et Vargunteium et Autronium nihil scelerate, nihil audacter ipsos per sese sine P. Sulla facere potuisse: de quo etiam si quis dubitasset antea, num, id quod tu <sup>68</sup> arguis, cogitasset, interfecto patre tuo consule descendere Kalendis Ianuariis cum lictoribus, sustulisti hanc suspicionem, cum dixisti hunc, ut Catilinam consulem efficeret, contra patrem tuum operas et manum comparasse. quod si tibi ego confitear, tu mihi concedas necesse est, hunc, cum Catilinae suffragaretur, nihil de suo consulatu, quem iudicio amiserat, per vim recuperando cogitavisse; neque enim istorum facinorum tantorum, tam atrocium crimen, iudices, P. Sullae persona suscipit.

Iam enim faciam, criminibus omnibus fere dissolutis, <sup>69</sup> contra atque in ceteris causis fieri solet, ut nunc denique de vita hominis ac de moribus dicam: etenim de principio studuit animus occurrere magnitudini criminis, satis facere exspectationi hominum, de me aliquid ipso, qui accusatus eram, dicere; nunc iam revocandi estis eo, quo vos ipsa causa, etiam tacente me, cogit animos mentisque convertere. omnibus in rebus, iudices, quae gra- <sup>25</sup> viores maioresque sunt, quid quisque voluerit, cogitarit, admiserit non ex crimine, sed ex moribus eius, qui arguitur, est ponderandum; neque enim potest quisquam nostrum subito fingi neque cuiusquam repente vita mutari

70 aut natura converti. circumspicite paulisper mentibus vestris, ut alia mittamus, hosce ipsos homines, qui huic adfines scelerei fuerunt. Catilina contra rem publicam coniuravit. cuius aures umquam haec respuerunt conatum esse audacter hominem a pueritia non solum intemperantia et scelere, sed etiam consuetudine et studio in omni flagitio, stupro, caede versatum? quis cum contra patriam pugnanti perisse miratur, quem semper omnes ad civile latrocinium natum putaverunt? quis Lentuli societates cum indicibus, quis insaniam libidinum, quis perversam atque impiam religionem recordatur, qui illum aut nefarie cogitasse aut stulte sperasse miretur? quis de C. Cethego atque eius in Hispaniam profectio ac de vulnere Q. Metelli Pii cogitat cui non ad illius poenam carcer aedificatus esse videatur? omitto ceteros, ne sit  
 71 infinitum: tantum a vobis peto, ut taciti de omnibus, quos coniurasse cognitum est, cogitetis: intellegetis unum quemque eorum prius a sua vita quam a vestra suspicionem esse damnatum. ipsum illum Autronium, quoniam eius nomen finitimum maxime est huius periculo et crimini, non sua vita ac natura convicit? semper audax, petulans, libidinosus; quem in stuprorum defensionibus non solum verbis uti improbissimis solitum esse scimus, verum etiam pugnis et calcibus; quem exturbare homines e possessionibus, caedem facere vicinorum, spoliare fana sociorum, vi [conatum] et armis disturbare iudicia, in bonis rebus omnis contemnere, in malis pugnare contra bonos, non rei publicae cedere, non fortunae ipsi succumbere. huius si causa non manifestissimis rebus tenebatur, tamen eum mores ipsius ac vita convincerent.  
 26  
 72 agedum, conferte nunc cum illius vitam P. Sullae, vobis populoque Romano notissimam, iudices, et eam ante oculos vestros proponite. eequod est huius factum aut commissum non dicam audacius, sed quod cuiquam paulo minus consideratum videatur? factum quaero? verbum eequod umquam ex ore huius excidit, in quo quisquam posset offendi? at vero in illa gravi L. Sullae turbulentaque victoria quis P. Sulla mitior, quis misericordior inventus est? quam multorum hic vitam est a L. Sulla deprecatus! quam multi sunt summi homines et ornatissimi

et nostri et equestris ordinis, quorum pro salute se hic Sullae obligavit! quos ego nominarem; neque enim ipsi nolunt et huic animo gratissimo adsunt: sed quia maius est beneficium, quam posse debet civis civi dare, ideo a vobis peto, ut quod potuit tempori tribuatis, quod fecit ipsi. quid reliquam constantiam vitae commemorem? 73 dignitatem, liberalitatem, moderationem in privatis rebus, splendorem in publicis? quae ita deformata sunt a fortuna, ut tamen a natura inchoata compareant. quae domus [quae] celebratio cotidiana! quae familiarium dignitas! quae studia amicorum! quae ex quoque ordine multitudo! haec diu multumque et multo labore quaesita una eripuit hora. accepit P. Sulla, iudices, volnus vehemens et mortiferum, verum tamen eius modi quod videretur huius vita et natura accipere potuisse. honestatis enim et dignitatis habuisse nimis magnam iudicatus est cupiditatem: quam si nemo alius habuit in consulatu petendo, cupidior iudicatus est hic fuisse quam ceteri; sin etiam in aliis non nullis fuit iste consulatus amor, fortuna in hoc fuit fortasse gravior quam in ceteris. postea vero 74 quis P. Sullam nisi maerentem, demissum afflictumque vidit? quis umquam est suspicatus hunc magis odio quam pudore hominum aspectum lucemque vitare? qui cum multa haberet invitamenta urbis et fori propter summa studia amicorum, quae tamen ei sola in malis restiterunt, afuit ab oculis vestris, et, cum lege retineretur, ipse se exsilio paene multavit. in hoc vos pudore, iudices, et in 27 hac vita tanto scelere locum fuisse creditis? aspiciate ipsum, contuemini os, conferte crimen cum vita; vitam ab initio usque ad hoc tempus explicatam cum crimine recognoscite: mitto rem publicam, quae fuit semper Sullae caris- 75 sima: hosne amicos, talis viros, tam cupidos sui, per quos res eius secundae quondam erant ornatae, nunc sublevantur adversae, crudelissime perire voluit, ut cum Lentulo et Catilina et Cethego foedissimam vitam ac miserrimam turpissima morte proposita degeret? non, inquam, cadit in hos mores, non in hunc pudorem, non in hanc vitam, non in hunc hominem ista suspitio. nova quaedam illa immanitas exorta est; incredibilis fuit ac singularis furor; ex multis ab adolescentia conlectis per-



ditorum hominum vitiis repente ista tanta importunitas  
 76 inauditi sceleris exarsit. nolite, iudices, arbitrari homi-  
 num illum impetum et conatum fuisse: neque enim ulla  
 gens tam barbara aut tam immanis umquam fuit in qua  
 non modo tot, sed unus tam crudelis hostis patriae sit  
 inventus: beluae quaedam illae ex portentis immanes ac  
 ferae, forma hominum indutae, exstiterunt. perspicite  
 etiam atque etiam, iudices; nihil enim est quod in hac  
 causa dici possit vehementius; penitus introspicite Catilinae,  
 Autronii, Cethegi, Lentuli ceterorumque mentis:  
 quas vos in his libidines, quae flagitia, quas turpitudines,  
 quantas audacias, quam incredibilis furores, quas notas  
 facinorum, quae indicia parricidiorum, quantos acervos  
 scelerum reperietis! ex magnis et diuturnis et iam de-  
 speratis rei publicae morbis ista repente vis erupit, ut ea  
 confecta et eiecta convalescere aliquando et sanari civi-  
 tas posset; neque enim est quisquam qui arbitretur illis  
 inclusis in re publica pestibus diutius haec stare potuisse;  
 itaque eos non ad perficiendum scelus, sed ad luendas  
 28 rei publicae poenas Furiae quaedam incitaverunt. in hunc  
 77 igitur gregem vos nunc P. Sullam, iudices, ex his, qui  
 cum hoc vivunt aut vixerunt, honestissimorum amicorum  
 gregibus reicietis? ex hoc hominum numero, ex hac fa-  
 miliarium dignitate in impiorum partem atque in parrici-  
 darum sedem atque numerum transferetis? ubi erit igitur  
 illud firmissimum praesidium pudoris? quo in loco nobis  
 vita ante acta proderit? quod ad tempus existimationis  
 partae fructus reservabitur, si non extremo discrimine ac  
 dimicatione fortunae deserviet, si non aderit, si nihil ad-  
 78 iuvabit? quaestiones nobis servorum accusator ac tor-  
 menta minuitur; in quibus quamquam nihil periculi suspi-  
 camur, tamen illa tormenta gubernat dolor, moderatur  
 natura cuiusque cum animi tum corporis, regit quaesitor,  
 flectit libido, corrumpit spes, infirmat metus, ut in tot  
 rerum angustiis nihil veritati loci relinquatur: vita P. Sullae  
 torqueatur; ex ea quaeratur num quae occultetur libido,  
 num quod lateat facinus, num quae crudelitas, num quae  
 audacia: nihil erroris erit in causa nec obscuritatis, iudi-  
 ces, si a vobis vitae perpetuae vox, ea quae verissima et  
 79 gravissima debet esse, audietur. nullum in hac causa

testem timemus; nihil quemquam scire, nihil vidisse, nihil audisse arbitramur. sed tamen, si nihil vos P. Sullae fortuna movet, iudices, vestra moveat. vestra enim, qui cum summa elegantia atque integritate vixistis, hoc maxime interest, non ex libidine aut similitate aut levitate testium causas honestorum hominum ponderari, sed in magnis disquisitionibus repentinisque periculis vitam unius cuiusque esse testem: quam vos, iudices, nolite armis suis spoliata atque nudata obicere invidiae, dedere suspicioni; munite communem arcem bonorum, obstruite perfugia improborum: valeat *et* ad poenam et ad salutem plurimum, quam solam videtis ipsam ex sua natura facillime perspicere, subito flecti fingique non posse.

Quid vero? haec auctoritas — semper enim est de ea <sup>29</sup>  
dicendum, quamquam a me timide modiceque dicetur —, <sup>80</sup>  
quid, inquam, haec auctoritas nostra, qui a ceteris coniurationis causis abstinuimus, P. Sullam defendimus, nihil hunc tandem iuvabit? grave est hoc dictum fortasse, iudices; grave, si appetimus aliquid; si cum ceteri de nobis silent, non etiam nosmet ipsi tacemus, grave: sed, si laedimur, si accusamur, si in invidiam vocamur, profecto conceditis, iudices, ut nobis libertatem retinere liceat, si minus liceat dignitatem. accusati sunt uno nomine consulares, ut iam videatur honoris amplissimi nomen plus <sup>81</sup>  
invidiae quam dignitatis adferre. ‘adfuerunt’ inquit ‘Catilinae illumque laudarunt.’ nulla tum patebat, nulla erat cognita coniuratio; defendebant amicum, aderant supplici, vitae eius turpitudinem in summis eius periculis non insequentur. quin etiam parens tuus, Torquate, consul reo de pecuniis repetundis Catilinae fuit advocatus, improbo homini, at supplici; fortasse audaci, at aliquando amico; cui cum adfuit post delatam ad eum primam illam coniurationem, indicavit se audisse aliquid, non credidisse. at idem non adfuit alio in iudicio, cum adessent ceteri: si postea cognorat ipse aliquid, quod in consulatu ignorasset, ignoscendum est eis, qui postea nihil audierunt; sin illa res prima valuit, num inveterata quam recens debuit esse gravior? sed si tuus parens etiam in ipsa suspicionem periculi sui, tamen humanitate adductus advocacionem hominis improbiissimi sella curuli atque ornamentis

et suis et consulatus honestavit, quid est quam ob rem consulares, qui Catilinae adfuerunt, reprehendantur? —  
<sup>82</sup> at idem eis, qui ante hunc causam de coniuratione dixerunt, non adfuerunt. tanto scelere astrictis hominibus statuerunt nihil a se adiumenti, nihil opis, nihil auxilii ferri oportere. atque ut de eorum constantia atque animo in rem publicam dicam, quorum tacita gravitas et fides de uno quoque loquitur neque cuiusquam ornamenta orationis desiderat, potest quisquam dicere umquam meliores, fortiores, constantiores consularis fuisse quam his temporibus et periculis, quibus paene oppressa est res publica? quis non de communi salute optime, quis non fortissime, quis non constantissime sensit? neque ego praecipue de consularibus disputo; nam haec et hominum ornatissimorum, qui praetores fuerunt, et universi senatus communis est laus, ut constet post hominum memoriam numquam in illo ordine plus virtutis, plus amoris in rem publicam, plus gravitatis fuisse: sed quia sunt descripti consulares, de his tantum mihi dicendum putavi, quod satis esset ad testandam omnium memoriam, neminem esse ex illo honoris gradu qui non omni studio, virtute, auctoritate incubuerit ad rem publicam conservandam. <sup>30</sup> sed quid? ego, qui Catilinam non laudavi, qui reo <sup>83</sup> Catilinae consul non adfui, qui testimonium de coniuratione dixi in alios, adeone vobis alienus a sanitate, adeo oblitus constantiae meae, adeo immemor rerum a me gestarum esse videor, ut, cum consul bellum gesserim cum coniuratis, nunc eorum ducem servare cupiam, et in animum inducam, cuius nuper ferrum rettuderim flammamque restinxerim, eiusdem nunc causam vitamque defendere? si me dius fidius, iudices, non me ipsa res publica, meis laboribus et periculis conservata, ad gravitatem animi et constantiam sua dignitate revocaret, tamen hoc natura est insitum, ut, quem timueris, quicum de vita fortunisque contenderis, cuius ex insidiis evaseris, hunc semper oderis: sed cum agatur honos meus amplissimus, gloria rerum gestarum singularis, cum quotiens quisque est in hoc scelere convictus, totiens renovetur memoria per me inventae salutis, ego sim tam demens, ego committam, ut ea, quae pro salute omnium gessi,

casu magis et felicitate a me quam virtute et consilio gesta esse videantur? quid ergo? hoc tibi sumis, dicet <sup>84</sup> fortasse quispiam, ut, quia tu defendis, innocens iudicetur? ego vero, iudices, non modo mihi nihil adsumo in quo quispiam repugnet, sed etiam, si quid ab omnibus conceditur, id reddo ac remitto. non in ea re publica versor, non eis temporibus meum caput obtuli pro patria periculis omnibus, non aut ita sunt exstincti quos vici aut ita grati quos servavi, ut ego mihi plus appetere coner quam quantum omnes inimici invidique patiantur. grave esse videtur eum, qui investigarit coniurationem, <sup>85</sup> qui patefecerit, qui oppresserit, cui senatus singularibus verbis gratias egerit, cui uni togato supplicationem decreverit, dicere in iudicio: non defenderem, si coniurasset. non dico id, quod grave est: dico illud, quod in his causis coniurationis non auctoritati adsumam, sed pudori meo: ego ille coniurationis investigator atque ultor certe non defenderem Sullam, si coniurasse arbitrarer. ego, iudices, de tantis omnium periculis cum quaererem omnia, multa audirem, crederem non omnia, caverem omnia, dico hoc, quod initio dixi, nullius indicio, nullius nuntio, nullius suspitione, nullius litteris de P. Sulla rem ullam ad me esse delatam. quam ob rem vos, di patrii ac penates, qui huic urbi atque huic rei publicae praesidetis, qui hoc imperium, qui hanc libertatem, qui populum Romanum, qui haec tecta atque templa me consule vestro numine auxilioque servastis, testor integro me animo ac libero P. Sullae causam defendere; nullum a me sciente facinus occultari, nullum scelus susceptum contra salutem omnium defendi ac tegi. nihil de hoc consul comperi, nihil suspicatus sum, nihil audiui. itaque idem ego ille, <sup>87</sup> qui vehemens in alios, qui inexorabilis in ceteros esse visus sum, persolvi patriae quod debui; reliqua iam a me meae perpetuae consuetudini naturaeque debentur: tam sum misericors, iudices, quam vos; tam mitis quam qui lenissimus. in quo vehemens fui vobiscum, nihil feci nisi coactus: rei publicae praecepitanti subveni; patriam demersam extuli; misericordia civium adducti tum fuimus tam vehementes quam necesse fuit: salus esset amissa omnium una nocte, nisi esset severitas illa suscepta. sed



ut ad sceleratorum poenam amore rei publicae sum ad-  
ductus, sic ad salutem innocentium voluntate deducor.

- 88 Nihil video esse in hoc P. Sulla, iudices, odio dignum,  
misericordia digna multa; neque enim nunc propulsandae  
calamitatis suae causa supplex ad vos, iudices, confugit,  
sed ne qua generi ac nomini suo nota nefariae turpitu-  
dinis inuratur. nam ipse quidem, si erit vestro iudicio  
liberatus, quae habebit ornamenta, quae solacia reliqua  
vitae, quibus lactari et perfrui possit? domus erit, credo,  
exornata; aperientur maiorum imagines; ipse ornatum ac  
vestitum pristinum recuperabit: omnia, iudices, haec  
amissa sunt; omnia generis, nominis, honoris insignia  
atque ornamenta unius iudicii calamitate occiderunt. sed  
ne extinctor patriae, ne proditor, ne hostis appelletur,  
ne hanc labem tanti sceleris in familia relinquat, id la-  
borat, id metuit, ne denique hic miser coniurati et con-  
scelerati et proditoris filius nominetur: huic puero, qui  
est ei vita sua multo carior, metuit, cui honoris integros  
fructus non sit traditurus, ne aeternam memoriam dede-  
coris relinquat. hic vos orat, iudices, parvus, ut se ali-  
quando si non integra fortuna, at ut afflicta, patri suo  
gratulari sinatis; huic misero notiora sunt itinera iudi-  
ciorum et fori quam campi et disciplinarum. non iam de  
vita P. Sullae, iudices, sed de sepultura contenditur:  
vita erepta est superiore iudicio; nunc ne corpus eiciatur  
laboramus. quid enim est huic reliqui quod eum in hac  
vita teneat? aut quid est quam ob rem haec cuiquam vita  
32 videatur? nuper is homo fuit in civitate P. Sulla, ut  
nemo ei se neque honore neque gratia neque fortunis an-  
teferret, nunc spoliatus omni dignitate, quae erepta sunt,  
non repetit: quod fortuna in malis reliqui fecit, ut cum  
parente, cum liberis, cum fratre, cum his necessariis  
lugere suam calamitatem liceat, id sibi ne eripiatis, vos,  
90 iudices, obtestatur. te ipsum iam, Torquate, expletum  
huius miseriis esse par erat: etsi nihil aliud Sullae nisi  
consulatum abstulissetis, tamen eo contentos vos esse  
oportebat; honoris enim contentio vos ad causam, non  
inimicitiae deduxerunt. sed cum huic omnia cum honore  
detracta sint, cum in hac fortuna miserrima ac luctuo-  
sissima destitutus sit, quid est quod expetas amplius?

lucisne hanc usuram eripere vis, plenam lacrimarum atque maeroris, in qua cum maximo cruciatu ac dolore retinetur? libenter reddiderit adempta ignominia foedissimi criminis. an vero inimicum ut expellas? cuius ex miseriis, si esses crudelissimus, videndo fructum caperes maiorem quam audiendo. o miserum et infelicem illum diem, quo <sup>91</sup> consul omnibus centuriis P. Sulla renuntiatus est! o falsam spem! o volucrem fortunam! o caecam cupiditatem! o praeposteram gratulationem! quam cito illa omnia ex laetitia et voluptate ad luctum et lacrimas reciderunt, ut, qui paulo ante consul designatus fuisset, repente nullum vestigium retineret pristinae dignitatis! quid enim erat mali quod huic, spoliato fama, honore, fortunis, deesse videretur? aut cui novae calamitati locus ullus relictus esset? urget eadem fortuna quae coepit; repperit novum maerorem; non patitur hominem calamitosum uno malo adflictum uno in luctu perire.

Sed iam impediior egomet, iudices, dolore animi, ne <sup>33</sup> de huius miseria plura dicam. vestrae sunt iam partes, <sup>92</sup> iudices; in vestra mansuetudine atque humanitate causam totam repono. vos reiectione interposita, nihil suspicantibus nobis, repentini in nos iudices consedistis, ab accusatoribus delecti ad spem acerbitatis, a fortuna nobis ad praesidium innocentiae constituti. ut ego quid de me populus Romanus existimaret, quia severus in improbos fueram, laboravi et quae prima innocentis mihi defensio est oblata suscepi, sic vos severitatem iudiciorum, quae per hos mensis in homines audacissimos facta sunt, lenitate ac misericordia mitigate. hoc cum a vobis impetrare <sup>93</sup> causa ipsa debet, tum est vestri animi atque virtutis declarare non esse eos vos, ad quos potissimum interposita reiectione devenire conveniret. in quo ego vos, iudices, quantum meus in vos amor postulat, tantum hortor, ut communi studio, quoniam in re publica coniuncti sumus, mansuetudine et misericordia nostra falsam a nobis crudelitatis famam repellamus.

## M. TULLII CICERONIS

## PRO A. LICINIO ARCHIA POETA ORATIO.

<sup>1</sup> Si quid est in me ingenii, indices, quod sentio quam  
<sup>1</sup> sit exiguum, aut si qua exercitatio dicendi, in qua me  
 non infitior mediocriter esse versatum, aut si huiusce rei  
 ratio aliqua ab optimarum artium studiis ac disciplina  
 profecta, a qua ego nullum confiteor aetatis meae tempus  
 abhorruisse, earum rerum omnium vel in primis hic A.  
 Licinius fructum a me repetere prope suo iure debet;  
 nam quoad longissime potest mens mea respicere spati-  
 um praeteriti temporis et pueritiae memoriam recor-  
 dari ultimam, inde usque repetens hunc video mihi prin-  
 cipem et ad suscipiendam et ad ingrediendam rationem  
 horum studiorum exstitisse. quod si haec vox, huius  
 hortatu praeceptisque conformata, non nullis aliquando  
 saluti fuit, a quo id accepimus quo ceteris opitulari et  
 alios servare possemus, huic profecto ipsi, quantum est  
<sup>2</sup> situm in nobis, et opem et salutem ferre debemus. ac  
 ne quis a nobis hoc ita dici forte miretur, quod alia quae-  
 dam in hoc facultas sit ingenii neque haec dicendi ratio  
 aut disciplina, ne nos quidem huic uni studio penitus um-  
 quam dediti fuimus: etenim omnes artes, quae ad huma-  
 nitatem pertinent, habent quoddam commune vinculum  
<sup>2</sup> et quasi cognatione quadam inter se continentur. sed ne  
<sup>3</sup> cui vestrum mirum esse videatur me in quaestione legi-  
 tima et in iudicio publico, cum res agatur apud praeto-  
 rem populi Romani, lectissimum virum, et apud severis-  
 simos iudices, tanto conventu hominum ac frequentia,  
 hoc uti genere dicendi quod non modo a consuetudine  
 iudiciorum, verum etiam a forensi sermone abhorreat,  
 quaeso a vobis, ut in hac causa mihi detis hanc veniam,  
 adcommodatam huic reo, vobis, quem ad modum spero,  
 non molestam, ut me pro summo poeta atque eruditissimo

homine dicentem, hoc concursu hominum litteratissimorum, hac vestra humanitate, hoc denique praetore exercente iudicium patiamini de studiis humanitatis ac litterarum paulo loqui liberius et in eius modi persona, quae propter otium ac studium minime in iudiciis periculisque tractata est, uti prope novo quodam et inusitato genere dicendi. quod si mihi a vobis tribui concedique sentiam, <sup>4</sup> perficiam profecto ut hunc A. Licinium non modo non segregandum, cum sit civis, a numero civium, verum etiam si non esset, putetis asciscendum fuisse.

Nam ut primum ex pueris excessit Archias atque ab <sup>3</sup> eis artibus, quibus actas puerilis ad humanitatem informari solet, se ad scribendi studium contulit, primum Antiochiae — nam ibi natus est loco nobili —, celebri quondam urbe et copiosa atque eruditissimis hominibus liberalissimisque studiis adfluente, celeriter antecellere omnibus ingenii gloria contigit. post in ceteris Asiae partibus cunctaeque Graeciae sic eius adventus celebrabantur, ut famam ingenii expectatio hominis, expectationem ipsius adventus admiratioque superaret. erat Italia tunc plena <sup>5</sup> Graecarum artium ac disciplinarum studiaque haec et in Latio vehementius tum colebantur quam nunc eisdem in oppidis et hic Romae propter tranquillitatem rei publicae non neglegebantur. itaque hunc et Tarentini et Regini et Neapolitani civitate ceterisque praemiis donarunt et omnes, qui aliquid de ingeniis poterant iudicare, cognitione atque hospitio dignum existimarunt. hac tanta celebritate famae cum esset iam absentibus notus, Romam venit Mario consule et Catulo. nactus est primum consules eos, quorum alter res ad scribendum maximas, alter cum res gestas tum etiam studium atque auris adhibere posset. statim Luculli, cum praetextatus etiam tum Archias esset, eum domum suam receperunt. sed etiam hoc non solum ingenii ac litterarum, verum etiam naturae atque virtutis, ut domus, quae huius adulescentiae prima fuit, eadem esset familiarissima senectuti. erat temporibus illis iucundus Metello illi Numidico et <sup>6</sup> eius Pio filio, audiebatur a M. Aemilio, vivebat cum Q. Catulo et patre et filio, a L. Crasso colebatur, Lucullos vero et Drusum et Octavios et Catonem et totam



Hortensiorum domum devinctam consuetudine cum teneret, adficebatur summo honore, quod cum non solum colebant qui aliquid percipere atque audire studebant, 4 verum etiam si qui forte simulabant. interim satis longo intervallo, cum esset cum M. Lucullo in Siciliam profectus et cum ex ea provincia cum eodem Lucullo decederet, venit Heracliam: quae cum esset civitas acquisitissimo iure ac foedere, ascribi se in eam civitatem voluit, idque, cum ipse per se dignus putaretur, tum auctoritate 7 et gratia Luculli ab Heracliensibus impetravit. data est civitas Silvani lege et Carbonis, si qui FOEDERATIS CIVITATIBUS ASCRIPTI FUISSENT: SI TUM, CUM LEX FEREBATUR, IN ITALIA DOMICILIUM HABUISSENT ET SI SEXAGINTA DIEBUS APUD PRAETOREM ESSENT PROFESSI. cum hic domicilium Romae multos iam annos haberet, professus est apud praetorem 8 Q. Metellum familiarissimum suum. si nihil aliud nisi de civitate ac lege dicimus, nihil dico amplius, causa dicta est. quid enim horum infirmari, Grati, potest? Heracliaeae esse tum ascriptum negabis? adest vir summa auctoritate et religione et fide, M. Lucullus, qui se non opinari, sed scire, non audisse, sed vidisse, non interfuisse, sed egisse dicit; adsunt Heraclienses legati, nobilissimi homines huius iudicii causa cum mandatis et cum publico testimonio [venerunt], qui hunc ascriptum Heracliensem dicunt. hic tu tabulas desideras Heracliensium publicas, quas Italico bello incenso tabulario interisse scimus omnis. est ridiculum ad ea, quae habemus, nihil dicere, quaerere quae habere non possumus, et de hominum memoria tacere, litterarum memoriam flagitare, et, cum habeas amplissimi viri religionem, integerrimi municipii ius iurandum fidemque, ea, quae depravari nullo modo possunt, repudiare, tabulas, quas idem dicis 9 solere corrumpi, desiderare. an domicilium Romae non habuit is, qui tot annis ante civitatem datam sedem omnium rerum ac fortunarum suarum Romae conlocavit? at non est professus. immo vero eis tabulis professus, quae solae ex illa professione conlegioque praetorum obtinent 5 publicarum tabularum auctoritatem. nam cum Appii tabulae neglegentius adservatae dicerentur, Gabinii, quam diu incolumis fuit, levitas, post damnationem calamitas

omnem tabularum fidem resignasset, Metellus, homo sanctissimus modestissimusque omnium, tanta diligentia fuit, ut ad L. Lentulum praetorem et ad iudices venerit et unius nominis litura se commotum esse dixerit. in his igitur tabulis nullam lituram in nomine A. Licinii videtis. quae cum ita sint, quid est quod de eius civitate dubite-<sup>10</sup> tis, praesertim cum aliis quoque in civitatibus fuerit ascriptus? etenim cum mediocribus multis et aut nulla aut humili aliqua arte praeditis gratuito civitatem in Graecia homines impertiebant, Reginos credo aut Locrensis aut Neapolitanos aut Tarentinos, quod scenicis artificibus largiri solebant, id huic summa ingenii praedito gloria noluisse! quid? cum ceteri non modo post civitatem datam, sed etiam post legem Papiam aliquo modo in eorum municipiorum tabulas inrepserunt, hic, qui ne utitur quidem illis, in quibus est scriptus, quod semper se Heracliensem esse voluit, reicietur? census<sup>11</sup> nostros requiris scilicet: est enim obscurum proximis censoribus hunc cum clarissimo imperatore L. Lucullo apud exercitum fuisse, superioribus cum eodem quaestore fuisse in Asia, primis Iulio et Crasso nullam populi partem esse censam. sed quoniam census non ius civitatis confirmat ac tantum modo indicat eum, qui sit census, [ita] se iam tum gessisse pro cive, eis temporibus, quibus tu criminari ne ipsius quidem iudicio in civium Romanorum iure esse versatum, et testamentum saepe fecit nostris legibus et adiit hereditates civium Romanorum et in beneficiis ad aerarium delatus est a L. Lucullo pro consule. quaere<sup>6</sup> argumenta, si qua potes: numquam enim hic neque suo neque amicorum iudicio revincetur.

Quaeres a nobis, Grati, cur tanto opere hoc homine<sup>12</sup> delectemur. quia suppeditat nobis ubi et animus ex hoc forensi strepitu reficiatur et aures convitio defessae conquiescant. an tu existimas aut suppetere nobis posse quod cotidie dicamus in tanta varietate rerum, nisi animos nostros doctrina excolamus, aut ferre animos tantam posse contentionem, nisi eos doctrina eadem relaxemus? ego vero fateor me his studiis esse deditum: ceteros pudeat, si qui se ita litteris abdiderunt, ut nihil possint ex eis neque ad communem adferre fructum neque in aspectum

lucemque proferre: me autem quid pudeat, qui tot annos ita vivo, iudices, ut a nullius umquam me tempore aut commodo aut otium meum abstraxerit aut voluptas avocarit aut denique somnus retardarit? qua re quis tandem me reprehendat aut quis mihi iure suscenseat, si, quantum ceteris ad suas res obeundas, quantum ad festos dies ludorum celebrandos, quantum ad alias voluptates et ad ipsam requiem animi et corporis conceditur temporum, quantum alii tribuunt tempestivis conviviis, quantum denique alveolo, quantum pilae, tantum mihi egomet ad haec studia recolenda sumpsero? atque hoc ideo mihi concedendum est magis, quod ex his studiis haec quoque crescit oratio et facultas, quae quantacumque in me est, numquam amicorum periculis defuit: quae si cui levior videtur, illa quidem certe, quae summa sunt, ex quo fonte

14 hauriam sentio: nam nisi multorum praeceptis multisque litteris mihi ab adolescentia suasissem nihil esse in vita magno opere expetendum nisi laudem atque honestatem, in ea autem persequenda omnis cruciatus corporis, omnia pericula mortis atque exsilii parvi esse ducenda, numquam me pro salute vestra in tot ac tantas dimicationes atque in hos profligatorum hominum cotidianos impetus obiecissem. sed pleni omnes sunt libri, plenae sapientium voces, plena exemplorum vetustas; quae iacerent in tenebris omnia, nisi litterarum lumen accederet. quam multas nobis imagines non solum ad intuendum, verum etiam ad imitandum fortissimorum virorum expressas scriptores et Graeci et Latini reliquerunt! quas ego mihi semper in administranda re publica proponens animum et mentem ipsa cogitatione hominum excellentium conformabam.

7  
15 Quæret quispiam: quid? illi ipsi summi viri, quorum virtutes litteris proditae sunt, istane doctrina, quam tu effers laudibus, eruditi fuerunt? difficile est hoc de omnibus confirmare, sed tamen est certe quod respondeam. ego multos homines excellenti animo ac virtute fuisse et sine doctrina naturae ipsius habitu prope divino per se ipsos et moderatos et gravis exstitisse fateor; etiam illud adiungo, saepius ad laudem atque virtutem naturam sine doctrina quam sine natura valuisse doctrinam. atque idem

ego contendo, cum ad naturam eximiam atque inlustrem accesserit ratio quaedam conformatioque doctrinae, tum illud nescio quid praeclarum ac singulare soleat exsistere. ex hoc esse hunc numero, quem patres nostri viderunt, <sup>16</sup> divinum hominem Africanum, ex hoc C. Laelium, L. Furium, moderatissimos homines et continentissimos, ex hoc fortissimum virum et illis temporibus doctissimum, M. Catonem illum senem; qui profecto si nihil ad percipiendam [colendam] virtutem litteris adjuvarentur, numquam se ad earum studium contulissent. quod si non hic tantus fructus ostenderetur et si ex his studiis delectatio sola peteretur, tamen, ut opinor, hanc animi adversionem humanissimam ac liberalissimam iudicaretis. nam ceterae neque temporum sunt neque aetatum omnium neque locorum: haec studia adolescentiam alunt, senectutem oblectant, secundas res ornant, adversis perfugium ac solacium praebent, delectant domi, non impediunt foris, pernoctant nobiscum, peregrinantur, rusticantur.

Quod si ipsi haec neque attingere neque sensu nostro <sup>17</sup> gustare possemus, tamen ea mirari deberemus, etiam cum in aliis videremus. quis nostrum tam animo agresti ac <sup>8</sup> duro fuit, ut Roscii morte nuper non commoveretur? qui cum esset senex mortuus, tamen propter excellentem artem ac venustatem videbatur omnino mori non debuisse. ergo ille corporis motu tantum amorem sibi conciliarat a nobis omnibus: nos animorum incredibilis motus celeritatemque ingeniorum neglegemus? quotiens ego hunc <sup>18</sup> Archiam vidi, iudices, — utar enim vestra benignitate, quoniam me in hoc novo genere dicendi tam diligenter attenditis —, quotiens ego hunc vidi, cum litteram scripsisset nullam, magnum numerum optimorum versuum de eis ipsis rebus, quae tum agerentur, dicere ex tempore! quotiens revocatum eandem rem dicere commutatis verbis atque sententiis! quae vero adcurate cogitateque scripsisset, ea sic vidi probari, ut ad veterum scriptorum laudem perveniret. hunc ego non diligam, non admirer, non omni ratione defendendum putem? atque sic a summis hominibus eruditissimisque accepimus, ceterarum rerum studia et doctrina et praeceptis et arte constare; poetam natura ipsa valere et mentis viribus excitari et quasi divino quo-



dam spiritu inflari. qua re suo iure noster ille Ennius sanctos appellat poëtas, quod quasi deorum aliquo dono  
19 atque munere commendati nobis esse videantur. sit igitur, iudices, sanctum apud vos, humanissimos homines, hoc poëtae nomen, quod nulla umquam barbaria violavit. saxa et solitudines voci respondent, bestiae saepe immanes cantu flectuntur atque consistunt: nos instituti rebus optimis non poëtarum voce moveamur? Homerum Colophonii civem esse dicunt suum, Chii suum vindicant, Salaminii repetunt, Smyrnaei vero suum esse confirmant, itaque etiam delubrum eius in oppido dedicaverunt; permulti alii praeterea pugnant inter se atque contendunt.  
9 ergo illi alienum, quia poëta fuit, post mortem etiam expetunt: nos hunc vivum qui et voluntate et legibus noster est, repudiabimus? praesertim cum omne olim studium atque omne ingenium contulerit Archias ad populi Romani gloriam laudemque celebrandam? nam et Cimbricas res adulescens attigit et ipsi illi C. Mario, qui durior ad  
20 haec studia videbatur, iucundus fuit. neque enim quisquam est tam aversus a Musis qui non mandari versibus aeternum suorum laborum facile praeconium patiat. Themistoclem illum, summum Athenis virum, dixisse aiunt, cum ex eo quaereretur, quod acroama aut cuius vocem libentissime audiret, eius, a quo sua virtus optime praedicaretur. itaque ille Marius item eximie L. Plotium dilexit, cuius ingenio putabat ea, quae gesserat, posse  
21 celebrari. Mithridaticum vero bellum, magnum atque difficile et in multa varietate terra marique versatum, totum ab hoc expressum est; qui libri non modo L. Lucullum, fortissimum et clarissimum virum, verum etiam populi Romani nomen inlustrant. populus enim Romanus aperuit Lucullo imperante Pontum et regiis quondam opibus et ipsa natura et regione vallatum; populi Romani exercitus eodem duce non maxima manu innumerabilis Armeniorum copias fudit; populi Romani laus est urbem amicissimam Cyzicenorum eiusdem consilio ex omni impetu regio atque totius belli ore ac faucibus ereptam esse atque servatam; nostra semper feretur et praedicabitur L. Lucullo dimicante cum interfectis ducibus depressa hostium classis et incredibilis apud Tenedum

pugna illa navalis; nostra sunt tropaea, nostra monumenta, nostri triumphus; quae quorum ingeniis efferuntur, ab eis populi Romani fama celebratur. carus fuit Africano superiori noster Ennius, itaque etiam in sepulchro Scipionum putatur is esse constitutus ex marmore; at eis laudibus certe non solum ipse qui laudatur, sed etiam populi Romani nomen ornatur. in caelum huius proavus Cato tollitur: magnus honos populi Romani rebus adiungitur. omnes denique illi Maximi, Marcelli, Fulvii non sine communi omnium nostrum laude decorantur. ergo illum, qui haec fecerat, Rudinum hominem, maiores nostri in civitatem receperunt; nos hunc Heracliensem, multis civitatibus expetitur, in hac autem legibus constitutum, de nostra civitate eiciemus?

Nam si quis minorem gloriae fructum putat ex Graecis versibus percipi quam ex Latinis, vehementer errat, propterea quod Graecâ leguntur in omnibus fere gentibus, Latina suis finibus, exiguis sane, continentur. quare si res eae, quas gessimus, orbis terrae regionibus definiuntur, cupere debemus, quo manuum nostrarum tela pervenerint, eodem gloriam famamque penetrare, quod cum ipsis populis, de quorum rebus scribitur, haec ampla sunt, tum eis certe, qui de vita gloriae causa dimicant, hoc maximum et periculorum incitamentum est et laborum. quam multos scriptores rerum suarum magnus ille Alexander secum habuisse dicitur! atque is tamen, cum in Sigeo ad Achillis tumulum astitisset: 'o fortunate' inquit 'adulescens, qui tuae virtutis Homerum praeconem inveneris! et vere. nam nisi Ilias illa exstisset, idem tumulus, qui corpus eius contexerat, nomen etiam obruisset. quid? noster hic Magnus, qui cum virtute fortunam adaequavit, nonne Theophanem Mytilenaeum, scriptorem rerum suarum, in contione militum civitate donavit, et nostri illi fortes viri, sed rustici ac milites, dulcedine quadam gloriae commoti, quasi participes eiusdem laudis, magno illud clamore approbaverunt? itaque, credo, si civis Romanus Archias legibus non esset, ut ab aliquo imperatore civitate donaretur, perficere non potuit. Sulla cum Hispanos donaret et Gallos, credo

- hunc petentem repudiasset: quem nos in contione vidimus, cum ei libellum malus poëta de populo subiecisset, quod epigramma in eum fecisset, tantummodo alternis versibus longiusculis, statim ex eis rebus, quas tunc vendebat, iubere ei praemium tribui sed ea condicione, ne quid postea scriberet. qui sedulitatem mali poëtae duxerit aliquo tamen praemio dignam, huius ingenium et virtutem in scribendo et copiam non expetisset?
- 26 quid? a Q. Metello Pio, familiarissimo suo, qui civitate multos donavit, neque per se neque per Lucullos impetravisset? qui praesertim usque eo de suis rebus scribi cuperet, ut etiam Cordubae natis poëtis, pingue quiddam sonantibus atque peregrinum, tamen auris suas
- 11 dederet. neque enim est hoc dissimulandum, quod obscurari non potest, sed prae nobis ferendum: trahimur omnes studio laudis et optimus quisque maxime gloria ducitur. ipsi illi philosophi etiam in eis libellis, quos de contemnenda gloria scribunt, nomen suum inscribunt; in eo ipso, in quo praedicationem nobilitatemque despi-
- 27 ciunt, praedicari de se ac nominari volunt. Decimus quidem Brutus, summus vir et imperator, Accii, amicissimi sui, carminibus templorum ac monumentorum aditus exornavit suorum. iam vero ille, qui cum Aetolis Ennio comite bellavit, Fulvius, non dubitavit Martis manubias Musis consecrare. qua re in qua urbe imperatores prope armati poëtarum nomen et Musarum delubra coluerunt, in ea non debent togati iudices a Musarum honore et a poëtarum salute abhorrere.
- 28 Atque ut id libentius faciatis, iam me vobis, iudices, indicabo et de meo quodam amore gloriae nimis acri fortasse, verum tamen honesto vobis confitebor. nam quas res nos in consulatu nostro vobiscum simul pro salute huiusce imperii et pro vita civium proque universa re publica gessimus, attigit hic versibus atque inchoavit; quibus auditis, quod mihi magna res et iucunda visa est, hunc ad perficiendum adornavi. nullam enim virtus aliam mercedem laborum periculorumque desiderat praeter hanc laudis et gloriae: qua quidem detracta, iudices, quid est quod in hoc tam exiguo vitae curriculo

[et tam brevi] tantis nos in laboribus exerceamus? certe <sup>29</sup> si nihil animus praesentiret in posterum et si quibus regionibus vitae spatium circumscriptum est, eisdem omnis cogitationes terminaret suas, nec tantis se laboribus frangeret neque tot curis vigiliisque angeretur nec totiens de ipsa vita dimicaret. nunc insidet quaedam in optimo quoque virtus, quae noctis ac dies animum gloriae stimulis concitat atque admonet non cum vitae tempore esse dimittendam commemorationem nominis nostri, sed cum omni posteritate adaequandam. an vero tam <sup>12</sup> parvi animi videamur esse omnes, qui in re publica at- <sup>30</sup> que in his vitae periculis laboribusque versamur, ut, cum usque ad extremum spatium nullum tranquillum atque otiosum spiritum duxerimus, nobiscum simul moritura omnia arbitremur? an statuas et imagines, non animorum simulacra, sed corporum, studiose multi summi homines reliquerunt, consiliorum relinquere ac virtutum nostrarum effigiem nonne multo malle debemus, summis ingeniis expressam et politam? ego vero omnia, quae gerebam, iam tum in gerendo spargere me ac disseminare arbitrabar in orbis terrae memoriam sempiternam. haec vero sive a meo sensu post mortem afutura est sive, ut sapientissimi homines putaverunt, ad aliquam mei partem pertinebit, nunc quidem certe cogitatione quadam speque delector.

Qua re conservate, iudices, hominem pudore eo, <sup>31</sup> quem amicorum videtis comprobari cum dignitate tum etiam vetustate, ingenio autem tanto, quantum id convenit existimari, quod summorum hominum ingeniis expetitur esse videatis, causa vero eius modi, quae beneficio legis, auctoritate municipii, testimonio Luculli, tabulis Metelli comprobetur. quae cum ita sint, petimus a vobis, iudices, si qua non modo humana, verum etiam divina in tantis ingeniis commendatio debet esse, ut eum, qui vos, qui vestros imperatores, qui populi Romani res gestas semper ornavit, qui etiam his recentibus nostris vestrisque domesticis periculis aeternum se testimonium laudis daturum esse profitetur estque ex eo numero, qui semper apud omnes sancti sunt habitus itaque



dicti, sic in vestram accipiatis fidem, ut humanitate vestra levatus potius quam acerbitate violatus esse videatur. quae de causa pro mea consuetudine breviter simpliciterque dixi, iudices, ea confido probata esse omnibus; quae autem remota a mea, iudicialique consuetudine et de hominis ingenio et communiter de ipsius studio locutus sum, ea, iudices, a vobis spero esse in bonam partem accepta, ab eo, qui iudicium exercet, certo scio.

---

M. TULLII CICERONIS  
ORATIO POST REDITUM IN SENATU  
HABITA.

Si, patres conscripti, pro vestris immortalibus in me<sup>1</sup>  
fratremque meum liberosque nostros meritis parum vobis  
cumulate gratias egero, quaeso obtestorque, ne meae na-  
turae potius quam magnitudini vestrorum beneficiorum id  
tribuendum putetis. quae tanta enim potest existere  
ubertas ingenii, quae tanta dicendi copia, quod tam divi-  
num atque incredibile genus orationis quo quisquam pos-  
sit vestra in nos universa promerita non dicam complecti  
orando, sed percensere numerando? qui mihi fratrem  
optatissimum, me fratri amantissimo, liberis nostris pa-  
rentes, nobis liberos, qui dignitatem, qui ordinem, qui  
fortunas, qui amplissimam rem publicam, qui patriam,  
qua nihil potest esse iucundius, qui denique nosmet ipsos  
nobis reddidistis. quod si parentes carissimos habere<sup>2</sup>  
debemus, quod ab eis nobis vita, patrimonium, libertas,  
civitas tradita est, si deos immortalis, quorum beneficio  
et haec tenuimus et ceteris rebus aucti sumus, si popu-  
lum Romanum, cuius honoribus in amplissimo consilio et  
in altissimo gradu dignitatis atque in hac omnium terra-  
rum arce conlocati sumus, si hunc ipsum ordinem, a quo  
saepe magnificentissimis decretis sumus honestati, im-  
mensum quiddam et infinitum est, quod vobis debemus,  
qui vestro singulari studio atque consensu parentum be-  
neficia, deorum immortalium munera, populi Romani  
honores, vestra de me multa iudicia nobis uno tempore  
omnia reddidistis, ut, cum multa vobis, magna populo  
Romano, innumerabilia parentibus, omnia dis immortali-  
bus debeamus, haec antea singula per illos habuerimus,  
nunc universa per vos recuperarimus.

Itaque, patres conscripti, quod ne optandum quidem<sup>2</sup>  
est homini, immortalitatem quandam per vos esse adepti<sup>3</sup>

videmur. quod enim tempus erit umquam cum vestrorum in nos beneficiorum memoria ac fama moriatur, qui illo ipso tempore, cum vi, ferro, metu, minis obsessi teneremini, non multo post discessum meum me universi revocavistis, referente L. Ninnio, fortissimo atque optimo viro? quem habuit ille pestifer annus et maxime fidelem et minime timidum, si dimicare placuisset, defensorem salutis meae: postea quam vobis decernendi potestas facta non est per eum tribunum plebis, qui cum per se rem publicam lacerare non posset, sub alieno scelere delituit, numquam de me siluistis, numquam meam salutem non ab eis consulibus, qui vendiderant, flagitavistis.

4 itaque vestro studio atque auctoritate perfectum est, ut ipse ille annus, quem ego mihi quam patriae malueram esse fatalem, octo tribunos haberet, qui et promulgarent de salute mea et ad vos saepe numero referrent. nam consules modesti legumque metuentes impediabantur lege, non ea, quae de me, sed ea quae de ipsis lata erat, quam meus inimicus promulgavit, ut, si revixissent ei, qui haec paene delerunt, tum ego redirem: quo facto utrumque confessus est, et se illorum vitam desiderare et magno in periculo rem publicam futuram, si cum hostes atque interfectores rei publicae revixissent, ego non revertissem. atque illo ipso tamen anno, cum ego cessissem, princeps autem civitatis non legum praesidio, sed parietum vitam suam tueretur, res publica sine consulibus esset, neque solum parentibus perpetuis, verum etiam tutoribus annuis esset orbata, sententias dicere prohiberemini, caput meae proscriptionis recitaretur, numquam dubitastis meam salutem cum communi salute coniungere.

3  
5 postea vero cum singulari virtute et praestantissima P. Lentuli consulis ex superioris anni caligine et tenebris lucem in re publica Kalendis Ianuariis dispicere coepistis, cum Q. Metelli, nobilissimi hominis atque optimi viri summa dignitas, cum praetorum, tribunorum plebis paene omnium virtus et fides rei publicae subvenisset, cum virtute, gloria, rebus gestis Cn. Pompeius, omnium gentium, omnium saeculorum, omnis memoriae facile princeps, tuto se venire in senatum arbitraretur, tantus vester consensus de salute mea fuit, ut corpus abesset meum, dignitas iam in

patriam revertisset. quo quidem mense quid inter me et  
 meos inimicos interesset existimare potuistis. ego meam  
 salutem deserui, ne propter me civium volneribus res  
 publica cruentaretur; illi meum reditum non populi Ro-  
 mani suffragiis, sed flumine sanguinis intercludendum  
 putaverunt. itaque postea nihil vos civibus, nihil sociis,  
 nihil regibus respondistis; nihil iudices sententiis, nihil  
 populus suffragiis, nihil hic ordo auctoritate declaravit;  
 mutum forum, elinguem curiam, tacitam et fractam civi-  
 tatem videbatis. quo quidem tempore cum is exces-  
 sisset, qui caedi et flammae vobis auctoribus restiterat,  
 cum ferro et facibus homines tota urbe volitantis, magi-  
 stratuum tecta impugnata, deorum templa inflammata,  
 summi viri et clarissimi consulis fascis fractos, fortissimi  
 atque optimi viri, tribuni plebis, sanctissimum corpus non  
 tactum ac violatum manu, sed volneratum ferro con-  
 fectumque vidistis. qua strage non nulli permoti magi-  
 stratus, partim metu mortis, partim desperatione rei  
 publicae, paululum a mea causa recesserunt; reliqui fue-  
 runt quos neque terror nec vis nec spes nec metus nec  
 promissa nec minae nec tela nec faces a vestra auctori-  
 tate, a populi Romani dignitate, a mea salute depellerent.  
 princeps P. Lentulus, parens ac deus nostrae vitae, for-  
 tulae, memoriae, nominis, hoc specimen virtutis, hoc in-  
 dicium animi, hoc lumen consulatus sui fore putavit, si  
 me mihi, si meis, si vobis, si rei publicae reddidisset:  
 qui ut est designatus, numquam dubitavit sententiam de  
 salute mea se et re publica dignam dicere. cum a tri-  
 buno plebis vetaretur, cum praeclarum caput recitaretur,  
 NE QUIS AD VOS REFERRET, NE QUIS DECERNERET, NE DISPUTA-  
 RET, NE LOQUERETUR, NE PEDIBUS IRET, NE SCRIBENDO ADESSET,  
 totam illam, ut ante dixi, proscriptionem non legem pu-  
 tavit, qua civis optime de re publica meritis nominatum  
 sine iudicio una cum senatu rei publicae esset creptus.  
 ut vero iniiit magistratum, non dicam quid egit prius, sed  
 quid omnino egit aliud nisi ut me conservato vestram in  
 posterum dignitatem auctoritatemque sanciret? di im-  
 mortales, quantum mihi beneficium dedisse videmini,  
 quod hoc anno P. Lentulus consul est! quanto maius  
 dedissetis, si superiore anno fuisset! nec enim eguissem



medicina consulari, nisi consulari volnere concidissem. audieram ex sapientissimo homine atque optimo civi et viro, Q. Catulo, non saepe unum consulem improbum, duo vero numquam [post Roman conditam] excepto illo Cinnano tempore fuisse: qua re meam causam semper fore firmissimam dicere solebat, dum vel unus in re publica consul esset. quod vere dixerat, si illud de duobus consulibus, quod ante in re publica [non] fuerat, perenne ac proprium manere potuisset. quod si Q. Metellus illo tempore consul fuisset [inimicus], dubitatis quo animo in me conservando fuerit futurus, cum in re-  
stituendo auctorem fuisse scriptoremque videatis? sed  
fuerunt ei consules, quorum mentes angustae, humiles, pravae, oppletae tenebris ac sordibus, nomen ipsum consulatus, splendorem illius honoris, magnitudinem tanti imperii nec intueri nec sustinere nec capere potuerunt, non consules, sed mercatores provinciarum ac venditores vestrae dignitatis, quorum alter me Catilinam, amatorem suum, multis audientibus, alter Cethegum consobrinum reposcebat: qui me duo sceleratissimi post hominum memoriam non consules, sed latrones non modo deseruerunt in causa praesertim publica et consulari, sed prodiderunt, oppugnarunt, omni auxilio, non solum suo, sed etiam vestro ceterorumque ordinum spoliatum esse voluerunt:  
quorum alter tamen neque me neque quemquam fefellit.  
quis enim ullam ullius boni spem haberet in eo, cuius  
primum tempus aetatis palam fuisset ad omnium libidines divolgatum; qui ne a sanctissima quidem parte corporis potuisset hominum impuram intemperantiam propulsare: qui cum suam rem non minus strenue quam postea publicam confecisset, egestatem et luxuriam domestico lenocinio sustentavit; qui nisi in aram tribunatus confugisset, neque vim praetoris nec multitudinem creditorum nec bonorum proscriptionem effugere potuisset; quo in magistratu nisi rogationem de piratico bello tulisset, profecto egestate et improbitate coactus piraticam ipse fecisset, ac minore quidem cum rei publicae detrimento quam quod intra moenia nefarius hostis praedoque versatus est: quo inspectante ac sedente legem tribunus plebis tulit, ne auspiciis optemperaretur, ne obnuntiare

concilio aut comitiis, ne legi intercedere liceret; ut lex Aelia et Fufia ne valeret; quae nostri maiores certissima subsidia rei publicae contra tribunicios furores esse voluerunt. idemque postea, cum innumerabilis multitudo<sup>12</sup> bonorum de Capitolio supplex ad eum sordidata venisset cumque adulescentes nobilissimi cunctique equites Romani se ad lenonis impudicissimi pedes abiecissent, quo vultu cincinnatus ganeo non solum civium lacrimas, verum etiam patriae preces repudiavit! neque eo contentus fuit, sed etiam in contionem escendit eaque dixit, quae, si eius vir Catilina revixisset, dicere non esset ausus: se nonarum Decembrium, quae me consule fuissent, elivique Capitolini poenas ab equitibus Romanis esse repetiturum, neque solum id dixit, sed quos ei commodum fuit compellavit, L. vero Lamiam, equitem Romanum, praestanti dignitate hominem et saluti meae pro familiaritate, rei publicae pro fortunis suis amicissimum, consul imperiosus exire ex urbe iussit; et cum vos vestem mutandam censuissetis cunctique mutassetis atque idem omnes boni iam ante fecissent, ille unguentis oblitus, cum toga praetexta, quam omnes praetores aedilesque tum abiecerant, inrisit squalorem vestrum et luctum gratissimae civitatis, fecitque, quod nemo unquam tyrannus, ut quo minus occulte vestrum malum gerneretis nihil diceret, ne aperte incommoda patriae lugeretis ediceret. cum vero in circo Flaminio, non a tribuno plebis consul<sup>6</sup> in contionem, sed a latrone archipirata productus esset,<sup>13</sup> primum processit qua auctoritate vir! vini, somni, stupri plenus, madenti coma, composito capillo, gravibus oculis, fluentibus buccis, pressa voce et temulenta: quod in civis indemnatos esset animadversum, id sibi dixit gravis auctor vehementissime displicere. ubi nobis haec auctoritas tam diu tanta latuit? cur in lustris et helluationibus huius calamistrati saltatoris tam eximia virtus tam diu cessavit? nam ille alter Caesoninus Calventius ab adulescentia versatus est in foro, cum eum praeter simulatam versutamque tristitiam nulla res commendaret, non vis consilii, non dicendi facultas, non scientia rei militaris, non cognoscendorum hominum studium, non liberalitas; quem praeteriens cum incultum, horridum mae-

stumque vidisses, etiam si agrestem et inhumanum existi-  
 14 mares, tamen libidinosum et perditum non putares. cum  
 hoc homine an cum stipite in foro constitisses, nihil  
 crederes interesse: sine sensu, sine sapore, elinguem,  
 tardum, inhumanum negotium, Cappadocem modo ab-  
 reptum de grege venalium diceres: idem domi quam  
 libidinosus, quam impurus, quam intemperans non ianua  
 receptis, sed pseudothyro intromissis voluptatibus! cum  
 vero etiam litteris studere incipit et belua immanis cum  
 Graeculis philosophari, tum est Epicureus, non penitus  
 illi disciplinae quaecumque est deditus, sed captus uno  
 verbo voluptatis. habet autem magistros non ex istis  
 ineptis, qui dies totos de officio ac de virtute disserunt,  
 qui ad laborem, ad industriam, ad pericula pro patria  
 subeunda adhortantur, sed eos, qui disputent horam nul-  
 lam vacuam voluptate esse debere: in omni parte corporis  
 semper oportere aliquod gaudium delectationemque ver-  
 15 sari. his utitur quasi praefectis libidinum suarum; hi  
 voluptates omnis vestigant atque odorantur; hi sunt con-  
 ditores instructoresque convivii; idem expendunt atque  
 aestimant voluptates sententiamque dicunt et iudicant  
 quantum cuique libidini tribuendum esse videatur. horum  
 ille artibus eruditus ita contempsit hanc prudentissimam  
 civitatem, ut omnis suas libidines, omnia flagitia latere  
 posse arbitraretur, si modo voltum importunum in forum  
 7 detulisset. isne quemquam, me quidem non — cogno-  
 ram enim propter Pisonum adfinitatem quam longe hunc  
 ab hoc genere cognatio materna Transalpini sanguinis  
 abstulisset —, sed vos populumque Romanum non con-  
 silio neque eloquentia, quod in multis saepe accidit, sed  
 16 rugis supercilioque decepit? L. Piso, tune ausus es isto  
 oculo, non dicam isto animo, ista fronte, non vita, tanto  
 supercilio, non enim possum dicere, tantis rebus gestis,  
 cum A. Gabinio consociare consilia pestis meae? non te  
 illius unguentorum odor, non vini anhelitus, non frons  
 calamistri notata vestigiis, in eam cogitationem addu-  
 cebat, ut, cum illius re similis fuisses, frontis tibi integri-  
 mento ad occultanda tanta flagitia diutius uti non liceret?  
 cum hoc tu coire ausus es, ut consularem dignitatem, ut  
 rei publicae statum, ut senatus auctoritatem, ut civis

optime meriti fortunas provinciarum foedere addiceres? te consule, tuis edictis et imperiis, senatui populoque Romano non est licitum non modo sententiis atque auctoritate sua, sed ne luctu quidem ac vestitu rei publicae subvenire. Capuaenē te putabas, in qua urbe domicilium <sup>17</sup> quondam superbiae fuit, consulem esse, sicut eras eo tempore, an Romae: in qua civitate omnes ante vos consules senatui paruerunt? tu es ausus in circo Flaminio, productus cum tuo illo pare, dicere te semper misericordem fuisse? quo verbo senatum atque omnis bonos tum, cum a patria pestem depellerent, crudelis demonstrabas fuisse. tu misericors me adfinem tuum, quem tuis comitiis praerogativae primum custodem praefeceras, quem Kalendis Ianuariis tertio loco sententiam rogaras, constrictum inimicis rei publicae tradidisti; tu meum generum, propinquum tuum, tu adfinem tuam, filiam meam, superbissimis et crudelissimis verbis a genibus tuis repulisti; idemque tu elementia ac misericordia singulari, cum ego una cum re publica non tribunicio, sed consulari ictu concidissem, tanto scelere tantaque intemperantia fuisti, ut ne unam quidem horam interesse patereris inter meam pestem et tuam praedam, saltem tum contisceret illa lamentatio et gemitus urbis. nondum palam <sup>18</sup> factum erat occidissem rem publicam, cum tibi arbitria funeris solvebantur: uno eodemque tempore domus mea diripiebatur, ardebat, bona ad vicinum consulem de Palatio, de Tusculano item ad vicinum alterum consulem deferebantur; cum isdem operis suffragium ferentibus, eodem gladiatore latore, vacuo non modo a bonis, sed etiam a liberis atque inani foro, ignaro populo Romano quid ageretur, senatu vero oppresso et adflicto, duobus impiis nefariisque consulibus aerarium, provinciae, legiones, imperia donabantur.

Horum consulum ruinas vos consules vestra virtute <sup>8</sup> fulsistis, summa tribunorum plebis praetorumque fide et diligentia sublevati. quid ego de praestantissimo viro, <sup>19</sup> T. Annio, dicam? aut quis de tali cive satis digne umquam loquetur? qui cum videret sceleratum civem aut domesticum potius hostem, si legibus uti liceret, iudicio esse frangendum; sin ipsa iudicia vis impediret ac tol-



leret, audaciam virtute, furorem fortitudine, temeritatem consilio, manum manu, vim vi esse superandam, primo de vi postulavit; postea quam ab eodem iudicia sublata esse vidit, ne ille omnia vi posset efficere curavit: qui docuit neque tecta neque templa neque forum neque curiam sine summa virtute ac maximis opibus et copiis ab intestino latrocinio posse defendi; qui primus post meum discessum metum bonis, spem audacibus, timorem

<sup>20</sup> huic ordini, servitutem depulit civitati. quam rationem pari virtute, animo, fide P. Sestius secutus, pro mea salute, pro vestra auctoritate, pro statu civitatis nullas sibi inimicitias, nullam vim, nullos impetus, nullum vitae discrimen vitandum umquam putavit; qui causam senatus exagitata contionibus improborum sic sua diligentia multitudini commendavit, ut nihil tam populare quam vestrum nomen, nihil tam omnibus earum aliquando quam vestra auctoritas videretur; qui me cum omnibus rebus, quibus tribunus pl. potuit, defendit, tum reliquis officiis, iuxta ac si meus frater esset, sustentavit; cuius ego clientibus, libertis, familia, copiis, litteris ita sum sustentatus, ut meae calamitatis non adiutor solum, verum etiam so-

<sup>21</sup> cius videretur. iam ceterorum officia [studia] vidistis: quam cupidus mei C. Cestilius, quam studiosus vestri, quam non varius fuerit in causa. quid M. Cispium? cui ego ipsi, parenti fratrique eius sentio quantum debeam: qui, cum a me voluntas eorum in privato iudicio esset offensa, publici mei beneficii memoria privatam offensio-

nem oblitteraverunt. iam T. Fadius, qui mihi quaestor fuit, M. Curtius, cuius ego patri quaestor fui, studio, amore, animo huic necessitudini non defuerunt. multa de me C. Messius et amicitiae et rei publicae causa dixit;

<sup>22</sup> legem separatim initio de salute mea promulgavit. Q. Fabricius si quae de me agere conatus est, ea contra vim et ferrum perficere potuisset, mense Ianuario nostrum statum recuperassemus: quem ad salutem meam voluntas

<sup>9</sup> impulit, vis retardavit, auctoritas vestra revocavit. iam vero praetores quo animo in me fuerint vos existimare potuistis, cum L. Caecilius privatim me suis omnibus copiis studuerit sustentare, publice promulgarit de mea salute cum conlegis paene omnibus, direptoribus autem

bonorum meorum in ius adeundi potestatem non fecerit. M. autem Calidius statim designatus sententia sua quam esset cara sibi mea salus declaravit. omnia officia C. <sup>23</sup> Septimii, Q. Valerii, P. Crassi, Sex. Quinctilii, C. Cornuti summa et in me et in rem publicam constiterunt.

Quae cum libenter commemoro, tum non invitus non nullorum in me nefarie commissa praetereo. non est mei temporis iniurias meminisse, quae ego etiam si ulcisci possem, tamen oblivisci mallet: alio transferenda mea tota vita est, ut bene de me meritis referam gratiam, amicitias igni perspectas tuear, cum apertis hostibus bellum geram, timidis amicis ignoseam, proditores non indicem, dolorem profectionis meae reditus dignitate consoler. quod si mihi nullum aliud esset officium in omni <sup>24</sup> vita reliquum, nisi ut erga duces ipsos et principes atque auctores salutis meae satis gratus iudicaret, tamen exiguum reliquae vitae tempus non modo ad referendam, verum etiam ad commemorandam gratiam mihi relictum putarem. quando enim ego huic homini ac liberis eius, quando omnes mei gratiam referent? quae memoria, quae vis ingenii, quae magnitudo observantiae tot tantisque beneficiis respondere poterit? qui mihi primus afflicto et iacenti consularem fidem dextramque porrexit; qui me a morte ad vitam, a desperatione ad spem, ab exitio ad salutem vocavit; qui tanto amore in me, studio in rem publicam fuit, ut excogitaret quem ad modum calamitatem meam non modo levaret, sed etiam honestaret. quid enim magnificentius, quid praeclarius mihi accidere potuit, quam quod illo referente vos decrevistis, ut cuncti ex omni Italia, qui rem publicam salvam vellent, ad me unum, hominem fractum et prope dissipatum, restituendum et defendendum venirent? ut qua voce ter omnino post Romam conditam consul usus esset pro universa re publica apud eos solum, qui eius vocem exaudire possent, eadem voce senatus omnis ex omnibus agris atque oppidis civis totamque Italiam ad unius salutem defendendam excitaret? quid ego gloriosius meis posteris potui <sup>10</sup> relinquere quam hoc, senatum iudicasse, qui civis me non <sup>25</sup> defendisset, eum rem publicam salvam noluisse? itaque tantum vestra auctoritas, tantum eximia consulis dignitas

valuit, ut dedecus et flagitium se committere putaret, si qui non veniret. idemque consul, cum illa incredibilis multitudo Romam et paene Italia ipsa venisset, vos frequentissimos in Capitolium convocavit. quo tempore quantam vim naturae bonitas haberet et vera nobilitas intellegere potuistis: nam Q. Metellus et inimicus et frater inimici perspecta vestra voluntate omnia privata odia deposuit; quem P. Servilius, vir cum clarissimus tum vero optimus mihiq̃ amicissimus et auctoritatis et orationis suae divina quadam gravitate ad sui generis communisque sanguinis facta virtutesque revocavit, ut haberet in consilio et fratrem ab inferis, socium rerum mearum, et omnis Metellos, praestantissimos civis, paene ex Acheronte excitatos, in quibus Numidicum illum [Metellum], cuius quondam de patria discessus molestus  
 26 omnibus, ipsi ne luctuosus quidem visus est. itaque existit non modo salutis defensor, qui ante hoc suum beneficium fuerat inimicus, verum etiam ascriptor dignitatis meae. quo quidem die cum ccccxvii senatores essetis, magistratus autem omnes adessent, dissensit unus, is qui sua lege coniuratos etiam ab inferis excitandos putarat. atque illo die cum rem publicam meis consiliis conservatam gravissimis verbis et plurimis iudicassetis, idem consul curavit, ut eadem a principibus civitatis in contione postero die dicerentur; cum quidem ipse egit ornatissime meam causam perfecitque astante atque audiente Italia tota, ut nemo cuiusquam conducti aut per-  
 11  
 27 diti vocem acerbam atque inimicam bonis posset audire. ad haec non modo adiumenta salutis, sed etiam ornamenta dignitatis meae reliqua vos idem addidistis: decrevistis, ne quis ulla ratione rem impediret; qui id impedisset, vos graviter molesteque laturos: illum contra rem publicam salutemque bonorum concordiamque civium facturum, et ut ad vos de eo statim referretur, meque, etiam si diutius calumniarentur, redire iussistis. quid? ut *eis* agerentur gratiae qui e municipiis venissent? quid? ut ad illam diem, res cum redissent, rogarentur, ut pari studio convenirent? quid denique illo die, quem P. Lentulus mihi fratrique meo liberisque nostris natalem constituit non modo ad nostram, verum etiam ad sempiterni me-

moriam temporis, quo die nos comitiis centuriatis, quae  
 maxime maiores comitia iusta dici haberique voluerunt,  
 arcessivit in patriam, ut caedem centuriae, quae me con-  
 sulem fecerant, consulatum meum comprobarent; quo <sup>28</sup>  
 die quis civis fuit qui fas esse putaret, quacumque aut  
 aetate aut valetudine esset, non se de salute mea senten-  
 tiam ferre? quando tantam frequentiam in campo, tantum  
 splendorem Italiae totius ordinumque omnium, quando  
 illa dignitate rogatores, diribitores custodesque vidistis?  
 itaque P. Lentuli beneficio excellenti atque divino non  
 reducti sumus in patriam, sicut non nulli clarissimi cives,  
 sed equis insignibus et curru aurato reportati. possum <sup>29</sup>  
 ego satis in Cn. Pompeium umquam gratus videri? qui  
 non solum apud vos, qui omnes idem sentiebatis, sed  
 etiam apud universum populum salutem populi Romani  
 et conservatam per me et coniunctam esse cum mea  
 dixerit; qui causam meam prudentibus commendarit, im-  
 peritos edocuerit eodemque tempore improbos auctoritate  
 sua compresserit, bonos excitarit; qui populum Romanum  
 pro me, tamquam pro fratre aut pro parente, non solum  
 hortatus sit, verum etiam obsecrarit; qui cum ipse propter  
 metum dimicationis et sanguinis domo se teneret, iam a  
 superioribus tribunis petierit, ut de salute mea et pro-  
 mulgarent et referrent; qui in colonia nuper constituta,  
 cum ipse gereret magistratum, in qua nemo erat emptus  
 intercessor, vim et crudelitatem privilegii auctoritate ho-  
 nestissimorum hominum et publicis litteris consignarit  
 princepsque Italiae totius praesidium ad meam salutem  
 implorandum putarit; qui cum ipse mihi semper amicis-  
 simus fuisset, etiam ut suos necessarios mihi amicos red-  
 deret elaborarit. quibus autem officiis T. Annii beneficia <sup>12</sup>  
 remunerabor? cuius omnis ratio, cogitatio, totus denique <sup>30</sup>  
 tribunatus nihil aliud fuit nisi constans, perpetua, fortis,  
 invicta defensio salutis meae? quid de P. Sestio loquar?  
 qui suam erga me benevolentiam et fidem non solum  
 animi dolore, sed etiam corporis vulneribus ostendit.

Vobis vero, patres conscripti, singulis et egi et agam  
 gratias. universis egi initio quantum potui: satis ornate  
 agere nullo modo possum. et quamquam sunt in me  
 praecipua merita multorum, quae silere nullo modo pos-



sum, tamen huius temporis ac timoris mei non est conari commemorare beneficia in me singulorum; nam difficile est non aliquem, nefas quemquam praeterire. ego vos universos, patres conscripti, deorum in numero colere debeo; sed ut in ipsis dis immortalibus non semper eodem atque alias alios solemus et venerari et precari, sic in hominibus de me divinitus meritis omnis erit aetas mihi ad eorum erga me merita praedicanda atque recolenda.

31 hodierno autem die nominatim a me magistratibus statui gratias esse agendas et de privatis uni, qui pro salute mea municipia coloniasque adisset, populum Romanum supplex obsecrasset, sententiam dixisset eam, quam vos secuti mihi dignitatem meam reddidistis. vos me florentem semper ornastis; laborantem mutatione vestis et prope luctu vestro quoad licuit defendistis. nostra memoria senatores ne in suis quidem periculis mutare vestem solebant: in meo periculo senatus veste mutata fuit, quoad licuit per eorum edicta, qui mea pericula non modo suo praesidio, sed etiam vestra deprecatione nudarunt.

32 quibus ego rebus obiectis, cum mihi privato configendum viderem cum eodem exercitu, quem consul non armis, sed vestra auctoritate superaram, multa mecum ipse re-

13 putavi. dixerat in contione consul se clivi Capitolini poenas ab equitibus Romanis repetiturum; nominatim alii compellabantur, alii citabantur, alii relegabantur; aditus templorum erant non solum praesidiis et manu, verum etiam demolitione sublatis. alter consul, ut me et rem publicam non modo desereret, sed etiam hostibus rei publicae proderet, pactionibus se suorum praemiorum obligarat. erat alius ad portas cum imperio in multos annos magnoque exercitu, quem ego inimicum mihi fuisse non dico, tacuisse, cum diceretur esse inimicus, scio.

33 duae partes esse in re publica cum putarentur, altera me deposcere propter inimicitias, altera timide defendere propter suspicionem caedis putabatur. qui autem me deposcere videbantur, [in] hoc auxerunt dimicationis metum, quod numquam infitiando suspicionem hominum curamque minuerunt; qua re cum viderem senatum ducibus orbatum, me a magistratibus partim oppugnatum, partim proditum, partim derelictum, servos simulatione conlegiorum

nominatim esse conscriptos, copias omnis Catilinae paene  
 isdem ducibus ad spem caedis et incendiorum esse revo-  
 catas, equites Romanos proscriptionis, municipia vastita-  
 tis, omnis caedis metu esse permotos, potui, potui, patres  
 conscripti, multis auctoribus fortissimis viris me vi armis-  
 que defendere, nec mihi ipsi ille animus idem meus vobis  
 non incognitus defuit: sed videbam, si vicissem praesen-  
 tem adversarium, nimium multos mihi alios esse vincen-  
 dos; si victus essem, multis bonis et pro me et mecum  
 etiam post me esse pereundum, tribuniciique sanguinis  
 ultores esse praesentis, meae mortis poenas iudicio et  
 posteritati reservari. nolui, cum consul communem sa-  
 lutem sine ferro defendissem, meam privatus armis de-  
 fendere, bonosque viros lugere malui meas fortunas quam  
 suis desperare; ac si solus essem interfectus, mihi turpe,  
 si cum multis, rei publicae funestum fore videbatur. quod  
 si mihi aeternam esse aerumnam propositam arbitrarer,  
 morte me ipse potius quam sempiterno dolore multassem.  
 sed cum viderem me non diutius quam ipsam rem publi-  
 cam ex hac urbe afuturum, neque ego illa exterminata  
 mihi remanendum putavi et illa, simul atque revocata  
 est, me secum pariter reportavit. mecum leges, mecum  
 quaestiones, mecum iura magistratuum, mecum senatus  
 auctoritas, mecum libertas, mecum etiam frugum uber-  
 tas, mecum deorum et hominum sanctitates omnes et re-  
 ligiones afuerunt; quae si semper abessent, magis vestras  
 fortunas lugerem quam desiderarem meas; sin aliquando  
 revocarentur, intellegebam mihi cum illis una esse re-  
 deundum. cuius mei sensus certissimus testis est hic <sup>14</sup>  
 idem, qui custos capitis fuit, Cn. Plancius, qui omnibus <sup>31</sup>  
 provincialibus ornamentis commodisque depositis totam  
 suam quaesturam in me sustentando et conservando con-  
 locavit; qui si mihi quaestor [imperator] fuisset, in filii  
 loco fuisset, nunc certe erit in parentis [cum fuerit quae-  
 stor non imperii, sed doloris mei].

Quapropter, patres conscripti, quoniam in rem publi- <sup>36</sup>  
 cam sum pariter cum re publica restitutus, non modo in  
 ea defendenda nihil minuam de libertate mea pristina,  
 sed etiam adaugebo. etenim si eam tum defendebam, <sup>15</sup>  
 cum mihi aliquid illa debebat, quid nunc me facere opor-  
 tet, cum ego illi plurimum debeo? nam quid est quod  
 animum meum frangere aut debilitare possit, cuius ipsam  
 calamitatem non modo nullius delicti, sed etiam binorum  
 in rem publicam beneficiorum testem esse videatis? nam

et importata est, quia defenderam civitatem, et mea voluntate suscepta est, ne a me defensa res publica per  
 37 eundem me extremum in discrimen vocaretur. pro me non, ut pro P. Popilio, nobilissimo homine, adulescentes filii, non propinquorum multitudo populum Romanum est deprecata, non, ut pro Q. Metello, summo et clarissimo viro, spectata iam adulescentia filius; non L. et C. Metelli consulares, non eorum liberi, non Q. Metellus Ne-  
 pos, qui tum consulatum petebat, non Luculli, Servilii, Scipiones, Metellarum filii, flentes ac sordidati populo Romano supplicaverunt, sed unus frater, qui in me pietate filius, consiliis parens, amore, ut erat, frater inventus est, squalore et lacrimis et cotidianis precibus desiderium mei nominis renovari et rerum gestarum memoriam usurpari coëgit. qui cum statuisset, nisi per vos me recuperasset, eandem subire fortunam atque idem sibi domicilium et vitae et mortis deposceret, tamen numquam  
 nec magnitudinem negotii nec solitudinem suam nec vim  
 38 inimicorum ac tela pertimuit. alter fuit propugnator meorum fortunarum et defensor adsiduus, summa virtute et pietate, C. Piso, gener, qui minas inimicorum meorum, qui inimicitias adfinis mei, propinqui sui, consulis, qui Pontum et Bithyniam quaestor prae mea salute neglexit. nihil umquam senatus de P. Popilio decrevit, numquam in hoc ordine de Q. Metello mentio facta est: tribuniciis sunt illi rogationibus, interfectis inimicis denique restituti, cum alter eorum senatui parvisset, alter vim caedemque fugisset. nam C. quidem Marius, qui hac hominum memoria tertius ante me consularis tempestate civili expulsus est, non modo a senatu non est restitutus, sed reditu suo senatum cunctum paene delevit. nulla de illis magistratuum consensio, nulla ad rem publicam defendendam populi Romani convocatio, nullus Italiae motus, nulla decreta municipiorum et coloniarum exstiterunt.  
 39 qua re cum me vestra auctoritas arcessierit, populus Romanus vocarit, res publica implorarit, Italia cuncta paene suis umeris reportarit, non committam, patres conscripti, ut, cum ea mihi sint restituta, quae in potestate mea non fuerunt, ea non habeam, quae ipse praestare possim, praesertim cum illa amissa recuperarim, virtutem et fidem numquam amiserim.

---

M. TULLII CICERONIS  
ORATIO POST REDITUM AD QUIRITES  
HABITA.

Quod precatus a Iove Optimo Maximo ceterisque dis<sup>1</sup>  
immortalibus sum, Quirites, eo tempore, cum me fortu-<sup>1</sup>  
nasque meas pro vestra incolumitate, otio concordiaque  
devovi, ut, si meas rationes umquam vestrae saluti ante-  
posuissem, sempiternam poenam sustinerem mea volun-  
tate susceptam, sin et ea, quae ante gesseram, conser-  
vandae civitatis causa gessissem et illam miseram pro-  
fectionem vestrae salutis gratia suscepissem, ut, quod  
odium scelerati homines et audaces in rem publicam et  
in omnis bonos conceptum iam diu continerent, id in me  
uno potius quam in optimo quoque et universa civitate  
deficeret, hoc si animo in vos liberosque vestros fuisset,  
ut aliquando vos patresque conscriptos Italiamque uni-  
versam memoria mei misericordiaque [desiderium] teneret,  
cuius devotionis me esse convictum iudicio deorum immor-  
talium, testimonio senatus, consensu Italiae, confessione  
inimicorum, beneficio divino immortalique vestro maxime  
laetor, Quirites; et si nihil est homini magis optandum<sup>2</sup>  
quam prospera, aequabilis perpetuaque fortuna secundo  
vitae sine ulla offensione cursu, tamen, si mihi tranquilla  
et placata omnia fuissent, incredibili quadam et paene  
divina, qua nunc vestro beneficio fruor, laetitiae voluptate  
caruissem. quid dulcius hominum generi ab natura da-  
tum est quam sui cuique liberi? mihi vero et propter  
indulgentiam meam et propter excellens eorum ingenium  
vita sunt mea cariores: tamen non tantae voluptati erant  
suscepti quantae nunc sunt restituti. nihil cuiquam fuit<sup>3</sup>  
umquam iucundius quam mihi meus frater: non tam id  
sentiebam, cum fruebar, quam tum, cum carebam, et  
postea quam vos me illi et mihi eum reddidistis. res  
familiaris sua quemque delectat: reliquae meae fortunae



recuperatae plus mihi nunc voluptatis adferunt quam tum in inecolumitate adferebant. amicitiae, consuetudines, vicinitates, clientelae, ludi denique et dies festi quid haberent  
4 voluptatis carendo magis intellexi quam fruendo. iam vero honos, dignitas, locus, ordo, beneficia vestra, quamquam mihi semper clarissima visa sunt, tamen ea nunc renovata inlustriora videntur, quam si obscurata non essent. ipsa autem patria, di immortales! dici vix potest quid caritatis, quid voluptatis habeat! quae species Italiae! quae celebritas oppidorum! quae forma regionum! qui agri! quae fruges! quae pulchritudo urbis! quae humanitas civium! quae rei publicae dignitas! quae vestra maiestas! quibus ego omnibus antea rebus sic fruebar ut nemo magis; sed tamquam bona valetudo iucundior est eis, qui e gravi morbo recreati sunt, quam qui nunquam aegro corpore fuerunt, sic haec omnia desiderata magis  
2 quam adsidue percepta delectant. quorsum igitur haec  
5 disputo? quorsum? ut intellegere possitis neminem unquam tanta eloquentia fuisse neque tam divino atque incredibili genere dicendi qui vestram magnitudinem multitudinemque beneficiorum, quam in me fratremque meum et liberos nostros contulistis, non modo augere aut ornare oratione, sed enumerare aut consequi possit. a parentibus, id quod necesse erat, parvus sum procreatus: a vobis natus sum consularis; illi mihi fratrem incognitum qualis futurus esset dederunt; vos spectatum et incredibili pietate cognitum reddidistis; rem publicam illis accepi temporibus eam, quae pacis amissa esset: a vobis eam recuperavi, quam aliquando omnes unius opera servatam iudicaverunt. di immortales mihi liberos dederunt: vos reddidistis; multa praeterea a dis immortalibus optata consecuti sumus: nisi vestra voluntas fuisset, omnibus divinis muneribus carceremus. vestros denique honores, quos eramus gradatim singulos adsecuti, nunc a vobis universos habemus, ut quantum antea parentibus, quantum dis immortalibus, quantum vobismet ipsis, tantum hoc tempore universum cuncto populo Romano debeamus.

6 Nam cum in ipso beneficio vestro tanta magnitudo est, ut eam complecti oratione non possim, tum in studiis

vestris tanta animorum declarata est voluntas, ut non solum calamitatem mihi detraxisse, sed etiam dignitatem auxisse videamini. non enim pro meo reditu, ut pro P. 3 Popilii, nobilissimi hominis, adulescentes filii et multi praeterea cognati atque adfines deprecati sunt; non, ut pro Q. Metello, clarissimo viro, iam spectata aetate filius, non L. Diadematus consularis, summa auctoritate vir, non C. Metellus censorius, non eorum liberi, non Q. Metellus Nepos, qui tum consulatum petebat, non sororum filii, Luculli, Servilii, Scipiones: permulti enim tum Metelli [aut Metellarum liberi] pro Q. Metelli reditu vobis ac patribus vestris supplicaverunt. quod si ipsius summa dignitas maximaeque res gestae non satis valerent, tamen filii pietas, propinquorum preces, adulescentium squalor, maiorum natu lacrimae populum Romanum movere potuerunt. nam C. Marii, qui post illos veteres clarissimos 7 consularis, hac vestra patrumque memoria, tertius ante me consularis subiit indignissimam fortunam praestantissima sua gloria dissimilis fuit ratio: non enim ille deprecatione rediit, sed in discessu civium exercitu se armisque revocavit: at me nudum a propinquis, nulla cognatione munitum, nullo armorum ac tumultus metu, C. Pisonis, generi mei, divina quaedam et inaudita auctoritas atque virtus fratrisque miserimi atque optimi cotidiana lacrimae sordesque lugubres a vobis deprecatae sunt. frater erat unus, qui suo squalore vestros oculos s inflecteret, qui suo fletu desiderium mei memoriamque renovaret; qui statuerat, Quirites, si vos me sibi non reddidissetis, eandem subire fortunam: tanto in me amore exstitit, ut negaret fas esse non modo domicilio, sed ne sepulcro quidem se a me esse seiunctum. pro me praesente senatus hominumque praeterea viginti milia vestem mutaverunt; pro eodem [me] absente unius squalorem sordesque vidistis. unus, qui quidem in foro posset adesse mihi, pietate filius inventus est, beneficio parens, amore idem, qui semper fuit, frater. nam coniugis miserae squalor et luctus atque optimae filiae maeror adsiduus filiique parvi desiderium mei lacrimaeque pueriles aut itineribus necessariis aut magnam partem tectis ac tenebris continebantur. qua re hoc maius est vestrum 4

in nos promeritum, quod non multitudini propinquorum, sed nobismet ipsis nos reddidistis.

9 Sed quem ad modum propinqui, quos ego parare non potui, mihi ad deprecandam calamitatem meam non fuerunt, sic illud, quod mea virtus praestare debuit, adiutores, auctores hortatoresque ad me restituendum ita multi fuerunt, ut longe superiores omnis hac dignitate copiaeque superarem. numquam de P. Popilio, clarissimo atque fortissimo viro, numquam de Q. Metello, nobilissimo et constantissimo cive, numquam de C. Mario, custode civitatis atque imperii vestri, in senatu mentio facta  
 10 est: tribuniciis superiores illi rogationibus, nulla auctoritate senatus sunt restituti; Marius vero non modo non a senatu, sed etiam oppresso senatu est restitutus, nec rerum gestarum memoria in reditu C. Marii, sed exercitus atque arma valuerunt. at de me ut valeret, semper senatus flagitavit; ut aliquando perficeretur, cum primum licuit, frequentia atque auctoritate perfregit. nullus in eorum reditu motus municipiorum et coloniarum factus est: at me in patriam ter suis decretis Italia cuncta revocavit; illi, inimicis interfectis, magna civium caede facta, reducti sunt: ego eis, a quibus eiectus sum, provincias obtinentibus, inimico autem, optimo viro et mitissimo, altero *consule* referente reductus sum: cum is inimicus, qui ad meam perniciem vocem suam communibus hostibus prae buisset, spiritu dumtaxat viveret, re quidem infra omnis mortuos amandatus  
 5 esset. numquam de P. Popilio L. Opimius, fortissimus  
 11 consul, numquam de Q. Metello non modo C. Marius, qui erat inimicus, sed ne is quidem, qui secutus est, M. Antonius, homo eloquentissimus, cum A. Albino conlega senatum aut populum est cohortatus: at pro me superiores consules semper ut referrent flagitati sunt; sed veriti sunt, ne gratiae causa facere viderentur, quod alter mihi adfinis erat, alterius causam capitis receperam: qui provinciarum foedere inretiti, totum illum annum querellas senatus, luctum bonorum, Italiae gemitum pertulerunt. Kalendis vero Ianuariis postea quam orba res publica consulis fidem tamquam legitimi tutoris imploravit, P. Lentulus consul, parens, deus, salus nostrae

vitae, fortunae, memoriae, nominis, simul ac de sollemni religione rettulit, nihil humanarum rerum sibi prius quam de me agendum iudicavit. atque eo die confecta res <sup>12</sup> esset, nisi is tribunus pl., quem ego maximis beneficiis quaestorem consul ornaram, cum et cunctus ordo et multi cum summi viri orarent et Cn. Oppius socer, optimus vir, ad pedes eius flens iaceret, noctem sibi ad deliberandum postulasset: quae deliberatio non in reddenda, quem ad modum non nulli arbitrabantur, sed, ut patefactum est, in augenda mercede consumpta est. postea res acta est in senatu alia nulla: cum variis rationibus impeditur, voluntate tamen perspecta senatus causa ad vos mense Ianuario deferebatur. hic tantum interfuit inter <sup>13</sup> me et inimicos meos: ego, cum homines in tribunali Aurelio palam conscribi centuriarique vidissem, cum intellegerem veteres ad spem caedis Catilinae copias esse revocatas, cum viderem ex ea parte homines, cuius partis nos vel principes numerabamur, partim quod mihi inviderent, partim quod sibi timerent, aut proditores esse aut desertores salutis meae, cum duo consules empti pactione provinciarum auctores se inimicis rei publicae tradidissent, cum egestatem, avaritiam, libidines suas viderent expleri non posse, nisi *me* constrictum domesticis hostibus deditissent, cum senatus equitesque Romani flere pro me ac mutata veste vobis supplicare edictis atque imperiis vetarentur, cum omnium provinciarum pactiones, cum omnia cum omnibus foedera reconciliatione gratiarum sanguine meo sancirentur, cum omnes boni non recusarent quin vel pro me vel mecum perirent, armis decertare pro mea salute nolui quod et vincere et vinci luctuosum rei publicae fore putavi: at inimici mei <sup>14</sup> mense Ianuario cum de me ageretur, corporibus civium trucidatis flumine sanguinis meum reditum intercludendum putaverunt. itaque dum ego absum, eam rem publicam habuistis, ut aequae me atque illam restituendam putaretis; ego autem, in qua civitate nihil valeret senatus, omnis esset impunitas, nulla iudicia, vis et ferrum in foro versaretur, cum privati parietum se praesidio, non legum tuerentur, tribuni plebis vobis inspectantibus volnerarentur, ad magistratuum domos cum ferro et fa-



cibus iretur, consulis fascēs frangerentur, deorum immortalium templa incenderentur, rem publicam esse nullam putavi. itaque neque re publica exterminata mihi locum in hac urbe esse duxi nec, si illa restitueretur, dubitavi  
15 quin me secum ipsa reduceret. an ego, cum mihi esset exploratissimum P. Lentulum proximo anno consulem futurum, qui illis ipsis rei publicae periculosissimis temporibus aedilis curulis me consule omnium meorum consiliorum particeps periculorumque socius fuisset, dubitarem quin is me confectum consularibus vulneribus consulari medicina ad salutem reduceret? hoc duce, collega autem eius, elementissimo atque optimo viro, primo non adversante, post etiam adiuvante, reliqui magistratus paene omnes fuerunt defensores salutis meae: ex quibus excellenti animo, virtute, auctoritate, praesidio, copiis T. Annius et P. Sestius praestanti in me benevolentia et divino studio exstiterunt; eodemque P. Lentulo auctore et pariter referente collega frequentissimus senatus, uno dissentiente, nullo<sup>6</sup> intercedente, dignitatem meam quibus potuit verbis amplissimis ornavit, salutem  
16 vobis, municipiis, coloniis omnibus commendavit. ita me nudum a propinquis, nulla cognatione munitum consules, praetores, tribuni plebis, senatus, Italia cuncta semper a vobis deprecata est; denique omnes, qui vestris maximis beneficiis honoribusque sunt ornati, producti ad vos ab eodem non solum ad me conservandum vos cohortati sunt, sed etiam rerum mearum gestarum auctores,  
7 testes, laudatores fuerunt. quorum princeps ad cohortandos vos et ad rogandos fuit Cn. Pompeius, vir omnium, qui sunt, fuerunt, erunt, virtute, sapientia, gloria princeps: qui mihi unus uni privato amico eadem omnia dedit, quae universae rei publicae, salutem, otium, dignitatem; cuius oratio fuit, quem ad modum accepi, triperita: primum vos docuit meis consiliis rem publicam esse servatam causamque meam cum communi salute coniunxit hortatusque est, ut auctoritatem senatus, statum civitatis, fortunas civis bene meriti defenderetis; tum me in perorando posuit rogari a senatu, rogari ab equitibus Romanis, rogari ab Italia cuncta; deinde ipse ad extremum pro mea vos salute non rogavit solum, verum etiam

obsecravit. huic ego homini, Quirites, tantum debeo, <sup>17</sup> quantum hominem homini debere vix fas est. huius consilia, P. Lentuli sententiam, senatus auctoritatem vos secuti, in eo me loco, in quo vestris beneficiis fueram, isdem centuriis, quibus conlocaratis, reposuistis. eodem tempore audistis eodem ex loco summos viros, ornatissimos atque amplissimos homines, principes civitatis, omnis consularis, omnis praetorios eadem dicere, ut omnium testimonio per me unum rem publicam conservatam esse constaret. itaque cum P. Servilius, gravissimus vir et ornatissimus civis, dixisset opera mea rem publicam incolumem magistratibus deinceps traditam, dixerunt in eandem sententiam ceteri. sed audistis eo tempore clarissimi viri non solum auctoritatem, sed etiam testimonium, L. Gellii, qui, quia suam classem attemptatam magno cum suo periculo paene sensit, dixit in contione vestrum, si ego consul, cum fui, non fuisset, rem publicam funditus interituram fuisse.

En ego tot testimoniis, Quirites, hac auctoritate senatus, tanta consensione Italiae, tanto studio bonorum omnium, agente P. Lentulo, consentientibus ceteris magistratibus, deprecante Cn. Pompeio, omnibus hominibus faventibus, dis denique immortalibus frugum ubertate, copia, vilitate redditum meum comprobantibus, mihi, meis, rei publicae restitutus, tantum vobis, quantum facere possum, Quirites, pollicebor: primum, qua sanctissimi homines pietate erga deos immortalis esse soleant, eadem [me] erga populum Romanum semper fore numenque vestrum aequae mihi grave et sanctum ac deorum immortalium in omni vita futurum; deinde, quoniam me in civitatem res publica ipsa reduxit, nullo me loco rei publicae defuturum. quod si quis existimat, me aut voluntate <sup>18</sup> esse mutata aut debilitata virtute aut animo fracto, vehementer errat: mihi quod potuit vis et iniuria et sceleratorum hominum furor detrahere, eripuit, abstulit, dissipavit; quod viro forti adimi non potest, id mihi manet et permanebit. vidi ego fortissimum virum, municipem meum, C. Marium — quoniam nobis quasi aliqua fatali necessitate non solum cum his, qui haec delere voluissent, sed etiam cum fortuna belligerandum fuit, — cum

- tamen vidi, cum esset summa senectute, non modo non infracto animo propter magnitudinem calamitatis, sed  
20 confirmato atque renovato. quem egomet dicere audivi, tum se fuisse miserum, cum careret patria, quam obsidione liberavisset, cum sua bona possideri ab inimicis ac diripi audiret, cum adulescentem filium videret eiusdem socium calamitatis, cum in paludibus demersus concursu ac misericordia Minturnensium corpus ac vitam suam conservasset, cum parva navicula traiectus in Africam, quibus regna ipse dederat, ad eos inops supplexque venisset: recuperata vero sua dignitate se non commissurum, ut, cum ea, quae amiserat, sibi restituta essent, virtutem animi non haberet, quam numquam perdidisset. sed hoc inter me atque illum interest, quod ille, qua re plurimum potuit, ea ipsa re inimicos suos ultus est, armis: ego qua consuevi arte utar, quoniam illi arti in bello ac seditione locus est, huic in pace atque otio.  
21 quamquam ille animo irato nihil nisi de inimicis ulciscendis agebat, ego de ipsis inimicis tantum, quantum  
9 mihi res publica permittet, cogitabo. denique, Quirites, quoniam me quattuor omnino hominum genera violarunt, unum eorum, qui odio rei publicae, quod eam ipsis invitis conservaram, inimicissimi mihi fuerunt; alterum, qui per simulationem amicitiae nefarie me prodiderunt; tertium, qui cum propter inertiam suam eadem adsequi non possent, inviderunt laudi et dignitati meae; quartum, qui cum custodes rei publicae esse deberent, salutem meam, statum civitatis, dignitatem eius imperii, quod erat penes ipsos, vendiderunt, sic ulciscar facinora eorum singula, quem ad modum a quibusque sum provocatus: malos civis rem publicam bene gerendo, perfidos amicos nihil credendo atque omnia cavendo, invidos virtuti et gloriae serviendo, mercatores provinciarum revocando domum atque ab eis provinciarum rationem repetendo.  
22 quamquam mihi, Quirites, maiori curae est quem ad modum vobis, qui de me estis optime meriti, gratiam referam quam quem ad modum inimicorum iniuriarum crudelitatemque persequar. etenim ulciscendae iniuriae facilius ratio est quam beneficii remunerandi, propterea quod superiorem esse contra improbos minus est negotii quam

bonis exaequari; tum etiam ne tam necessarium quidem est male meritis quam optime [meritis] referre quod debeas. odium vel precibus mitigari potest vel temporibus <sup>23</sup> rei publicae communique utilitate deponi vel difficultate ulciscendi leniri vel vetustate sedari: bene meritos ne colas nec exorari fas est neque id rei publicae remittere utique necesse est: neque est excusatio difficultatis neque aequum est tempore et die memoriam beneficii definire. postremo qui in ulciscendo remissior fuit, † in eorum aperte utitur: at gravissime vituperatur, qui in tantis beneficiis, quanta vos in me contulistis, remunerandis est tardior, neque solum ingratus, quod ipsum grave est, verum etiam impius appelletur necesse est. [atque in officio persolvendo dissimilis est ratio pecuniae debitae, propterea quod pecuniam qui retinet non dissolvit; qui reddidit non habet: gratiam et qui rettulit habet et qui habet dissolvit.] quapropter memoriam vestri beneficii colam benevolentia sempiterna, *neque solum me vivo*, sed etiam <sup>10</sup>  
<sup>24</sup> cum *anima defecerit* mea, multa monumenta vestri in me beneficii permanebunt. in referenda autem gratia hoc vobis repromitto semperque praestabo, mihi neque in consiliis de re publica capiendis diligentiam neque in periculis a re publica propulsandis animum neque in sententia simpliciter *e re publica* ferenda fidem neque in hominum voluntatibus pro re publica laedendis libertatem nec in perferendo labore industriam nec in vestris commodis augendis gratam animi benevolentiam defuturam. atque <sup>25</sup> haec cura, Quirites, erit infixā animo meo sempiterna, ut cum vobis, qui apud me deorum immortalium vim et numen tenetis, tum posteris vestris cunctisque gentibus dignissimus ea civitate videar, quae suam dignitatem non posse se tenere, nisi me recuperasset, cunctis suffragiis iudicavit.

---



M. TULLII CICERONIS  
DE DOMO SUA AD PONTIFICES ORATIO.

<sup>1</sup>  
<sup>1</sup> Cum multa divinitus, pontifices, a maioribus nostris inventa atque instituta sunt, tum nihil praeclarius quam quod eosdem et religionibus deorum immortalium et summae rei publicae praeesse voluerunt, ut amplissimi et clarissimi cives rem publicam bene gerendo religiones, religionum ius sapienter interpretando rem publicam conservarent. quod si ullo tempore magna causa in sacerdotum populi Romani iudicio ac potestate versata est, haec profecto tanta est, ut omnis rei publicae dignitas, omnium civium salus, vita, libertas, arae, foci, di penates, bona, fortunae, domicilia vestrae sapientiae, fidei, potestati commissa creditaque esse  
<sup>2</sup> videantur; vobis hodierno die constituendum est utrum posthac amentis ac perditos magistratus improborum ac sceleratorum civium praesidio nudare an etiam deorum immortalium religione armare malitis. nam si illa labes ac flamma rei publicae suum illum pestiferum et funestum tribunatum, quem aequitate humana tueri non potest, divina religione defenderit, aliae caerimoniae nobis erunt, alii antistites deorum immortalium, alii interpretes religionum requirendi: sin autem vestra auctoritate sapientiaque, pontifices, ea, quae furore improborum in re publica ab aliis oppressa, ab aliis deserta, ab aliis prodita gesta sunt, rescinduntur, erit causa cur consilium maiorum in amplissimis viris ad sacerdotia deligendis  
<sup>3</sup> iure ac merito laudare possimus. sed, quoniam ille demens, si ea, quae ego per hos dies in senatu de re publica sensi, vituperasset, aliquem se aditum ad aures vestras esse habiturum putavit, omittam ordinem dicendi meum: respondebo hominis furiosi non orationi, qua ille uti non potest, sed convitio, cuius exercitationem cum intolerabili petulantia tum etiam diuturna impunitate munivit.

Ac primum illud a te homine vaesano ac furioso re- 2  
 quiro, quae te tanta poena tuorum scelerum flagitiorum-  
 que vexet, ut hos talis viros, qui non solum consiliis  
 suis, sed etiam specie ipsa dignitatem rei publicae susti-  
 nent, quod ego in sententia dicenda salutem civium cum  
 honore Cn. Pompeii coniunxerim, mihi esse iratos et  
 aliud de summa religione hoc tempore sensuros ac me  
 absente senserint arbitrere. ‘fuisti’ inquit ‘tum apud 4  
 pontifices superior, sed iam, quoniam te ad populum  
 contulisti, sis inferior necesse est.’ itane vero? quod in  
 imperita multitudine est vitiosissimum, varietas et incon-  
 stantia et crebra tamquam tempestatum sic sententiarum  
 commutatio, hoc tunc ad hos transferas, quos ab incon-  
 stantia gravitas, a libidinosa sententia certum et defini-  
 tum ius religionum, vetustas exemplorum, auctoritas lit-  
 terarum monumentorumque deterret? ‘tunc es ille,’ in-  
 quit ‘quo senatus carere non potuit, quem boni luxerunt,  
 quem res publica desideravit? quo restituto senatus au-  
 ctoritatem restitutam putabamus, quam primam adveniens  
 prodidisti?’ nondum de mea sententia dico: impudentiae  
 primum respondebo tuae. hunc igitur tu, funesta rei pu- 3  
 blicae pestis, hunc tu civem ferro et armis et exercitus 5  
 terrore et consulum scelere et audacissimorum hominum  
 minis, servorum dilectu, obsessione templorum, occupa-  
 tione fori, oppressione curiae, domo et patria, ne cum  
 improbis boni ferro dimicarent, cedere curasti, quem a  
 senatu, quem a bonis omnibus, quem a cuncta Italia de-  
 sideratum, arcessitum, revocatum conservandae rei pu-  
 blicae causa confiteris? ‘at enim in senatum venire, in  
 Capitolium intrare turbulento illo die non debuisti.’ ego 6  
 vero neque veni et domo me tenui, quam diu turbulen-  
 tum tempus fuit, cum servos tuos a te iam pridem ad  
 bonorum caedem paratos cum illa tua consceleratorum  
 ac perditorum manu armatos etiam in Capitolium tecum  
 venisse constabat: quod cum mihi nuntiaretur, scio me  
 domi mansisse et tibi et gladiatoribus tuis instaurandae  
 caedis potestatem non fecisse: postea quam mihi nuntia-  
 tum est, populum Romanum in Capitolium propter me-  
 tum atque inopiam rei frumentariae convenisse, ministros  
 autem scelerum tuorum perterritos, partim amissis gladiis,

partim creptis diffugisse, veni non solum sine ullis copiis  
7 ac manu, verum etiam cum paucis amicis. an ego, cum  
P. Lentulus consul, optime de me ac de re publica meri-  
tus, cum Q. Metellus, qui, cum meus inimicus esset,  
frater tuus, et dissensionis nostrae et precibus tuis salutem  
ac dignitatem meam praetulisset, me arcesserent in sena-  
tum, cum tanta multitudo civium tam recenti officio suo  
me ad referendam gratiam nominatim vocarent, non veni-  
rem, cum praesertim te iam illinc cum tua fugitivorum  
manu discessisse constaret? hic tu me etiam, custodem  
defensoremque Capitolii templorumque omnium, hostem  
Capitolinum appellare ausus es, quod cum in Capitolio  
senatum duo consules haberent, eo venirem? utrum est  
tempus aliquod quo in senatum venisse turpe sit? an ea  
res erat illa, de qua agebatur, ut rem ipsam repudiare  
4 et eos, qui agebant, condemnare deberem? primum  
8 dico senatoris esse boni semper in senatum venire, nec  
cum his sentio, qui statuunt minus bonis temporibus  
in senatum ipsis non venire licere, non intellegentes hanc  
suam nimiam perseverantiam vehementer eis, quorum  
animum offendere voluerunt, gratam et iucundam fuisse.  
at enim non nulli propter timorem, quod se in senatu  
tuto non esse arbitrabantur, discesserunt. non repre-  
hendo, nec quaero fueritne aliquid pertimescendum: puto  
suo quemque arbitrato timere oportere. cur ego non  
timuerim quacris? quia te illinc abisse constabat. cur,  
cum viri boni non nulli putarint tuto se in senatu esse  
non posse, ego non idem senserim? cur, cum ego me  
sensissem tuto omnino in civitate esse non posse, illi  
senserunt? an eis licet et recte licet in meo metu sibi  
nihil timere; mihi uni necesse erit et meam et aliorum  
9 vicem pertimescere? an quia non condemnavi sententia  
mea duo consules, sum reprehendendus? eos igitur ego  
potissimum damnare debui, quorum lege perfectum est,  
ne ego indemnatus atque optime de re publica meritis  
damnatorum poenam sustinerem? quorum etiam delicta  
propter eorum egregiam in me conservando voluntatem  
non modo me, sed omnis bonos ferre oporteret, eorum  
optimum consilium ego potissimum, per eos in meam  
pristinam dignitatem restitutus, meo consilio repudiarem?

at quam sententiam dixi? primum eam, quam populi sermo in animis nostris iam ante defixerat; deinde eam, quae erat superioribus diebus agitata in senatu; deinde eam, quam senatus frequens tum, cum mihi est adensus, secutus est; ut neque adlata sit a me res inopinata ac recens, nec, si quod in sententia vitium est, maius sit eius, qui dixerit, quam omnium, qui probarint. ‘at <sup>10</sup> enim liberum senatus iudicium propter metum non fuit.’ si timuisse eos facis, qui discesserunt, concede non timuisse eos, qui remanserunt; sin autem sine eis, qui tum afuerunt, nihil decerni libere potuit, cum omnes adessent, coeptum est referri de inducendo senatus consulto: ab universo senatu reclamatum est. sed quaero in <sup>5</sup> ipsa sententia, quoniam princeps ego sum eius atque auctor, quid reprehendatur. utrum causa novi consilii capiendi non fuit, an meae partes in ea causa non praecipuae fuerunt, an alio potius confugiendum fuit? quae vis, quae causa maior quam fames esse potuit? quam seditio? quam consilia tua tuorumque? qui facultate oblata ad imperitorum animos incitandos renovaturum te tua cum illis funesta latrocinia ob annonae causam putavisti? frumentum provinciae frumentariae partim non ha- <sup>11</sup> bebant, partim in alias terras, credo propter varietatem venditorum, miserant, partim, quo gratius esset tum, cum in ipsa fame subvenissent, custodiis suis clausum continebant, ut subito novum mitterent. res erat non in opinione dubia, sed in praesenti atque ante oculos proposito periculo, neque id coniectura prospiciebamus, sed iam experti videbamus. nam cum ingravesceret annona, ut iam plane inopia ac fames, non caritas timeretur, concursus est ad templum Concordiae factus, senatum illuc vocante Metello consule. qui si verus fuit, ex dolore hominum et fame, certe consules causam suscipere, certe senatum aliquid consilii capere oportuit; sin causa fuit annona, seditionis quidem instimulator et concitator tu fuisti, nonne id agendum nobis omnibus fuit, ut materiam subtraheremus furori tuo? quid? si utrumque fuit, <sup>12</sup> ut et fames stimularet homines et tu in hoc ulcere tamquam inguen existeres, nonne fuit eo maior adhibenda medicina quae et illud nativum et hoc a te fictum malum



sanare posset? erat igitur et praesens caritas et futura famas; non est satis: facta lapidatio est. si ex dolore plebei, nullo incitante, magnum malum; si P. Clodii impulsu, usitatum hominis facinorosi scelus; si utrumque, ut et res esset ea, quae sua sponte multitudinis animos incitaret, et parati atque armati seditionis duces, videtur ipsa res publica et consulis auxilium implorasse et senatus fidem? atquin utrumque fuisse perspicuum est: difficultatem annonae summamque inopiam rei frumentariae, ut homines non iam diuturnam caritatem, sed ut famem plane timerent, nemo negat; hanc istum otii et pacis hostem causam adrepturum fuisse ad incendia, caedem, rapinas nolo, pontifices, suspicemini, nisi videritis:

13 qui sunt homines a Q. Metello fratre tuo consule in senatu palam nominati, a quibus ille se lapidibus appetitum, etiam percussum esse dixit? L. Sergium et M. Lollium nominavit. quis est iste Lollius? qui sine ferro ne nunc quidem tecum est; qui te tribuno plebis nihil de me dicam, sed qui Cn. Pompeium interficiendum depoposcit. quis est Sergius? armiger Catilinae, stipator tui corporis, signifer seditionis, concitator tabernariorum, damnatus iniuriarum, percussor, lapidator, fori depopulator, obsessor curiae: his atque eius modi ducibus cum tu in annonae caritate in consules, in senatum, in bona fortunasque locupletium per causam inopum atque imperitorum repentinos impetus comparares, cum tibi salus esse in otio nulla posset, cum desperatis ducibus decurios ac discriptos haberes exercitus perditorum, nonne providendum senatui fuit ne in hanc tantam materiem

6  
14 seditionis ista funesta fax adhaeresceret? fuit igitur causa capiendi novi consilii. videte nunc fuerintne partes meae praecipuae. quem tum Sergius ille tuus, quem Lollius, quem ceterae pestes in lapidatione illa nominabant? quem annonam praestare oportere dicebant? nonne me? quid? puerorum illa concursatio nocturna? non a te ipso instituta me frumentum flagitabat? quasi vero ego aut rei frumentariae praefuissem aut compressum aliquod frumentum tenerem aut in isto genere omnino quicquam aut curatione aut potestate valuissem. sed homo ad caedem imminens meum nomen operis ediderat, imperitis iniecerat.

cum de mea dignitate in templo Iovis Optimi Maximi senatus frequentissimus, uno isto dissentiente, decrevisset, subito illo ipso die carissimam annonam necopinata vilitas consecuta est. erant qui deos immortalis, id quod <sup>15</sup> ego sentio, numine suo reditum meum dicerent comprobasse; non nulli autem illam rem ad illam rationem coniecturamque revocabant, qui, quod in meo reditu spes otii et concordiae sita videbatur, in discessu autem cotidianus seditionis timor, iam paene belli depulso metu, commutatam annonam esse dicebant; quae quia rursus in meo reditu facta erat durior, a me, cuius adventu fore vilitatem boni viri dictitabant, annona flagitabatur. ego <sup>7</sup> denique non solum ab operis tuis impulsu tuo nominabar, sed etiam depulsis ac dissipatis tuis copiis a populo Romano universo, qui tum in Capitolium convenerat, cum illo die minus valerem, in senatum nominatim vocabar. veni exspectatus; multis iam sententiis dictis rogatus sum <sup>13</sup> sententiam; dixi rei publicae saluberrimam, mihi necessariam: petebatur a me frumenti copia, annonae vilitas; possem aliquid in ea re necne ratio non habebatur; flagitabar bonorum expostulatione; improborum convitia sustinere non poteram: delegavi amico locupletiori, non quo illi ita de me merito onus illud imponerem, succubissem enim potius ipse, sed quia videbam id, quod omnes, quod nos de Cn. Pompeio polliceremur, id illum fide, consilio, virtute, auctoritate, felicitate denique sua facillime perfecturum. itaque sive hunc di immortales <sup>17</sup> fructum mei reditus populo Romano tribuunt, ut, quem ad modum discessu meo frugum inopia, fames, vastitas, caedes, incendia, rapinae, scelerum impunitas, fuga, formido, discordia fuisset, sic reditu ubertas agrorum, frugum copia, spes otii, tranquillitas animorum, iudicia, leges, concordia populi, senatus auctoritas mecum simul reducta videantur; sive egomet aliquid adventu meo, consilio, auctoritate, diligentia pro tanto beneficio populo Romano praestare debui, praesto, promitto, spondeo; nihil dico amplius; hoc, quod satis est huic temporis, dico, rem publicam annonae nomine in id discrimen quo vocabatur non esse venturam. num igitur in hoc officio, quod fuit praecipue meum, sententia mea reprehenditur? rem maximam <sup>8</sup>  
<sup>18</sup>

fuisse *et* summi periculi, non solum a fame, sed etiam a caede, incendiis, vastitate nemo negat, cum ad causam caritatis accederet iste speculator communium miseriarum, qui semper ex rei publicae malis sceleris sui faces inflammaret: negat oportuisse quicquam uni extra ordinem decerni. non iam tibi sic respondebo, ut ceteris: Cn. Pompeio plurima, periculosissima, maxima mari terraque bella extra ordinem sunt commissa; quarum rerum si quem paeniteat, cum victoriae populi Romani necesse est pac-  
 19 nitere — non ita tecum ago: cum his haec a me haberi oratio potest, qui ita disputant, se, si qua res ad unum deferenda sit, ad Cn. Pompeium delaturos potissimum, sed se extra ordinem nihil cuiquam dare: cum Pompeio datum sit, id se pro dignitate hominis ornare ac tueri solere. horum ego sententiam ne laudem, impediō Cn. Pompeii triumphis, quibus ille, cum esset extra ordinem ad patriam defendendam vocatus, auxit nomen populi Romani imperiumque honestavit; constantiam probo, qua mihi quoque utendum fuit, quo ille auctore extra ordinem  
 20 bellum cum Mithridate Tigraneque gessit. sed cum illis tamen possum aliquid disputare: tua vero quae tanta impudentia est, ut audeas dicere extra ordinem dari nihil cuiquam oportere? qui cum lege nefaria Ptolemaeum, regem Cypri, fratrem regis Alexandrini, eodem iure regnantem, causa incognita publicasses populumque Romanum scelere obligasses, cum in eius regnum, bona, fortunas latrocinium huius imperii immisisses, cuius cum patre, avo, maioribus societas nobis et amicitia fuisset, huius pecuniae deportandae et, si ius suum defenderet,  
 21 bello gerendo M. Catonem praefecisti. dices: quem virum? sanctissimum, prudentissimum, fortissimum, amicissimum rei publicae, virtute, consilio, ratione vitae mirabili ad laudem et prope singulari! sed quid ad te, qui negas esse verum quemquam ulli rei publicae extra ordinem  
 9 praefici? atque in hoc solum inconstantiam redarguo tuam? qui [in ipso Catone], quem tu non pro illius dignitate produxeras, sed pro tuo scelere subduxeras, quem tuis Sergiis, Lolliis, Titiis ceterisque caedis et incendiorum ducibus obieceras, quem carnificem civium, quem in-  
 demnatorum necis principem, quem crudelitatis auctorem

fuisse dixeras: ad hunc honorem et imperium extra ordinem nominatim rogatione tua detulisti? et tanta fuisti intemperantia, ut illius tui sceleris rationem occultare non posses: litteras in contione recitasti, quas tibi a C. Caesare missas diceres CAESAR PULCRO, cum etiam es argumentatus amoris esse hoc signum, *quod* cognominibus tantum uteretur neque ascriberet PRO CONSULE aut TRIBUNO PLEBIS; deinde gratulari tibi, quod [idem in posterum] M. Catonem a tribunatu tuo removisses et quod eidem in posterum de extraordinariis potestatibus libertatem ademisses: quas aut numquam tibi ille litteras misit aut, si misit, in contione recitari noluit; at, sive ille misit sive tu finxisti, certe consilium tuum de Catonis honore illarum litterarum recitatione patefactum est. sed omitto <sup>23</sup> Catonem, cuius eximia virtus, dignitas et in eo negotio, quod gessit, fides et continentia tegere videretur improbitatem et legis et actionis tuae: quid? homini post homines natos turpissimo, sceleratissimo, contaminatissimo quis illam opimam fertilemque Syriam, quis bellum cum pacatissimis gentibus, quis pecuniam ad emendos agros constitutam, ereptam ex sui Caesaris rebus actis, quis imperium infinitum dedit? cui quidem cum Ciliciam dedisses, mutasti pactionem et Ciliciam ad praetorem item extra ordinem transtulisti; Gabinio pretio amplificato Syriam nominatim dedisti. quid? homini taeterrimo, crudelissimo, fallacissimo, omnium scelerum libidinumque maculis notatissimo, L. Pisoni, nonne nominatim populos liberos, multis senatus consultis, etiam recenti lege generi ipsius liberatos, vinctos et constrictos tradidisti? nonne, cum ab eo merces tui beneficii pretiumque provinciae meo sanguine tibi esset persolutum, tamen aerarium cum eo partitus es? itane vero? tu provincias consularis, quas <sup>24</sup> C. Gracchus, qui unus maxime popularis fuit, non modo non abstulit a senatu, sed etiam, ut necesse esset quotannis constitui per senatum [decreta], lege sanxit, eas lege Sempronia per senatum decretas rescidisti, extra ordinem, sine sorte, nominatim dedisti, non consulibus, sed rei publicae pestibus: nos, quod nominatim rei maximae, paene iam desperatae, summum virum, saepe ad extrema rei publicae discrimina delectum, praefecimus,



- 10 ate reprehendemur? quid tandem? si, quae tum in illis  
rei publicae tenebris caecisque nubibus et procellis, cum  
senatum a gubernaculis deiecesses, populum e navi extur-  
basses, ipse archipirata cum grege praedonum impuris-  
simo plenissimis velis navigares — si, quae tum promul-  
gasti, constituisti, promisisti, vendidisti, perferre potuisses,  
ecqui locus orbi terrarum vacuus extraordinariis fascibus  
25 atque imperio Clodiano fuisset? sed excitatus aliquando  
Cn. Pompeii, — dicam ipso audiente, quod sensi et sentio,  
quoquo animo auditurus est — excitatus, inquam, ali-  
quando Cn. Pompeii nimium diu reconditus et penitus  
abstrusus animi dolor subvenit subito rei publicae civita-  
temque fractam malis, mutam ac debilitatam, abiectam  
metu, ad aliquam spem libertatis et pristinae dignitatis  
erexit. hic vir extra ordinem rei frumentariae prae-  
ficiendus non fuit? scilicet tu helluoni spurcatissimo, prae-  
gustatori libidinum tuarum, homini egentissimo et faci-  
norosissimo, Sex. Clodio, socio tui sanguinis, qui sua  
lingua etiam sororem tuam a te abalienavit, omne fru-  
mentum privatum et publicum, omnis provincias frumen-  
tarias, omnis mancipes, omnis horreorum clavis lege tua  
tradidisti; qua ex lege primum caritas nata est, deinde  
inopia. impendebat fames, incendia, caedes, direptio;  
26 immincebat tuus furor omnium fortunis et bonis. queritur  
etiam importuna pestis, ex ore impurissimo Sex. Clodii  
rem frumentariam esse ereptam summisque in periculis  
eius viri auxilium implorasse rem publicam, a quo saepe  
se et servatam et amplificatam esse meminisset. extra  
ordinem ferri nihil placet Clodio. quid? de me quod  
tulisse te dicis, patricida, fratricida, sororicida, nonne  
extra ordinem tulisti? an de peste civis, quem ad modum  
omnes iam di atque homines iudicarunt, conservatoris  
rei publicae, quem ad modum autem tute ipse confiteris,  
non modo indemnati, sed ne accusati quidem, licuit tibi  
ferre non legem, sed nefarium privilegium, lugente se-  
nату, maerentibus bonis omnibus, totius Italiae precibus  
repudiatis, oppressa captaque re publica: mihi, populo  
Romano implorante, senatu poscente, temporibus rei  
publicae flagitantibus, non licuit de salute populi Romani  
27 sententiam dicere? qua quidem in sententia si Cn. Pom-

peii dignitas aucta est, coniuncta cum utilitate communi, certe laudandus essem, si eius dignitati suffragatus viderer, qui meae saluti opem et auxilium tulisset. desi- 11  
nant, desinant homines isdem machinis sperare me restitutum posse labefactari, quibus antea stantem perculerunt. quod enim par amicitiae consularis fuit umquam in hac civitate coniunctius quam fuimus inter nos ego et Cn. Pompeius? quis apud populum Romanum de illius dignitate inlustrius, quis in senatu saepius dixit? qui tantus fuit labor, quae simultas, quae contentio quam ego non pro illius dignitate susceperim? qui ab illo in me honos, quae praedicatio de mea laude, quae remuneratio benevolentiae praetermissa est? hanc nostram coniunctionem, 28  
hanc conspiracy in re publica bene gerenda, hanc iucundissimam vitae atque officiorum omnium societatem certi homines fictis sermonibus et falsis criminibus diremerunt, cum eidem illum, ut me metueret, me caveret, monerent, eidem apud me mihi illum uni esse inimicissimum dicerent, ut neque ego ab illo quae mihi petenda essent satis audaciter petere possem neque ille tot suspicionibus certorum hominum et scelere exulceratus quae meum tempus postularet satis prolixè mihi polliceretur. data merces est erroris mei magna, pontifices, ut me non 29  
solum pigeat stultitiae meae, sed etiam pudeat: qui, cum me non repentinum aliquod meum tempus, sed veteres multo ante suscepti et provisi labores cum viro fortissimo et clarissimo coniunxissent, sim passus a tali amicitia distrahi neque intellexerim quibus aut ut apertis inimicis obsisterem aut ut insidiosis amicis non crederem. proinde desinant aliquando me isdem inflare verbis: ‘quid sibi iste volt? nescit quantum auctoritate valeat, quas res gesserit, qua dignitate sit restitutus! cur ornat eum, a quo desertus est?’ ego vero neque me tum desertum 30  
puto, sed paene deditum: nec quae sint in illa rei publicae flamma gesta contra me neque quo modo neque per quos patefaciendum mihi esse arbitror. si utile rei publicae fuit haurire me unum pro omnibus illam indignissimam calamitatem, etiam hoc utile est, quorum id scelere conflatum sit me occultare et tacere. illud vero est hominis ingrati tacere: itaque libentissime praedicabo Cn. Pom-

peium studio et auctoritate, aeque atque unum quemque vestrum, opibus, contentione, precibus, periculis denique  
 12 praecepit pro salute mea laborasse. hic tuis, P. Lentule, cum tu nihil aliud dies et noctis nisi de salute mea cogitares, consiliis omnibus interfuit; hic tibi gravissimus auctor ad instituendam, fidelissimus socius ad comparandam, fortissimus adiutor ad rem perficiendam fuit; hic municipia coloniasque adiit; hic Italiae totius auxilium cupientis imploravit; hic in senatu princeps sententiae fuit, idemque \* dixisset, tum etiam pro salute mea popu-  
 31 lum Romanum obsecravit. qua re istam orationem, qua es usus, omittas licet, post illam sententiam, quam dixeram de annonae, pontificum animos esse mutatos; proinde quasi isti aut de Cn. Pompeio aliter atque ego existimo sentiant aut quid mihi pro expectatione populi Romani, pro Cn. Pompeii meritis erga me, pro ratione mei temporis faciendum fuerit ignorent aut etiam, si cuius forte pontificis animum, quod certo scio aliter esse, mea sententia offendit, alio modo sit constituturus aut de religione pontifex aut de re publica civis quam cum aut caerimonia-  
 rum ius aut civitatis salus coegerit.

32 Intellego, pontifices, me plura extra causam dixisse quam aut opinio tulerit aut voluntas mea, sed cum me purgatum vobis esse cuperem, tum etiam vestra in me attente audiendo benignitas provexit orationem meam. sed hoc compensabo brevitate eius orationis, quae pertinet ad ipsam causam cognitionemque vestram; quae cum sit in ius religionis et in ius rei publicae distributa, religionis partem, quae multo est verbosior, praetermit-  
 33 tam, de iure rei publicae dicam. quid est enim aut tam adrogans quam de religione, de rebus divinis, caerimoniis, sacris pontificum collegium docere conari aut tam stultum quam, si quis quid in vestris libris invenerit, id narrare vobis aut tam curiosum quam ea scire velle, de quibus maiores nostri vos solos et consuli et scire volue-  
 13 runt? nego potuisse iure publico, legibus eis, quibus haec civitas utitur, quemquam civem ulla eius modi calamitate adfici sine iudicio: hoc iuris in hac civitate, etiam tum, cum reges essent, dico fuisse; hoc nobis esse a maioribus traditum; hoc esse denique proprium liberae

civitatis, ut nihil de capite civis aut de bonis sine iudicio senatus aut populi aut eorum, qui de quaque re constituti iudices sint, detrahi possit. videsne me radicitus evel-<sup>34</sup> lere omnis actiones tuas atque illud agere, quod apertum est, te omnino nihil gessisse iure, non fuisse tribunum plebis, hodie esse patricium? dico apud pontifices; augures adsunt; versor in medio iure publico.

Quod est, pontifices, ius adoptionis? nempe ut is adoptet, qui neque procreare iam liberos possit et, cum potuerit, sit expertus. quae deinde causa cuique sit adoptionis, quae ratio generum ac dignitatis, quae sacrorum, quaeri a pontificum conlegio solet. quid est horum in ista adoptione quaesitum? adoptat annos viginti natus, etiam minor senatorem. liberorumne causa? at procreare potest. habet uxorem, suscipiet iam liberos. exheredabit igitur pater filium. quid? sacra Clodiae gentis cur intereunt quod in te est? quae omnis notio pontificum, cum adoptarere, esse debuit. nisi forte ex te ita<sup>35</sup> quaesitum est, num perturbare rem publicam seditionibus velles et ob eam causam adoptari, non ut eius filius esses, sed ut tribunus plebis fieres et funditus everteres civitatem? respondisti, credo, te ita velle: pontificibus bona causa visa est; approbaverunt. non aetas eius, qui adoptabat, est quaesita, ut in Cn. Aufidio, M. Pupio: quorum uterque nostra memoria, summa senectute, alter Oresten, alter Pisonem adoptavit; quas adoptiones, sicut alias innumerabilis, hereditates nominis, pecuniae, sacrorum secutae sunt. tu neque Fonteius es, qui esse debebas, neque patris heres, neque amissis sacris paternis in haec adoptiva venisti. ita perturbatis sacris, contaminatis gentibus et quam deseruisti et quam polluisti, iure Quiritium legitimo tutelarum et hereditatum relicto, factus es eius filius contra fas, cuius per aetatem pater esse potuisti. dico apud pontifices; nego istam adoptionem pontificio iure esse factam: primum, quod eae vestrae sint actates, ut is, qui te adoptavit, vel filii tibi loco per aetatem esse potuerit vel eo, quo fuit; deinde quod causa quaeri solet adoptandi, ut et is adoptet, qui, quod natura iam adsequi non potest, legitimo et pontificio iure quaerat, et ita adoptet, ut ne quid aut de dignitate generum aut



de sacrorum religione minuatur, illud in primis, ne qua calumnia, ne qua fraus, ne quis dolus adhibeatur; ut haec simulata adeptio filii quam maxime veritatem illam  
 37 suscipiendorum liberorum imitata esse videatur. quae maior calumnia est quam venire imberbum adulescentulum, bene valentem ac maritum; dicere *se* filium senatorem populi Romani sibi velle adoptare; id autem scire et videre omnis, non ut ille filius instituatur, sed ut e patriciis exeat *et* tribunus plebis fieri possit, idcirco adoptari? neque id obscure; nam adoptatum emancipari statim, ne sit eius filius, qui adoptarit: cur ergo adoptabat? probate genus adoptionis: iam omnium sacra interierint, quorum custodes vos esse debetis, iam patricius nemo relinquetur. cur enim quisquam vellet tribunum plebis se fieri non licere, angustiores sibi esse petitionem consulatus, in sacerdotium cum possit venire, quia patricio non sit is locus, non venire? ut cuique aliquid acciderit, qua re commodius sit esse plebeium, simili ratione adoptabitur.  
 38 ita populus Romanus brevi tempore neque regem sacrorum neque flamines nec Salios habebit nec ex parte dimidia reliquos sacerdotes neque auctores centuriatorum et curiatorum comitiorum auspiciaque populi Romani, si magistratus patricii creati non sint, intereant necesse est, cum interrex nullus sit, quod et ipsum patricium esse et a patriciis prodi necesse est. dixi apud pontifices istam adoptionem nullo decreto huius conlegii probatam, contra omne pontificum ius factam pro nihilo esse habendam: qua sublata intellegis totum tribunatum tuum concidisse.

15  
 39 Venio ad augures, quorum ego libros, si qui sunt reconditi, non scrutor; non sum in exquirendo iure augurum curiosus; haec, quae una cum populo didici, quae saepe in contionibus responsa sunt, novi. negant fas esse agi cum populo, cum de caelo servatum sit. quo die de te lex curiata lata esse dicatur, audes negare de caelo esse servatum? adest praesens vir singulari virtute, constantia, gravitate praeditus, M. Bibulus: hunc consulem illo ipso die contendo servasse de caelo. 'infirmas igitur tu acta C. Caesaris, viri fortissimi?' minime; neque enim mea iam quicquam interest exceptis

eis telis, quae ex illius actionibus in meum corpus im-  
 missa sunt. sed haec de auspiciis, quae ego nunc per-<sup>40</sup>  
 breviter attingo, acta sunt a te. tu tuo praecepitante  
 iam et debilitato tribunatu auspiciorum patronus subito  
 exstitisti; tu M. Bibulum in contionem, tu augures pro-  
 duxisti; a te interrogati augures responderunt, cum de  
 caelo servatum sit, cum populo agi non posse; tibi M.  
 Bibulus quaerenti se de caelo servasse respondit, idem-  
 que in contione dixit, ab Appio tuo fratre productus, te  
 omnino, quod contra auspicia adoptatus esses, tribunum  
 non fuisse. tua denique omnis actio posterioribus men-  
 sibus fuit omnia, quae C. Caesar egisset, quod contra  
 auspicia essent acta, per senatum rescindi oportere: quod  
 si fieret, dicebas te tuis umeris me custodem urbis in  
 urbem relaturum. videte hominis amentiam, \* per suum  
 tribunatum Caesaris actis inligatus teneretur. si et sa-<sup>41</sup>  
 crorum iure pontifices et auspiciorum religione augures  
 totum evertunt tribunatum tuum, quid quaeris amplius?  
 an etiam apertius aliquod ius populi atque legum? hora<sup>16</sup>  
 fortasse sexta diei questus sum in iudicio, cum C. Anto-  
 nium, conlegam meum, defenderem, quaedam de re pu-  
 blica, quae mihi visa sunt ad illius miseri causam perti-  
 nere: haec homines improbi ad quosdam viros fortis longe  
 aliter atque a me dicta erant detulerunt: hora nona illo  
 ipso die tu es adoptatus. si, quod in ceteris legibus tri-  
 num nundinum esse oportet, id in adoptione satis est  
 trium esse horarum, nihil reprehendo; sin eadem obser-  
 vanda sunt, iudicavit senatus M. Drusi legibus, quae  
 contra legem Caeciliam et Didiam latae essent, populum  
 non teneri. iam intellegis omni genere iuris, quod in<sup>42</sup>  
 sacris, quod in auspiciis, quod in legibus sit, te tribunum  
 plebis non fuisse. at ego hoc totum non sine causa re-  
 linquo; video enim quosdam clarissimos viros, principes  
 civitatis, aliquot locis iudicasse te cum plebe iure agere  
 potuisse; qui etiam de me ipso, cum tua rogatione funere  
 elatam rem publicam esse dicerent, tamen id funus, etsi  
 miserum atque acerbum fuisset, iure indictum esse dice-  
 bant. quod de me civi ita de re publica merito tulis-  
 ses, funus te indixisse rei publicae; quod salvis auspiciis  
 tulisses, iure egisse dicebant. qua re licebit, ut opinor,

nobis eas actiones non infirmare, quibus illi actionibus constitutum tribunatum comprobaverunt.

- 43 Fueris sane tribunus plebis † tam in iure quam lege fuit hic ipse Villius, vir omnibus rebus clarissimus atque amplissimus: quo iure, quo more, quo exemplo
- 17 legem nominatim de capite civis indemnati tulisti? vetant leges sacratae, vetant XII tabulae leges privatis hominibus inrogari; id est enim privilegium: nemo umquam tulit; nihil est crudelius, nihil perniciosius, nihil quod minus haec civitas ferre possit. proscriptionis miserrimum nomen illud et omnis acerbitas Sullani temporis quid habet quod maxime sit insigne ad memoriam crudelitatis? opinor, poenam in civis Romanos nominatim sine iudicio
- 44 constitutam. hanc vos igitur, pontifices, iudicio atque auctoritate vestra tribuno plebis potestatem dabit, ut proscribere possit quos velit? quaero enim quid sit aliud proscribere: VELITIS IUBEATIS UT M. TULLIUS IN CIVITATE NE SIT BONAQUE EIUS UT MEA SINT. ita enim fecit, etsi aliis verbis tulit. hoc plebei scitum est? haec lex, haec rogatio est? hoc vos pati potestis, hoc ferre civitas, ut singuli cives singulis versiculis e civitate tollantur? equidem iam perfunctus sum; nullam vim, nullum impetum metuo; explevi animos invidorum; placavi odia improborum; saturavi etiam perfidiam et scelus proditorum; denique de mea causa, quae videbatur perditis civibus ad invidiam esse proposita, iam omnes urbes, omnes ordines, omnes
- 45 di atque homines iudicarunt: vobismet ipsis, pontifices, et vestris liberis ceterisque civibus pro vestra auctoritate et sapientia consulere debetis. nam cum tam moderata iudicia populi sint a maioribus constituta, primum ut ne poena capitis cum pecunia coniungatur, deinde ne improdicta die quis accusetur, ut ter ante magistratus accuset intermissa die quam multam inroget aut iudicet, quarta sit accusatio trinum nundinum prodicta die, qua die iudicium sit futurum, tum multa etiam ad placandum atque ad misericordiam reis concessa sint, deinde exorabilis populus, facilis suffragatio pro salute, denique etiam si qua res illum diem aut auspiciis aut excusatione sustulit,
- 18  
46 tota causa iudiciumque sublatum sit: — haec cum ita sint in re, ubi crimen est, ubi accusator, ubi testes, quid

indignius quam qui neque adesse sit iussus neque citatus neque accusatus, de eius capite, liberis, fortunis omnibus conductos et sicarios et egentis et perditos suffragium ferre et eam legem putare? ac, si hoc de me potuit, quem honos, quem dignitas, quem causa, quem res publica tuebatur, cuius denique pecunia non expetebatur, cui nihil oberat praeter conversionem status et inclinationem communium temporum, quid tandem futurum est eis, quorum vita remota ab honore populari et ab hac inlustri gratia est, pecuniae autem tantae sunt, ut eas nimium multi, egentes, sumptuosi, nobiles concupiscant? date hanc tribuno plebis licentiam et intuemini paulisper animis iuventutem et eos maxime, qui imminere iam cupiditate videntur in tribuniciam potestatem: conlegia, medius fidius, tribunorum plebis tota reperientur hoc iure firmato, quae coëant de hominum locupletissimorum bonis, praeda praesertim populari et spe largitionis oblata.

At quid tulit legum scriptor peritus et callidus? VELITIS IUBEATIS UT M. TULLIO AQUA ET \*IGNI INTERDICATUR? crudele, nefarium, ne in sceleratissimo quidem civi sine iudicio ferendum. non tulit ut interdicatur. quid ergo? UT INTERDICTUM SIT. o caenum, o portentum, o scelus! hanc tibi legem Clodius scripsit, spurciorem lingua sua, ut interdictum sit, cui non sit interdictum? Sexte noster, bona venia, quoniam iam dialecticus es et haec quoque liguris, quod factum non est, ut sit factum, ferri ad populum aut verbis ullis sanciri aut suffragiis confirmari potest? hoc tu scriptore, hoc consiliario, hoc ministro<sup>43</sup> omnium non bipedum solum, sed etiam quadripedum impurissimo rem publicam perdidisti; neque tu eras tam excors tamque demens, ut nescires Clodium esse qui contra leges faceret, alios qui leges scribere solerent, sed neque eorum neque ceterorum, in quibus esset aliquid modestiae, cuiusquam tibi potestas fuit; neque tu legum scriptoribus isdem potuisti uti quibus ceteri neque operum architectis, neque pontificem adhibere quem velles, postremo ne in praedae quidem societate mancipem aut praedem [socium] extra tuorum gladiatorum numerum aut denique suffragii latorem in ista tua proscriptione quemquam nisi furem ac sicarium reperire potuisti. ita-<sup>19</sup>  
<sup>49</sup>



que cum tu florens ac potens per medium *forum* scortum  
 populare volitares, amici illi tui, te uno amico tecti et  
 beati, qui se populo commiserant, ita repellebantur, ut  
 etiam Palatinam tuam perderent; qui in iudicium vene-  
 rant, sive accusatores erant sive rei, te deprecante damna-  
 bantur. denique etiam ille novicius Ligus, venalis scri-  
 ptor et subscriptor tuus, cum M. Papirii sui fratris esset  
 50 testamento et iudicio improbatus, mortem eius se velle  
 persequi dixit; nomen Sex. Propertii detulit: accusare  
 alienae dominationis scelerisque socius propter calumniae  
 iure rogata videatur: cuius quam quisque partem tetigit,  
 digito, voce, praeda, suffragio, quocumque venit, repu-  
 diatus convictusque discessit. quid, si eis verbis scripta  
 est ista proscriptio, ut se ipsa dissolvat? est enim, quod  
 M. TULLIUS FALSUM SENATUS CONSULTUM RETTULERIT. si  
 igitur rettulit falsum senatus consultum, tum est rogatio;  
 si non rettulit, nulla est: satisne tibi videtur a senatu  
 indicatum me non modo non ementitum esse auctoritatem  
 eius ordinis, sed etiam unum post urbem conditam dili-  
 gentissime senatui paruisse? quot modis doceo legem  
 istam, quam vocas, non esse legem? quid, si etiam plu-  
 ribus de rebus uno sortitore tulisti, tamenne arbitraris,  
 id, quod M. Drusus in legibus suis plerisque bonis  
 ille vir, M. Scauro et L. Crasso consiliariis non ob-  
 tinuerit, id te posse, hominem facinorum et stuprorum  
 omnium *documentum* Decumis et Clodiis auctoribus, ob-  
 51 tinere? tulisti de me, ne reciperer, non ut exirem, quem  
 20 tu ipse non poteras dicere non licere esse Romae. quid  
 enim diceres? damnatum? certe non. expulsum? qui  
 licuit? sed tamen ne id quidem est scriptum, ut exirem:  
 poena est, qui receperit, quam omnes neglexerunt; eicctio  
 nusquam est. verum sit. quid? operum publicorum ex-  
 actio: quid? nominis inscriptio tibi num aliud videtur  
 esse ac meorum bonorum direptio? praeterquam quod ne  
 id quidem per legem Liciniam, ut ipse tibi curationem  
 ferres, facere potuisti? quid? hoc ipsum, quod nunc apud  
 pontifices agis, te meam domum consecrasse, te monu-  
 mentum fecisse in meis aedibus, te signum dedicasse  
 eaque te ex una rogatiuncula fecisse, unum et idem

videtur esse atque id, quod de me ipso nominatim tulisti? tam hercule est unum, quam quod idem tu lege una tu-<sup>52</sup> listi, ut Cyprius rex, cuius maiores huic populo socii atque amici semper fuerunt, cum bonis omnibus sub praeconem subiceretur et exsules Byzantium reducerentur. 'eidem' inquit 'utraque de re negotium dedi.' quid? si eidem negotium dedisset, ut in Asia cistophorum flagitaret, inde iret in Hispaniam, cum inde decessisset, consulatum ei petere liceret, cum factus esset, provinciam Syriam obtineret, quoniam de uno homine scriberet, una res esset? quod si iam populus Romanus de ista re con-<sup>53</sup> sultus esset et non omnia per servos latronesque gessisses, nonne fieri poterat ut populo de Cyprio rege placeret, de exsulibus Byzantiis displiceret? quae est, quaeso, alia vis, quae sententia Caeciliae legis et Didiae nisi haec, ne populo necesse sit in coniunctis rebus compluribus aut id, quod nolit, accipere, aut id, quod velit, repudiare? quid? si per vim tulisti, tamenne lex est? aut quicquam iure gestum videri potest, quod per vim gestum esse constet? an, si in ipsa latione tua, capta iam urbe, lapides iacti, si manus conlata non est, idcirco tu ad illam labem atque cluviem civitatis sine summa vi pervenire potuisti? cum in tribunali Aurelio conscribebas palam<sup>21</sup> non modo liberos, sed etiam servos, ex omnibus vicis<sup>54</sup> concitatos, vim tum videlicet non parabas? cum edictis tuis tabernas claudi iubebas, non vim imperitae multitudinis, sed hominum honestorum modestiam prudentiamque quaerebas? cum arma in aedem Castoris comportabas, nihil aliud nisi uti ne quid per vim agi posset machinabare? cum vero gradus Castoris convellisti ac removisti, tum, ut modeste tibi agere liceret, homines audacis ab eius templi aditu atque ascensu reppulisti? cum eos, qui in conventu virorum bonorum verba de salute mea fecerant, adesse iussisti eorumque advocationem manibus, ferro, lapidibus discussisti, tum profecto ostendisti vim tibi maxime displicere. verum haec furiosa vis vaesani<sup>55</sup> tribuni plebis facile superari frangique potuit virorum bonorum vel virtute vel multitudine. quid? cum Gabinio Syria dabatur, Macedonia Pisoni, utrique infinitum imperium, ingens pecunia, ut tibi omnia permetterent, te ad-

iuvarent, tibi manum, copias, tibi suos speratos centuriones, tibi pecuniam, tibi familias compararent, te suis sceleratis contionibus sublevarent, senatus auctoritatem inriderent, equitibus Romanis mortem proscriptionemque minitarentur, me terrerent minis, mihi eadem et dimicationem denuntiarent, meam domum refertam viris bonis per amicos suos complerent proscriptionis metu, me frequentia nudarent virorum bonorum, me praesidio spoliarent senatus, pro me non modo pugnare amplissimum ordinem, sed etiam plorare et supplicare mutata veste prohiberent, ne tum quidem vis erat? quid igitur ego cessi aut qui timor fuit? non dicam, in me; fac me timidum esse natura: quid illa tot virorum fortissimorum milia? quid nostri equites Romani? quid senatus? quid denique omnes boni? si nulla erat vis, cur me flentes potius persecuti sunt, quam aut increpantes retinuerunt aut irati reliquerunt? an hoc timebam, si mecum ageretur more institutoque maiorum, ut possem praesens  
<sup>57</sup> sustinere? utrum si dies dicta esset, iudicium mihi fuit pertimescendum an sine iudicio privilegium? iudicium in causa tam turpi? scilicet homo, qui eam, si iam esset ignota, dicendo non possem explicare. an quia causam probare non poteram, cuius tanta bonitas est, ut ea ipsa non modo se, sed etiam me absentem per se probarit? an senatus, an ordines, an ei, qui cuncta ex Italia ad me revocandum convolaverunt, segniores me praesente ad me retinendum et conservandum fuissent in ea causa, quam ipse iam parricida talem dicat fuisse, ut me ab omnibus ad meam pristinam dignitatem exspectatum at-  
<sup>58</sup> que revocatum queratur? an vero in iudicio periculi nihil fuit: privilegium pertinui ne, mihi praesenti si multa inrogaretur, nemo intercederet? tam inops autem ego eram ab amicis aut tam nuda res publica a magistratibus? quid? si vocatae tribus essent, proscriptionem non dicam in me, ita de sua salute merito, sed omnino in ullo civi comprobavissent? an, si ego praesens fuisset, veteres illae copiae coniuratorum tuique perditii milites atque egentes et nova manus sceleratissimorum consulum corpori meo pepercissent? qui cum eorum omnium crudelitati scelerique cessissem, ne absens quidem luctu

meo mentis eorum satiare potui. quid enim vos uxor <sup>23</sup>  
 mea misera violarat, quam vexavistis, raptavistis, omni <sup>59</sup>  
 crudelitate lacerastis? quid mea filia, cuius fletus adsi-  
 duus sordesque lugubres vobis erant incundae: ceterorum  
 omnium mentis oculosque flectebant? quid parvus filius,  
 quem, quam diu afui, nemo nisi lacrimantem confectum-  
 que vidit, quid fecerat, quod cum totiens per insidias  
 interficere voluistis? quid frater meus? qui cum aliquanto  
 post meum discessum ex provincia venisset neque sibi  
 vivendum nisi me restituto putaret, cum eius maeror,  
 squalor incredibilis et inauditus, omnibus mortalibus mi-  
 serabilis videbatur, quotiens est ex vestro ferro ac manibus  
 elapsus? sed quid ego vestram crudelitatem expromo, <sup>60</sup>  
 quam in ipsum me ac meos adhibuistis, qui parietibus,  
 qui tectis, qui columnis ac postibus meis hostificum quod-  
 dam et nefarium, omni imbutum odio bellum intulistis?  
 non enim te arbitror, cum post meum discessum omnium  
 locupletium fortunas, omnium provinciarum fructus, te-  
 trarcharum ac regum bona spe atque avaritia devorasses,  
 argenti et supellectilis meae cupiditate esse caecatum:  
 non existimo Campanum illum consulem cum saltatore  
 conlega, cum alteri totam Achaia, Thessalia, Boeo-  
 tiam, Graeciam, Macedoniam omnemque barbariam, bona  
 civium Romanorum condonasses, alteri Syriam, Babylo-  
 nem, Persas, integerrimas pacatissimasque gentis, ad  
 diripiendum tradidisses, illos tam cupidos liminum meo-  
 rum et columnarum et valvarum fuisse; neque porro illa <sup>61</sup>  
 manus copiaeque Catilinae caementis ac testis tectorum  
 meorum se famem suam expleturas putaverunt: sed ut  
 hostium urbis nec omnium hostium, verum eorum, qui-  
 buscum acerbum bellum internicivumque suscepimus, non  
 praeda adducti, sed odio solemus excindere, quod, in  
 quos propter eorum crudelitatem inflammatae mentes  
 nostrae fuerunt, cum horum etiam tectis et sedibus resi-  
 dere aliquod bellum semper videtur: \*\*\*\*\*

Nihil erat latum de me; non adesse eram iussus, non <sup>24</sup>  
 citatus afueram; eram etiam tuo iudicio civis incolumis, <sup>62</sup>  
 cum domus in Palatio, villa in Tusculano, altera ad al-  
 terum consulem transferebatur; senatum consules voca-  
 bant; columnae marmoreae ex aedibus meis inspectante



populo Romano ad socrum consulis portabantur; in fundum autem vicini consulis non instrumentum aut ornamenta villae, sed etiam arbores transferebantur, cum ipsa villa non praedae cupiditate — quid enim erat praedae? — sed odio et crudelitate funditus everteretur. domus ardebat in Palatio non fortuito, sed oblato incendio; consules epulabantur et in coniuratorum gratulatione versabantur, cum alter se Catilinae delicias, alter Cethegi  
63 consobrinum fuisse diceret. hanc ego vim, pontifices, hoc scelus, hunc furorem meo corpore opposito ab omnium bonorum cervicibus depuli omnemque impetum discordiarum, omnem diu conlectam vim improborum, quae inveterata compresso odio atque tacito iam erumpebat nancta tam audacis duces, excepi meo corpore. in me uno consulares faces iactae manibus tribuniciis, in me omnia, quae ego quondam rettuderam, coniurationis nefaria tela adhaeserunt. quod si, ut multis fortissimis viris placuit, vi et armis contra vim decertare voluissem, aut vicissem cum magna internicione improborum, sed tamen civium, aut interfectis bonis omnibus, quod illis optatissimum  
64 fuisset, una cum re publica concidissem. videbam vivo senatu populoque Romano celerem mihi summa cum dignitate reditum, nec intellegebam fieri diutius posse, ut mihi non liceret esse in ea re publica, quam ipse servassem. quod si non liceret, audieram et legeram clarissimos nostrae civitatis viros se in medios hostis ad perspicuam mortem pro salute exercitus iniecissem: ego pro salute universae rei publicae dubitarem hoc meliore conditione esse quam Decii, quod illi ne auditores quidem suae gloriae, ego etiam spectator meae laudis esse potuissem?  
25 itaque infractus furor tuus inanis faciebat impetus; omnem enim vim omnium sceleratorum acerbitas mei casus exceperat; non erat in tam immani iniuria tantisque ruinis novae crudelitati locus. Cato fuerat proximus. † quid ageres non erat ut qui modus moribus fuerat, idem esset iniuriae? quid? posses extrudere ad Cypriam pecuniam: praeda perierit; alia non deerit; † hanc modo amandas esse. sic M. Cato invisus quasi per beneficium Cyprum relegatur. eiciuntur duo, quos videre improbi non poterant, alter per honorem turpissimum, alter per

honestissimam calamitatem. atque ut sciatis non homi-<sup>66</sup>  
nibus istum, sed virtutibus hostem semper fuisse, me  
expulso, Catone amandato, in eum ipsum se convertit,  
quo auctore, quo adiutore in contionibus ea, quae gerebat,  
omnia, quaeque gesserat, se et fecisse et facere dicebat:  
Cn. Pompeium, quem omnium iudicio longe principem  
esse civitatis videbat, diutius furori suo veniam daturum  
non arbitrabatur: qui ex eius custodia per insidias regis  
amici filium, hostem, captivum, surripuisset, et ea iniuria  
virum fortissimum laccessisset, speravit isdem se copiis  
cum illo posse configere, quibuscum ego noluissem bo-  
norum periculo dimicare, et primo quidem adiutoribus  
consulibus, postea fregit foedus Gabinius, Piso tamen in  
fide mansit. quas iste tum caedes, quas lapidationes,<sup>67</sup>  
quas fugas fecerit, quam facile ferro cotidianisque insi-  
diis, cum iam a firmissimo robore copiarum suarum relictus  
esset, Cn. Pompeium foro curiaeque privavit domumque  
*compulerit* vidistis: ex quo iudicare potestis quanta vis  
illa fuerit oriens et congregata, cum haec Cn. Pompeium  
terruerit iam distracta et exstincta.

Haec vidit in sententia dicenda Kalendis Ianuariis<sup>26</sup>  
vir prudentissimus et cum rei publicae cum mihi, tum<sup>68</sup>  
etiam veritati amicissimus, L. Cotta, qui legem de meo  
reditu ferendam non censuit: qui me consuluisse rei publi-  
cae, cessisse tempestati, amicio rem vobis ceterisque civi-  
bus quam mihi exstitisse, vi, armis, dissensione hominum  
ad caedem instituta novoque dominatu pulsum esse dixit:  
nihil de meo capite potuisse ferri, nihil esse iure scriptum  
aut posse valere, omnia contra leges moremque maiorum,  
temere, turbulente, per vim, per furorem esse gesta. quod  
si illa lex esset, nec referre ad senatum consulibus nec  
sententiam dicere sibi licere; quorum utrumque cum fieret,  
non oportere ut de me lex ferretur decerni, ne illa, quae  
nulla esset, esse lex iudicaretur. sententia verior, gra-  
vior, melior, utilior rei publicae nulla esse potuit: hominis  
enim scelere et furore notato similis a re publica labes  
in posterum demovebatur. neque hoc Cn. Pompeius, qui<sup>69</sup>  
ornatissimam de me sententiam dixit, vosque, pontifices,  
qui me vestris sententiis auctoritatibusque defendistis,  
non vidistis, illam esse nullam atque esse potius flammam

- temporis, interdictum sceleris, vocem furoris, sed prospexitis, ne quae popularis in nos aliquando invidia redundaret, si sine populi iudicio restituti videremur; eodemque consilio M. Bibuli, fortissimi viri, senatus sententiam secutus est, ut vos de mea domo statueretis, non quo dubitaret quin ab isto nihil legibus, nihil religionibus, nihil iure esset actum, sed ne quis oreretur aliquando in tanta ubertate improborum qui in meis aedibus aliquam religionem residere diceret; nam legem quidem istam nullam esse, quotienscumque de me senatus sententiam dixit, totiens iudicavit, quoniam quidem scripto illo istius sententiam dicere vetabatur. atque hanc rem par illud simile, 70 Piso et Gabinius, vidit: homines legum iudiciorumque metuentes, cum frequentissimus senatus eos ut de me referrent cotidie flagitaret, non se rem improbare dicebant, sed lege istius impediri: erat hoc verum; nam impediabantur, verum ea lege, quam idem iste de Macedonia Syriaque tulerat. hanc tu, P. Lentule, neque pri- 27 vatus neque consul legem esse umquam putasti. nam tribunis plebis referentibus sententiam de me designatus consul saepe dixisti; ex Kalendis Ianuariis, quoad perfecta res est, de me rettulisti, legem promulgasti, tulisti; quorum tibi, si esset illa lex, nihil liceret. at etiam Q. Metellus, conlega tuus, clarissimus vir, quam legem esse homines alienissimi a P. Clodio iudicarent, Piso et Gabinius, eam nullam esse frater P. Clodii, cum de me ad 71 senatum tecum una rettulit, iudicavit. sed vero isti, qui Clodii leges timuerunt, quem ad modum ceteras observarunt? senatus quidem, cuius est gravissimum iudicium de iure legum, quotienscumque de me consultus est, totiens eam nullam esse iudicavit; quod idem tu, Lentule, vidisti in ea lege, quam de me tulisti: nam non est ita latum, ut mihi Romam venire liceret, sed ut venirem. non enim voluisti id, quod licebat, ferre ut liceret, sed me ita esse in re publica, magis ut arcessitus imperio populi Romani viderer quam ad administrandam civitatem restitutus.
- 72 Hunc tu etiam, portentosa pestis, exsulem appellare ausus es, cum tantis sceleribus esses et flagitiis notatus, ut omnem locum quo adisses exsilii simillimum redderes?

quid est enim exsul? ipsum per se nomen calamitatis, non turpitudinis. quando igitur est turpe? re vera, cum est poena peccati; opinione autem hominum etiam, si est poena damnati. utrum igitur peccato meo nomen subeo an re iudicata? peccato? iam neque tu id dicere audes, quem isti satellites tui felicem Catilinam nominant, neque quisquam eorum, qui solebant. non modo iam nemo est tam imperitus qui ea, quae gessi in consulatu, peccata esse dicat, sed nemo est tam inimicus patriae qui non meis consiliis patriam conservatam esse fateatur. quod enim est in terris commune tantum tantulumve consilium quod non de meis rebus gestis ea, quae mihi essent optatissima et pulcherrima, iudicarit? summum est populi Romani populorumque et gentium omnium ac regum consilium senatus: decrevit ut omnes, qui rem publicam salvam esse vellent, ad me unum defendendum venirent, ostenditque nec stare potuisse rem publicam, si ego non fuisset, nec futuram esse ullam, si non redisset. pro- ximus est huic dignitati ordo equester: omnes omnium publicorum societates de meo consulatu ac de meis rebus gestis amplissima atque ornatissima decreta fecerunt. scribae, qui nobiscum in rationibus monumentisque publicis versantur, non obscurum de meis in rem publicam beneficiis suum iudicium decretumque esse voluerunt. nullum est in hac urbe conlegium, nulli pagani aut montani, quoniam plebei quoque urbanae maiores nostri conventicula et quasi concilia quaedam esse voluerunt, qui non amplissime non modo de salute mea, sed etiam de dignitate decreverint. nam quid ego illa divina atque im- mortalia municipiorum et coloniarum et totius Italiae decreta commemorem, quibus tamquam gradibus mihi videor in caelum ascendisse, non solum in patriam revertisse? ille vero dies qui fuit, cum te, P. Lentule, legem de me ferente populus Romanus ipse vidit sensitque quantus et quanta dignitate esset? constat enim nullis umquam comitiis campum Martium tanta celebritate, tanto splendore omnis generis hominum, aetatum, ordinum floruisse. omitto civitatum, nationum, provinciarum, regum, orbis denique terrarum de meis in omnis mortalis meritis unum iudicium unumque consensum: adventus meus atque in-



troitus in urbem qui fuit? utrum me patria sic accepit, ut lucem salutemque redditam sibi ac restitutam accipere debuit, an ut crudelem tyrannum, quod vos Catilinae  
76 gregales de me dicere solebatis? itaque ille unus dies, quo die me populus Romanus a porta in Capitolium atque inde domum sua celebritate laetitiaque comitatum honestavit, tantae mihi iucunditati fuit, ut tua mihi conscelerata illa vis non modo non propulsanda, sed etiam  
† emendanda fuisse videatur. qua re illa calamitas, si ita est appellanda, exussit hoc genus totum maledicti, ne quisquam iam audeat reprehendere consulatum meum tot, tantis, tam ornatis iudiciis, testimoniis, auctoritatibus  
29 comprobatum. quod si in isto tuo maledicto probrum non modo mihi nullum obiectas, sed etiam laudem illustras meam, quid te aut fieri aut fingi dementius potest? uno enim maledicto bis a me patriam servatam esse concedis: semel, cum id feci, quod omnes non negent immortalitati, si fieri potest, mandandum, tu supplicio puniendum putasti; iterum, cum tuum multorumque praeter te inflammatum in bonos omnis impetum meo corpore excepi, ne eam civitatem, quam servassem inermis,  
77 matus in discrimen adducerem. esto: non fuit in me poena ulla peccati; at fuit iudicii. cuius? quis me umquam ulla lege interrogavit? quis postulavit? quis diem dixit? potest igitur damnati poenam sustinere indemnatus? est hoc tribunicium? est populare? quamquam ubi tu te popularem, nisi cum *pro* populo fecisti, potes dicere? sed, cum hoc iuris a maioribus proditum sit, ut nemo civis Romanus aut sui potestatem aut civitatem possit amittere, nisi ipse auctor factus sit; quod tu ipse potuisti in tua causa discere: credo enim, quamquam in illa adoptione legitime factum est nihil, tamen te esse interrogatum, auctorne esses, ut in te P. Fonteius vitae necisque potestatem haberet, ut in filio: — quaero, si aut negasses aut tacuisses, si tamen id xxx curiae iussissent, num id iussum esset ratum? certe non. quid ita? quia ius a maioribus nostris, qui non fecte et fallaciter populares, sed vere et sapienter fuerunt, ita comparatum est, ut civis Romanus libertatem nemo possit  
78 invitum amittere. quin etiam, si xviri sacramentum in

libertatem iniustum iudicassent, tamen quotienscumque vellet quis, hoc in genere solo rem iudicatam referri posse voluerunt; civitatem vero nemo umquam ullo populi iussu amittet invitus. qui cives Romani in colonias 30 Latinas proficiscebantur, fieri non poterant Latini, nisi erant auctores facti nomenque dederant; qui erant rerum capitalium condemnati, non prius hanc civitatem amittebant, quam erant in eam recepti, quo vertendi, hoc est mutandi, soli causa venerant; id autem ut esset faciendum non ademptione civitatis, sed tecti et aquae et ignis interdictione adigebantur. populus Romanus L. Sulla 79 dictatore ferente comitiis centuriatis municipiis civitatem ademit; ademit eisdem agros: de agris ratum est; fuit enim populi potestas; de civitate ne tam diu quidem valuit, quam diu illa Sullani temporis arma valuerunt. an vero Volaterranis, cum etiam tum essent in armis, L. Sulla victor, re publica reciperata, comitiis centuriatis civitatem eripere non potuit, hodieque Volaterrani non modo cives, sed etiam optimi cives fruuntur nobiscum simul hac civitate: consulari homini P. Clodius, eversa re publica, civitatem adimere potuit concilio advocato, conductis operis non solum egentium, sed etiam servorum, Fidulio principe, qui se illo die confirmat Romae non fuisse? quod si non fuit, quid te audacius, qui eius 80 nomen incideris? quid desperatius, qui ne ementiendo quidem potueris auctorem adumbrare meliorem? sin autem is primus scivit, quod facile potuit, qui propter inopiam tecti in foro pernoctasset, cur non iuret se Gadibus fuisse, cum tu te fuisse Interamnae probaveris? hoc tu igitur homo popularis iure munitam civitatem et libertatem nostram putas esse oportere, ut, si, tribuno plebis rogante VELITIS IUBEATISNE, Fidulii centum se velle et iubere dixerint, possit unus quisque nostrum amittere? tum igitur maiores nostri populares non fuerunt, qui de civitate et libertate ea iura sanxerunt, quae nec vis temporum nec potentia magistratuum nec res iudicata nec denique universi populi Romani potestas, quae ceteris in rebus est maxima, labefactare possit. at tu etiam ereptor civitatis 81 legem de iniuriis publicis tulisti Anagnino nescio cui Menullae pergratam, qui tibi ob eam legem statuam in

- meis aedibus posuit, ut locus ipse in tanta tua iniuria legem et inscriptionem statuae refelleret: quae res municipibus Anagninis ornatissimis multo maiori dolori fuit quam quae idem ille gladiator scelera Anagniae fecerat.
- 31 quid? si ne scriptum quidem unquam est in ista ipsa rogatione, quam se Fidulius negat scivisse, tu autem, ut acta tui praeclari tribunatus hominis dignitate cohonestes,
- 82 auctoritatem amplexeris —: sed tamen si nihil de me tulisti quo minus essem non modo in civium numero, sed etiam in eo loco, in quo me honores populi Romani conlocarunt, tamenne cum tua voce violabis, quem post nefarium scelus consulum superiorum tot vides iudiciis senatus, populi Romani, Italiae totius honestatum? quem ne tunc quidem, cum aberam, negare poteras esse tua lege senatorem? ubi enim tuleras, ut mihi aqua et igni interdiceretur? quod C. Gracchus de P. Popilio, Saturninus de Metello tulit, homines seditiosissimi de optimis ac fortissimis civibus; non ut esset interdictum, quod ferri non poterat, tulerunt, sed ut interdiceretur. ubi cavisti ne me meo loco censor in senatum legeret? quod de omnibus, etiam quibus damnatis interdictum est,
- 83 ptum est in legibus. quaere hoc ex Clodio, scriptore legum tuarum; iube adesse: latitat omnino, sed si requiri iusseris, invenient hominem apud sororem tuam occultantem se capite demisso. sed si patrem tuum, civem me dius fidius egregium, dissimilem vestri, nemo unquam sanus exsulem appellavit, qui, cum de eo tribunus plebis promulgasset, adesse propter iniquitatem illius Cinnani temporis noluit eique imperium est abrogatum; si in illo poena legitima turpitudinem non habuit propter vim temporum, in me, cui dies dicta numquam est, qui reus non fui, qui numquam sum a tribuno plebis citatus, damnati poena esse potuit, ea praesertim, quae ne in ipsa quidem
- 32 rogatione praescripta est? ac vide quid intersit inter illum
- 84 iniquissimum patris tui casum et hanc fortunam conditionemque nostram: patrem tuum, civem optimum, clarissimi viri filium, qui si viveret, qua severitate fuit, tu profecto non viveres, L. Philippus censor avunculum suum praeteriit in recitando senatu; nihil enim poterat dicere qua re rata non essent, quae erant acta in ea re

publica, in qua se illis ipsis temporibus censorem esse voluisset: me L. Cotta, homo censorius, in senatu iuratus dixit se, si censor tum esset, cum ego aberam, meo loco senatorem recitaturum fuisse. quis in meum locum <sup>85</sup> iudicem subdidit? quis meorum amicorum testamentum discessu meo fecit qui mihi non idem tribuerit, quod [et] si adessem? quis me non modo civis, sed socius recipere contra tuam legem et iuvare dubitavit? denique universus senatus multo ante quam est lata lex de me, ‘gratias agendas’ censuit ‘civitatis eis, quae M. Tullium’ — tantumne? immo etiam, ‘civem optime de re publica meritum recepissent.’ et tu unus pestifer civis cum restitutum negas esse civem, quem eiecitum universus senatus non modo civem, sed etiam egregium civem semper putavit? at vero, ut annales populi Romani et <sup>86</sup> monumenta vetustatis loquuntur, Kaeso ille Quinctius et M. Furius Camillus et C. Servilius Ahala, cum essent optime de re publica meriti, tamen populi incitati vim iracundiamque subierunt, damnatique comitiis centuriatis cum in exilium profugissent, rursus ab eodem populo placato sunt in suam pristinam dignitatem restituti. quod si his damnatis non modo non imminuit calamitas clarissimi nominis gloriam, sed etiam honestavit — nam etsi optabilius est cursum vitae conficere sine dolore et sine iniuria, tamen ad immortalitatem gloriae plus adfert desideratum esse a suis civibus quam omnino numquam esse violatum —, mihi sine ullo iudicio populi profecto cum amplissimis omnium iudiciis restitutio maledicti locum aut criminis obtinebit? fortis et constans in optima <sup>87</sup> ratione civis P. Popilius semper fuit; tamen eius in omni vita nihil est iam ad laudem industrius quam calamitas ipsa. quis enim iam meminisset cum bene de re publica meritum, nisi et ab improbis expulsus esset et per bonos restitutus? Q. Metelli praeclarum imperium in re militari fuit, egregia censura, omnis vita plena gravitatis: tamen huius viri laudem ad sempiterni memoriam temporis calamitas propagavit. quod si [et] illis, qui expulsi sunt <sup>33</sup> inique, sed tamen legibus, reducti inimicis interfectis, rogationibus tribuniciis, non auctoritate senatus, non comitiis centuriatis, non decretis Italiae, non desiderio



civitatis, iniuria inimicorum probro non fuit, in me, qui profectus sum integer, afui simul cum re publica, redii cum maxima dignitate te vivo, fratre tuo altero consule reducente, altero praetore † petente, tuum scelus

ss meum probum putas esse oportere? ac si me populus Romanus incitatus iracundia aut invidia e civitate eiecisset idemque postea mea in rem publicam beneficia recordatus se conlegisset, *et* temeritatem atque iniuriam suam restitutione mea reprehendisset, tamen profecto nemo tam esset amens qui mihi tale populi iudicium non dignitati potius quam dedecori putaret esse oportere. nunc vero cum me in iudicium populi nemo omnium vocarit, condemnari non potuerim, qui accusatus non sim, denique ne pulsus quidem ita sim, ut, si contenderem, superare non possem, contraque a populo Romano semper sim defensus, amplificatus, ornatus, quid est qua re quisquam mihi se ipsa populari

89 ratione anteponat? an tu populum Romanum esse putas illum, qui constat ex eis, qui mercede conducuntur? qui impelluntur ut vim adferant magistratibus? ut obsideant senatum? optent cotidie caedem, incendia, rapinas? quem tu tamen populum nisi tabernis clausis frequentare non poteras, cui populo duces Lentidios, Lollios, Placulecios, Sergios praefeceras. o speciem dignitatemque populi Romani, quam reges, quam nationes exterae, quam gentes ultimae pertimescant, multitudinem hominum ex servis, ex conductis, ex facinorosis, ex egentibus congregatam!

90 illa fuit pulcritudo populi Romani, illa forma, quam in campo vidisti tum, cum etiam tibi contra senatus totiusque Italiae auctoritatem et studium dicendi potestas fuit; ille populus est dominus regum, victor atque imperator omnium gentium, quem illo clarissimo die, scelerate, vidisti tum, cum omnes principes civitatis, omnes ordinum atque aetatum omnium suffragium se non de civis, sed de civitatis salute ferre censebant; cum denique homines in campum non tabernis, sed municipiis clausis

34  
91 venerunt. hoc ego populo, si tum consules aut fuissent in re publica aut omnino non fuissent, nullo labore tuo praecipiti furori atque impio sceleri restitsem; sed publicam causam contra vim armatam sine populi praesidio

suscipere nolui: non quo mihi P. Scipionis, fortissimi viri, vis \* privati hominis displiceret; sed Scipionis factum statim P. Mucius consul, qui in gerenda re putabatur fuisse segnior, gesta multis senatus consultis non modo defendit, sed etiam ornavit: mihi aut te interfecto cum consulibus aut te vivo et tecum et cum illis armis decertandum fuit. erant eo tempore multa etiam alia <sup>92</sup> metuenda: ad servos, medius fidius, res publica venisset; tantum homines impios ex vetere illa coniuratione inustum nefariis mentibus bonorum odium retinebat.

Hic tu me etiam gloriari vetas: negas esse ferenda quae soleam de me praedicare, et homo facetus inducis etiam sermonem urbanum ac venustum, me dicere solere esse me Iovem, eundemque dictitare Minervam esse sororem meam. non tam insolens sum, quod Iovem esse me dico, quam ineruditus, quod Minervam sororem Iovis esse existimo. sed tamen ego mihi sororem virginem ascisco: tu sororem tuam virginem esse non sisti. sed vide ne tu te soleas Iovem dicere, quod tu iure eandem sororem et uxorem appellare possis. et quoniam hoc reprehendis, <sup>35</sup>  
<sup>93</sup> quod solere me dicas de me ipso gloriosius praedicare, quis umquam audit, cum ego de me nisi coactus ac necessario dicerem? nam si, cum mihi furta, largitiones, libidines obiciuntur, ego respondere soleo meis consiliis, periculis, laboribus patriam esse servatam, non tam sum existimandus de gestis rebus gloriari quam de obiectis confiteri. sed si mihi ante haec durissima rei publicae tempora nihil umquam aliud obiectum est, nisi crudelitas mea unius temporis, cum a patria perniciem depuli, quid? me huic maledicto utrum non respondere an demisse respondere decuit? ego vero etiam rei publicae semper <sup>94</sup> interesse putavi me illius pulcherrimi facti, quod ex auctoritate senatus consensu bonorum omnium pro salute patriae gessissem, splendorem verbis dignitatemque retinere, praesertim cum mihi uni in hac re publica, audiente populo Romano, opera mea hanc urbem et hanc rem publicam esse salvam iurato dicere fas fuisset. extinctum est iam illud maledictum crudelitatis, quod me non ut crudelem tyrannum, sed ut mitissimum parentem, omnium civium studiis desideratum, repetitum, arcessitum

95 vident. aliud exortum est. obicitur mihi meus ille dis-  
 cessus: cui ego crimini respondere sine mea maxima laude  
 non possum. quid enim, pontifices, debeo dicere? pec-  
 catine conscientia me profugisse? at id, quod mihi cri-  
 mini dabatur, non modo peccatum non erat, sed erat res  
 post natos homines pulcherrima. iudicium populi perti-  
 misse? at [id] nec propositum ullum fuit et, si fuisset,  
 duplicata gloria discessissem. bonorum mihi praesidium  
 defuisse? falsum est. me mortem timuisse? turpe est.  
 96 dicendum igitur est id, quod non dicerem nisi coactus —  
 nihil enim unquam de me dixi sublatius asciscendae  
 laudis causa potius quam criminis depellendi —, dico  
 96 igitur et quam possum maxima voce dico: cum omnium  
 perditorum et coniuratorum incitata vis, duce tribuno ple-  
 bis, consulibus auctoribus, afflicto senatu, perterritis equi-  
 tibus Romanis, suspensa ac sollicita tota civitate, non  
 tam in me impetum faceret, quam per me in omnis bonos,  
 me vidisse, si vicissem, tenuis rei publicae reliquias, si  
 victus essem, nullas futuras: quod cum iudicassem, de-  
 flexi coniugis miserae discidium, liberorum carissimorum  
 solitudinem, fratris absentis amantissimi atque optimi  
 casum, subitas fundatissimae familiae ruinas, sed his om-  
 nibus rebus vitam anteposui meorum civium remque  
 publicam concidere unius discessu quam omnium interitu  
 occidere malui. speravi, id quod accidit, me iacentem  
 posse vivis viris fortibus excitari; si una cum bonis in-  
 97 terissem, nullo modo posse *rem p.* recreari. accepi, pon-  
 tifices, magnum atque incredibilem dolorem; non nego;  
 neque istam mihi ascisco sapientiam, quam non nulli in  
 me requirebant, qui me animo nimis fracto esse atque  
 afflicto loquebantur. an ego poteram, cum a tot rerum  
 tanta varietate divellerer, quas idcirco praetereo, quod  
 ne nunc quidem sine fletu commemorare possum, infitiam  
 me esse hominem et communem naturae sensum repu-  
 diare? tum vero neque illud meum factum laudabile nec  
 beneficium ullum a me in rem publicam profectum dice-  
 rem, si quidem ea rei publicae causa reliquisssem, quibus  
 aequo animo carerem, eamque animi durtiam, sicut cor-  
 37 poris, quod cum uritur, non sentit, stuporem potius quam  
 98 virtutem putarem. suscipere tantos animi dolores atque

ea, quae capta urbe accidunt victis, stante urbe, unum perpeti et iam se videre distrahi a complexu suorum, disturbari tecta, diripi fortunas, patriae denique causa patriam ipsam amittere, spoliari populi Romani beneficiis amplissimis, praecipitari ex altissimo dignitatis gradu, videre praetextos inimicos, nondum morte complorata arbitria petentis funeris: haec omnia subire conservandorum civium causa atque ita, cum dolenter feras et sis non tam sapiens quam ei, qui nihil curant, sed tam amans tuorum ac tui quam communis humanitas postulat, ea laus praeclara atque divina est. nam qui ea, quae numquam cara ac iucunda duxit, animo aequo rei publicae causa deserit, nullam benevolentiam insignem in rem publicam declarat; qui autem ea relinquit rei publicae causa, a quibus cum summo dolore divellitur, ei patria cara est, cuius salutem caritati anteponit suorum. qua<sup>99</sup> re — dirumpatur licet ista furia atque audiat haec ex me, quoniam laccessivit, — bis servavi rem p., qui consul togatus armatos vicerim, privatus consulibus armatis cesserim. utriusque temporis fructum tuli maximum: superioris, quod ex senatus auctoritate et senatum et omnis bonos meae salutis causa mutata veste vidi, posterioris, quod et senatus et populus Romanus et omnes mortales et privatim et publice iudicarunt sine meo reditu rem publicam salvam esse non posse.

Sed hic meus reditus, pontifices, vestro iudicio con-<sup>100</sup> tinetur: nam si vos me in meis aedibus conlocatis, id quod in omni mea causa semper studiis, consiliis, auctoritatibus sententiisque fecistis, video me plane ac sentio restitutum; sin mea domus non modo mihi non redditur, sed etiam monumentum praebet inimico doloris mei, sceleris sui, publicae calamitatis, quis erit qui hunc reditum potius quam poenam sempiternam putet? in conspectu prope totius urbis domus est mea, pontifices; in qua si manet illud, non monumentum [urbis], sed sepulcrum, inimico nomine inscriptum, demigrandum potius aliquo est quam habitandum in ea urbe, in qua tropaea de me et de re publica videam constituta. an ego tantam aut<sup>38</sup> animi durtiem habere aut oculorum impudentiam possim,<sup>101</sup> ut cuius urbis servatorem me esse senatus omnium ad-



sensu totiens iudicarit, in ea possim intueri domum meam eversam non ab inimico meo, sed ab hoste communi et ab eodem aedem exstructam et positam in oculis civitatis, ne umquam conquiescere possit fletus bonorum? Sp. Maclii regnum appetentis domus est complanata, et quia illud aequum accidisse populus Romanus Maelio iudicavit, nomine ipso Aequimaclii iustitia poenae comprobata est: Sp. Cassii domus ob eandem causam *est* eversa atque in eo loco aedis posita Telluris. in Vacci pratis domus fuit M. Vacci, quae publicata *est* et eversa, ut illius facinoris memoria et nomine loci notaretur. M. Manlius cum ab ascensu Capitolii Gallorum impetum reppulisset, non fuit contentus beneficii sui gloria; regnum appetisse est iudicatus: ergo eius domum eversam duobus lucis convestitam videtis. quam igitur maiores nostri sceleratis ac nefariis civibus maximam poenam constitui posse arbitrati sunt, eandem ego subibo ac sustinebo, ut apud posteros nostros non exstinctor coniurationis et sceleris, <sup>102</sup> sed auctor et dux fuisse videar? hanc vero, pontifices, labem turpitudinis et inconstantiae poterit populi Romani dignitas sustinere vivo senatu, vobis principibus publici consilii, ut domus M. Tullii Ciceronis cum domo Fulvii Flacci ad memoriam poenae publice constitutae coniuncta esse videatur? M. Flaccus, quia cum C. Graccho contra salutem rei publicae fecerat, ex senatus sententia est interfectus; eius domus eversa et publicata est: in qua porticum post aliquanto Q. Catulus de manubiis Cimbricis fecit. ista autem fax ac furia patriae, cum urbem Pisone et Gabinio ducibus cepisset, occupasset, teneret, uno eodemque tempore et clarissimi viri mortui monumenta debebat et meam domum cum Flacci domo coniungebat; ut, qua poena senatus adfecerat eversorem civitatis, eadem iste oppresso senatu adficeret eum, quem patres <sup>39</sup> conscripti custodem patriae iudicassent. hanc vero in <sup>103</sup> Palatio atque in pulcherrimo urbis loco porticum esse patiemi, furoris tribunicii, sceleris consularis, crudelitatis coniuratorum, calamitatis rei publicae, doloris mei defixum indicium ad memoriam omnium gentium sempiternam? quam porticum pro amore, quem habetis in rem publicam et semper habuistis, non modo sententiis, sed,

si opus esset, manibus vestris disturbare cuperetur, nisi quem forte illius castissimi sacerdotis superstitiosa dedicatio deterret.

O rem, quam homines soluti ridere non desinant, tristiores autem sine maximo dolore audire non possint! Publiusne Clodius, qui ex pontificis maximi domo religionem eripuit, is meam intulit? huncine vos, qui estis antistites caerimoniarum et sacrorum, auctorem habetis et magistrum publicae religionis? o di immortales! — vos enim haec audire cupio — P. Clodius vestra sacra curat? vestrum numen horret? res omnis humanas religionem vestra contineri putat? hic non inludit auctoritati horum omnium, qui adsunt, summorum virorum? non vestra, pontifices, gravitate abutitur? ex isto ore religionis verbum excidere aut elabi potest? quam tu eodem ore accusando senatum, quod severe de religione decerneret, impurissime taeterrimeque violasti. aspici-  
 40  
 105  
 te, pontifices, hominem religiosum et, si vobis videtur, quod est bonorum pontificum, monete eum modum quandam esse religionis; nimium esse superstitiosum non oportere. quid tibi necesse fuit anili superstitione, homo fanaticae, sacrificium, quod alienae domi fieret, invisere? quae autem te tanta mentis imbecillitas tenuit, ut non putares deos satis posse placari, nisi etiam muliebribus religionibus te implicuisses? quem unquam audisti maiorum tuorum, qui et sacra privata coluerunt et publicis sacerdotiis praefuerunt, cum sacrificium Bonae deae fieret, interfuisse? neminem, ne illum quidem, qui caecus est factus. ex quo intellegitur multa in vita falso homines opinari; quoniam ille, qui nihil viderat sciens quod nefas esset, lumina amisit, istius, qui non solum aspectu, sed etiam incesto flagitio et stupro caerimonias polluit, poena omnis oculorum ad cecitatem mentis est conversa. hoc auctore tam casto, tam religioso, tam sancto, tam pio potestis, pontifices, non commoveri, cum suis dicat se manibus domum civis optimi evertisse et eam isdem manibus consecrasset?

Quae tua fuit consecratio? 'tuleram', inquit 'ut mihi liceret.' quid? non exceperas, ut, si quid ius non esset rogari, ne esset rogatum? ius igitur statuetis esse unius

cuiusque vestrum sedis, aras, focos, deos penatis subiectos esse libidini tribuniciae? in quem quisque per homines concitatos inruerit, quem impetu pereulerit, huius domum non solum adfligere, quod est praesentis insaniae quasi tempestatis repentinae, sed etiam in posterum tempus religione sempiterna obligare? equidem sic accepi, pontifices, in religionibus suscipiendis caput esse interpretari quae voluntas deorum immortalium esse videatur; nec est ulla erga deos pietas, si honesta *deest* de numine eorum ac mente opinio, cum expeti nihil ab eis quod sit iniustum atque inhonestum † arbitrare. hominem invenire ista labes tum, cum omnia tenebat, neminem potuit cui meas aedis addiceret, cui traderet, cui donaret; ipse cum loci illius, cum aedium cupiditate flagraret ob eamque causam unam [una] iusta illa rogatione sua vir bonus dominum se in meis bonis esse voluisset, tamen illo ipso in furore suo non est ausus meam domum, cuius cupiditate inflammatus erat, possidere: deos immortalis existimatis, cuius labore et consilio sua ipsi templa tenuerunt, in eius domum adflictam et eversam per [vim] hominis sceleratissimi nefarium latrocinium immigrare voluisse? civis est nemo tanto in populo extra contaminatam illam et eruentam P. Clodii manum, qui rem ullam de meis bonis attigerit, qui non pro suis opibus in illa tempestate me defenderit: at qui aliqua se contagione praedae, societatis, emptionis contaminaverunt, nullius neque privati neque publici iudicii poenam effugere potuerunt. ex his igitur bonis, ex quibus nemo rem ullam attigit qui non omnium iudicio sceleratissimus haberetur, di immortales domum meam concupiverunt? ista tua pulchra Libertas deos penatis et familiaris meos lares expulit, ut se ipsa tamquam in captivis sedibus conlocaret? quid est sanctius, quid omni religione munitius quam domus unius cuiusque civium? hic arae sunt, hic foci, hic di penates, hic sacra, religiones, caerimoniae continentur: hoc per-fugium est ita sanctum omnibus, ut inde abripi neminem fas sit. quo magis est istius furor ab auribus vestris repellendus, qui quae maiores nostri religionibus tuta nobis et sancta esse voluerunt, ea iste non solum contra religionem labefactavit, sed etiam ipsius religionis nomine evertit.

At quae dea est? bonam esse oportet, quoniam qui-<sup>110</sup>  
dem est abs te dedicata. ‘Libertas’ inquit ‘est.’ tu  
igitur domi meae conlocasti, quam ex urbe tota sustulisti?  
tu cum conlegas tuos, summa potestate praeditos, negares  
liberos esse, cum in templum Castoris aditus esset apertus  
nemini, cum hunc clarissimum virum, summo genere na-  
tum, summis populi beneficiis usum, pontificem et con-  
sularem et singulari bonitate et modestia praeditum, quem  
satis mirari quibus oculis aspicere audeas non queo, au-  
diente populo Romano a pedisequis conculcari iuberet,  
cum indemnatum *me* exturbares privilegiis tyrannicis in-  
rogatis, cum principem orbis terrae virum inclusum domi  
contineres, cum forum armatis catervis perditorum homi-  
num possideres, Libertatis simulacrum in ea domo con-  
locabas, quae domus erat ipsa indicio crudelissimi tui  
dominatus et miserrimae populi Romani servitutis? cumne<sup>111</sup>  
potissimum Libertas domo sua debuit pellere, qui nisi  
fuisset, in servorum potestatem civitas tota venisset? at<sup>43</sup>  
unde est inventa ista Libertas? quaesivi enim diligenter.  
Tanagraea quaedam meretrix fuisse dicitur; eius non longe  
a Tanagra simulacrum e marmore in sepulcro positum  
fuit. hoc quidam homo nobilis, non alienus ab hoc reli-  
gioso Libertatis sacerdote, ad ornatum aedilitatis suae  
deportavit; etenim cogitarat omnis superiores muneris  
splendore superare. itaque omnia signa, tabulas, orna-  
mentorum quod superfuit in fanis et communibus locis,  
tota e Graecia atque insulis omnibus honoris populi Ro-  
mani causa sane frugaliter domum suam deportavit. is<sup>112</sup>  
postea quam intellexit posse se interversa aedilitate a L.  
Pisone consule praectorem renuntiari, si modo eadem prima  
littera competitorem habuisset aliquem, aedilitatem duo-  
bus in locis, partim in arca, partim in hortis suis, conlo-  
cavit; signum de busto meretricis ablatum isti dedit, quod  
esset signum magis istorum quam publicae libertatis.  
hanc deam quisquam violare audeat, imaginem meretricis,  
ornamentum sepulcri, a fure sublatam, a sacrilego con-  
locatam? haec me domo mea pellet? haec victrix ad-  
flictae civitatis rei publicae spoliis ornabitur? haec erit  
in eo monumento, quod positum est, ut esset indicium  
oppressi senatus ad memoriam sempiternam turpitudinis?



113 o Q. Catule, — patremne appellem *ante* an filium? recentior enim memoria filii est et cum meis rebus gestis coniunctior —, tantumne te fefellit, cum mihi summa et cotidie maiora praemia in re publica fore putabas? negabas fas esse duo consules esse in hac civitate inimicos rei publicae: sunt inventi qui senatum tribuno furenti constrictum traderent, qui pro me patres conscriptos deprecari et populo supplices esse edictis atque imperio vetarent, quibus inspectantibus domus mea disturbaretur, diriperetur, qui denique ambustas fortunarum mearum  
114 reliquias suas domos comportari iuberent. venio nunc ad patrem. tu, Q. Catule, M. Fulvii domum, cum is fratris tui socer fuisset, monumentum tuarum manubiarum esse voluisti, ut eius, qui perniciosa rei publicae consilia cepisset, omnis memoria funditus ex oculis hominum ac mentibus tolleretur: hoc si quis tibi aedificanti illam porticum diceret, fore tempus, cum is tribunus plebis, qui auctoritatem senatus, iudicium bonorum omnium neglexisset, tuum monimentum consulibus non modo inspectantibus, verum adiuvantibus disturbaret, everteret, idque cum eius civis, qui rem publicam ex senatus auctoritate consul defendisset, domo coniungeret, nonne responderes id nisi eversa civitate accidere non posse?

41  
115 At videte hominis intolerabilem audaciam cum proiecta quadam et effrenata cupiditate. monumentum iste umquam aut religionem ullam cogitavit? habitare laxe et magnifice voluit duasque et magnas et nobilis domos coniungere. eodem puncto temporis, quo meus discessus isti causam caedis eripuit, a Q. Seio contendit ut sibi domum venderet: cum ille id negaret, primo se luminibus eius esse obstructurum minabatur. adfirmabat Postumus se vivo illam domum istius numquam futuram: acutus adulescens ex ipsius sermone intellexit quid fieri oporteret: hominem veneno apertissime sustulit; emit domum licitatoribus defatigatis prope dimidio carius quam aestimabatur.  
116 quorsum igitur haec oratio pertinet? domus illa mea prope tota vacua est: vix pars aedium mearum decima ad Catuli porticum accessit. causa fuit ambulatio et monimentum et ista Tanagraea oppressa libertate Libertas. in Palatio, pulcherrimo prospectu, porticum

cum conclavibus pavimentatam trecentum pedum concupierat, amplissimum peristylum, cetera eius modi, facile ut omnium domos et laxitate et dignitate superaret. et homo religiosus cum aedis meas idem emeret et venderet, tamen *in* illis tantis tenebris non est ausus suum nomen emptioni illi ascribere. posuit Scatonem illum, hominem sua virtute egentem, ut is, qui in Marsis, ubi natus est, tectum, cui imbris vitandi causa succederet, iam nullum haberet, aedis in Palatio nobilissimas emisse se diceret. inferiorem aedium partem adsignavit non suae genti Fontciae, sed Clodiae, quam reliquit; quem in numerum ex multis Clodiis nemo nomen dedit nisi aut egestate aut scelere perditus. hanc vos, pontifices, tan- 45  
tam *tam* variam, tam novam in omni genere voluntatem, impudentiam, audaciam, cupiditatem comprobabitis?

‘Pontifex’ inquit ‘adfuit.’ non te pudet, cum apud 117  
pontifices res agatur, pontificem dicere non conlegium pontificum adfuisse, praesertim cum tribunus plebis vel denuntiari potueris vel etiam cogere? esto: conlegium non adhibuisti. quid? de conlegio quis tandem adfuit? opus erat enim auctoritate, quae est in his omnibus, sed tamen auget et aetas et honos dignitatem; opus erat etiam scientia, quam si omnes consecuti sunt, certe peritiores vetustas facit. quis ergo adfuit? ‘frater’ inquit 118  
‘uxoris meae.’ si auctoritatem quaerimus, etsi id est aetatis, ut nondum consecutus sit, tamen quanta est in adulescente auctoritas, ea propter tantam coniunctionem adfinitatis minor est putanda; sin autem scientia est quaesita, quis erat minus peritus quam is, qui paucis illis diebus in conlegium venerat? qui etiam tibi erat magis obstrictus beneficio recenti, cum se fratrem uxoris tuae fratri tuo germano antelatum videbat: etsi in eo providisti ne frater te accusare possit. hanc tu igitur dedicationem appellas, ad quam non conlegium, non honoribus populi Romani ornatum pontificem, non denique \* adulescentem quemquam, cum haberes in conlegio familiarissimos, adhibere potuisti? adfuit is, si modo adfuit, quem tu impulisti, soror rogavit, mater coëgit. videte 119  
igitur, pontifices, quid statuatis in mea causa de omnium fortunis: verbone pontificis putetis, si is postem tenuerit

et aliquid dixerit, domum unius cuiusque consecrari posse, an istae dedicationes et templorum et delubrorum religiones ad honorem deorum immortalium sine ulla civium calamitate a maioribus nostris constitutae sint? est inventus tribunus plebis qui consularibus copiis instructus omni impetu furoris in eum civem intruerit, quem perculsum ipsa res publica suis manibus extolleret. quid? si  
 46  
 120 qui similis istius — neque enim iam deerunt qui imitari velint — quem mei dissimilem, cui res publica non tantum debeat, per vim adflixerit, domum eius per pontificem dedecarit, id vos ista auctoritate constituetis ratum esse oportere? dicitis: quem reperiet pontificem? quid? *pontifex* et tribunus plebis idem esse non potest? M. Drusus, ille clarissimus vir, tribunus plebis pontifex fuit: ergo si is Q. Caepionis, inimici sui postem aedium tenuisset et pauca verba fecisset, aedes Caepionis essent dedecatae?  
 121 nihil loquor de pontificio iure, nihil de ipsius verbis dedicationis, nihil de religione, caerimoniis: non dissimulo me nescire ea, quae, etiam si scirem, dissimularem, ne aliis molestus, vobis etiam curiosus viderer: etsi effluunt multa ex vestra disciplina, quae etiam ad nostras aures saepe permanent. postem teneri in dedicatione oportere videor audisse templi: ibi enim postis est, ubi templi aditus est [valvae]. ambulationis postis nemo umquam tenuit in dedicando: simulacrum autem aut aram si dedicasti, sine religione loco moveri potest. sed iam hoc dicere tibi non licebit, quoniam pontificem postem tenuisse dixisti.

122 Quamquam quid ego de dedicatione loquor? aut quid de vestro iure et religione contra quam proposueram  
 47 disputo? ego vero, si omnia sollemnibus verbis, veteribus et traditis institutis acta esse dicerem, tamen me rei publicae iure defenderem. an, cum tu eius civis discessu, cuius unius opera senatus atque omnes boni civitatem esse incolumem totiens iudicassent, oppressam taeterrimo latrocinio cum duobus sceleratissimis consulibus rem publicam teneres, domum eius, qui patriam a se servatam perire suo nomine noluisse, per pontificem aliquem  
 123 dedicasses, posset recreata res publica sustinere? date huic religioni aditum, pontifices: iam nullum fortunis

communibus exitum reperietis. an si postem tenuerit pontifex et verba ad religionem deorum immortalium composita ad perniciem civium transtulerit, valebit in iniuria nomen sanctissimum religionis: si tribunus plebis verbis non minus priscis et aeque sollemnibus bona cuiuspiam consecrarit, non valebit? atqui C. Atinius patrum memoria bona Q. Metelli, qui cum ex senatu censor eiecerat, avi tui, Q. Metelle, et tui, P. Servili, et proavi tui, P. Scipio, consecravit, foculo posito in rostris adhibitoque tibicine. quid tum? num ille furor tribuni plebis ductus ex non nullis perveterum temporum exemplis fraudi Metello fuit, summo illi et clarissimo viro? certe non fuit. vidimus hoc idem Cn. Lentulo censori tribuni plebis facere: num qua igitur is bona Lentuli religione obligavit? sed quid ego ceteros? tu, tu, inquam, capite velato, contione advocata, foculo posito, bona tui Gabinii, cui regna omnia Syrorum, Arabum Persarumque donaras, consecrasti. quod si tum nihil est actum, quid in meis bonis agi potuit? sin est ratum, cur ille gurges, helluatus tecum simul rei publicae sanguine, ad caelum tamen extruit villam in Tusculano visceribus aerarii; mihi meas ruinas, quarum ego similem totam urbem esse passus non sum, aspicere non licuit? omitto Gabinium: quid? exemplo tuo bona tua nonne L. Ninnius, vir omnium fortissimus atque optimus, consecravit? quod si, quia ad te pertinet, ratum esse negas oportere, ea iura constituisti in praeclaro tribunatu tuo, quibus in te conversis recusares, alios everteres: sin ista consecratio legitima est, quid est quod profanum in tuis bonis esse possit? an consecratio nullum habet ius, dedicatio est religiosa? quid ergo illa tua tum obtestatio tibicinis? quid foculus? quid preces? quid *verba* prisca voluerunt? ementiri, fallere, abuti deorum immortalium numine ad hominum metum timoremque voluisti? nam si est illud ratum — mitto Gabinium — tua domus certe et quicquid habes aliud, Cereri est consecratum; sin ille tibi ludus fuit, quid te impurius, qui religiones omnis pollueris aut ementiundo aut stuprando? ‘iam fateor’ inquit ‘me in Gabinio nefarium fuisse.’ quippe vides poenam illam a te in alium institutam in te ipsum esse conversam. sed homo



omnium scelerum flagitiorumque documentum, quod in Gabinio fateris, cuius impudicitiam pueritiae, libidines adolescentiae, dedecus et egestatem reliquae vitae, latrocinium consulatus vidimus, cui ne ista quidem ipsa calamitas iniuria potuit accidere, id in me infirmas, et gravius esse dicis, quod uno adolescente quam quod contione  
127 tota teste fecisti? ‘dedicatio magnam’ inquit ‘habet re-  
49 ligionem.’ nonne vobis Numa Pompilius videtur loqui? discite orationem, pontifices, et vos flamines: etiam tu, rex, disce a gentili tuo; quamquam ille gentem istam reliquit, sed tamen disce ab homine religionibus dedito ius totum omnium religionum. quid? in dedicatione nonne et quis dedicet et quid et qui [quo modo] quaeritur? an tu haec ita confundis et perturbas, ut quicumque velit, quod velit, quo modo velit possit dedicare? quis eras tu, qui dedicabas? quo iure? qua lege? quo exemplo? qua potestate? ubi te isti rei populus Romanus praefecerat? video enim esse legem veterem tribuniciam quae vetet iniussu plebis aedis, terram, aram consecrari: neque tam hoc ille Q. Papirius, qui hanc legem rogavit, sensit neque suspicatus est, fore periculum ne domicilia aut possessiones indemnatorum civium consecrarentur: neque enim id fieri fas erat neque quisquam fecerat neque erat causa  
128 cur prohibendo non tam detertere videretur quam admo-  
nere. sed quia consecrabantur aedes, non privatorum domicilia, sed quae sacrae nominantur, consecrabantur agri, non ita ut nostra praedia, si qui vellet, sed ut imperator agros de hostibus captos consecraret, statuebantur arae quae religionem adferrent ipsi loco, quo essent consecratae, haec, nisi plebes iussisset, fieri vetuit. quae si tu interpretaris de nostris aedibus atque agris scripta esse, non repugno, sed quaero quae lex lata sit, ut tu aedis meas consecrares, ubi tibi haec potestas data sit, quo iure feceris. neque ego nunc de religione, sed de bonis omnium nostrum, nec de pontificio, sed de iure  
50 publico disputo. lex Papiria vetat aedis iniussu plebis consecrari: sit sane hoc de nostris aedibus ac non de publicis templis: unum ostende verbum consecrationis in ipsa tua lege, si illa lex est ac non vox sceleris et  
129 crudelitatis tuae. quod si tibi tum in illo rei publicae

naufragio omnia in mentem venire potuissent aut si tuus scriptor in illo incendio civitatis non syngraphas cum Byzantiis exsulibus et cum legatis Brogitari faceret, sed vacuo animo tibi ista non scita, sed portenta conscriberet, esses omnia si minus re, at verbis legitimis consecutus. sed uno tempore cautiones fiebant pecuniarum, foedera feriebantur provinciarum, regum appellationes venales erant, servorum omnium vicatim celebrabatur tota urbe discriptio, inimici in gratiam reconciliabantur, imperia ascribebantur nova iuventuti, Q. Scio venenum misero parabatur, 'de Cn. Pompeio, propugnatore et custode imperii, interficiendo consilia inibantur, senatus ne quid esset, ut lugerent semper boni, ut capta res publica consulum prodicione, vi tribunicia teneretur. haec cum tot tantaque agerentur, non mirum est, praesertim in furore animi et caecitate, multa illum et te fefellisse.

At videte quanta sit vis huius Papiriae legis in re <sup>130</sup> tali, non qualem tu adfers, sceleris plenam et furoris. Q. Marcius censor signum Concordiae fecerat idque in publico conlocarat. hoc signum C. Cassius censor cum in curiam transtulisset, conlegium vestrum consuluit num quid esse causae videretur quin id signum curiamque Concordiae dedicaret. quaeso, pontifices, et hominem cum homine <sup>51</sup> et tempus cum tempore et rem cum re comparate. ille erat summa modestia et gravitate censor, hic tribunus plebis scelere et audacia singulari; tempus illud erat tranquillum et in libertate populi et gubernatione positum senatus, tuum porro tempus libertate populi Romani oppressa, senatus auctoritate deleta. res illa plena iustitiae, sapientiae, dignitatis; censor enim, penes quem maiores nostri, id quod tu sustulisti, iudicium senatorum de dignitate esse voluerunt, Concordiae signum volebat in curia curiamque ei deae dedicare: praeclara voluntas atque <sup>131</sup> omni laude digna; praescribere enim se arbitrabatur, ut sine studiis dissensionis sententiae dicerentur, si sedem ipsam ac templum publici consilii religione Concordiae devinxisset: tu cum ferro, cum metu, cum edictis, cum privilegiis, cum praesentibus copiis perditorum, absentis exercitus terrore et minis, consulum societate et nefario foedere servitute oppressam civitatem teneres, Libertatis

signum posuisti magis ad ludibrium impudentiae quam ad simulationem religionis. ille in curia quae poterat sine cuiusquam incommodo dedicari \* tu in civis optime de re publica meriti cruore ac paene ossibus simulacrum non libertatis publicae, sed licentiae conlocasti. atque ille tamen ad conlegium rettulit: tu ad quem rettulisti?

132 si quid deliberares, si quid tibi aut piandum aut instituendum fuisset religione domestica, tamen instituto ceterorum uterere: ad pontificem detulisses: novum delubrum cum in urbis clarissimo loco nefando [quodam atque inaudito] instituto inchoares, referendum ad sacerdotes publicos non putasti? at si conlegium pontificum adhibendum non videbatur, nemone horum tibi idoneus visus est, qui aetate, honore, auctoritate antecellunt, ut cum eo *de* dedicatione communicares? quorum quidem

52 tu non contempsisti, sed pertinuisti dignitatem. an tu auderes quaerere ex P. Servilio aut ex M. Lucullo, quorum ego consilio atque auctoritate rem publicam consul ex vestris manibus ac faucibus eripui, quibusnam verbis aut quo ritu, primum hoc dico, civis domum consecrares, deinde civis eius, cui princeps senatus, tum autem ordines omnes, deinde Italia tota, post cunctae gentes testimonium huius urbis atque imperii conservati dedissent?

133 quid diceres, o nefanda et perniciosa labes civitatis? ‘ades, ades, Luculle, Servili, dum dedico domum Ciceronis, ut mihi praeceatis postemque teneatis.’ es tu quidem cum audacia tum impudentia singulari, sed tibi tamen oculi, voltus, verba cecidissent, cum te viri, qui sua dignitate personam populi Romani atque auctoritatem imperii sustinerent, verbis gravissimis proterruissent neque sibi fas esse dixissent, furori interesse tuo atque

134 in patriae parricidio excellere. quae cum videres, tum te ad tuum adfinem non delectum a te, sed relictum a ceteris contulisti; quem ego tamen credo, si est ortus ab illis, quos memoriae proditum est ab ipso Hercule, perfuncto iam laboribus, sacra didicisse, in viri fortis acrumnis non ita crudelem fuisse, ut in vivi et spirantis capite bustum suis manibus imponeret: qui aut nihil dixit nec fecit omnino poenamque hanc maternae temeritatis tulit, ut mutam in delicto personam nomen-

que praeberet, aut, si dixit aliquid verbis haesitantibus postemque tremibunda manu tetigit, certe nihil rite, nihil caste, nihil more institutoque perfecit. viderat ille Murenam, vitricum suum, consulem designatum, ad me consulem cum Allobrogibus communis exitii indicia adferre; audierat ex illo se a me bis salutem accepisse, separatim semel, iterum cum universis. quā re quis est qui existimare possit huic novo pontifici, primam hanc post sacerdotium initum religionem instituenti vocemque mittenti non et linguam obmutuisse et manum obtorpuisse et mentem debilitatam metu concidisse, praesertim cum ex conlegio tanto non regem, non flaminem, non pontificem videret fierique particeps invitus alieni sceleris cogere-tur et gravissimas poenas adfinitatis impurissimae sustineret?

Sed ut revertar ad ius publicum iudicandi, quod ipsi pontifices semper non solum ad suas caerimonias, sed etiam ad populi iussa adcommodaverunt, habetis in commentariis vestris, C. Cassium censorem de signo Concordiae dedicando ad pontificum conlegium rettulisse eique M. Aemilium pontificem maximum pro conlegio respondisse, nisi eum populus Romanus nominatim praefecisset atque eius iussu faceret, non videri eam recte posse dedicari. quid? cum Licinia, virgo Vestalis, summo loco nata, sanctissimo sacerdotio praedita, T. Flaminio Q. Metello consulibus aram et aediculam et pulvinar sub Saxo dedicasset, nonne eam rem ex auctoritate senatus ad hoc conlegium Sex. Iulius praetor rettulit? cum P. Scaevola, pontifex maximus, pro conlegio respondit, QUOD IN LOCO PUBLICO LICINIA, GAII FILIA, INIUSSU POPULI DEDICASSET, SACRUM NON VIDERIER. quam quidem rem quanta severitate quantaque diligentia senatus \* ex ipso senatus consulto facile cognoscetis. S. C. videtisne praetori urbano negotium datum, ut curaret ne id sacrum esset, et ut, si quae essent incisae aut inscriptae litterae, tollerentur? o tempora! o mores! tum censorem, hominem sanctissimum, simulacrum Concordiae dedicare pontifices in templo inaugurato prohibuerunt, post autem senatus in loco Augusto consecratam iam aram tollendam ex auctoritate pontificum censuit neque ullum est passus ex ea dedi-



catione litterarum exstare monumentum: tu, procella patriae, turbo ac tempestas pacis atque otii, quod in naufragio rei publicae, tenebris offusis, demerso populo Romano, everso atque eiccto senatu, dirueris, aedificaris, religione omni violata, religionis tamen nomine contaminaris, in eius civis aedibus, qui urbem suis laboribus ac periculis conservasset, monumentum deletae rei publicae conlocaris, † ab equitum nota doloris bonorum omnium sublato Q. Catuli nomine incideris, id sperasti rem publicam diutius quam, quoad mecum simul expulsa careret his moenibus, esse laturam?

- 138 Ac si, pontifices, neque is, cui licuit, neque id, quod fas fuit, dedicavit, quid me attinet iam illud tertium, quod proposueram, docere, non eis institutis ac verbis,  
 54 quibus caerimoniae postulant, dedicasse? dixi a principio nihil me de scientia vestra, nihil de sacris, nihil de abscondito iure pontificum dicturum: quae sunt adhuc a me de iure dedicandi disputata, non sunt quaesita ex occulto aliquo genere litterarum, sed sumpta de medio, ex rebus palam per magistratus actis ad conlegiumque delatis, ex senatus consulto, ex lege. illa interiora iam vestra sunt, quid dici, quid † praere, quid tangi, quid teneri ius fuerit;  
 139 quae si omnia e Ti. Coruncanii scientia, qui peritissimus pontifex fuisse dicitur, acta esse constarent aut si M. Horatius ille Pulvillus, qui, cum eum multi propter invidiam fictis religionibus impedirent, restitit et constantissima mente Capitolium dedicavit, huius modi alicui dedicationi praefuisset, tamen in scelere religio non valeret, ne valeat id, quod imperitus adolescens, novus sacerdos, sororis precibus, matris minis adductus, ignarus, invitus, sine conlegis, sine libris, sine auctore, sine fictore, furtim, mente ac lingua titubante fecisse dicatur, praesertim cum iste impurus atque impius hostis omnium religionum, qui contra fas et inter viros saepe mulier et inter mulieres vir fuisset, ageret illam rem ita raptim et turbulente, uti neque mens  
 55 neque vox neque lingua consisteret. delatum [tum] est ad  
 140 vos, pontifices, et post omnium sermone celebratum, quem ad modum iste praeposteris verbis, ominibus obscenis, identidem se ipse revocando, dubitans, timens, haesitans omnia aliter ac vos in monumentis habetis et pronuntiarit

et fecerit. quod quidem minime mirum est, in tanto scelere tantaque dementia ne audaciae quidem locum ad timorem comprimendum fuisse. etenim si nemo unquam praedo tam barbarus atque immanis fuit qui cum fana spoliasset, deinde aram aliquam in litore deserto somniis stimulatus aut religione aliqua consecraret, non horreret animo, cum divinum numen scelere violatum placare precibus cogeretur, qua tandem istum perturbatione mentis omnium templorum atque tectorum totiusque urbis praedonem fuisse censetis, cum pro detestatione tot scelerum unam aram nefarie consecraret? non potuit ullo modo — 141 quamquam et insolentia dominatus extulerat animos et erat incredibili armatus audacia — non in agendo ruere ac saepe peccare, praesertim illo pontifice [et] magistro qui cogeretur docere ante quam ipse didicisset. magna vis est cum in deorum immortalium numine tum vero in ipsa re publica: di immortales suorum templorum custodem ac praesidem sceleratissime pulsum cum viderent, ex suis templis in eius aedis immigrare nolebant; itaque istius vaccordissimi mentem cura metuque terrebant; res vero publica quamquam erat exterminata mecum, tamen observabatur ante oculos exstinctoris sui et ab istius inflammato atque inito furore iam tum se neque repetebat. qua re quid est mirum, si iste † metus furore instinctus, scelere praeceps, neque institutas caerimonias persequi neque verbum ullum sollemne potuit effari?

Quae cum ita sint, pontifices, revocate iam animos 56 vestros ab hac subtili nostra disputatione ad universam 142 rem publicam, quam antea cum viris fortibus multis, in hac vero causa solis vestris cervicibus sustinctis. vobis universi senatus perpetua auctoritas, cui vosmet ipsi praestantissime semper in mea causa praefuistis, vobis Italiae magnificentissimus ille motus municipiorumque concursus, vobis campus centuriarumque una vox omnium, quarum vos principes atque auctores fuistis, vobis omnes societates, omnes ordines, omnes, qui aut re aut spe denique sunt bona, omne suum erga meam dignitatem studium et iudicium non modo commissum, verum etiam commendatum esse arbitrabuntur. denique ipsi di im- 143 mortales, qui hanc urbem atque imperium tuentur, ut

esset omnibus gentibus posteritatieque perspicuum divino me numine esse rei publicae redditum, ideo mihi videntur fructum redditus et gratulationis meae ad suorum sacerdotum potestatem iudiciumque revocasse. hic est enim redditus, pontifices, haec restitutio in domo, in sedibus, in aris, in focis, in dis penatibus recipendis. quorum si iste suis sceleratissimis manibus tecta sedisque convellit, ducibusque consulibus tamquam urbe capta hanc unam domum quasi acerrimi propugnatoris sibi delendam putavit, tamen illi di penates ac familiares mei

57 per vos in meam domum meum erunt restituti. quo-  
 114 circa te, Capitoline, quem propter beneficia populus Romanus Optimum, propter vim Maximum nominavit, teque, Iuno Regina, et te, custos urbis, Minerva, quae semper adiutrix consiliorum meorum, testis laborum exstitisti, precor atque quaeso, vosque, qui maxime me repetistis atque revocastis, quorum de sedibus haec mihi est proposita contentio, patrii penates familiaresque, qui huic urbi et rei publicae praesidetis, vos obtestor, quorum ego a templis atque delubris pestiferam illam et nefariam flammam depuli, teque, Vesta mater, cuius castissimas sacerdotes ab hominum amentium furore et scelere defendi, cuiusque ignem illum sempiternum non sum passus aut sanguine civium restingui aut cum totius urbis incendio commisceri: ut, si in illo paene fato rei publicae obiei meum caput pro vestris caerimoniis atque templis perditissimorum civium furori atque ferro et si iterum, cum ex mea contentione interitus bonorum omnium quaereretur, vos sum testatus, vobis me ac meos commendavi, meque atque meum caput ea condicione devovi, ut, si et eo ipso tempore et ante in consulatu meo commodis meis omnibus, emolumentis, praemiis praetermissis, cura, cogitatione, vigiliis omnibus nihil nisi de salute meorum civium laborassem, tum mihi re publica aliquando restituta liceret frui; sin autem mea consilia patriae non profuissent, ut perpetuum dolorem avolsus a meis sustinerem, hanc ego devotionem capitis mei, cum ero in meas sedes restitutus, tum denique convictam esse et commissam

146 putabo. nam nunc quidem, pontifices, non solum domo, de qua cognostis, sed tota urbe carco, in quam

videor esse restitutus. urbis enim celeberrimae et maximae partes adversum illud non monumentum, sed volnus patriae contuentur: quem cum mihi conspectum morte magis vitandum fugiendumque esse videatis, nolite, quaeso, cum, cuius reditu restitutam rem publicam fore putastis, non solum dignitatis ornamentis, sed etiam urbis patriae visu velle esse privatum. non me bonorum direptio, non 58 tectorum excisio, non depopulatio praediorum, non praeda consulum ex meis fortunis crudelissime capta permovet: caduca semper et mobilia haec esse duxi, non virtutis atque ingenii, sed fortunae et temporum munera; quorum ego non tam facultatem umquam et copiam expetendam putavi, quam et in utendo rationem et in carendo patientiam. etenim ad nostrum usum prope modum iam est definita moderatio rei familiaris; liberis autem nostris satis amplum patrimonium paterni nominis ac memoriae nostrae relinquemus: domo per scelus erepta, per latrocinium occupata, per religionis vim sceleratius etiam aedificata quam eversa, carere sine maxima ignominia rei publicae, meo dedecore ac dolore non possum. qua 147 propter, si dis immortalibus, si senatui, si populo Romano, si cunctae Italiae, si provinciis, si exteris nationibus, si vobismet ipsis, qui in mea salute principem semper locum auctoritatemque tenuistis, gratum et iucundum meum reditum intellegitis esse, quaeso obtestorque vos, pontifices, ut me, quem auctoritate, studio, sententiis restitulistis, nunc, quoniam senatus ita volt, manibus quoque vestris in sedibus meis conlocetis.

---



M. TULLII CICERONIS  
ORATIO DE HARUSPICUM RESPONSO IN  
P. CLODIUM IN SENATU HABITA.

<sup>1</sup> Hesterno die, patres conscripti, cum me et vestra  
<sup>1</sup> dignitas et frequentia equitum Romanorum praesentium, quibus senatus dabatur, magno opere commosset, putavi mihi reprimendam esse P. Clodii impudicam impudentiam, cum is publicanorum causam stultissimis interrogationibus impediret, P. Tullioni Syro navaret operam atque ei se, cui totus venierat, etiam vobis inspectantibus vendicaret. itaque hominem furem exultantemque continui, simul ac periculum iudicii intendi; duobus inceptis verbis omnem impetum gladiatoris ferociamque

<sup>2</sup> compressi. ac tamen ignarus ille qui consules essent, exsanguis atque aestuans se ex curia repente proripuit cum quibusdam fractis iam atque inanibus minis et cum illius Pisoniani temporis Gabinianique terroribus; quem cum egredientem insequi coepissem, cepi equidem fructum maximum et ex consurrectione omnium vestrum et ex comitatu publicanorum. sed vacors repente sine suo vultu, sine colore, sine voce constitit; deinde respexit et simul atque Cn. Lentulum consulem aspexit, concidit in curiae paene limine, recordatione, credo, Gabinii sui desiderioque Pisonis. cuius ego de effrenato et praecepiti furore quid dicam? potest gravioribus a me verbis vulnerari quam est statim in facto ipso a gravissimo viro, P. Servilio, confectus ac trucidatus? cuius si iam vim et gravitatem illam singularem ac paene divinam adsequi possem, tamen non dubito quin ea tela, quae coniecerit inimicus, quam ea, quae conlega patris emisit, leviora atque hebetiora esse videantur.

<sup>2</sup> Sed tamen mei facti rationem exponere illis volo, qui  
<sup>3</sup> hesterno die dolore me elatum et iracundia longius prope

progressum arbitrabantur quam sapientis hominis cogitata  
 ratio postulasset. nihil feci iratus, nihil impotenti animo,  
 nihil non diu consideratum ac multo ante meditatam.  
 ego enim me, patres conscripti, inimicum semper esse  
 professus sum duobus, qui me, qui rem publicam cum  
 defendere deberent, servare possent, cumque ad con-  
 sulare officium ipsis insignibus illius imperii ad meam  
 salutem non solum auctoritate, sed etiam precibus vestris  
 vocarentur, primo reliquerunt, deinde prodiderunt, po-  
 stremo oppugnarunt praemiisque nefariae pactionis fun-  
 ditus una cum re publica oppressum extinctumque vo-  
 luerunt, qui quae suo ductu et imperio cruento illo atque  
 funesto supplicia neque a sociorum moenibus prohibere  
 neque hostium urbibus inferre potuerunt, excisionem,  
 inflammationem, eversionem, depopulationem, vastita-  
 tem, ea sua cum praeda meis omnibus tectis atque agris  
 intulerunt. cum his furiis et facibus, cum his, inquam, <sup>4</sup>  
 exitiosis prodigiis ac paene huius imperii pestibus bellum  
 mihi inexpiabile dico esse susceptum, neque id tamen  
 ipsum tantum quantum meus ac meorum, sed tantum  
 quantum vester atque omnium bonorum dolor postu-  
 lavit. in Clodium vero non est hodie maius odium quam <sup>3</sup>  
 illo die fuit, cum illum ambustum religiosissimis igni-  
 bus cognovi muliebri ornatu ex incesto stupro atque ex  
 domo pontificis maximi emissum. tum, inquam, tum  
 vidi ac multo ante prospexi quanta tempestas excita-  
 retur, quanta impenderet procella rei publicae. vide-  
 bam illud scelus tam importunum, audaciam tam im-  
 manem adolescentis furentis, nobilis, vulnerati non  
 posse arceri otii finibus; erupturum illud malum ali-  
 quando, si impunitum fuisset, ad perniciem civitatis.  
 non multum mihi sane post ad odium accessit: nihil <sup>5</sup>  
 enim contra me fecit odio mei, sed odio severitatis,  
 [odio dignitatis,] odio rei publicae. non me magis vio-  
 lavit quam senatum, quam equites Romanos, quam  
 omnis bonos, quam Italiam cunctam, non denique in  
 me sceleratorius fuit quam in ipsos deos immortalis: etenim  
 illos eo scelere violavit, quo nemo antea; in me fuit eo-  
 dem animo, quo etiam eius familiaris Catilina, si vicis-  
 set, fuisset. itaque cum numquam a me esse accu-

sandum putavi, non plus quam stipitem illum, qui quorum hominum esset nesciremus, nisi se Ligurem ipse esse diceret. quid enim hunc persequar, pecudem ac beluam, pabulo inimicorum meorum et glande corruptum? qui si sensit quo scelere se devinxerit, non dubito quin sit miserrimus; sin autem id non videt, periculum est ne se stuporis excusatione defendat. accedit etiam, quod expectatione omnium fortissimo et clarissimo viro, T. Annio, devota et constituta ista hostia esse videtur, cui me praeripere desponsam iam et destinatam laudem, cum ipse eius opera et dignitatem et  
4 salutem recuperarim, valde est iniquum. etenim, ut P. ille Scipio natus mihi videtur ad interitum exitiumque Karthaginis, qui illam a multis imperatoribus obsessam, oppugnatam, labefactam, paene captam aliquando, quasi fatali adventu solus evertit, sic T. Annius ad illam pestem comprimendam, extinguendam, funditus delendam natus esse videtur et quasi divino munere donatus rei publicae. solus ille cognovit quem ad modum armatum civem, qui lapidibus, qui ferro alios fugaret, alios domi contineret, qui urbem totam, qui curiam, qui forum, qui templa omnia caede incendiisque terreret, non  
7 modo vinci, verum etiam vinciri oporteret. huic ego et tali et ita de me ac de patria merito viro numquam mea voluntate praeripiam eum praesertim reum, cuius ille inimicitias non solum suscepit propter salutem meam, verum etiam appetivit. sed si etiam nunc inlaqueatus iam omnium legum periculis, inretitus odio bonorum omnium, expectatione supplicii iam non diuturna implicatus, feretur tamen haesitans et in me impetum impeditus facere conabitur, resistam et aut concedente aut etiam adiuvante Milone eius conatum refutabo, velut hesterno die, cum mihi stanti tacens minaretur, voce tantum attigi legum initium et iudicii: consedit ille, conticui; diem dixisset, ut iecerat: fecissem ut ei statim tertius a praetore dies diceretur. atque hoc sic moderetur et cogitet, si contentus sit eis sceleribus, quae commisit, esse se iam consecratum Miloni: si quod in me telum intenderit, statim me esse adrepturum arma iudiciorum atque legum.

Atque paulo ante, patres conscripti, contionem habuit, quae est ad me tota delata; cuius contionis primum universum argumentum sententiamque audite: cum riseritis impudentiam hominis, tum a me de tota contione audietis. de religionibus sacris et caerimoniis est contionatus, patres conscripti, Clodius: P. inquam Clodius sacra et religiones neglegi, violari, pollui questus est. non mirum, si hoc vobis ridiculum videtur. etiam sua contio risit hominem, quo modo ipse gloriari solet, ducentis confixum senati consultis, quae sunt omnia contra illum pro religionibus facta, hominemque eum, qui pulvinaribus Bonae deae stuprum intulerit, eaque sacra, quae viri oculis ne imprudentis quidem aspici fas est, non solum aspectu virili, sed flagitio stuproque violarit, in contione de religionibus neglectis conqueri. itaque nunc proxima contio eius exspectatur de pudicitia. quid enim interest utrum ab altaribus religiosissimis fugatus de sacris et religionibus conqueratur an ex sororum cubiculo egressus pudorem pudicitiamque defendat? responsum haruspicum hoc recens de fremitu in contione recitavit, in quo cum aliis multis scriptum etiam illud est, id quod audistis, *LOCA SACRA ET RELIGIOSA PROFANA HABERI*. in ea causa esse dixit domum meam, a religiosissimo sacerdote, P. Clodio, consecratam. gaudeo mihi de toto hoc ostento, quod haud scio an gravissimum multis his annis huic ordini nuntiatum sit, datam non modo iustam, sed etiam necessariam causam esse dicendi. reperietis enim ex hoc toto prodigio atque responso nos de istius scelere ac furore ac de impendentibus periculis maximis prope iam voce Iovis Optimi Maximi promoneri. sed primum expiabo religionem aedium mearum, si id facere vere ac sine cuiusquam dubitatione potero; sin scripulus tenuissimus residere aliquis videbitur, non modo patienti, sed etiam libenti animo portentis deorum immortalium religionique parebo. sed quae tandem est in hac urbe tanta domus ab ista suspitione religionis tam vacua atque pura? quamquam vestrae domus, patres conscripti, ceterorumque civium multo maxima ex parte sunt liberae religione, tamen una mea domus iudiciiis omnibus liberata in hac urbe sola est. te enim appello,



Lentule, et te, Philippe: ex hoc haruspicum responso decrevit senatus, ut de locis sacris religiosis ad hunc ordinem referretis. potestisne referre de mea domo? quae, ut dixi, sola in hac urbe omni religione, omnibus iudiciis liberata est; quam primum inimicus ipse in illa tempestate ac nocte rei publicae, cum cetera scelera stilo illo impuro, Sex. Clodii ore tincto, conscripsisset, ne una quidem attigit littera religionis; deinde eandem domum populus Romanus, cuius est summa potestas omnium rerum, comitiis centuriatis omnium aetatum ordinumque suffragiis eodem iure esse iussit, quo fuisset.

12 postea vos, patres conscripti, non quo dubia res esset, sed ut huic furiae, si diutius in hac urbe, quam delere cuperet, maneret, vox interdiceretur, decrevistis, ut de mearum aedium religione ad pontificum collegium referretur. quae tanta religio est, qua non in nostris dubitationibus atque in maximis superstitionibus unius P. Servilii ac M. Luculli responso ac verbo liberemur? de sacris publicis, de ludis maximis, de deorum penatium Vestaeque matris caerimoniis, de illo ipso sacrificio, quod fit pro salute populi Romani, quod post Romam conditam huius unius casti tutoris religionum scelere violatum est, quod tres pontifices statuissent, id semper populo Romano, semper senatui, semper ipsis dis immortalibus satis sanctum, satis augustum, satis religiosum esse visum est. at vero meam domum P. Lentulus consul et pontifex, P. Servilius, M. Lucullus, Q. Metellus, M. Glabrio, M. Messalla, L. Lentulus flamen Martialis, P. Galba, Q. Metellus Scipio, C. Fannius, M. Lepidus, L. Claudius rex sacrorum, M. Scaurus, M. Crassus, C. Curio, Sex. Caesar flamen Quirinalis, Q. Cornelius, P. Albinovanus, Q. Terentius, pontifices minores, causa cognita, duobus locis dicta, maxima frequentia amplissimorum ac sapientissimorum civium astante, omni religione una mente omnes liberaverunt.

7  
13 nego umquam post sacra constituta, quorum eadem est antiquitas, quae ipsius urbis, ulla de re, ne de capite quidem virginum Vestalium, tam frequens conlegium iudicasse: quamquam ad facinoris disquisitionem interest adesse quam plurimos: ita est enim interpretatio illa

pontificum, ut eidem potestatem habeant iudicum: religionis explanatio vel ab uno pontifice perito recte fieri potest, quod idem in iudicio capitis durum atque iniquum est: tamen sic reperietis frequentiores pontifices de mea domo quam umquam de caerimoniis virginum iudicasse. postero die frequentissimus senatus, te consule designato, Lentule, sententiae princeps, P. Lentulo et Q. Metello consulibus referentibus statuit, cum omnes pontifices, qui erant huius ordinis, adessent, cumque alii, qui honoribus populi Romani antecedeabant, multa de conlegii iudicio verba fecissent omnesque idem scribendo adessent, domum meam iudicio pontificum religione liberatam videri. de hoc igitur loco sacro potissimum videntur haruspices dicere, qui locus solus ex privatis locis omnibus hoc praecipue iuris habet, ut ab ipsis, qui sacris praesunt, sacer non esse iudicatus sit? verum referte: quod ex senatus consulto facere debetis. aut vobis cognitio dabitur, qui primi de hac domo sententiam dixistis et eam religione omni liberastis, aut senatus ipse iudicabit, qui uno illo solo antistite sacrorum dissentiente frequentissimus antea iudicavit, aut, id quod certe fiet, ad pontifices reicietur, quorum auctoritati, fidei, prudentiae maiores nostri sacra religionesque et privatas et publicas commendarunt. quid ergo ei possunt aliud iudicare ac iudicaverunt? multae sunt domus in hac urbe, patres conscripti, atque haud scio an paene cunctae iure optimo, sed tamen iure privato, iure hereditario, iure auctoritatis, iure Mancipi, iure nexi: nego esse ullam domum aliam privato eodem, quo quae optima lege, publico vero omni praecipuo et humano et divino iure munitam: quae primum aedificatur<sup>15</sup> ex auctoritate senatus pecunia publica, deinde contra vim nefariam huius gladiatoris tot senati consultis munita atque saepta est. primum negotium isdem magistratibus est datum anno superiore, ut curarent ut sine vi aedificare mihi liceret, quibus in maximis periculis universa res publica commendari solet; deinde cum ille saxis et ignibus et ferro vastitatem meis sedibus intulisset, decrevit senatus eos, qui id fecissent, lege de vi, quae est in eos, qui universam rem publicam op-<sup>8</sup>

pugnassent, teneri. vobis vero referentibus, o post hominum memoriam fortissimi atque optimi consules, decrevit idem senatus frequentissimus, qui meam domum  
16 violasset, contra rem publicam esse facturum. nego ullo de opere publico, de monumento, de templo tot senatus exstare consulta quot de mea domo, quam senatus unam post hanc urbem constitutam ex aerario aedificandam, a pontificibus liberandam, a magistratibus defendendam, a iudicibus muniendam putarit. P. Valerio pro maximis in rem publicam beneficiis data domus est in Velia publice, at mihi in Palatio restituta; illi locus, at mihi etiam parietes atque tectum; illi quam ipse privato iure tueretur, mihi quam publice magistratus omnes defenderent. quae quidem ego si aut per me aut ab aliis haberem, non praedicarem apud vos, ne nimis gloriari viderer; sed cum sint mihi data a vobis, cum ea attemptentur eius lingua, cuius ante manu eversa vos mihi et liberis meis manibus vestris reddidistis, non ego de meis, sed de vestris factis loquor, nec vereor ne haec mea vestrorum beneficiorum praedicatio non grata potius  
17 quam adrogans videatur. quamquam, si me tantis laboribus pro communi salute perfunctum efferret aliquando ad gloriam in refutandis maledictis hominum improborum animi quidam dolor, quis non ignosceret? vidi enim hesterno die quendam murmurantem: quem aiebant negare ferri me posse, quia cum ab hoc eodem impurissimo parricida rogarer cuius essem civitatis, respondi me, probantibus et vobis et equitibus Romanis, eius esse, quae carere me non potuisset. ille, ut opinor, ingemuit. quid igitur responderem? quaero ex eo ipso, qui ferre me non potest: me civem esse Romanum? literate respondissem: an tacuissem? desertum negotium. potest quisquam vir in rebus magnis cum invidia versatus satis graviter in inimici contumeliam sine sua laude respondere? at ipse non modo respondet quicquid potest, cum est lacessitus, sed etiam gaudet se ab amicis quid respondeat admoneri.

9  
18 Sed quoniam mea causa expedita est, videamus nunc quid haruspices dicant. ego enim fateor me et magnitudine ostenti et gravitate responsi et una atque constanti

haruspicum *voce* vehementer esse commotum; neque is sum, qui, si cui forte videor plus quam ceteri, qui aeque atque ego sunt occupati, versari in studio litterarum, eis delecter aut utar omnino litteris, quae nostros animos deterrent atque avocant a religione. ego vero primum habeo auctores ac magistros religionum colendarum maiores nostros, quorum mihi tanta fuisse sapientia videtur, ut satis superque prudentes sint, qui illorum prudentiam, non dicam adsequi, sed quanta fuerit perspicere possint; qui statas sollemnisque caerimonias pontificatu, rerum bene gerendarum auctoritates augurio, fatorum veteres praedictiones Apollinis vatum libris, portentorum expiationes Etruscorum disciplina contineri putaverunt; quae quidem tanta est, ut nostra memoria primum Italici belli funesta illa principia, post Sullani Cinnanique temporis extremum paene discrimen, tum hanc recentem urbis inflammandae delendique imperii coniurationem non obscure nobis paulo ante praedixerint. deinde, si quid habui otii, etiam cognovi, multa homines<sup>19</sup> doctos sapientisque et dixisse et scripta de deorum immortalium numine reliquisse; quae quamquam divinitus perscripta video, tamen eius modi sunt, ut ea maiores nostri docuisse illos, non ab illis didicisse videantur. etenim quis est tam vacors qui aut cum suspexit in caelum, deos esse non sentiat et ea, quae tanta mente fiunt, ut vix quisquam arte ulla ordinem rerum ac necessitudinem persequi possit, casu fieri putet, aut cum deos esse intellexerit, non intellegat eorum numine hoc tantum imperium esse natum et auctum et retentum? quam volumus licet, patres conscripti, ipsi nos amemus, tamen nec numero Hispanos nec robore Gallos nec calliditate Poenos nec artibus Graecos nec denique hoc ipso huius gentis ac terrae domestico nativoque sensu Italos ipsos ac Latinos, sed pietate ac religione atque hac una sapientia, quod deorum numine omnia regi gubernarique perspeximus, omnis gentis nationesque superavimus.

Qua re ne plura de re minime loquar dubia, adhibete<sup>10</sup> animos et mentis vestras, non solum auris, ad haruspicum vocem admovete: QUOD IN AGRO LATINIENSI AUDITUS EST STREPITUS CUM FREMITU. mitto haruspices, mitto<sup>20</sup>



illam veterem ab ipsis dis immortalibus, ut hominum fama est, Etruriae traditam disciplinam: nos nonne haruspices esse possumus? exauditus in agro propinquo et suburbano est strepitus quidam reconditus et horribilis fremitus armorum. quis est ex gigantibus illis, quos poëtae ferunt bellum dis immortalibus intulisse, tam impius qui hoc tam novo tantoque motu non magnum aliquid deos populo Romano praemonstrare et praecinere fateatur? de ea re scriptum est: POSTILIONES ESSE IOVI,  
 21 SATURNO, NEPTUNO, TELLURI, DIS CAELESTIBUS. audio quibus dis violatis expiatio debeatur, sed hominum quae ob delicta quaero. LUDOS MINUS DILIGENTER FACTOS POLLUTOSQUE. quos ludos? te appello, Lentule, — tui sacerdotii sunt tensae, curricula, praecentio, ludi, libationes epulaeque ludorum —, vosque, pontifices, ad quos epulones Iovis Optimi Maximi, si quid est praetermissum aut commissum, adferunt, quorum de sententia illa eadem renovata atque instaurata celebrantur; qui sunt ludi minus diligenter facti? quando aut quo scelere polluti? respondebis et pro te et pro conlegis tuis, etiam pro pontificum conlegio, nihil cuiusquam aut neglegentia contemptum aut scelere esse pollutum: omnia sollemnia ac iusta ludorum omnibus rebus observatis summa cum  
 11 caerimonia esse servata. quos igitur haruspices ludos  
 22 minus diligenter factos pollutosque esse dicunt? eos, quorum ipsi di immortales atque illa mater Idaea te, te, Cn. Lentule, cuius abavi manibus esset accepta, spectatorem esse voluit: quod ni tu Megalesia illo die spectare voluisses, haud scio an vivere nobis atque his de rebus iam queri liceret. vis enim innumerabilis incitata ex omnibus vicis conlecta servorum ab hoc aedile religioso repente e fornicibus ostiisque omnibus in scenam signo dato immissa inrupit. tua tum, tua, Cn. Lentule, eadem virtus fuit, quae in privato quondam tuo proavo: te, nomen, imperium, vocem, aspectum, impetum tuum stans senatus equitesque Romani et omnes boni sequebantur, cum ille servorum eludentium multitudini senatum populumque Romanum vinctum ipso consessu et constrictum spectaculis atque impeditum turba et an-  
 23 gustiis tradidisset. an si ludius constitit aut tibicen re-

pente conticuit aut puer ille patrimus et matrimus si tensam non tenuit, si lorum omisit, aut si aedilis verbo aut simpuvio aberravit, ludi sunt non rite facti, eaque errata expiantur et mentes deorum immortalium ludorum instauratione placantur: si ludi ab laetitia ad metum traducti, si non intermissi, sed perempti atque sublatis sunt, si civitati universae scelere eius, qui ludos ad luctum conferre voluit, exstiterunt dies illi pro festis paene funesti, dubitabimus quos ille fremitus nuntiet ludos esse pollutos? ac si volumus ea, quae de quoque deo <sup>24</sup> nobis tradita sunt, recordari, hanc Matrem magnam, cuius ludi violati, polluti, paene ad caedem et ad funus civitatis conversi sunt, hanc, inquam, accepimus agros et nemora cum quodam strepitu fremituque peragrarē. haec igitur vobis, haec populo Romano et scelerum in- <sup>12</sup> dicia ostendit et periculorum signa patefecit. nam quid ego de illis ludis loquar, quos in Palatio nostri maiores ante templum in ipso Matris magnae conspectu Megalesibus fieri celebrarique voluerunt? qui sunt more institutisque maxime casti, sollemnes, religiosi, quibus ludis primum ante populi consessum senatui locum P. Africanus iterum consul ille maior dedit, ut eos ludos haec lues impura polluerit: quo si qui liber aut spectandi aut etiam religionis causa accesserat, manus adferebantur; quo matrona nulla adiit propter vim consessumque servorum: ita ludos eos, quorum religio tanta est, ut ex ultimis terris arcessita in hac urbe consederit, qui uni ludi ne verbo quidem appellantur Latino, ut vocabulo ipso et appetita religio externa et Matris magnae nomine suscepta declaretur, hos ludos servi fecerunt, servi spectaverunt, tota denique hoc aedile servorum Megalesia fuerunt. prohi di immortales! qui magis nobiscum <sup>25</sup> loqui possetis, si essetis versareminique nobiscum? ludos esse pollutos significastis ac plane dicitis. quid magis inquinatum, deformatum, perversum, conturbatum dici potest quam omne servitium permissu magistratus liberatum in alteram scenam immissum, alteri praepositum, ut alter consessus potestati servorum obiceretur, alter servorum totus esset? si examen apium ludis in scenam caveamve venisset, haruspices acciendos ex Etruria pu-

taremus: videmus universi repente examina tanta servorum immissa in populum Romanum saeptum atque inclusum et non commovemur? atque in apium fortasse examine nos ex Etruscorum scriptis haruspices, ut a  
26 servitio caveremus, monerent: quod igitur ex aliquo diiuncto diversoque monstro significatum caveremus, id cum ipsum sibi monstrum est, et cum in eo ipso periculum est, ex quo periculum portenditur, non pertimescemus? istius modi Megalesia fecit pater tuus? istius modi patruus? is mihi etiam generis sui mentionem facit, cum Athenionis aut Spartaci exemplo ludos facere maluerit quam C. aut Appii Claudiorum? illi cum ludos facerent, servos de cavea exire iubebant: tu in alteram servos immisisti, ex altera liberos eiecisti. itaque qui  
antea voce praeconis a liberis semovebantur, tuis ludis  
13 non voce, sed manu liberos a se segregabant. ne hoc quidem tibi in mentem veniebat, Sibyllino sacerdote, haec sacra maiores nostros ex vestris libris expetisse? si illi sunt vestri, quos tu impia mente conquiris, viola-  
27 tis oculis legis, contaminatis manibus attrectas. hac igitur vate suadente quondam, defessa Italia Punico bello atque ab Hannibale vexata, sacra ista nostri maiores ascita ex Phrygia Romae conlocarunt: quae vir is accepit, qui est optimus populi Romani iudicatus, P. Scipio; femina autem, quae matronarum castissima putabatur, Q. Claudia: cuius priscam illam severitatem [sacrificii] mirifice tua soror existimatur imitata. nihil te igitur neque maiores tui coniuncti cum his religionibus neque sacerdotium ipsum, quo est haec tota religio constituta, neque curulis aedilitas, quae maxime hanc tueri religionem solet, permovet quo minus castissimos ludos omni flagitio  
28 pollueres, dedecore maculares, scelere obligares? sed quid ego id admiror? qui, accepta pecunia Pessinuntem ipsum, sedem domiciliumque Matris decorum, vastaris et Brogitaro Gallograeco, impuro homini ac nefario, cuius legati te tribuno dividere in aede Castoris tuis operis nummos solebant, totum illum locum fanumque vendideris? sacerdotem ab ipsis aris pulvinaribusque detraxeris? omnia illa, quae vetustas, quae Persae, quae Syri, quae reges omnes, qui Europam Asiamque tenue-

runt, semper summa religione coluerunt, perverteris? quae denique nostri maiores tam sancta duxerunt, ut cum refertam urbem atque Italiam fanorum haberemus, tamen nostri imperatores maximis et periculosissimis bellis huic deae vota facerent eaque in ipso Pessinunte ad illam ipsam principem aram et in illo loco fanoque persolverent. quod cum Deiotarus religione sua castissime<sup>29</sup> tueretur, quem unum habemus in orbe terrarum fidelissimum huic imperio atque amantissimum nostri nominis, Brogitaro, ut ante dixi, addictum pecunia tradidisti. atque hunc tamen Deiotarum, saepe a senatu regali nomine dignum existimatum, clarissimorum imperatorum testimoniis ornatum, tu etiam regem appellari cum Brogitaro iubes. sed alter est rex iudicio senatus per nos, pecunia Brogitarus per te appellatus: \* \* \* alterum putabo regem, si habuerit unde tibi solvat quod ei per syngrapham credidisti. nam cum multa regia sunt in Deiotaro, tum illa maxime, quod tibi nummum nullum dedit, quod eam partem legis tuae, quae congruebat cum iudicio senatus ut ipse rex esset, non repudiavit, quod Pessinuntem per scelus a te violatum et sacerdote sacrisque spoliatum recuperavit, ut in pristina religione servaret, quod caerimonias ab omni vetustate acceptas a Brogitaro pollui non sinit mavoltque generum suum munere tuo quam illud fanum antiquitate religionis carere. sed ut ad haec haruspicum responsa redeam, ex quibus est primum de ludis, quis est qui id non totum in istius ludos praedictum et responsum esse fateatur?

Sequitur de locis sacris, religiosis. o impudentiam<sup>30</sup> miram! de mea domo dicere audes? committe vel consulibus vel senatui vel conlegio pontificum tuam. ac mea quidem his tribus omnibus iudiciis, ut dixi antea, liberata est. at in eis aedibus, quas tu, Q. Seio, equite Romano, viro optimo, per te apertissime interfecto, tenes, sacellum dico fuisse et aras; tabulis hoc censoriis, memoria multorum firmabo ac docebo: agatur modo haec<sup>31</sup> res, quod ex eo senatus consulto, quod nuper est factum, referri ad vos necesse est, habeo quae de locis religiosis velim dicere. cum de domo tua dixero, in qua tamen ita est inaedificatum sacellum, ut alius fecerit, tibi tan-



tum modo sit demoliendum, tum videbo num mihi necesse sit de aliis etiam aliquid dicere. putant enim ad me non nulli pertinere magmentarium Telluris aperire; nuper id patuisse dicunt et ego recordor: nunc sanctissimam partem ac sedem maximae religionis privato dicunt vestibulo contineri. multa me movent, quod aedes Telluris est curationis meae, quod is, qui illud magmentarium sustulit, mea domo iudicio pontificum liberata secundum fratrem suum iudicatum esse dicebat: movet me etiam in hac caritate annonae, sterilitate agrorum, inopia frugum religio Telluris et eo magis, quod eodem  
 32 ostento Telluri postilio deberi dicitur. vetera fortasse loquimur; quamquam hoc si minus civili iure perscriptum est, lege tamen naturae, communi iure gentium sanctum est, ut nihil mortales a dis immortalibus usu capere  
 15 possint. verum tamen antiqua neglegemus: etiamne ea neglegamus, quae fiunt cum maxime, quae videmus? L. Pisonem quis nescit his temporibus ipsis maximum et sanctissimum Dianae sacellum in Caeculo sustulisse? adsunt vicini eius loci; multi sunt etiam in hoc ordine, qui sacrificia gentilicia, illo ipso in sacello, stato loco, anniversaria factitarint. et quaerimus di immortales quae loca desiderent, quid significant, de quo loquantur? a Sex. Serrano sanctissima sacella suffossa, inaedificata, oppressa, summa denique turpitudine foedata esse nescimus?  
 33 tu meam domum religiosam facere potuisti? qua mente? quam amiseras. qua manu? qua disturbaras. qua voce? qua incendi iusseras. qua lege? quam ne in illa quidem impunitate tua scripseras. quo pulvinari? quod stupraras. quo simulacro? quod ereptum ex meretricis sepulcro in imperatoris monumento conlocaras. quid habet mea domus religiosi, nisi quod impuri et sacrilegi parietem tangit? itaque ne quis meorum imprudens introspicere tuam domum possit ac te sacra illa tua facientem videre, tollam altius tectum, non ut ego te despiciam, sed tu ne aspicias urbem eam, quam delere voluisti.

16  
 34 Sed iam haruspicum reliqua responsa videamus. ORATORES CONTRA IUS FASQUE INTERFECTOS. quid est hoc? de Alexandrinis esse video sermonem; quem ego non re-

futo: sic enim sentio, ius legatorum, cum hominum praesidio munitum sit, tum etiam divino iure esse vallatum. sed quaero ab illo, qui omnis indices tribunus e carcere in forum effudit, cuius arbitrio sicae nunc omnes atque omnia venena tractantur, qui cum Hermarcho Chio syngraphas fecit, ecquid sciat unum acerrimum adversarium Hermarchi, Theodosium, legatum ad senatum a civitate libera missum, sicae percussum? quod non minus quam de Alexandrinis indignum dis immortalibus esse visum certo scio. nec confero nunc in te unum omnia: 35 spes maior esset salutis, si praeter te nemo esset impurus: plures sunt; hoc et tu tibi confidis magis et nos prope iure diffidimus. quis Platorem ex Orestide, quae pars Macedoniae libera est, hominem in illis locis clarum ac nobilem, legatum Thessalonicam ad nostrum, ut se ipse appellavit, imperatorem venisse nescit? quem ille propter pecuniam, quam ab eo extorquere non poterat, in vincla coniecit et medicum intromisit suum qui legato, socio, amico, libero foedissime et crudelissime venas incideret. securis suas cruentari scelere noluit; nomen quidem populi Romani tanto scelere contaminavit, ut id nulla re possit nisi ipsius supplicio expiari. qualis hunc carnifices putamus habere, qui etiam medicis suis non ad salutem, sed ad necem utatur?

Sed recitemus quid sequatur. FIDEM IUSQUE IURANDUM 17  
NEGLECTUM. hoc quid sit per se ipsum non facile inter- 36  
pretor, sed ex eo, quod sequitur, suspicor de tuorum iudicum manifesto periurio dici, quibus olim erepti essent nummi, nisi a senatu praesidium postulassent. qua re autem de eis dici suspicer haec causa est, quod sic statuo, et illud in hac civitate esse maxime inlustre atque insigne periurium et te ipsum tamen in periurii crimen ab eis, quibuscum coniurasti, non vocari.

Et video in haruspicum responsum haec esse sub- 37  
iecta: SACRIFICIA VETUSTA OCCULTAE MINUS DILIGENTER  
FACTA POLLUTAEQUE. haruspices haec loquuntur an patrii penatesque di? multi enim sunt, credo, in quos huius maleficii suspitio cadat. quis praeter hunc unum? obscure dicitur quae sacra polluta sint? quid planius, quid religiosius, quid gravius dici potest? VETUSTA OCCULTA-

QUE. nego ulla verba Lentulum, gravem oratorem ac disertum, saepius, cum te accusaret, usurpasse quam haec, quae nunc ex Etruscis libris in te conversa atque interpretata dicuntur. etenim quod sacrificium tam vetustum est quam hoc, quod a regibus aequale huius urbis accepimus? quod autem tam occultum quam id, quod non solum curiosos oculos excludit, sed etiam errantis? quo non modo improbitas, sed ne imprudentia quidem *impune* possit intrare? quod quidem sacrificium ante P. Clodium nemo omni memoria violavit, nemo umquam adiit, nemo neglexit, nemo vir aspicere non horruit; quod fit per virgines Vestalis, fit pro populo Romano, fit in ea domo, quae est in imperio, fit incredibili caerimonia, fit ei deae, cuius ne nomen quidem viros scire fas est; quam iste idcirco Bonam dicit, quod in tanto  
18 sibi scelere ignoverit. non ignovit, mihi crede, non: nisi forte tibi esse ignotum putas, quod te iudices emiserrunt excussum et exhaustum, suo iudicio absolutum, omnium condemnatum, aut quod oculos, ut opinio illius  
38 religionis est, non perdidisti. quis enim ante te sacra illa vir sciens viderat, ut quisquam poenam quae sequeretur id scelus scire posset? an tibi luminis obsesset caecitas plus quam libidinis? ne id quidem sentis, coniventis illos oculos abavi tui magis optandos fuisse quam hos flagrantis sororis? tibi vero, si diligenter attendes, intelleges hominum poenas deesse adhuc, non deorum. homines te in re foedissima defenderunt; homines turpissimum nocentissimumque laudarunt; homines confitentem iudicio liberaverunt; hominibus iniuria tui stupri inlata in ipsos dolori non fuit; homines tibi arma alii in me, alii post in illum invictum civem dederunt; hominum beneficia prorsus concedo tibi iam maiora non  
39 esse quaerenda: a dis quidem immortalibus quae potest homini maior esse poena furore atque dementia? nisi forte in tragoediis, quos volnere ac dolore corporis cruciari et consumi vides, graviores deorum immortalium iras subire quam illos, qui furentes inducuntur, putas. non sunt illi eiulatus et gemitus Philoctetae tam miseri, quamquam sunt acerbi, quam illa exsultatio Athamantis et quam senium matricidarum. tu, cum furialis in con-

tionibus voces mittis, cum domos civium evertis, cum lapidibus optimos viros foro pellis, cum ardentis faces in vicinorum tecta iactas, cum aedis sacras inflammas, cum servos concitas, cum sacra ludosque conturbas, cum uxorem sororemque non discernis, cum quod in eas cubile non sentis, tum baccharis, tum furis, tum das eas poenas, quae solae sunt hominum scelerei a dis immortalibus constitutae. nam corporis quidem nostri infirmitas multos subit casus per se; denique ipsum corpus tenuissima de causa saepe conficitur: deorum tela in impiorum mentibus figuntur. qua re miserior es, cum in omnem fraudem raperis oculis, quam si omnino oculos non habueris.

Sed quoniam de eis omnibus, quae haruspices com-<sup>19</sup>  
missa esse dicunt, satis est dictum, videamus quid eidem<sup>40</sup>  
haruspices iam a dis immortalibus dicant moneri. monent: NE PER OPTIMATIUM DISCORDIAM DISSENSIIONEMQUE PATRIBUS PRINCIPIBUSQUE CAEDES PERICULAQUE CREENTUR, AUXILIOQUE † DIMINUITIS DEFICIENTUR, QUA RE AD UNUM IMPERIUM PROVIN-  
CIAE REDEANT EXERCITUSQUE, DIMINUTIOQUE ACCEDAT. haruspicum verba sunt haec omnia: nihil addo de meo. quis igitur optimatium discordiam molitur? idem iste, nec ulla vi ingenii aut consilii sui, sed quodam errore nostro; quem quidem ille, quod obscurus non erat, facile perspexit. hoc enim etiam turpius afflicta res publica, quod ne ab eo quidem vexatur, ut tamquam fortis in pugna vir acceptis a forti adversario vulneribus adversis honeste cadere videatur. Ti. Gracchus convellit statum<sup>41</sup>  
civitatis: qua gravitate vir! qua eloquentia! qua dignitate! nihil ut a patris avique Africani praestabili insignique virtute, praeterquam quod a senatu desciverat, deflexisset. secutus est C. Gracchus: quo ingenio! qua eloquentia! quanta vi! quanta gravitate dicendi! ut dolerent boni non illa tanta ornamenta ad meliorem mentem voluntatemque esse conversa. ipse L. Saturninus ita fuit effrenatus et paene demens, ut auctor esset egregius et ad animos imperitorum excitandos inflammandosque perfectus. nam quid ego de P. Sulpicio loquar? cuius tanta in dicendo gravitas, tanta iucunditas, tanta brevitatis fuit, ut posset vel ut prudentes errarent vel ut



boni minus bene sentirent perficere dicendo. cum his conflictari et pro salute patriae cotidie dimicare erat omnino illis, qui tum rem publicam gubernabant, molestum, sed habebat ea molestia quandam tamen dignitatem. hic vero, de quo ego ipse tam multa nunc dico, pro di immortales! quid est? quid valet? quid adfert, ut tanta civitas, si cadet, quod di omen obruant! a viro tamen confecta videatur? qui post patris mortem primam illam aetatulam suam ad scurrarum locupletium libidines detulit, quorum intemperantia expleta in domesticis est germanitatis stupris volutatus; deinde iam robustus provinciae se ac rei militari dedit atque ibi piratarum contumelias perpressus, etiam Cilicum libidines barbarorumque satiavit; post exercitu L. Luculli sollicitato per nefandum scelus fugit illum Romaeque recenti adventu suo cum propinquis suis decidit ne reos faceret, a Catilina pecuniam accepit ut turpissime praevanicaretur. inde cum Murena se in Galliam contulit, in qua provincia mortuorum testamenta conscripsit, pupillos necavit, nefarias cum multis scelerum pactiones societatesque conflavit; unde ut rediit, quaestum illum maxime fecundum uberemque campestem totum ad se ita redegit, ut homo popularis fraudaret improbissime populum, idemque vir clemens divisores omnium tribuum domi ipse suae crudelissima morte mactaret. exorta est illa rei publicae, sacris, religionibus, auctoritati vestrae, iudiciis publicis funesta quaestura: in qua idem iste deos hominesque, pudorem, pudicitiam, senatus auctoritatem, ius, fas, leges, iudicia violavit. atque hic ei gradus — o misera tempora stultasque nostras discordias! — P. Clodio gradus ad rem publicam hic primus est aditus ad popularem iactationem atque ascensus. nam Ti. Graccho invidia Numantini foederis, cui feriendo, quaestor C. Mancini consulis cum esset, interfuerat, et in eo foedere improbando senatus severitas dolori et timori fuit; eaque res illum fortem et clarum virum a gravitate patrum desiscere coëgit. C. autem Gracchum mors fraterna, pietas, dolor, magnitudo animi ad expetendas domestici sanguinis poenas excitavit. Saturninum, quod in annonae caritate quaestorem a sua frumentaria procurazione

senatus amovit eique rei M. Scaurum praefecit, scimus dolore factum esse popularem. Sulpicium ab optima causa profectum Gaioque Iulio consulatum contra leges petenti resistentem longius quam voluit popularis aura provexit. fuit in his omnibus, etsi non iusta — nulla enim potest cuiquam male de re publica merendi iusta esse causa —, gravis tamen et cum aliquo animi virilis dolore coniuncta: P. Clodius a crocota, a mitra, a muliebribus soleis purpureisque fasceolis, a strophio, a psalterio, a flagitio, a stupro est factus repente popularis. nisi cum mulieres exornatum ita deprehendissent, nisi ex eo loco, quo eum adire fas non fuerat, ancillarum beneficio emissus esset, populari homine populus Romanus, res publica cive tali careret. hanc ob amentiam in discordiis nostris, de quibus ipsis his prodigiis recentibus a dis immortalibus admonemur, adreptus est unus ex patriciis, cui tribuno pl. fieri non liceret. quod anno ante frater Metellus et concors etiam tum senatus, senatus principe Cn. Pompeio sententiam dicente, excluserat acerrimeque una voce ac mente restiterat, id post discidium optimatum, de quo ipso nunc monemur, ita perturbatum itaque permutatum est, ut, quod frater consul ne fieret obstiterat, quod adfinis et sodalis clarissimus vir, qui illum reum non laudarat, excluserat, id is consul efficeret in discordiis principum, qui illi unus inimicissimus esse debuerat, eo fecisse auctore se diceret, cuius auctoritatis neminem posset paenitere. iniecta fax est foeda ac luctuosa rei publicae: petita est auctoritas vestra, gravitas amplissimorum ordinum, consensus bonorum omnium, totus denique civitatis status. haec enim certe petebantur, cum in me cognitorem harum omnium rerum illa flamma illorum temporum coniciebatur. excepi et pro patria solus exarsi, sic tamen, ut vos isdem ignibus circumsaepi me primum ictum pro vobis et fumantem videretis. non sedabantur discordiae, sed etiam crescebat in eos odium, a quibus nos defendi putabamur. ecce isdem auctoribus, Pompeio principe, qui cupientem Italiam, flagitantis vos, populum Romanum desiderantem non auctoritate sua solum, sed etiam precibus ad meam salutem excitavit, restituti sumus. sit discordiarum finis

21  
44

45

22  
46

aliquando; a diuturnis dissensionibus conquiescamus: non sinit eadem ista labes: eas habet contiones, ea miscet ac turbat, ut modo se his, modo vendat illis, nec tamen ita, ut se quisquam, si ab isto laudatus sit, laudatiorem putet, sed ut eos, quos non amant, ab eodem gaudeant vituperari. atque ego hunc non miror — quid enim faciat aliud? —: illos homines sapientissimos gravissimosque miror, primum, quod quemquam clarum hominem atque optime de re publica meritum impurissimi voce hominis violari facile patiuntur, deinde si existimant perditum hominis profligatque maledictis posse, id quod minime conducit ipsis, cuiusquam gloriam dignitatemque violari, postremo quod non sentiunt id, quod tamen mihi iam suspicari videntur, illius furentis ac volaticos impetus in  
47 se ipsos posse converti. atque ex hac nimia non nullorum alienatione a quibusdam haerent ea tela in re publica, quae quam diu haerebant in uno me, graviter equidem, sed aliquanto levius ferebam. an iste nisi primo se dedisset eis, quorum animos a vestra auctoritate seunctos esse arbitrabatur, nisi eos in caelum suis laudibus praeclarus auctor extolleret, nisi exercitum C. Caesaris — in quo fallebat, sed eum nemo redarguebat —, nisi eum, inquam, exercitum signis infestis in curiam se immissurum minitaretur, nisi se Cn. Pompeio adiutore, M. Crasso auctore, quae faciebat facere clamaret, nisi consules causam coniunxisse secum, in quo uno non mentiebatur, confirmaret, tam crudelis mei, tam sceleratus rei publicae  
23  
48 vexator esse potuisset? idem postea quam respirare vos a metu caedis, emergere auctoritatem vestram e fluctibus illis servitutis, reviviscere memoriam ac desiderium mei vidit, vobis se coepit subito fallacissime venditare. tum leges Iulias contra auspicia latas et hic et in contionibus dicere, in quibus legibus inerat curiata illa lex, quae totum eius tribunatum continebat, quam caecus amentia non videbat: producebat fortissimum virum, M. Bibulum; quaerebat ex eo C. Caesare leges ferente de caelo semperne servasset? semper se ille servasse dicebat. augures interrogabat quae ita lata essent rectene lata essent? illi vitio lata esse dicebant. ferebant in oculis hominem quidam boni viri et de me optime meriti,

sed illius, ut ego arbitror, furoris ignari. longius processit: in ipsum Cn. Pompeium, auctorem, ut praedicare est solitus, consiliorum suorum, inveli coepit: inibat gratiam a non nullis. tum vero elatus *est* spe, posse se, <sup>49</sup> quoniam togatum domestici belli exstinctorem nefario scelere foedasset, illum etiam, illum externorum bellorum hostiumque victorem adfligere; tum est illa in templo Castoris scelerata et paene deletrix huius imperii sica deprehensa; tum ille, cui nulla hostium diutius urbs umquam fuit clausa, qui omnis angustias, omnis altitudines moenium obiectas semper vi ac virtute perfregit, obsesus est ipse domi, meque non nulla imperitorum vituperatione timiditatis meae consilio et facto suo liberavit. nam si Cn. Pompeio, viro uni omnium fortissimo, quicumque nati sunt, miserum magis fuit quam turpe, quam diu ille tribunus pl. fuit, lucem non aspicere, carere publico, minas eius perferre, cum in contionibus diceret velle se in Carinis aedificare alteram porticum quae Palatio responderet, certe mihi exire domo mea ad privatum dolorem fuit luctuosum, ad rationem rei publicae gloriosum. videtis igitur hominem per se ipsum iam <sup>24</sup> pridem adffictum ac iacentem perniciosis optimatum <sup>50</sup> discordiis excitari, cuius initia furoris dissensionibus eorum, qui tum a vobis seiuncti videbantur, sustentata sunt. reliqua iam praecipitantis tribunatus etiam post tribunatum obtrectatores eorum atque adversarii defenderunt, ne a re publica rei publicae pestis removeretur restiterunt, etiam ne causam diceret, etiam ne privatus esset. etiamne in sinu atque in deliciis quidam optimi viri viperam illam venenatam ac pestiferam habere potuerunt? quo tandem decepti munere? ‘volo’ inquiunt ‘esse qui in contione detrahat de Pompeio.’ detrahat ille vituperando? velim sic hoc vir summus atque optime de mea salute meritis accipiat, ut a me dicitur: dicam quidem certe quod sentio: mihi, me dius fidius, tum de illius amplissima dignitate detrahere, cum eum maximis laudibus efferebat, videbatur. utrum tandem C. Marius <sup>51</sup> splendidior cum eum C. Glaucia laudabat, an cum eundem iratus postea vituperabat? an ille demens et iam pridem ad poenam exitiumque praeceps foedior aut in-



quination in Cn. Pompeio accusando quam in universo  
 senatu vituperando fuit? quod quidem miror, cum alter-  
 rum gratum sit iratis, alterum esse tam bonis civibus  
 non acerbum. sed ne id viros optimos diutius delectet,  
 legant hanc eius contionem, de qua loquor: in qua Pom-  
 peium ornat an potius deformat? certe laudat et unum  
 esse in hac civitate dignum huius imperii gloria dicit et  
 significat se illi esse amicissimum et reconciliationem esse  
 52 gratiae factam. quod ego quamquam quid sit nescio, ta-  
 men hoc statuo, hunc, si amicus esset Pompeio, lauda-  
 turum illum non fuisse. quid enim, si illi inimicissimus  
 esset, amplius ad eius laudem minuendam facere potuisset?  
 videant ei, qui illum Pompeio inimicum esse gaudebant  
 ob eamque causam in tot tantisque sceleribus conivebant  
 et non numquam eius indomitos atque effrenatos furores  
 plausu etiam suo prosequerantur, quam se cito inverterit.  
 nunc enim iam laudat illum: in eos invehitur, quibus se  
 antea venditabat. quid existimatis eum, si reditus ei  
 gratiae patuerit, esse facturum, qui tam libenter in opi-  
 25 nionem gratiae inrepat? quas ego alias optimatum dis-  
 53 cordias a dis immortalibus definiri putem? nam hoc  
 quidem verbo neque P. Clodius neque quisquam de gre-  
 galibus eius aut de consiliariis designatur. habent Etrusci  
 libri nomina certa, quae in id genus civium cadere pos-  
 sint. DETERIORES, REPULSOS, quod iam audiētis, hos ap-  
 pellant, quorum et mentes et res sunt perditae longeque  
 a communi salute diiunctae. qua re cum di immortales  
 monent de optimatum discordia, de clarissimorum et  
 optime meritorum civium dissensione praedicunt: cum  
 principibus periculum caedemque portendunt, in tuto  
 conlocant Clodium, qui tantum abest a principibus quan-  
 54 tum a puris, quantum ab religiosis. vobis, o clarissimi  
 atque optimi cives, et vestrae saluti consulendum et pro-  
 spiciendum vident. caedes principum ostenditur; id, quod  
 interitum optimatum sequi necesse est, adiungitur; ne  
 in unius imperium res recidat, admonemur; ad quem  
 metum si deorum monitis non duceremur, tamen ipsi no-  
 stro sensu coniecturaque raperemur: neque enim ullus  
 alius discordiarum solet esse exitus inter claros et poten-  
 tis viros nisi aut universus interitus aut victoris domina-

tus aut regnum. dissensit cum Mario, clarissimo cive, consul nobilissimus et fortissimus, L. Sulla: horum uterque ita cecidit victus, ut victor idem regnaverit. cum Octavio conlega Cinna dissedit: utrique horum secunda fortuna regnum est largita, adversa mortem. idem iterum Sulla superavit: tum sine dubio habuit regalem potestatem, quamquam rem publicam recuperarat. inest hoc <sup>55</sup> tempore haud obscurum odium atque id insitum penitus et inustum animis hominum amplissimorum; dissident principes; captatur occasio. qui non tantum opibus valent, nescio quam fortunam tamen ac tempus expectant; qui sine controversia plus possunt, ei fortasse non nunquam consilia ac sententias inimicorum suorum extimescunt. tollatur haec e civitate discordia: iam omnes isti qui portenduntur metus exstinguentur; iam ista serpens, quae tum hic delitiscit, tum se emergit et fertur illuc, compressa atque inlisa morietur. monent enim ei- <sup>23</sup> dem, NE OCCULTIS CONSILIIS RES PUBLICA LAEDATUR. quae sunt occultiora quam eius, qui in contione ausus est dicere iustitium edici oportere, iuris dictionem intermittere, claudi aerarium, iudicia tolli? nisi forte existimatis hanc tantam conluvionem illi tantamque eversionem civitatis in mentem subito in rostris cogitanti venire potuisse. est quidem ille plenus vini, stupri, somni plenusque inconsideratissimae ac dementissimae temeritatis; verum tamen nocturnis vigiliis, etiam coitione hominum, iustitium illud concoctum atque meditatum est. mementote, patres conscripti, verbo illo nefario temptatas aures nostras et perniciosam viam audiendi consuetudine esse munitam.

Sequitur illud: NE DETERIORIBUS REPULSISQUE HONOS AU- <sup>56</sup> GEATUR. REPULSOS videamus; nam DETERIORES qui sint post docbo. sed tamen in eum cadere hoc verbum maxime, qui sit unus omnium mortalium sine ulla dubitatione deterrimus, concedendum est. qui sunt igitur REPULSI? non, ut opinor, ei, qui aliquando honorem vitio civitatis, non suo, non sunt adsecuti; nam id quidem multis saepe optimis civibus atque honestissimis viris accidit. repulsi sunt ei, quos ad omnia progredientis, quos munera contra leges gladiatoria parantis, quos apertissime largientis

non solum alieni, sed etiam sui, vicini, tribules, urbani, rustici reppulerunt. hi ne honore augeantur, monent. debet esse gratum quod praedicunt, sed tamen huic malo populus Romanus ipse nullo haruspicum admonitu sua  
57 sponte prospexit. deteriores cavete; quorum quidem est magna natio, sed tamen eorum omnium hic dux est atque princeps. etenim si unum hominem deterrimum poëta praestanti aliquis ingenio fictis vitiis conquisitis deformatum vellet inducere, nullum profecto dedecus reperire posset, quod in hoc non inesset, multaque in eo  
27 penitus defixa atque haerentia praeteriret. parentibus et dis immortalibus et patriae nos primum natura conciliat; eodem enim tempore et suscipimur in lucem et hoc caelesti spiritu augemur et certam in sedem civitatis ac libertatis ascribimur: iste parentum nomen, sacra, memoriam, gentem Fonteiano nomine obruit; deorum ignis, solia, mensas, abditos ac penetralis focos, occulta et maribus non invisa solum, sed etiam inaudita sacra inexprimiabili scelere pervertit idemque earum templum inflammavit dearum, quarum ope etiam aliis incendiis subvenitur.  
58 quid de patria loquar? qui primum cum civem vi, ferro, periculis urbe, omnibus patriae praesidiis depulit, quem vos patriae conservatorem esse saepissime iudicatis: deinde everso senatus, ut ego semper dixi, comite, duce, ut ille dicebat, senatum ipsum, principem salutis mentisque publicae, vi, caede incendiisque pervertit; sustulit duas leges, Aeliam et Fufiam, maxime rei publicae salutaris; censuram exstinxit; intercessionem removit; auspicia delevit; consules, sceleris sui socios, aerario, provinciis, exercitu armavit; reges qui erant vendidit, qui non erant appellavit; Cn. Pompeium ferro domum compulit; imperatorum monumenta evertit; inimicorum domus disturbavit; vestris monumentis suum nomen inscripsit. infinita sunt scelera, quae ab illo in patriam sunt edita. quid, quae in singulos civis, quos necavit, socios, quos diripuit, imperatores, quos prodidit, exercitus, quos temptavit? quid vero? ea quanta sunt, quae  
59 in ipsum se scelera, quae in suos edidit? quis minus umquam pepercit hostium castris quam ille omnibus corporis sui partibus? quae navis umquam in flumine pu-


blico tam volgata omnibus quam istius aetas fuit? quis umquam nepos tam libere est cum scortis quam hic cum sororibus volutatus? quam denique tam immanem Charybdim poëtae fingendo exprimere potuerunt, quae tantos exhaurire gurgites posset, quantas iste Byzantium Brogitarorumque praedas exsorbuit? aut tam eminentibus canibus Scyllam tamque ieiunis quam quibus istum videtis, Gelliis, Clodiis, Titiis rostra ipsa mandentem?


Qua re, id quod extremum est in haruspicum responso, provide, NE REI PUBLICAE STATUS COMMUTETUR. etenim vix haec, si undique fulciamus, iam labefacta, vix, inquam, nixa in omnium nostrum umeris cohaerebunt. fuit quondam ita firma haec civitas et valens, ut negligentiam senatus vel etiam iniurias civium ferre posset: iam non potest. aerarium nullum est: vectigalibus non fruuntur qui redemerunt; auctoritas principum cecidit; consensus ordinum est divolsus; iudicia perierunt; suffragia descripta tenentur a paucis; bonorum animus ad nutum nostri ordinis expeditus iam non erit; civem qui se pro patriae salute opponat invidiae frustra posthac requiretis. qua re hunc statum, qui nunc est, qualiscumque est, nulla alia re nisi concordia retinere possumus; nam ut meliore simus loco ne optandum quidem est illo impunito; deteriore autem statu ut simus, unus est inferior gradus aut interitus aut servitutis: quo ne trudemur, di immortales nos admonent, quoniam iam pridem humana consilia ceciderunt. atque ego hanc orationem, patres conscripti, tam tristem, tam gravem, non suscepissem, non quin hanc personam et has partis honoribus populi Romani, vestris plurimis ornamentis mihi tributis deberem et possem sustinere, sed tamen facile tacentibus ceteris reticuissem: sed haec oratio omnis fuit non auctoritatis meae, sed publicae religionis. mea fuerunt verba fortasse plura, sententiae quidem omnes haruspicum, ad quos aut referri nuntiata ostenta non convenit aut eorum responsis commoveri necesse est. quod si cetera magis pervolgata nos saepe et leviora moverunt, vox ipsa deorum immortalium non mentis omnium permovebit? nolite enim id putare accidere posse, quod in fabulis saepe videtis fieri, ut deus aliqui



delapsus e caelo coetus hominum adeat, versetur in terris, cum hominibus conloquatur. cogitate genus sonitus eius, quem Latinienses nuntiarunt, recordamini illud etiam, quod nondum est relatum; quod eodem fere tempore factus in agro Piceno Potentiae nuntiatur terrae motus horribilis cum quibusdam † multis metuendisq[ue] rebus: haec eadem profecto quae prospicimus impendentia per-  
63 timescetis. etenim haec deorum immortalium vox, haec paene oratio iudicanda est, cum ipse mundus cumq[ue] agri atq[ue] terrae motu quodam novo contremiscunt et inusitato aliquid sono incredibilique praedicunt. in quo constituendae nobis quidem sunt procurationes et obsecratio, quem ad modum monemur; sed faciles sunt preces apud eos, qui ultro nobis viam salutis ostendunt; nostrae nobis sunt inter nos irae discordiaeque placandae.

---











7756

Cicero, Marcus Tullius

Opera quae supersunt omnia; ed. by

Baiter and Kayser. Vol.4.

LL

C5684B

University of Toronto  
Library

DO NOT  
REMOVE  
THE  
CARD  
FROM  
THIS  
POCKET

Acme Library Card Pocket

Under Pat. "Ref. Index File"

Made by LIBRARY BUREAU

